

釋宗金書





禪宗全書

# 雜集部九

( 92 )

藍吉富 主編

北京圖書館出版社

圖書在版編目 (CIP) 數據

禪宗全書 / 藍吉富主編. — 北京: 北京圖書館出版社,  
2004.12

ISBN 7-5013-2602-9

I. 禪… II. 藍… III. 禪宗—文獻—匯編 IV. B946.5

中國版本圖書館 CIP 數據核字 (2004) 第 103681 號

責任編輯: 王冠 于浩

封面設計: 許冬麗

ISBN 7-5013-2602-9



9 787501 326020 >

本書原名為《禪宗全書》，藍吉富主編，經北京版權代理有限公司代理，授權北京圖書館出版社獨家出版發行。

書名 禪宗全書 (全 101 冊)

著者 藍吉富 主編

---

出版 北京圖書館出版社 (100034 北京市西城區文津街 7 號)

發行 010-66139745, 66175620, 66126153, 66174391 (傳真),  
66126156 (門市部)

E-Mail cbs@nlc.gov.cn (投稿) btsfxb@nlc.gov.cn (郵購)

Website www.nlcpress.com

印刷 河北三河燕郊古籍印裝廠

開本 880 × 1230 毫米 1/16

印張 4414

版次 2004 年 12 月第 1 版 2004 年 12 月第 1 次印刷

---

書號 ISBN 7-5013-2602-9/B · 108

定價 18000 圓

# 目次

宗鑑法林(上).....	一
凡例.....	三
原書目次.....	四
卷一：釋迦文佛.....	二〇
卷二：釋迦文佛.....	三五
諸經.....	四〇
卷三：諸經.....	四八
應化聖賢(文殊——利益).....	五九
卷四：舍利弗——寶誌公.....	六二
卷五：南嶽慧思——法華志言.....	七七
西天祖師(初祖迦葉——二十七祖般若多羅).....	八四
卷六：東土祖師(初祖達磨——六祖慧能).....	九一
卷七：旁出諸祖(牛頭法融——永嘉真覺).....	一〇四



卷八：河北智隍——住菴婆·····	一二一
卷九：南嶽懷讓——百丈懷海·····	一三八
卷十：百丈懷海——南泉普願·····	一五三
卷十一：南泉普願——歸宗智常·····	一六五
卷十二：鹽官齊安——西園曇藏·····	一七九
卷十三：東寺如會——華林善覺·····	一九二
卷十四：五臺隱峰——潭州隱山·····	二〇七
卷十五：西山亮座主——安和通·····	二二〇
卷十六：長慶大安——趙州從諗·····	二三五
卷十七：趙州從諗·····	二四六
卷十八：趙州從諗·····	二五七
卷十九：趙州從諗——白馬曇照·····	二六八
卷二十：終南師祖——湖南祇林·····	二八一
卷二十一：臨濟義玄·····	二九三
卷二十二：臨濟義玄·····	三〇四
卷二十三：睦州道明——相國裴休·····	三一五
卷二十四：大隨法真——金華俱胝·····	三二七
卷二十五：興化存獎·····	三三八

卷二十六：寶壽延沼——尙書陳操·····	三四八
卷二十七：南院慧顯——際上座·····	三六〇
卷二十八：風穴延沼——長沙靈泉·····	三七〇
卷二十九：汾州善昭——石霜楚圓·····	三八一
卷三十：瑯琊慧覺——楊岐方會·····	三九四
卷三十一：黃龍慧南——比部孫居士·····	四〇七
卷三十二：晦堂祖心——東山法演·····	四一七
卷三十三：東山法演——智海仁仙·····	四二七
卷三十四：昭覺克勤——焦山師體·····	四三七
卷三十五：天童咸傑——伏龍元長·····	四五一
卷三十六：萬峯時蔚——興善廣慧·····	四六四
卷三十七：天童圓悟——寶華通忍·····	四七五
卷三十八：龍池通微——永正悟元·····	四八四
卷三十九：瀉山靈祐·····	四九三
卷四十：仰山慧寂——香巖智閒·····	五〇八
卷四十一：徑山洪謹——芭蕉圓·····	五二一
卷四十二：天□道悟——德山宣鑒·····	五三二
卷四十三：巖頭全衲——雪峰義存·····	五四三

# 宗鑑法林(上)







凡例

一是書之會集也始於壬辰春在塞北之法林寺其鐫版訖工也於甲午夏在京師柏林之宗鑑堂今題曰宗鑑法林識地也

一集書者皆以南嶽青原對出未免舛錯今依統要南嶽歸南嶽青原歸青原支派既已清晰覽者自無諸譌

一天皇天王之誤兩家聚訟不休終爲千古疑案欲爲分割誠難置喙況已墜之宗何必深論今將二字放一黑圈以俟後之作者

一事必遵古洞下五代之譌昉於近世從前皆不言及故亦未之聞今何敢妄加筆削謹遵會元等書庶免前賢之呵叱以取罪愆

一南嶽下自馬祖一始至五峰學林臯豫止青原下自石頭遷始至指南徹雪關闔止以後語錄繁多誠有未備

一公案自宋元以來流傳者一千七百則人所共知每言及必舉是數更不知此外別有妙悟埋沒昔

賢之精神良可太息因增入共二千五百六十四則

一聯珠惟頌統要惟拈分爲兩岐未免各存意見覽者亦有顧此失彼之歎今皆合集庶幾一目了然洞若觀火

一諸方語錄拈頌頗多亦有未經流通者今廣加蒐羅雖殘篇斷簡必再三詳訂錄入集中以公天下後世

一公案中有疑似者不敢輒加臆斷貽笑諸方卽如油齋公案一云鵝湖一云南泉未知孰是今皆收入古德餘做此

一公案原以淘汰見識或反以見識去穿鑿公案雖一時英雄欺人恐過去古人流涕今凡係穿鑿腐靡者槩不收入

一拈頌隨到隨收不能悉依輩行

一是書初刻於京都公案二千五百有零二刻於理安復增入一百五十餘則共成二千七百二十則至於公案考訂卷帙編次不無大同小異之殊

一是書之成僅閱二年深山邃谷者德尊宿語錄不傳世者缺遺必多敬俟後賢補入

宗鑑法林目錄

卷一皇

世尊

釋迦文佛二十八則

卷二皇

釋迦文佛九則

諸經

經首一則

圓覺十則

卷三皇

法華十四則

維摩八則

華嚴七則

涅槃二則

楞嚴二十一則

文殊般若一則

金剛十二則

楞伽二則

心經一則

應化聖賢

文殊三則

無邊身一則

卷四皇

舍利弗三則

賓頭盧一則

那吒一則

城東老嫗一則

廣額屠兒一則

勝思惟梵天一則

入定僧一則

忻州翁一則

寶誌公三則

卷五皇

南嶽慧思一則

明州布袋三則

波羅提一則

豐干一則

無著一則

利益一則

須菩提二則

殃崛摩羅二則

七賢女一則

善財五則

天親大士一則

障蔽魔王一則

雙林善慧七則

臺山翁六則附無著喜

萬年杜順一則

秦跋陀一則

梵志一則

寒山子六則

拾得一則

智者一則

法華志言五則

西天祖師

初祖迦葉二則

二祖阿難一則

三祖商那和脩一則

四祖優波鞠多一則

五祖提多迦一則

七祖婆須密一則

九祖伏駄密多一則

十祖脇尊者一則

十一祖富那夜奢一則

十二祖馬鳴一則

十四祖龍樹一則

十七祖僧伽難提一則

二十三祖鶴勒那一則

二十四祖師子二則

二十五祖婆舍斯多一則

二十七祖般若多羅三則

卷六圖

東土祖師

初祖達磨九則

二祖慧可一則

三祖僧璨五則

四祖道信三則

五祖弘忍二則

六祖慧能七則

卷七圖

旁出諸祖

四祖牛頭法融一則

天柱慧崇二則

五祖蒙山道明一則

安國嵩嶽破竈二則

嵩山終南惟政一則

永嘉真覺五則

卷八章

河北智隍一則

南陽耽源應真五則

未詳法嗣

公期和尙一則

雲幽重憚一則

唐朝因一則

僧肇七則

聖壽一則

尊宿一則

牛頭威嗣安國玄挺一則

鶴林玄素一則

國一鳥窠道林二則

嵩山慧安一則

破竈嵩山峻極一則

六祖南陽慧忠二十二則

荷澤神會二則

禪月贊休一則

先淨照一則

樓子一則

圓通一則

古德十九則

座主一則

入冥僧一則

老宿一則

雲蓋僧一則

高麗聖像一則

上經僧一則

藏主一則

老宿一則

六通院僧一則

住菴僧一則

守衣盂侍者一則

行者一則

塔頭侍者一則

道流一則

感山主一則

點燈僧一則

老聃二則

宋太宗八則

明高帝一則

錢塘鎮使一則

韓居士一則

官人一則

長者一則

施主一則

官人一則

跨驢人一則

賣餅婆一則

燒菴婆一則

住菴婆一則

卷九 羣

大鑒下一世

六祖南嶽懷讓四則

大鑒下二世

南岳馬祖道一四則

大鑒下三世

馬祖百丈懷海三則

卷十 羣

百丈懷海八則

卷十一 羣

南泉普願二十七則

卷十二 固

鹽官齊安六則

五洩靈默一則

麻谷寶徹六則

西園曇藏一則

卷十三 固

東寺如會四則

大珠慧海三則

章敬懷惲二則

杉山智堅三則

石鞏慧藏四則

南泉普願十一則

歸宗智常十一則

大梅法常五則

盤山寶積九則

西堂智藏四則

南源道明二則

百丈惟政三則

泐潭法會一則

筠州道遙一則

中邑洪恩二則



渤潭常興一則

大達無業二則

鵝湖大義三則

佛光如滿一則

蒙溪一則

京兆惟寬二則

京兆艸堂一則

三角總印三則

利山一則

魯祖寶雲三則

茗溪道行一則

紫玉道通二則

華林善覺一則

卷十四面

五臺隱峰四則

馬頭神藏一則

衢州烏臼二則

石臼二則

古寺一則

本溪二則

韶州乳源二則

齊峰二則

洪州水潦三則

楊岐甄叔一則

芙蓉太毓二則

浮梧一則

鎮州金牛二則

崧山二則

則川三則

忻州打地一則

石林一則

潭州秀溪一則

江西柳樹三則

百靈一則

潭州隱山一則

卷十五面

西山亮座主一則

襄州龐蘊十六則

龍婆一則

大鑒下四世

百丈黃檗希運十四則

大慈寰中四則

平田普崖二則

安和通一則

卷十六帝

長慶大安二則

百丈涅槃一則

南泉顯嗣趙州從諗二十帝

卷十七帝

趙州從諗二十八則

卷十八帝

趙州從諗三十一則

卷十九帝

趙州從諗十八則

長沙景岑十五則

子湖利踪三則

鄂州茱萸四則

白馬臺照一則

卷二十帝

終南師祖一則

日子一則

甘贊行者五則

五臺智通一則

麻谷  
徽嗣壽州良遂一則

章敬  
惲嗣金州長一則

永泰  
湍嗣五臺秘魔一則

湖南祇林一則

卷二十一

大鑒下五世

黃檗  
運嗣臨濟義玄十七則

卷二十二

臨濟義玄二十八則

卷二十三

睦州道明三十一則

相國裴休二則

卷二十四

香嚴義端一則

刺史陸亘七則

歸宗  
常嗣芙蓉靈訓二則

靈山  
積嗣鎮州普化六則

西堂  
藏嗣虔州處微一則

河中公綏一則

上林戒靈一則

長慶  
安嗣大隨真六則

靈雲志勤七則

新興嚴陽一則

杭州多福一則

日容遠一則

大愚  
嗣末山尼了然一則

天龍  
嗣金華俱胝二則

卷二十五

大鑒下六世

臨濟  
玄嗣興化存獎十四則

卷二十六

寶壽延沼八則

魏府大覺二則

定州善崔一則

襄州聖師一則

虎溪一則

桐峰一則

雲山一則

靈樹如敏三則

趙州  
諡嗣光孝慧覺一則

婺州新建一則

子湖  
蹤嗣漳州浮石一則

茱萸  
嗣梯山石梯一則

關南  
常嗣關南道吾三則

三聖慧然五則

灌溪志閒四則

幽州譚空一則

鎮州萬壽一則

覆盆一則

滄州米倉一則

定上座一則

歲上座二期

卷二十七退

大鑒下七世

興化南院慧顯七則

寶壽二世二則

鎮州大悲一則

池州山教一則

卷二十八退

大鑒下八世

南院風穴延沼十七則

西院興陽歸靜一則

大鑒下九世

風穴首山省念十則

長沙靈泉一則

卷二十九退

大鑒下十世

汾州善昭七則

神鼎洪譔一則

見陸州明  
尚書陳操四則

守廓侍者三則

西院思聰三則

大覺  
激心旻德一則

克符  
際上座一則

鐵湖安一則

廣慧真一則

葉縣歸省五則

石門繚聰七則

廣慧元璉二則

大鑒下十一世

汾陽昭嗣  
石霜楚圓十九則

卷三十退

瑯琊慧覺七則

法華全舉四則

天聖皓泰二則

石門聰嗣  
金山曇穎二則

見廣  
慧璉內翰楊億三則

大鑒下十二世

慈明圓嗣  
楊岐方會十二則

卷三十一昌

黃龍慧南九則

道吾悟真一則

興教坦一則

龍華岳嗣  
西余淨端一則

大鑒下十三世

楊岐會嗣  
白雲守端十三則

三交智嵩四則

大愚守芝六則

芭蕉谷泉二則

葉縣省嗣  
浮山法遠四則

都尉李遵勗一則

翠巖可真二則

瑯琊覺嗣  
姜山方一則

大愚芝嗣  
雲峰文悅三則

保寧仁勇七則

茶陵郁山主一則

北部孫居士一則

卷三十二昌

黃龍南嗣晦堂祖心四則

眞淨克文九則

泐潭洪英一則

龍慶慶閑二則

玄沙明慧一則

積翠永菴主一則

淨因臻嗣長慶文慧一則

大鑒下十四世

白雲端嗣東山法演十五則

卷三十三昌

東山法演二十三則

提刑郭正祥二則

晦堂心嗣死心悟新四則

夾山曉純一則

眞淨文嗣兜率從悅四則

法雲果二則

九峯希廣一則

東林總嗣慧力可昌二則

開先行瑛一則

學士蘇軾一則

大潯詰嗣泐潭景祥一則

智海仁遷一則

卷三十四昌

大鑒下十五世

東山演嗣昭覺克勤七則

太平慧懃二則

龍門清遠四則

元體首座一則

見瑯琊起俞道婆二則

泐潭清嗣雪峯慧空一則

大鑒下十六世

圓悟勤嗣虎丘紹隆三則

瞎堂慧遠三則

育王端裕一則

中竺中仁一則

龍門遠嗣道場明辨一則

見大隨靜見大隨靜尚書莫將一則

大鑒下十七世

虎丘窪嗣天童曇華六則

東林道顏一則

此卷元嗣國清行機一則

卷三十五昌

大鑒下十八世

應龍華嗣童咸傑三則

九頂清素二則

法閣上座一則

黃龍清嗣上封本才一則

泐潭乾嗣圓通道旻一則

大慧宗杲十三則

華藏安民一則

護國景元一則

太平勤嗣何山守珣二則

開福寧嗣大潯善果一則

見圓通見圓通樞密吳居厚一則

徑山杲嗣育王德光三則

佛智裕嗣淨慈師一一則

焦山師體一則

無庵全嗣華藏有權一則

全嗣華藏有權一則



記菴淨慈彥充一則

大鑒下十九世

密菴臥龍祖先二則

天童徑山如珙一則

大鑒下二十世

鳳龍徑山師範一則

徑山徑山行端一則

大鑒下二十一世

無準仰山祖欽四則

天目育王如洪二則

掩室石溪心月一則

大鑒下二十二世

仰山天目原妙十則

大鑒下二十三世

高峰妙嗣中峯明本一則

瑞岩華頂先觀一則

大鑒下二十四世

中峰伏龍元長七則

靈隱崇嶽六則

松源天童文禮一則

徑山中天竺有一則

淨慈妙倫二則

運菴虛堂智愚一則

岩叟天寧梵琦三則

天目繼嚴一則

三二十六佛

大鑒下二十五世

千岩萬峯時蔚二則

大鑒下二十六世

萬峰鄧尉普持一則

大鑒下二十七世

寶嶺東明慧昌一則

大鑒下二十八世

東明翼善永慈一則

大鑒下二十九世

海舟寶峯智瑄二則

大鑒下三十世

寶峰天奇本瑞三則

大鑒下三十一世

天奇龍泉正聰三則

大鑒下三十二世

龍泉笑巖德寶七則

大鑒下三十三世

吉菴天寧道濟一則

敬異徑山性沖三則

笑岩龍池正傳六則

徑山興善廣慧三則

卷三十七 佛

大鑒下三十四世

龍池天童圓悟十二則

徑山圓信三則

磐山圓修十八則  
淨名大蓮一則

與善普明妙用二則

大鑒下三十五世

天童大瀉如學三則

雙桂海明四則

金粟通乘一則

卷三十八 佛

龍池通微三則

雪竇通雲二則

報恩通賢四則

徑山竹林本豫三則

理安通問九則

陽山通授二則

金明悟進一則

三峯法藏三則

徑山通容五則

寶華通忍三則

平陽道忞七則

鶴林通門三則

天童通奇三則

天目通琇六則

緣羅通際四則

普明紫雲悟鈞一則

永正悟元一則

卷三十九 佛

大鑒下四世

百丈海潮山靈祐四十四則

卷四十 佛

大鑒下五世

渴山仰山慧寂二十九則

香嚴智閒七則

卷四十一 日

徑山洪謹二則

延慶法端一則

九峯慈慧一則

三角法遇一則

常侍王敬初三則

大鑒下六世

仰山西塔光穆一則

南塔光涌五則

徑山洪州米嶺一則

大鑒下七世

西塔資福如寶四則

定山神英二則

京兆米和尚四則

元康一則

雙峯一則

霍山景通三則

無著文喜一則

先雙峰雙峯古一則

南塔芭蕉慧清五則

大鑒下八世

資福資福貞邃二則

芭蕉圖一則

卷四十二日

大鑒下三世

嗣法天□道悟二則  
存疑

大鑒下四世

天□龍潭崇信三則  
悟嗣

大鑒下五世

龍潭德山宣鑒十四則  
信嗣

卷四十三日

大鑒下六世

德山巖頭全蘊十六則  
鑑嗣

卷四十四日

雪峰義存三十一則

卷四十五日

雪峰義存九則

大鑒下七世

高本簡二則

芭蕉芭蕉繼微一則  
請嗣

岩頭瑞巖師彥四則  
藏嗣

香溪從範一則

雪峰長慶慧稜十四則  
存嗣

卷四十六增

保福從展十三則

鼓山神晏四則

長生皎然二則

卷四十七增

安國弘瑱一則

太厚字上座六則

大鑒下八世

玄泉黃龍誨機三則  
彥嗣

長慶招慶道匡二則  
稜嗣

報恩寶資一則

保福報慈文欽一則  
展嗣

建山澄一則

睡龍保福清豁一則  
湧嗣

白馬行霸一則

羅山道閒七則

聖壽巖一則

鏡清道忞十七則

翠巖令參二則

鵝湖智字一則

洞巖可休一則

羅山明招德謙十則  
開嗣

報慈光雲一則

太傅王延彬三則

招慶省澄一則

鼓山鼓山了宗一則  
晏嗣

白兆大龍智洪一則  
圓嗣

大鑒下九世

黃龍黃龍繼達一則

嘉州黑水一則

卷四十八增

大鑒下七世

雪峰雲門文偃二十八則

卷四十九增

雲門文偃三十六則

卷五十增

雲門文偃二十六則

大鑒下八世

雲門白雲子祥一則

巴陵顯鑒四則

香林激遠六則

卷五十一增

洞山守初八則

般若啓柔一則

北禪悟通一則

東樹二世三則

德山圓明四則

雙泉師寬一則

奉先深二則

雙峰竟欽二則

黃龍贊一則

薦福承古一則

大鑒下九世

白雲連州寶華一則

南臺勤一則

雙泉五祖師戒四則

奉先天台祥菴主一則

大鑒下十世

文殊洞山曉聰五則

卷五十二增

雪竇重顯十二則

福嚴北禪智賢二則

大鑒下十一世

洞山雲居曉舜二則

刺史許式一則

渤海育王懷璉一則

北禪法昌倚遇四則

大鑒下十二世

雲居蔣山法泉一則

德山文殊應真二則

密陵靈澈散聖二則

香林智門光祚四則

雙泉德山慧遠一則

智門雪竇重顯十三則

雲蓋繼鵬一則

德山開先善暹一則

佛日契嵩一則

北塔玉泉承皓六則

雪竇天衣義懷九則

開先佛印了元一則

育王佛日戒弼一則

天衣  
懷嗣慧林宗本一則

圓通法秀二則

大鑒下十二世

慧林  
本嗣長蘆崇信二則

大鑒下十四世

瑞岩  
鴻嗣育王曇振一則

長蘆  
信嗣東林慈受二則

大鑒下十五世

智者法詮一則

慈受  
深嗣靈隱慧光一則

大鑒下十六世

靈隱  
光嗣中竺元妙一則

大鑒下十七世

中竺  
有嗣光孝已菴二則

卷五十三

大鑒下七世

雪峰  
存嗣玄沙師備三十三則

大鑒下八世

玄沙  
備嗣地藏桂琛八則

大章契如一則

卷五十四

安國慧球二則

大鑒下九世

羅漢  
琛嗣清涼文益二十則

龍濟紹脩八則

大鑒下十世

法眼  
益嗣天台德韶五則

報恩玄則二則

永明道潛二則

清溪  
進嗣天平從漪一則

大鑒下十一世

天台  
詔嗣永明延壽三則

瑞鹿遇安一則

嚴峯師木一則

法鏡  
欽嗣雲居道齊二則

大鑒下十二世

雲居  
齊嗣瑞巖義海一則

大鑒下十三世

瑞巖  
海嗣翠巖嗣元一則

卷五十五

清溪洪進一則

白龍  
希嗣東禪玄亮一則

清涼法鑑三則

報恩慧明一則

靈隱清聳一則

五雲志逢一則

龍華慧居一則

九曲慶祥一則

大鑒下一世

六祖 青原行思七則

大鑒下二世

青原 石頭希遷六則

大鑒下三世

石頭 藥山惟儼十二則

卷五十六法

藥山惟儼十則

潭州大川一則

卷五十七法

長髭曠四則

汾州石樓二則

大鑒下四世

藥山 雲巖曇晟十則

卷五十八法

船子德誠四則

百顏明哲一則

丹霞 然嗣 翠微無學二則

丹霞天然八則

大顓寶通四則

法門佛陀一則

大同普濟六則

道吾宗智十四則

柳樹慧省一則

高沙彌四則

孝義性空二則

大川 長沙僊天五則

馬頰本空二則

文公韓愈一則

卷五十九法

大鑒下五世

雲巖 洞山良价二十七則

卷六十輪

洞山良价十三則

幽溪二則

漸源仲興四則

船子 夾山善會六則

卷六十一輪

夾山善會十五則

投子大同二十四則

白雲約一則

卷六十二輪

大鑒下六世

洞山 雲居道膺十七則

大顓 三平義忠三則

本生一則

長髭 石室善道二則

神山僧密四則

道吾 智嗣 石霜慶諸十一則

深清一則

翠微 學嗣 清平令遵三則

道場如訥一則

曹山本寂二十九則

卷六十三輪

疎山匡仁十則

龍牙居遁十則

欽山文邃九則

卷六十四常

白水本仁二則

九峰普滿四則

幽棲道幽一則

洞山道全一則

石霜諸嗣大光居誨一則

涌泉景欣三則

卷六十五常

雲蓋志元一則

覆船洪薦三則

鳳翔石柱一則

夾山會嗣洛浦元安十六則

韶山寶普六則

鄆州四禪一則

青林師虔三則

越州乾峯四則

天童咸啓二則

華嚴休靜二則

北院通二則

京兆蜆子一則

九峯道虔十二則

南濟僧一一則

雲門海晏一則

秀士張燭一則

幡龍可文一則

上藍令超二則

太原海湖一則

天蓋山幽一則

投子同嗣投子感溫二則

卷六十六常

大鑒下七世

雲居膺嗣同安丕五則

嵇山章一則

朱溪謙二則

新羅雲住一則

曹山慧霞三則

育王弘通一則

卷六十七常

疎山仁嗣護國守微五則

青林慶嗣廣德義一則

龍牙通嗣報慈藏嶼二則

大光海嗣谷山有緣一則

九峰茂嗣禾山無殷二則

谷山藏嗣新羅瑞巖一則

新羅大嶺一則

清平選嗣三角令珪一則

牛頭微一則

歸宗懷惲一則

佛日本空一則

雲居道簡三則

曹山寂嗣金峯從志十四則

荷玉光慧一則

蜀州西禪一則

黃檗慧一則

石門獻蘊一則

含珠審哲一則

白雲善藏一則

同安常察八則

新羅聯珠一則

洛浦安嗣青峯傳楚一則



永安善靜一則

黃山鄧州桐泉一則

大鑒下八世

同安同安志二則

靈泉仁嗣太陽慧堅一則

石門蘊嗣石門慧徹四則

卷六十八常

大鑒下九世

同安志嗣梁山緣觀八則

廣德延嗣廣德周三則

大鑒下十世

梁山觀嗣太陽警玄四則

大鑒下十一世

太陽玄嗣投子義青四則

福嚴審承一則

大鑒下十二世

投子青嗣芙蓉道楷十二則

卷六十九轉

蟠龍文嗣木平善道二則

韶山普嗣潭州文殊一則

護國激嗣薦福思一則

廣德義嗣廣德延二則

青峰楚嗣淨衆歸信一則

護國遠嗣雲頂德敷一則

興陽清剖二則

大鑒下十三世

芙蓉楷嗣丹霞子淳五則

闡提惟照二則

大鑒下十四世

丹霞淳嗣長蘆清了四則

大鑒下十五世

長蘆了嗣天童宗珏二則

大鑒下十六世

天童珏嗣雪竇智鑑二則

大鑒下十七世

雪竇鑑嗣天童如淨五則

大鑒下十八世

天童淨嗣襄州覺四則

大鑒下十九世

鹿門覺嗣青州希辨八則

大鑒下二十世

普照辨嗣大明寶二則

大鑒下二十一世

淨因法成二則  
淨因自覺一則

天童正覺三則

天衣聰嗣吉祥元實一則

直翁舉嗣雲外岫二則

大明 玉山覺體三則

大鑒下二十二世

玉山 體嗣 大明善滿二則

卷七十轉

大鑒下二十三世

雪巖 滿嗣 萬松行秀九則

大鑒下二十四世

報恩 秀嗣 雪庭福裕四則

大鑒下二十五世

雪庭 裕嗣 靈隱文泰二則

大鑒下二十六世

少室 泰嗣 寶應福遇一則

大鑒下二十七世

寶應 遇嗣 香嚴文才四則

大鑒下二十八世

淳拙 才嗣 松庭子嚴一則

大鑒下二十九世

松庭 嚴嗣 少室了收二則

大鑒下三十世

凝然 改嗣 少室契斌三則

大鑒下三十一世

俱空 斌嗣 無方可從一則

大鑒下三十二世

定國 從嗣 月舟文載二則

大鑒下三十三世

月舟 載嗣 小山宗書一則

大鑒下三十四世

宗鏡 書嗣 幻休常潤一則

大鑒下三十五世

少室 潤嗣 大覺方念一則

大鑒下三十六世

大覺 念嗣 顯聖圓激十八則

卷七十一轉

壽昌 經嗣 博山元來三則

鼓山元賢一則

大鑒下三十七世

東山常忠一則

東山 忠嗣 壽昌慧經三則

東苑元鏡二則

雲門激嗣指南明徹一則

佛日明方六則

東山明復二則

弁山明雪十一則

檀度道密三則

獨峯道嚴一則

博山道奉一則

東苑鏡嗣天界道盛四則

卷七十二轉

尊宿嗣法未詳

東山雲頂三則

普照道悟一則

四川大癩一則

紫柏真可一則

儀峰方彖二則

愁山德清二則

破山法乘一則

潭柘福源一則

麥浪明懷一則

愚菴明孟三則

香雪明有一則

博山來嗣雪關智闇一則

長慶道獨一則

回龍道舟二則

治父道雄一則

鼓山異嗣開元道霈一則

高郵定一則

省菴思一則

雲棲株宏五則

無念深有二則

養菴心二則

眞寂廣印二則

徧融眞圓一則

寶頂元亮一則

雲居觀衡四則

元白通可二則

僧摩馬一騰一則

黃巖覺眞二則

翠巖通詰三則

惟一普潤二則

賣鹽翁一則

宗鑑法林目錄

宗鑑法林卷一

釋迦文佛

集雲堂編

世尊初降生時一手指天一手指地周行七步目  
顧四方曰天上天下惟吾獨尊

雲門偃云我當時若見一棒打殺與狗子喫貴圖天  
下太平雪竇顯云便與掀倒禪床 法眼益云雲門  
氣勢甚大要且無佛法道理時有老宿云將謂無人  
證明雪竇云鈞在不疑之地 瑯琊覺云雲門可謂  
將此深心奉塵刹是則名爲報佛恩 雲峰悅云雲  
門雖有定亂之謀且無出身之路 法昌遇云雲門

好一棒太遲生未離兜率脚跟下好與一錐雖然也是賊過後張弓 天童華云雲門此話雖行未免落他陷穽 高峰妙云世尊大似靈龜拽尾自取喪身之兆雲門雖則全提正令也是爲他閒事長無明當時但於地上畫一圓相就中書個丁字復展兩手示之管取冰消瓦解 南堂欲云雲門好棒可殺驚人未免傷鋒犯手當時若見祇消道箇澹澹澹老漢若也知方管取暗裏抽身免見明中落節 天童悟云我不似雲門大驚小怪當時但向前以手加額云貓看他面皮向甚處著 棲霞成云當時若見怎麼道但向前合掌云大王萬福

指天指地語琅琅送語傳言出畫堂使者尙能多意氣主人應是不尋常泉大道

開基剋業前王事端拱持盈後帝心劍戟盡爲農器用此時誰報太平音佛印元

美如西子離金闕嬌似楊妃下玉樓猶把琵琶半遮面不令人見轉風流佛鑑勸

一火鑄成金彈子團圓都不費鉗鎚拈來萬仞峰頭

放打落天邊白鳳兒慈愛深

千年石虎產麒麟一角通身五彩明金鎖玉關渾掣斷毗盧界內鼓烟塵雪竇宗

老漢纔生便著忙周行七步似顛狂賺他無限癡男

女開眼堂堂入鑊湯徑山杲

從來家富產嬌兒纔出胞胎便亂揮到得伎窮雙樹

下始知四十九年非懶菴樞

無憂樹下浴嬰孩清曉薔薇帶露開轉過衲僧相見

處後糟驢馬出胞胎天童淨

未曾撞入摩耶腹兩手知他甚處安右脇出來魔境

現祇堪惆悵不堪看天目禮

七步周行猶彷彿指天指地不分明是非既落旁人

耳洗到驢年也未清虛堂愚

生來自恨錯同條鐵鑄心肝也合消還你獨尊三界

內奈何今日又明朝覺菴具

毗嵐毒種毒花開添得雲門醉後杯今日柯橋風色

惡澹烟疎雨洗黃梅岳翁淳

摩耶今日產嬰孩剛道天宮降下來不是鷄窠生鳳

卵分明象子出驢胎千岩長

忽聽矯音上御樓玉釵敲斷意悠悠雖然不作禪教  
客也有偷心暗點頭石淚如

躍治之金自不祥干將鑄就赤眉殃乾坤撥亂稱元  
首竊國紛紛有憲章觀濤奇

月上山城征馬急雨過新水菱荷香自此洞庭秋正  
好烟波聲裏鬪漁郎邱溪森

自言自語自徘徊自動芳心自作媒不是自家親骨  
肉誰將炭送雪中來寒松操

大義未成先自立咸陽三月火通紅到底不忘亡國  
象有何面目見江東綠雨蕉

自掘深坑自活埋腥風匝地露屍骸人間天上稱尊  
大當甚難根破草義法林香

世尊臘月八日明星出時忽然大悟乃曰奇哉一  
切衆生具有如來智慧德相但以妄想執著不能  
證得

博山來云根本無明即是不動智不動智即是根本  
無明者裏別具一隻眼老瞿曇冰消瓦解 天章玉

云大小釋迦話作兩橛當時有人下者一語免致後  
代兒孫起模畫樣然雖如是也不得屈我釋迦喝一  
喝 藥地智云雪山坐久成勞空花亂墜一瓢惡水  
祇合自澆何故爲他六年奇句不及下地先聲 道  
林慮云開得一隻眼失却一張口

瞿曇失却眼睛時雪裏梅花祇一枝而今到處生荊  
棘却笑春風惱亂吹晦堂心

天蓋地載成團作塊周法界而無邊析鄰虛而無內  
及盡立微誰分向背佛祖來償口業債問取南泉王  
老師人人祇喫一莖菜宏智覺

入山去何所圖出山來胡爲乎早知今日事悔不慣  
當初無準範

舉頭見星忽悟道黃泥山上生茅草李婆自做老裁  
衣不剪乾紅剪香早栢堂益

金鐘夜擊九重城六載歸來改瘦形待得衆生心眼  
活雪山依舊碧峻嶒盧堂愚

六年雪嶺道方成打失從前鬼眼睛滿面慚惶無著  
處至今生怕見明星荆叟珏

二千年前臘月八黃面瞿曇雙眼活潑僧祇劫喫鹽  
多苦行六年添得渴月江印

六載隈藏在雪山灰頭土面自慚顏今朝忽覩明星  
現始覺從前被眼瞞鐵山仁

家在深山別覓山眼開何處著慚顏殷勤爲惜王孫  
醉月滿荷衣霜滿鬢玉林秀

今朝正是臘月八釋迦老子眼睛瞎白日青天被鬼  
迷夜對明星將眼刮朝宗忍

日日擡眸便覩星如何特地話重新而今要問靈山  
老兩道眉毛賸幾莖六吉謙

六年苦行進山來夜半明星笑破腮果是髑髏乾得  
盡因何惹出者場災法林音

世尊陞座文殊白椎曰諦觀法王法法王法如是  
世尊便下座

芭蕉徹云忙忙者匝地普天 獅林則云衆中道世  
尊入林不動草文殊入水不動波自然海晏河清乃  
搖手呵呵大笑云錯了也且道是何道理掀翻海岳  
求知已撥轉乾坤致太平 天童悟云文殊大似認

影迷頭世尊也是脚跟不著地 雲門信云當時奪

却文殊椎子喝一喝看那黃面老子作何去就 博

山來云世尊拉抹金鍼文殊橫抽玉線彌縫海嶽要

是其人且道未陞座前法王法在甚麼處 報恩賢

云世尊雖是頭正尾正殊不知却被文殊使令 孤

秀曜云世尊向電光影裏穿鍼文殊從猛虎舌上書

字直饒縱奪齊行已是落三落四還有爲二老作主

者麼笙歌宛轉隨雲散杜宇空傳別苑聲

百萬靈山似葦蕪風行雲集已周遮當時不是文殊

老往往瞿曇更撒沙佛印元

月在波心徹底寒澄潭應不許龍蟠五湖多少未歸

客却被旁人把釣竿上方盆

一輪明月映天心四海生靈荷照臨何必西風撼丹

桂碧霄重送九秋音佛鑑勸

一段眞風見也麼綿綿化母理機梭織成古錦含春

象無奈東君漏泄何天童覺

綸綵封章出御樓克謀借箸有留侯不因鑄印復銷

印六國烽烟正未休蔗菴範

南國佳人畫裏看霜毫初點曉妝殘莫勞脂粉施顏色  
窗外梅花拂影寒似亭挺

幽谷瓊枝帶露開春含紅紫錦成堆誰知遇陣催花  
雨褪落飛英滿翠苔松操

世尊因五通仙人問如來六通我五通如何是那  
一通世尊召仙人仙人應諾世尊曰那一通你問  
我

明覺顯云老胡元不知有那一通却因邪打正 瑯  
琊覺云世尊不知可謂因正而打邪五通不知實乃  
因邪而打正 翠巖芝云五通如是問世尊如是答  
要且不會那一通 雲峰悅云大小瞿曇被外道勘  
破了有旁不肯底出來雲峰要問作麼生是那一通  
古南門云呼蛇易遣蛇難世尊被仙人一拶轉身  
無路將錯就錯何不纔問便擗仙人當下知歸和前  
五通一時放下豈不灑灑地做個平地神仙 崇先  
奇云老胡也知有那一通祇是口門窄 平田本云  
世尊被仙人輕輕一靠直得喚鐘作甕 浪山嶼云  
世尊就窠打劫順水推船若論那一通端的未會在

汝問何如此問親嶺梅江柳共芳春抱賊不用重搜  
檢已自當堂露賊身長靈卓

那一通你問我立關倒插無鬚鎖等閒一掣掣得開  
三個老婆相對坐咄斷橋倫

醉乘白鶴登銀闕夢跨青鸞入絳宮酒醒眼開俱不  
見一川桃李自東風中峰本

那一通你問我猢猻上樹偷生果口裏嚼得不甘香  
眼裏耳裏都是火忽然撞著看園翁沒處躲三宜孟

世尊因外道問不問有言不問無言世尊據座外  
道讀曰世尊大慈大悲開我迷雲令我得入作禮  
而去阿難問外道有何所證而言得入世尊曰如  
世良馬見鞭影而行

五祖戒云大小世尊被阿難一狀領過又出語云汝  
何所問 法眼益因僧請益敘語未終眼云住住你  
擬向世尊良久處會那僧從此悟入 雪竇顯云邪  
正不分過猶鞭影又云迷雲既開決定見佛還許他  
同參也無若共相委知則天下宗師并爲外道伴侶  
如各非印證則東土衲僧不如西天外道 翠岩芝



云世尊被外道當面塗糊祇如外道云令我得入要  
且未夢見在既不曾夢見爲什麼却悟去 瑯琊覺  
云依稀似曲纔堪聽又被風吹別調中 楊岐會云  
世尊輟已從人外道乃因齋慶讚 滄山喆云外道  
懷藏寶鏡世尊親爲高提直得森羅顯煥萬象歷然  
又得阿難金鐘再擊四衆共聞大似二龍玩珠長他  
智者威憚 雲居齊云什麼處是外道悟處衆中道  
世尊良久時便是舉鞭處怎麼會還得不 昭覺勤  
云待他問不問有言不問無言和聲便打及至阿難  
問外道有何所證亦和聲便打殺人須是殺人刀活  
人須是活人劍 徑山杲舉雪竇語畢云邪正兩分  
正猶鞭影 磬山修云二老恰在鞭影裏批判良久  
云三十年後此話大行 南磬問云瞿曇鈍置太煞  
若是山僧便與和座掀倒雖然知我者少笑我者多  
佛日哲云雪竇妙喜二尊宿氣吞佛祖名振古今  
檢點將來三十棒一棒也放他不過何故不合向鞭  
影邊妄分邪正  
萬丈寒潭徹底清錦鱗夜靜向光行和竿一掣隨鉤

上水面茫茫散月明白雲端  
雪覆喬林同一色清光上下含虛碧探樵人立渡頭  
寒極目寒蟾爲誰白成枯木  
世尊恰似青銅鏡挂向虛空秋月淨表裏無私照膽  
寒高低一一皆相映佛鑑勲  
露影藏身問世尊瞿曇一點不加文迷雲舒卷從斯  
入十倍精神減八分佛燈珣  
迷悟觸體前何勞更舉鞭祇持鷄狗戒不學祖師禪  
鼓山珙  
世尊隻眼通三界外道雙眸貫五天華意正穠桃臉  
笑春光不在柳梢邊雪巢一  
自把顧軻空裏擲必端自打自家頭灼然自痛自難  
說自著摩挲歸去休斷橋倫  
野鳥關關弄語頻東皇暗轉劫壺春林花未吐成狼  
藉猶有餘香冷醉人幻寄庭  
九日柴門鋪綠茵酒帘高捲菊花春淵明去後無消  
息空有餘香冷醉人法林音  
世尊因外道問昨日說何法世尊曰說定法曰今



日說何法世尊曰說不定法曰因甚昨日定今日不定世尊曰昨日定今日不定

五祖戒云世尊何得將別人物作自己用 鴻山詰云大小世尊看樓打樓大瀉即不然待問昨日說定法今日何說不定法但云非汝境界 薦福懷云世尊被外道拶著出自偶然雖然如此邪正未分 龍華宗云黃面瞿曇隨邪逐惡外道雖則言中有響怎奈眼裏無筋

古鑑從來絕點痕隨其妍醜目前分如今鑑破無光影風輓長江水色渾塗毒策

行盡江南數十程曉風殘月入華清朝元閣上西風急都入長楊作雨聲 楚石琦

世尊敕阿難往問調達曰汝在地獄中安否曰我雖在地獄如三禪天樂又令阿難問還求出否曰我待世尊來便出阿難曰佛是三界大師豈有入地獄分曰佛既無入地獄分我豈有出地獄分

翠巖眞云親言出親口 徑山杲云既無出分又無入分喚什麼作釋迦老子喚什麼作提婆達多又喚

什麼作地獄還委悉麼自攜瓶去酤村酒却著衫來作主人 天寧琦云妙喜與麼批判刁刀相似魚魯參差殊不知釋迦自釋迦調達自調達地獄自地獄料掉沒交涉一夜落花雨滿溪流水香 伏龍長云臨危不悚眞大丈夫 萬峰藏云既是三界導師爲甚無入地獄分阿難直受始得

好笑提婆達多入捺落十小劫波雖然得三禪妙樂吹布毛須還鳥窠 湛堂準

萬仞崖頭拌得去不知何處覓全屍業風吹起再甦惺却問如今是甚時 廬堂愚

水月空花鏡裏天丹成何地不神仙扁舟一任風吹去祇在蘆花淺水邊 抱璞璉

荒田荒地没人耕一耕耕起便死爭不如盡情回付君依舊春風長葛藤 緣雨蕉

華嶽山人愛黑甜素心豈爲利名遷濁怡夢裏乾坤大石爛松枯懶記年 鏡堂清

世尊因長爪梵志索論義預約曰我義若墮我自斬首以謝世尊曰汝義以何爲宗曰我義以一切

不受爲宗世尊曰是見受不志拂袖而去行至中路有省謂弟子曰我當回去斬首以謝世尊弟子曰人天衆前幸當得勝何以斬首志曰我寧於有智人前斬首不於無智人前得勝乃歎曰我義兩處負墮是見若受負門處處是見不受負門處細一切人天二乘皆不知我義墮處惟有世尊諸大菩薩知我義墮回至世尊前曰我義兩處負墮故當斬首以謝世尊曰我法中無如是事汝當回心向道於是同五百弟子一時出家證阿羅漢

緣雨蕉云懵懵懂懂挑擔水桶掉了一隻不知輕重  
驀拈拄杖云吽吽 法林音云且道梵志中路還省也未若在今日直須打了趁出

是見若受破家門是見不受與誰論匾擔驀折兩頭  
脫一毫頭上現乾坤天衣懷

一切不受逞家風片言雙破兩頭空赤幡奪了回光  
處始信言前墮已宗本覺一

世尊在忉利天爲母說法優填王思佛命匠雕栴  
檀像及至世尊下來像亦出迎

法林音云大小世尊爲魅所著

紫金光聚照山河天上人間意氣多曾敕文殊領徒

衆毗耶城裏問維摩盧堂愚

雲在嶺頭閒不徹水流澗底太忙生一莖草上全神

變大地無人著眼睛牧雲門

僧繇壁上畫龍形畫得龍成未得神破壁驚看無兩

樣飛騰全在點睛人唐際化

栴檀雕就紫金身特地逢迎意氣新慚愧瞿曇清白

眼無端又著一沙塵靈機觀

世尊三喚像亦三應世尊曰無爲眞佛實在我身

大湏智云世尊爲誰家分上事又喝云汝等切忌認

著昭昭靈靈

眞佛無爲在我身三呼三應太惺惺若人不悟元由

者塵劫茫茫認識神大湏智

世尊因乾達婆王奏樂山河大地盡作琴聲迦葉

起舞王問迦葉豈不是阿羅漢諸漏已盡何更有

餘習世尊曰實無餘習莫謗法也王又撫琴三遍

迦葉亦三度起舞王曰迦葉起舞豈不是世尊曰

實不曾作舞王曰世尊何得妄語世尊曰不妄語  
汝撫琴山河大地草木盡作琴聲豈不是王曰是  
世尊曰迦葉亦復如是實不曾作舞王乃信受

修山主問澄源乾達婆王奏樂直得須彌峯峇海水  
騰波迦葉作舞作麼生會源云迦葉過去世曾作樂  
人來習氣未除修云須彌峯峇海水騰波又作麼生  
源休去法眼益代云正是習氣 幻寄稷云有底道  
世尊以藥去病澄源以病去藥夢也未夢見乾達婆  
王在 黃蘗琦云若是山僧待問迦葉是阿羅漢諸  
漏已盡何更有餘習亦乃起舞不惟以楔出楔抑令  
乾達婆王展轉疑殺

輕輕撥轉一條絃聲振三千與大千賴得飲光知密  
意肯將羅袖惹春烟 塗毒策

有三尺劍可以謁趙國無千里眼難以見懸絲魏魏  
堂堂三界大師虛堂愚

月畔梅花白風飄柳絮狂人情若馬頰客路似羊腸  
玉笈乾

世尊因靈山會有五百比丘得四禪定具五神

通未得法忍以宿命智通各各自見過去弑父害  
母及諸衆罪心內懷疑於甚深法不能證入於是  
文殊承佛神力手握利劍持逼世尊世尊曰住住  
不用作逆勿得害我我必被害爲善被害文殊從  
本以來無有我人但以內心見有我人內心起時  
我必被害即名爲害於是五百比丘悟自本心如  
夢如幻於夢幻中無有我人乃至能生所生父母  
於是五百比丘同聲讚歎文殊大智士深達法源  
底自手握利劍持逼如來身如劍佛亦爾一相無  
有二無相無所生是中云何殺

天童傑云爲人須爲徹殺人須見血文殊費盡腕頭  
氣力要且不知此劍來處帶累釋迦老子通身是口  
分疎不下五百比丘恁麼悟去入地獄如箭射忽若  
蹋翻大海趨倒須彌雲門扇子踣跳上三十三天築  
著帝釋鼻孔東海鯉魚打一棒兩似盆傾又作麼生  
良久云自從舞得三台後拍拍元來總是歌 萬峰  
藏云我若作世尊待文殊來便一棒打殺免得比丘  
於無相無生處打之遶 南山寶云世尊被文殊一

擲直得將從前所有滯貨盡情拋出若不得五百比丘善能解脫縱文殊通身是手也收拾不及雖然在瞿曇門下則得納僧門下一點也用不著

佛祖由來總是冤電機旋處直如弦金毛若解和聲擲月裏麒麟笑揭天瞎堂遠

文殊當日逼如來五百聲聞眼豁開欲會如來佛亦爾青蛇匣裏吼風雷本覺一

出匣青蛇氣吐虹平移海嶽萬千重當時不有沉冤客何事當陽訴異同緣雨蕉

世尊因波斯匿王問聖義諦中有世俗諦否若言

無智不應二若言有智不應一一二之義其義云

何世尊曰大王汝於過去龍光佛時曾問此義我

今無說汝今無聞無說無聞是名一義二義

翠巖真云波斯匿王善問不善答世尊善答不善問

一人理上偏枯一人事上偏枯翠巖當時若見點一

把火照看者黃面老子面皮厚多少 薦福懷云大

王分明問世尊分明答賓主歷然作麼生說個無說

無聞底道理 靈巖儲云佛佛授手祖祖相傳如印

印水似空合空雖則文彩全彰要且不可存朕跡苟非

具超方眼者未免坐在無說無聞處山僧若見恁麼

問但道四海浪平龍臥穩九天雲淨鶴飛高

問處奇特答處殊絕一二義諦驪龍角折真如詰

無聞無說意無窮鐵壁银山一線通何處是渠真聖

諦秋風昨夜到梧桐東谷光

快性經紀靈利客人相逢一飲滿面陽春通然遠

世尊因耆婆婆善別音響乃敲一髑髏問生何道曰

生人道又敲一曰生何道曰生天道又敲一曰生

何道耆婆罔措

天童悟云世尊大似有先鋒無殿後耆婆罔知也好

與一敲不見道先以定動後以智拔 龍華宗云世

尊敲磬分明怎奈傷鋒犯手耆婆善別音響也是認

影迷頭且道第三度敲底畢竟生甚麼處良久云泥

牛入海無消耗挂角羴羊不見蹤

如來一擊少人知直下分明更是誰無限月光隨水

去片雲偏向故山歸塗毒策

老胡一擊許誰知大冶紅爐片雪飛青草塚間留不

住白雲還望故山歸隱堂遠

世尊因黑齒梵志運神力以左右手擎合歡梧桐花兩株獻佛世尊曰梵志志應諾世尊曰放下著志放下左手一株世尊又曰放下著志放下右手一株世尊又曰放下著志曰我兩手皆空更放下個甚麼世尊曰吾非教汝放捨其花汝當放下內六根外六塵中六識無一可捨是汝免生死處志大悟

徑山琇云大小世尊尚墮在識情數量合喫二十棒梵志雖然悟去亦未出得情識數量合喫二十棒徑山恁麼批判蕭何制律棲霞成云三界大師不合將閨閣中物般出翻被梵志勘破

兩手擎來教放下空身立地更疑猜根塵識界無尋處多謝春風爛熳開心聞貴

截斷千崖路風前活計新誰如蓆帽下元是昔愁人無際派

世尊因地布髮掩泥獻花於然燈佛燈見布髮處遂約退衆乃指地曰此一方地宜建一梵刹時賢

于長者持標於指處插曰建梵刹已竟諸天因散花讚曰庶子有大智矣

博山來云插草建精藍長者全身領荷鍼芥相投唧唧固然唧唧要且旁觀者哂寶壽方云諸天散花讚歎有利害無利害具足皞召衆云然燈指處玉轉珠回賢于插草虎步龍驤於斯見得古釋迦不先今彌勒不後其或未然驀卓拄杖喝一喝

一莖草上建精藍風卷蟪蛄入海南惡水潑來成第二鈍根錯過問前三張無盡

梵刹分明在地頭插標重建換人眸鴈飛不在秋江上珍重時人莫浪求石奇雲

世尊從忉利天下時四衆八部俱往空界迎有蓮花色比丘尼作念曰我是尼身必居大僧後於是用神力變作轉輪聖王千子圍繞最初見佛佛纔見乃訶曰蓮花色尼汝何得越大僧見吾汝雖見吾色身且不見吾法身須菩提巖中晏坐却見吾法身

薦福懷云蓮花色尼被熱瞞則且置還知瞿曇老漢



性命在別人手裏麼 位中符云世尊二見不除好與蓮花色尼一狀領過法林音云白巖是作家

未動葭灰三尺雪乾坤何處不陽春千山鳥絕江深凍不見尋花問柳人三峯藏

世尊一日說大集經敕一切憐惡鬼神悉皆集會有不赴者四天王飛熱鐵輪追之無有不順佛敕者惟一魔王謂世尊曰瞿曇我待一切衆生成佛盡衆生界空無有衆生名字我乃發菩提心

天衣懷云臨危不變真大丈夫作麼生著得一轉語與黃面老子出氣盡大地人無不愛佛到者裏何者是佛何者是魔良久云欲識魔麼開眼見明欲識佛麼合眼見暗魔之與佛以拄杖卓一下云一時穿却鼻孔 南堂靜云我若作世尊卽向他道汝已發心竟應當如是住不然道汝喚什麼作衆生擬開口與一熱鐵輪 徑山杲云天衣老漢恁麼批判怎奈話作兩橛若向何者是佛何者是魔處休去不妨使人疑著却云開眼見明合眼見暗卽當不少又云佛之與魔拄杖子一時穿却鼻孔雪上加霜妙喜却爲黃

面老子代一傳語待魔王道無有衆生名字我乃發菩提心祇向他道幾乎錯喚你作魔王此語有兩頁門檢點得出許你具衲僧眼 東禪觀云怪哉淺草撥著一個大蟲上門上戶敲人火急可惜當時放過待他怎麼道祇消一個擔板漢非惟塞斷咽喉亦乃教伊轉動不得雖然相識滿天下知心能幾人 龍池傳云魔王是歸依語不是歸依語 雲門云魔王言中有響護法已竟 崇先奇云我若見他怎麼道但云我不如汝管取低首歸降何故重賞之下必有勇夫 補陀沃云者魔王具什麼眼敢怎麼道萬壽朗云當時魔王怎麼道便與一熱鐵輪免他向淨白地上躲身還有爲伊作主者麼拈拄杖云看看四天王飛熱鐵輪來也以拄杖旋風打散 寶壽波云魔王世尊總合喫熱鐵輪有分何故賞則俱賞罰則俱罰

高眼從來不著塵阿誰奴子共殷勤嚴冬一片三江凍萬卉千葩徧地春三峯藏

茹藏首陽山恥食周家粟皮聞水土恩餓死受人辱

大威威

龍飛鳳舞過青霄徧界光騰瑞氣高劈破彩雲風肅  
肅月巢終不貴花梢普慈雲

世尊一日敕阿難食時將至汝入城持鉢難應諾

世尊曰汝既持鉢當依七佛儀式難問如何是七

佛儀式世尊召阿難難應諾世尊曰持鉢去

密菴傑云大小世尊被阿難輕輕拶著未免喚鍾作  
甕

從前七佛儀式慶喜何嘗欠少堪笑黃面瞿曇無端  
打個之遶遶演

世尊因此丘問我於世尊法中見處卽有證處未  
是世尊當何所示世尊曰比丘某甲當何所示是  
汝所問

鐵鎚劈面擲擊破精靈窟血濺梵天紅大地成狼藉  
獨步裔

聞說瞿塘春水高今朝親上峽中燒木鷄倒嶽傾湫  
下幾個長年解把篙三峽藏

世尊一日陞座迦葉白椎曰世尊說法竟世尊便

下座

芭蕉散云無孔笛過塵拍板

浮雲不共此山齊山謫蒼蒼望轉迷曉月暫飛千樹  
裏秋河隔在數峯西金山杰

世尊一日陞座默然而坐阿難白椎曰請世尊說  
法世尊曰會中有二比丘犯律行我故不說法阿  
難以他心通觀是比丘卽時遣出世尊還復默然  
阿難又白是二比丘今已遣出世尊何不說法世  
尊曰我誓不爲二乘聲聞人說法

南堂靜云前箭猶輕後箭深 高峯妙云世尊能挽  
千鈞之弩銀山鐵壁箭箭皆穿阿難雖有隱身之術  
殊不知觸髓後中箭還有躲避得過底麼 一麟足  
云世尊雖有羅龍陷虎之機且無點鐵成金之用阿  
難却有六韜三略之謀未免陷入八陣圖裏仔細檢  
點俱宜喫棒

世尊因文殊起佛見法見被世尊威神攝向二鐵  
圍山

五雲逢云什麼處是二鐵圍山如今有人起佛見法

見五雲與烹茶兩盃 白雲端云世尊當時無大人  
相如今有起佛見法見者承天終不敢動著他何故  
但得雪消去自然春到來 五祖演云五祖則具大  
慈悲遂拍手云曼殊室利不審今後更敢也無良久  
乃自云一度被蛇傷怕見斷井索 千巖長云不起  
佛見法見還免得貶向二鐵圍山麼世尊也是憐兒  
不覺醜 寶華忍云瞿曇白雲五祖雖云扶豎綱宗  
要且未透末後句在曹山者裏若有起佛見法見每  
人分半院與他何故一掌不浪鳴兩掌鳴擱 開  
先金云正恁麼時瞿曇還免得二鐵圍山麼頃六月  
朔風吹大地家家屋上砌嚴霜 菩提珍云世尊握  
闔外威權全提正令若非文殊也大難承當如今有  
人起佛見法見龍池願捨四大作禪床供養 山容  
波云文殊一竊在眼世尊空花亂墜貶向鐵圍則不  
無還知瞿曇性命落在文殊手裏麼 清波格云文  
殊纔起佛見法見早已自入二鐵圍山干他世尊甚  
事  
黑風海內渾身去業浪堆中載得歸誰把一雙清白

眼趁他蝴蝶亂飛飛綠雨蕉  
底事邊關叛逆生勞勞嚷嚷動刀兵狼烟一掃歸王  
化四海何愁不太平 滿又啓

世尊於自恣曰文殊三處過夏迦葉欲白椎擯出  
纔拈椎乃見百千萬億文殊盡其神力椎不能舉  
世尊曰你擬擯那個文殊迦葉無對

昭覺勤云可惜放過當時待老漢道你擬擯那個文  
殊便與一椎看他作何合煞 雲居元云一家有事  
百家忙 保寧茂云大小迦葉有頭無尾畢竟如何  
西天令嚴久立珍重 高峯妙云文殊知底迦葉不  
知迦葉知底文殊不知彼彼不知則且置百千萬億  
文殊畢竟那個是真文殊 天寧琦云迦葉太不丈  
夫莫道百千萬億文殊便是百千萬億世尊也下一  
椎始見作家不見道棒下無生忍臨機不見師 鼓  
山賈云文殊雖得便宜怎奈轉增醜態何不默受擯  
出教他迦葉三十年摸索不著 慧雲盛云世尊雖  
善解交怎奈遭人怪笑何故當斷不斷返招其亂  
寶峯弁云盡謂迦葉把住要津文殊十方坐斷寶峯



看來正是放過一著復云險

千峯月淡楚江秋衲子初開布袋頭聞道淮南米價

賤便隨船子下揚州褚納秀

天高雲淨月彎彎雨過秋空眼界寬百億文殊真妙  
體分明祇在一毫端正堂辨

錦衣公子遊春慣白首佳人懊恨多彼富尙嫌千口

少自貧無奈一身何月庭忠

移場三處逞風流拈起椎來價滿齏潦倒瞿曇奸狡

甚搖唇鼓舌自啾啾法林音

世尊因文殊門外立乃曰文殊文殊何不入門來

文殊曰我不見一法在門外何以教我入門

報慈遂徵云爲復是門外語門內語嵩山詰代云

吾不如汝黃龍新云文殊怎麼道入得門入不得

門若入得門冰消瓦解萬峯藏云總隔一片板

崇先奇云世尊門裏出身不得文殊身裏出門不得

世尊偕阿難行次見一古佛塔世尊便作禮阿難

問甚麼人塔世尊曰過去諸佛塔曰過去諸佛是

甚麼人弟子世尊曰是吾弟子曰應當如是

德山密云過去是現在弟子實有此理天童悟云

我若作阿難待世尊云是我弟子但問佛是甚麼人

弟子擬開口便作禮休去蓮樹策云阿難當時見

道是吾弟子何不便禮三拜管教黃面老子置身無  
地

世尊坐次見二人舁豬過乃問者個是甚麼曰佛

具一切智豬子也不識世尊曰也須問過

太陽立云不因世尊問幾乎忘却地藏恩云老漢

也是無端節目上更生節目忽被二人呵呵大笑舁

豬便行一場懨懨壽昌經云君子有成人之美

萬峯藏云舁向前過世尊早墮了也資福侶云利

動君子綠雨蕉云世尊大似勾賊破家設使二人

待問便打豬一棒云何不抵對世尊又如何折合

捨筏懷兼濟逢耕更問津却將未歸意說與欲行人

木菴瓊

世尊因異學問諸法是常耶世尊不對曰諸法是

無常耶世尊亦不對曰世尊具一切智何不對我

世尊曰汝之所問皆爲戲論

高峯妙云異學有言若啞世尊無語如雷者裏見得分明正是增益戲論何故諦聽諦聽 白光明云異學兩度問法已成戲論世尊兩度不答戲論猶多

宗鑑法林卷一

宗鑑法林卷二

集雲堂 編

迦釋文佛

世尊於靈山會上拈花示衆衆皆默然惟迦葉破顏微笑世尊曰吾有正法眼藏涅槃妙心實相無相微妙法門不立文字教外別傳付囑摩訶迦葉白雲端云迦葉善觀風雲別氣色雖然還覺頂門重麼 黃龍心云直下穿過觸體已是換却眼睛臨危不在悚人向甚處見釋迦老子 僧問靈山拈花意旨如何雲峰悅云一言既出驢馬難追迦葉微笑意旨如何云口是禪門 高峰妙云世尊扶頭迦葉扶尾直至如今擡舉不起莫有共著力者麼以兩手作

扶勢云也祇兀底 獅林則云要問黃面老子者兩

件物從甚處得來擬開口好與一喝 平陽恣云且

道靈山有付囑無付囑喝一喝云千聖不知何處去

倚天長劍逼人寒 雲菴悅云我若作飲光見伊恁

麼道便好再發一笑看老漢又如何折合 崇化能

云世尊拈花憐兒不覺醜迦葉微笑刺腦入膠盆

霜風刮地掃枯菱誰覺東君令已回惟有嶺梅先漏

泄一枝獨向雪中開佛慧泉

飲光誰謂悟拈花微笑依然隔海涯黃面祇圖傳大

事赤眉終不打貧家祖印明

古塚露枯骨窮源逢斷橋一番新雨過翠色滿林梢

白楊順

頂上鐵枷三百斤分明有理不容伸默然鷄足峰前

坐猶把金襴誑後人尼無著持

末後無端重漏泄焦齒翁翁嚼生鐵玉鞭擊碎月明

珠累及兒孫揚醜拙湛堂深

八十婆婆未嫁人柔腸百結向誰伸而今趁得東君

力喜見眉間一點春香檀海

化母無私似掌平百花如錦正春深尋常繡出鴛鴦  
看今日和鍼度與人惟一獨

烽火一然萬國憂與君攜手上高樓名姬暗笑勤王  
士不見夫人在上頭南巷依

高髻雲鬟宮樣粧春風一曲杜韋娘司空見慣渾閒  
事惱殺蘇州刺史腸石公瑱

君起早臣起早彤庭月落天將曉金帶趨朝對越時  
御爐縹緲宮闈窈午門人靜月初昇殿閣一聲鳴鳳  
鳥騎聲獅

世尊因文殊至諸佛集處諸佛各還推一女子入  
於三昧殊曰云何此女子得近佛座而我不能世  
尊曰汝但覺此女子而自問之文殊遶女子三匝  
鳴指一下乃托至梵天盡其神力而不能出世尊  
曰假使百千文殊亦出此女子定不得下方過四  
十二恒河沙國土有罔明菩薩能出此女子定須  
與罔明從地湧出世尊敕出罔明乃鳴指一下女  
子於是從定而出

翠巖芝云僧投寺裏宿賊打不防家 五雲逢云不

惟文殊不能出此定祇恐如來也出此定不得 翠

巖真問僧文殊因甚出不得罔明因甚却出得英邵

武方其問時以手捏其膝而去真笑云賣匙箸漢未  
在天童覺云若定若動富人變弄鴻毛輕而不輕

泰山重而不重還知老瞿曇鼻孔在我手裏麼 龍

翔訢舉公案了拈拄杖云一串穿却南欄格云本來  
一串用穿作麼 理安問云古今盡道女子出定殊

不知個個破家蕩產今日有三十棒要世尊喫何故

不因漁父引怎得見波濤

拂拭瑤琴月下彈調高雪曲和應難五侯費盡平生

志從此詩書嬾更看賈鋒照

坐擁羣峰覆白雲鶯啼深谷不知春巖前花雨紛紛

落夢覺初回識故人石門易

畫得天然別花間試展開黃鶯偷眼覷不敢下枝來

慈受深

出得出不得是定非正定罔明與文殊喪却窮性命

徑山杲

一畝之地三蛇九鼠仔細看來是何面蒙佛照光

誰在畫樓西相逢笑語低到家春色晚花落鷓鴣啼  
雪菴瑾

花落銀牀春爛慢月沉金帳夜迢遙虛堂寂寞無人  
共祇把檀香盡意燒中峰本

玉苑梁園翫早春滿林香艷醉遊人不禁簾外啼鶯  
切空使落花狼藉深理安問

玄石一醒醉三年妻兒抱首哭蒼天饒君題盡招魂  
賦樂得安閒自在眠文殊智閑明賢出入如何得話  
圓春光不改東風面惹得江南啼杜鵑三宜孟

錦城絲管日紛紛半入江風半入雲此曲祇應天上  
有人間能得幾回聞南菴依

君在湘江頭妾在湘江尾相思不相見共飲湘江水  
撫松客

輪囷鐵幹漫梳風嶺外丹楓鬪彩紅亦有幽思寫不  
得和煙和雨在雲中法林音

世尊示隨色摩尼珠問五方天王此珠作何色時  
五方天王互說異色世尊藏珠復擡手曰此珠作  
何色天王曰佛手無珠何處有色世尊曰汝何迷

倒之甚吾將世珠示之便強設有青黃赤白色吾  
將眞珠示之便總不知時五方天王悉皆契悟

緣雨蕉云大小世尊被五方天王換却眼睛也不知  
世尊在尼拘律樹下坐次二商人問世尊還見車  
過不曰不見還聞不曰不聞莫禪定不曰不禪定  
莫睡臥不曰不睡臥莫別去不曰不別去商人乃  
歎曰善哉世尊覺而不見遂獻白氈兩段

天童悟云商人如是問世尊如是答甚處是商人見  
世尊覺而不見處 大愚鵬云三界大師被商人推  
在三百丈爛泥坑裏至今起不得

世尊昔至多子塔前命摩訶迦葉分座令坐以僧  
伽黎圍之遂告曰吾有正法眼藏密付於汝汝當  
護持傳授將來無令斷絕

僧問興化多子塔前共談何事化云一人傳實萬人  
傳虛

密傳分半座正好驚面睡不與麼且放過子孫未免  
遭殃禍海印信

於道無所證方通萬法路或明或暗行不愼亦不護

月來松色寒雲去青山露今古天台橋幾人能得度  
投子青

世尊臨入涅槃文殊請再轉法輪世尊咄曰文殊  
吾四十九年未曾說一字請我再轉法輪是吾曾  
轉法輪耶

雪峰空云世尊從文殊請不從文殊請 友可立云  
相逢盡道休官好林下何曾見一人

末上何曾轉法輪祇今再轉謾勞神路行人不知天  
曉猶把靈符執夜明北磬簡

老漢生平太脫空將無作有誑盲靈臨期一語方真  
實也是闍黎飯後鐘別山智

當陽據座已周遮何事迎風更撒沙囚口賊賊招盡  
了清廉猶自向人誇法林音

世尊於涅槃會上以手摩胸曰汝等善觀吾紫磨  
金色之身瞻仰取足勿令後悔若謂吾滅度非吾  
弟子若謂吾不滅度亦非吾弟子時百萬億衆悉  
皆契悟

雪峰悅云然則膏肓之病不足以發藥雪峰今日且

作死馬醫汝等諸人皮下還有血麼 東禪觀云衆  
中若有個作者纔見伊以手摩胸便出約住云瞿曇  
你者醜舉止休拈出也他若知非決定緘口免見百  
萬億衆詭邪倒見 高峰妙云老漢四十九年顛之  
倒之橫說豎說貴圖末後殷勤殊不知賺他百萬億  
衆至今墮在鐵圍山下無由解脫 清化巖云當時  
山僧若在但輕輕向世尊背上撫一下云老不休心  
非但令瞿曇滿面慚惶亦免百萬人天杓卜聽虎聲  
崇先奇云漆以堅自割膏以明自焚黃面瞿曇至  
死不變強哉矯

摩胸告衆誑嬰兒怎奈身移步不移接響承虎三千  
載春風依舊草萋萋長靈卓

風搖柳綫波旬舞雨泥花腮慶喜悲黃面瞿曇何處  
去令人到此祇攢眉無準範

雙林樹下手摩胸說有談無念脫空若謂瞿曇曾入  
滅錯教啼鳥笑春風虛舟度

老倒瞿曇不識羞臨行猶自逞風流摩胸示衆歸何  
處啼鳥一聲山更幽 皖山凝

世尊涅槃日迦葉最後至世尊乃於棺中露雙趺  
示之迦葉乃作禮請如來以三昧火而自闍維卽  
時金棺從七寶牀陞舉繞俱尸羅城七匝却還本  
處化火光三昧而自焚之

城山洽云黃面老子賣弄四十九年猶未足意臨末  
梢頭又做出許多伎倆真個不知死活雖然如是粉  
骨碎身未足齷

未出王宮已涅槃何須雙足露金棺致令迦葉雙眉  
皺慶喜門前倒刹竿佛鑑惣

臨行當休未肯休雙趺一出便難收至今骨節連毛  
竅暴露春風百草頭虛堂愚

周行七步猶成跡梯示雙趺豈易收微雨灑花千點  
淚淡烟籠竹一堆慈高峰妙

開口已經遭打殺臨終又賣醜行藏生平浩氣難收  
拾死到棺材也發狂靈機觀

世尊未離兜率已降王宮未出母胎度人已畢

天嶽畫云莫待是非來入耳從前知已反爲讐不  
退勇云新羅國裏火灼吳越石人燒脚誌公拋却杖

頭剪刀打倒天台國清寺裏豐干住底牆壁汾陽太  
子院裏驚然聳出一隻匾策高郵野鴨逢人便低頭  
云師太師太乃左右顧視云玄沙去後無消息紅白  
枝枝不著華

利刃有蜜不須舐蠱毒之家水莫嘗不舐不嘗俱不  
犯端衣錦自還鄉大慧杲

未離兜率降王宮便就刀山入鑊湯等閒擒住白拈  
賊滿眼俱爲敗露賊瞎堂遠

肌骨當初赫赤窮面皮今日厚千重捺頭搭尾應更  
點贏賽閣黎齋後鐘或菴證

日出天歡喜雲生地起愁如何人不老得似水長流  
千變長

朱絃彈夜月翠袖舞春風祇者逍遙處何人得與同  
恕中愠

蜀魄千年尙怨誰聲聲啼血向花枝滿山明月東風  
夜正是愁人不寐時天機

者貼老鼠藥佳人恨喫著喫著便成顛不鑒頭定亦  
脚漢開喙



諸經

經首八

僧問地藏深以字不成八字不是未審是甚麼字藏云看取下註脚 古南門云卽八是注脚

以字不是八不成森羅萬象此中明直饒巧說千般妙不是溫和不是經披雲寂

我佛金言義海深開遮惟要悟真心首標妙在當頭割密使泥牛曉夜吟雲居祐

以字不成八字非爍迦羅眼不能窺一毛頭上重拈出忿怒那吒失却威徑山泉

鳥跡半露蒼苔蝌蚪并遊春水若不信受奉行未免卽從座起石碧明

不向經題識本真紙堆討甚法王身未開梵籥承當去免作循行數墨人絕岸湘

以字不成八不是春風拂檻花猶睡王孫何處未歸來芳草萋萋愁滿地覺淚盛

以字不成八字不就乍看是豈細讀如豆不若兩宜剗衿續袖(三)宜孟

由來種樹爲乘涼樹長猶嫌暗客臆盡力推開推不

去令人千古費商量且知訥

蒼頡難造羅什難譯牟尼拈出自先不識僧顓實

楞嚴阿難自行乞食次

乞食原無一定方若爲非意問檀郎慈傷月面袈裟

客情溺山眉窈窕娘嬌許鏡分花避笑豔留釵比玉

慙香若非鸚鵡將人喚肯信溫柔是夢鄉自求膺

楞嚴佛告阿難吾不見時何不見吾不見之處若

見不見自然非彼不見之相若不見吾不見之地

自然非物云何非汝

博山來云盡大地是個釋迦阿難壓著釋迦鼻孔盡

大地是個阿難釋迦裂破阿難胸襟且道向甚麼處

見甚麼處不見者裏著得一隻眼黃面老子非但瞞

人亦乃自瞞 妙偉俊云世尊此語有兩負門若檢

點得出一對鴛鴦池邊獨立檢點不出一雙孤雁撲

地高飛

全家全牛意不殊從來作者共名模如今要見瞿曇

老利剎塵塵在半途雪寶顯

堂前露柱久懷胎產下孩兒頗俊哉未解語言先作賦一操直取狀元來自雲端

說離百非存規則言無一法尙筌筌毗耶默默曾緘口摩竭寥寥正掩扉佛鑑勸

初學賣花日嬌羞掩齒牙及至容顏老脫然無可遮却笑白雲空自散不知明月落誰家崇覺空

滄海漚乾太虛充滿衲僧鼻孔長古佛舌頭短珠絲度九曲玉環纔一轉直下相逢不識渠始信斯人不合伴宏智覺

隔林彷彿聞機杼知有人家在翠微及至入門親見了元來直是小兒囍箇堂機

石潤非玉水麗非金大禹決而西湖下和泣而陸沉美兮渺兮錯古讐今堂愚

愁腸百結事難別啞子喫苦向誰說有語祇可訴東風相如怎解中心結湛然澄

甕漏繩樞配隸家揭竿斬木枉喧譁要知紫蓋雲屯者一劍能誅白帝蛇靈潤機

楞嚴佛敕文殊將呪往護

休尋貝葉及樺皮文彩隨形卽汚伊頂法豈常情測度呪心須大智傳持紅爐那許留春雪黑沼空悲染素絲會得它山皆故里縱橫有路自超岐自求膺

楞嚴佛謂阿難若能轉物卽同如來

若能轉物卽如來春暖山花處處開自有一雙窮相手不曾容易舞三台白雲端

雨色和烟匝四維眼皮未綻若爲窺等閒覷破金剛際坦蕩無因役路岐或菴體

他人住處我不住他人行處我不行不是與人難共住大都縑素要分明此山應

堯之垂衣禹之行水輪扁斲而手美紀昌射而利矢能其能所其所人兮物兮孰此孰彼德微昱

田裏青螺皮作骨階前紅莧葉爲花螺蛸身腹無非蟹水母眼睛全是蝦斷流渡

楞嚴見見之時見非是見見猶離見見不能及

能仁珪云落花有意隨流水流水無心戀落花寒

松操云世祖功臣三十六雲臺爭似釣臺高妙像

俊云世尊一似小兒喫李忙向赤邊敲忽然敲破指



頭直得血潑梵天

沒絃琴上無私曲一度彈來轉轆轤斷巖流水少知音六六不成三十六妙峰善

瘦藤拄到風烟上乞與遊人眼界寬不知眼界寬多少白鳥去盡青天還撲翁鉅

雨洗淡紅桃萼嫩風搖淺碧柳絲輕白雲影裏怪石露綠水光中古木清潛菴光

海底波斯失却金雙盲婆子草中尋夜深摸得松毛刺走徧東村叫賣鍼天如則

鷺山艷艷樂從遊儘夜風光映碧流月落更殘天際曉醉扶公子上高樓印山先

一片潮聲下石頭江亭送別使人愁可憐垂柳絲千尺似爲春江縮去舟靈潤機

楞嚴七處徵心

七處徵心款便成推窮尋逐案分明都緣家賊難防避撥亂乾坤見太平記菴顏

吹糠著米翻成特地不因一事不長一智北磬簡

七處徵他天外天毫光直射阿難肩瞿曇忒殺憐兒

切逼得鮎魚上竹竿絕岸湘

滄溟吸盡盡珊瑚直取驪龍領下珠三十餘年尋海藏不知身在寶山居玉笈乾

楞嚴八還辨見

明暗色空不可還不可還者絕躋攀夾截虛空成畔岸一重水隔一重山記菴顏

楞嚴阿難大衆獲本妙心

東西南北捉虛空海角天涯信不通力盡神疲無處覓萬年松在祝融峰記菴顏

適我昔所願今者已滿足是玉也大奇祇恐不是玉北磬簡

楞嚴妙性圓明離諸名相

侶嚴荷云妙性豈不是名圓明豈不是相作麼生說個離諸名相底道理

一錢爲本萬錢利富而不足貧有餘換骨奪胎些子藥輸他潘閭倒騎驢記菴顏

金盤不可動轆轤轉難住停待良久問圓明湛如露

北磬簡

子丑寅卯丙丁甲乙小盡廿九大盡三十海神知貴  
不知價留與人間光照夜牧雲門

楞嚴諸可還者自然非汝不汝還者非汝而誰

能仁珪云常恨春歸無覓處不知轉入此中來喝一  
喝云三十年後莫道能仁教壞人家兒女 寒松操  
云本欲逃名山裏住住山名反出人間

還還還後更無還一個閒人天地間昨夜大蟲遭虎

獸皮毛落盡體元斑絕岸湘

日暖風和景更奇華華草草露全機茶蘼一陣香風  
起引得遊蜂到處飛心間貴

不汝還者復是誰殘紅流在釣魚磯日斜風定無人

掃燕子銜來水際飛天目禮

梧桐葉落正三秋鴈羽翩翩去自由漠漠楚天飛不

到且隨寒月宿汀洲伊菴彥

日永烟消古殿涼太平無事酒旗香放牛歸馬知誰

力恬憺風規有一腔證心修

故國飄零事已非烟波江上月明歸酣歌驚起沙汀

鴈盡向蘆花深處飛師覺濟

孤舟閒繫汨羅灣終日沉沉烟雨攢天際曉風吹散  
後霜眉獨對水晶盤越德祖

楞嚴六解一亡

根塵縛脫本同源一處休復六用捐手把一條紅斷  
貫孃生鼻孔一時穿出菴顏

六用無功信不通一時分付與春風篆烟一縷閒清  
晝百鳥不來花自紅北磬

楞嚴阿難大衆復白佛言若此妙明眞淨妙心本

來徧圓如是乃至大地草木蠕動含靈本元眞如  
卽是如來成佛眞體佛體眞實云何復有地獄餓

鬼畜生

雙劍峰前古寺基天尊元是一牟尼時難祇得同香

火莫聽閒人說是非菴顏

三蛇九鼠一畝之地竿木隨身逢場作戲北磬

楞嚴汝但棄其生滅守於眞常常光現前根塵識

心自然銷落

靈巖儲喝一喝云黃面老子和梵羅麤二千年來罕  
人酬價天寧旣開者個行戶難教客貨久滯今朝一

時攤向人前知時達變者便請滿載而去其或遲鈍  
卓拄杖云早晚行情不定莫言不道

楞嚴若以能推底是汝心則是認賊爲子

脩山主別云若能推底不是汝心則是認子爲賊

天童覺云如今推也是子是賊買帽相頭食魚去骨

寶壽新云世尊祇知其一不知其二龍濟祇知其

二不知其一者裏則不然能推底是心也得不是心

也得何故朝朝正月半夜夜是元宵

楞嚴當知虛空生汝心內猶如片雲點太清裏況

諸世界在虛空耶汝等一人發真歸元此十方空

悉皆消殞

五祖演云一人發真歸元十方虛空觸著殞著 昭

覺勤云一人發真歸元十方虛空錦上添華 洞山

度云一人發真歸元十方虛空八字打開乃展兩手

一人發真歸元十方虛空消殞試問楊岐栗蓬何似

雲門胡餅尼無著拈

瞋睡茫茫困思來喫碗濃茶便眼開四海五湖皇化

裏更無一物是塵埃朴翁語

曾伴溪雲歸晚色猶陪落日泛秋聲世間無限丹青  
手一段傷心畫不成覺俱盛

握卽成拳開卽成掌片雲太清不離舊樣開發羣蒙

俯提弱喪南海波斯入大唐眉毛祇在眼睛上牧雲門

摩月千霄勢莫凌春來寫碧浴波心平田莊上懂懂

客推倒方知路不平觀海奇

楞嚴知見立知卽無明本知見無見斯卽涅槃無

漏眞淨云何是中更容他物

道場如云釋迦老子和身放倒後代兒孫如何接續

要會麼通玄不是人間世滿目青山何處尋

明眼人前三尺暗賓中無主主中賓夜叉拈起吉撩

棒打落松梢月一輪天如則

楞嚴跋陀婆羅入浴忽悟水因

了事衲僧消一個長連床上展脚臥夢中曾說悟圓

通香水洗來薦面唾雪寶顯

洗塵觸體兩空寂妙證密圓超見思白璧無瑕空受

玷圓通會裏受塗糊塗毒策

楞嚴佛言富樓那如汝所言清淨本然云何忽生

山河大地汝常不聞如來宣說性覺妙明本覺明妙

清淨本然徧法界山河大地卽皆現性覺妙明認影

明眼耳便隨身色轉菴頌

彌滿清淨中不容他山河大地萬象森羅北磻簡

楞嚴觀世音菩薩成三十二應身獲十四無畏法

良哉觀世音旋聞與聲脫犬吠驢鳴休不休世出世

間活鐵鑊暗堂遠

三十二應不思議十四無畏如流水男子身中入定

時女子身中從定起菴頌

趁隊選圓通無端立下風當時供死款錯說在聞中

北磻簡

楞嚴佛言阿難此等衆生不識本心受此輪迴經

無量劫不得眞淨皆由隨順殺盜淫故反此三種

又則出生無殺盜淫有名鬼倫無名天魔有無相

傾起輪迴性

七處精研一妄心更隨三業殺盜淫身心不是閑家

具前箭猶輕後箭深菴頌

客舍并州已十霜歸心日夜憶咸陽無端又渡桑乾水却望并州是故鄉北磻簡

楞嚴無令心魔自起深孽

瞿曇徹底老婆心見明色發理難任入鄉隨俗那伽

定佛魔到此盡平沉菴頌

挽弓須挽強用槍須用長射人須射馬擒賊先擒王

北磻簡

圓覺如是我聞一時婆伽婆入於神通大光明藏

三昧正受一切如來光嚴住持是諸衆生清淨覺

地身心寂滅平等本際圓滿十方不二隨順

東西南北水茫茫無角鐵牛入海藏千眼大悲尋不

見倒騎佛殿入僧堂治父川

圓覺於不二境現諸淨土與大菩薩摩訶薩十萬

人俱

明鏡當臺照不差短長好醜盡歸家山河大地禪如

故不妨隨處旣烟霞治父川

圓覺非幻不滅

不屬內外與中間纔落思惟入魔境大丈夫兒不自

欺翻身坐斷毗盧頂月林觀

二圓覺修多羅教如標月指

方便門指頭月誦謫因底多甄別冷光霽霽登清途  
匝地茫茫尋舊穴指看畫處眼中屑到此何須更饒  
舌育王達

圓覺一切障礙卽究竟覺

枯樹雲充葉凋梅雪作花擊桐成木響蕪雪喫冬瓜  
長天秋水孤鷺落霞雪堂行

早朝心悶三杯酒午後頭昏一碗茶入夜脫衣伸脚  
睡五更走起眼瞇瞇或菴體

愛惡胸頭蕩沒塵牛溲馬渤等皆珍黃金不必呼爲  
貴阿魏何妨世有真介菴進

圓覺有我愛者亦愛涅槃伏我愛根爲涅槃相

黑山鬼窟至幽陰認得頑空盡力尋何似天窗饒一  
撥頓令大地作黃金

一錘打破精靈窟頓令虛空露出骨說甚騎牛李老  
君其中恍恍與惚惚靈潤機

圓覺棄愛樂捨還滋愛本便現有爲增上善果皆

輪迴故不成聖道

傀儡牽絲舞柘枝百般俊俏百般宜自從舞罷青絲  
斷堪笑渠儂撒手歸

圓覺居一切時不起妄念於諸妄心亦不息滅住  
妄想境不加了知於無了知不辨真實

天寧琦云若然者道有也得道無也得向上也得向  
下也得得也得不得也得數片白雲籠古寺一條綠  
水繞青山 報恩秀云居一切時不起妄念不於諸  
妄心亦不息滅不住妄想境不加了知不於無了知  
不辨真實不圭峰科此一段謂之忘心頓證又名忘  
心入覺萬松四個不字且道合屬那一科 博山來  
云四個不字是殺人刀是活人劍點鐵成金旋天轉  
地萬松門下卓卓全該若是絕學沙門更須從頭刪  
過畔 萬仞壁云釋迦老子橫身躡倒直至上無沖  
天之志下無入地之謀若有人救得敢保脚下烟生  
若救不得但知隨例淪鎚子也得三文買草鞋 玉  
笈乾云生處好討錢熟處好過年

黃花爛爛翠竹珊珊江南地暖塞北天寒遊人去後

無消息留得雲山到老看晦堂心

舉手攀南斗翻身倚北辰出頭天外看誰是我般人

鼓山珪

荷葉團團似鏡菱角尖尖似錐風吹柳絮毛毬

走雨打梨花蝴蝶飛徑山景

和烟釣月是生涯古策風高未足誇款乃一聲天地

闊祖師何處渡流沙或菴體

糊猴喫毛蟲烏狗上佛殿大地雪漫漫澄江淨如練

圓極岑

生鐵鑄牛頭牽犁還拽耙智者笑忻愚者驚怪差

古往今來幾百年更向鬼門重貼卦密菴傑

庭前栽高苴高苴生火飭火飭開蓮花蓮花結木瓜

木瓜纔劈破撒出白油蔬參伽堂仁

身世悠悠不繫舟得隨流處且隨流今朝有酒今朝

醉明日無錢明日愁石菴珪

春眠不覺曉處處聞啼鳥夜來風雨聲花落知多少

朴翁珪

春生夏長澹飯粗茶魚投濁水彩奔靨家無準範

火不待日而熱風不待月而涼渴來飲水困來上牀

鳧足自短鶴脰自長誰在原西寺鐘聲送夕陽古南門

草屨踏遍江南雪歸看廬山石上雲却笑閒身猶未

老尋梅幾度出松門弘覺恣

伯勞西去鴈東來李白桃紅歲歲開萬事無過隨分

好人生何用苦安排竺菴成

茅菴隱隱傍溪邊撥霧移芝種石田轉步看花花欲

醉流鶯不覺落窗簾前濟水流

早議郎君本是儂燈前月下且風流好風流看取朱

衣暗點頭玉笈乾

黃梅時節家家雨春草池塘處處蛙白鷺下田千點

雪黃鸝上樹一枝花菴松客

圓覺以大圓覺爲我伽藍

佛鎧堅云淨裸裸曲不藏直亦灑灑坐斷威音更有

一句不可道破

毫髮不留縱橫自由閬外乾坤廓落大方無外優游

明明祖師意明明百草頭禪破狐疑網截斷愛河流

縱有回天力爭如直下休四衢道中淨裸裸放出瀉

山水牯牛圖悟動

圓覺恒作是念我今此身四大和合髮毛爪齒等  
皆歸地涕唾膿血等皆歸水煖氣歸火動轉歸風  
四大各離今者妄身當在何處

今者妄身當在何不應談水更尋波狂心誤認鑑中  
影豈異迷頭演若多本覺一

芙蕖葉爛別西灣蓮子華開尚未還妾夢不離江上  
水人傳夫在鳳凰山于集成

宗鑑法林卷二

宗鑑法林卷三

集雲堂 編

諸經

法華佛放眉間白毫相光照東方萬八千世界

蠻奴赤脚上皇州賣盡珍奇跨白牛貪看市朝人作  
市又隨歌舞上官樓多意氣好風流月冷珠簾挂玉  
鉤分明忘却來時路百尺竿頭覩繡毬 圖極岑

法華止止不須說我法妙難思諸增上慢者聞必  
不敬信

天寧琦云說了也止得麼黃面老人分疎不下卓柱  
杖云有時拈在千峰頂劃斷天雲不放高 虎角咒  
畫○相舉起云世尊我以異方便助顯第一義免使  
者老子自生疑惑 妙偉俊云世尊五戒不持將常  
住物掩爲已有

春滿皇都月滿階婆心痛切爲誰哀兒孫自有兒孫  
福何必將金掘窮埋默菴慧

法華假使滿世間皆如舍利弗盡思共度量不能

測佛智

五祖演云尋常衲僧家高揖釋迦不拜彌勒是會佛  
智不會佛智衆中有則有祇是藏牙伏爪太平有個  
見處不惜眉毛舉向諸人待有人問隨口便答 破  
菴先云畢竟如何是佛智乃頌

雪子落紛紛烏盆變白盆忽然日頭出依舊是烏盆  
東廊壁洞竟無遮百衲花鍼補綺紗掩在風前人不  
識細看還是破袈裟樹南祚



法華經如長者有一大宅於後宅舍忽然大起

胡蜂休想舊時窠五百郎君不奈何慾火逼來無走  
路癡心夢上白牛車門前羊鹿權爲喻室內唯唵總  
是譌燈時吳烟相惱處出身不用動干戈治父川

法華此經開方便門示真實相深固幽遠無人能  
到

謾言幽遠涉途程到者方知不夜城鼓角聲寒蓮漏  
永佛燈猶作向來明圖極岑

法華是法住法位世間相常住

雲門云釋迦老子甚處去也 法林音云人說跛脚  
老單單祇一撇果然

犬子使吠賊牛子使牽犁衲僧若恁麼未曾摸著皮  
楊岐會

世間相常住黃鶯啼綠樹眞個可憐生動著便飛去

朴翁銘

茨菰葉爛別西灣蓮子花開尚未還妾夢不離江上  
水人傳郎在鳳凰山祖翁貌

法華若人散亂心入於塔廟中一稱南無佛皆已

成佛道

平陽志舉偈畢云且道以何爲驗良久云片葉飄庭  
際西風萬里秋

一攬花蹊一攬紅千株桃李萬株穠何人識得春風  
面五色芳菲處處逢遠菴體

法華授記品

祖翁田地舊皇都且莫從人向外圖空劫國名何處  
起威音佛號是誰呼溪山在在雖云異雲月家家豈  
有殊寧可無鞋亦脚走丈夫豈肯受塗糊百愚斯

法華是法非思量分別之所能解

一朝起來七件事柴米油鹽醬酢茶有人識得其中  
主不用天涯問作家竺菴成

法華十方佛土中惟有一乘法無二亦無三除佛

方便說

慙休乾云如何是方便說寒夜凝朝露晴天散夕霞

法華大通智勝佛十劫坐道場佛法不現前不得  
成佛道

三際斷時凡聖盡十身同處剎塵周無私應物隨高



下抹過僧祇大劫脩保率勇

燕坐道場經十劫一一從頭俱漏泄世間多少守株

人掉棒攪打天邊月徑山景

太平時代不談兵路不齎糧戶不扃十劫生來成底

事平生肝膽一時傾道場融

劫初鑄就毗盧印古篆雕蟲尙宛然堪笑堪悲人不

識却嫌字畫不完全環溪一

穴處巢居上古風魚潛水底鳥翔空一聲撲素渾無

象雲卷星攢又自工又安容手竅鑿混沌脂粉鴻濛

湛然澄

端妍嬌面露些些因甚還將衫袖遮疑殺古今人無

數半思半恨滿天涯聖可玉

法華如來如實知見三界之相無有生死若退若

出亦無在世及度者非實非虛非如非異不如

三界見於三界如斯之事如來明見無有錯謬

岫巒峰頭神禹碑字青石赤形模奇無目仙人纔一

見便應撫掌笑嘻嘻雲暗蒼龍化葛陂圓極岑

人唇風餐水漬根石邊尙有舊苔痕化工肯未隨寒

暑又拾清香爲返魂閒極雲

法華普門品呪詛諸毒藥所欲害身者念彼觀音

力還著於本人

東坡別云念彼觀音力兩家都沒事法眼益因閱至

此乃頌云呪詛毒藥形殺之逆眼耳若通本人何失

法華若有衆生聞是觀世音菩薩品者當知是人

功德不少

觀音門普普門收纔著欄衫便不差昨夜猿啼新嶺

上今朝鶴唳古溪頭惡風飄時迴光息欲火焚燒當

處休瓔珞受來都不用平生活計冷湫湫治父川

文殊般若清淨行者不入涅槃破戒比丘不入地

獄

偈問洞山全意旨如何全云度盡無遺影還他越涅

槃理安問拈拄杖云清淨行者不入涅槃破戒比

丘不入地獄卓一下云曼殊大士來也靠杖云斷岸

孤舟天獄盡云我爲你作個方便譬如有人自不

欲廁却要走出古人坑廁你道還好笑麼若向者裏

辨得我也許你向衲僧門下識得些子臭氣

養就家欄水牯牛自歸自去有來由而今穩臥深雲裏秦不管兮漢不收祖印明

壁上安燈盞堂前置酒臺悶來打三盞何處得愁來  
徑山杲

清淨行者不涅槃破戒比丘無地獄天台相接到西川總是自家親眷屬照堂一

夜來村飲歸健到三四五摩挲青莓苔莫瞋驚著汝自得暉

陪錢弄傀儡拌命打鞦韆渾家無眼見掩面哭蒼天或菴體

國有定亂劍家無白澤圖神仙張果老踏破藥葫蘆朴翁鉅

清淨行者清淨破戒比丘破戒各自安怙家邦切忌放賊過界退菴奇

涅槃地獄本無差祇爲從前被眼遮三脚瞎驢纔蹄跳鑊湯爐炭卽吾家高峯妙

常拌白日尋花巷盡把黃金作酒錢反著欄衫高拍掌大家齊唱太平年楚石琦

一葉翩翩不繫船夜深月落正堪眠蘆花兩岸無餘影白鷺飛來破曉烟卽念現

維摩因須菩提持鉢入維摩舍乞食時摩詰取鉢盛飯謂言汝能於食等者諸法亦等諸法等者於食亦等如是行乞乃可取食乃至彼外道六師是汝之師因其出家彼師所墮汝亦隨墮乃可取食入諸邪見不到彼岸住於八難不得無難同於煩惱離清淨法汝得無諍三昧一切衆生亦得是定其施汝者不名福田供養汝者墮三惡道爲與衆魔共一手作同諸勞侶汝與衆魔及諸塵勞等無有異於一切衆生而有怨心謗諸佛毀於法不入衆數終不得滅度汝若如是乃可取食須菩提聞此茫然不知以何答置鉢欲出

寶峰清云義出豐年還他摩詰其奈須菩提貪觀天上失却手撓致令食到口邊被人奪却 廣胤標云拖馳說之口奪紛爭之辯莫之敢逆者貴乎明斷尊者當時何不取一搏食待伊恁麼道直下塞却渠口免得者漢向葛藤窠裏著倒雖然於今看來亦似冷

地輪他先一著分明笑倒老空生 林友卉云盡謂  
須菩提不能倒拈蝎尾逆捋虎鬚致令食到口邊被  
人奪却殊不知尊者置鉢欲去不是好心

無邊無際休斟酌潮去潮來本自平清濁淺深并苦  
澹一般滋味迴分明 保寧勇

邪見歸依外道師與師同墮復何疑憑君滿鉢盛香  
飯午日亭亭腹正饑 張無盡

入林不動草入水不動波鏤湯無冷處合眼跳黃河  
鼓山珪

獨坐許誰知青山對落暉花須連夜發不待曉風吹  
徑山杲

白日街頭獨自行夜間屋裏獨自臥山高不礙白雲  
飛竹密不妨流水過 照堂一

維摩智度菩薩母容受一切法而無分別相

一切法離分別相依前諸相自如如春風景裏乾坤  
大無限江山開畫圖 仰山欽

維摩示疾毗耶佛敕文殊往問殊曰彼上人者難  
爲酬對深達實相善說法要辨才無滯智慧無礙

一切菩薩法式悉知諸佛秘藏無不得入降伏衆  
魔遊戲神通智慧方便皆已得度雖然當承佛旨  
詣彼問疾

馮山果云居士門高可謂壁立萬仞水泄不通擬心  
則差動念則隔不擬不動落在無事界中作麼生入  
良久云退後退後

冷坐毗耶城白病一時發不得文殊來幾乎無合煞  
徑山杲

示疾毗耶方丈文殊亦難近傍看來無藥可醫祇是  
忌口爲上 荆翁琰

詐病從來不可醫文殊特爲下鍼雖事禪一喙長三  
尺問著依前似鼓椎 無準範

手提拂子坐胡床眼似流星鬢似霜終日無言長示  
疾却將好肉剗成瘡 率菴琮

皺斷孃生八字眉者些病痛有誰知文殊鍼出膏肓  
穴也是將爲死馬醫 仲宣珩

丈室端居錯用心那堪獨樹不成林焉知病在膏肓  
裏却被文殊下一鍼 笑翁堪

維摩文殊師利從無住本立一切法

伊菴權云眼裏藏鍼耳中出氣

自小從來不脫空掘翻海底種青松街頭撞見李三

黑你自西兮我自東齊水洗

無欠無餘無必無固法法圓融頭頭顯露無住爲本

兮妙叶難量立一切法兮沙界罔措咄咄好鳥不棲

無影樹竹浪□

維摩不斷煩惱而入涅槃

朝生暮死千萬徧一日幾回相見面展陣開旗放出

來一指動時客戲見白雲端

維摩三十二菩薩各說竟文殊曰我於一切法無

言無說無示無識離諸問答是爲入不二法門殊

又問維摩摩默然殊歎曰乃至無有語言文字是

真入不二法門

保福展云維摩一默未出化門又云大小維摩被文

殊一坐至今起不得報恩秀云要起有甚麼難便掌

雪竇顯舉文殊語畢維摩道甚麼良久云勘破了

也 琅瑯覺云文殊讚善也是杓卜聽虛聲維摩默

然汝等不得讚龜打瓦 大滙智云不二法門是默

然不是默然若是文殊則爲贅語不是維摩一場虛

設 報恩秀云橫身爲衆不免禍出私門那堪文殊

點破已露瑕眚直饒天童道現屠俗塵而無俗氣也

是掩鼻偷香 磬山脩云語默上摸索有甚交涉若

向衆菩薩未啓口處識得根源方知說卽是默默卽

是說衆菩薩未曾說一字老維摩其聲如雷會麼龍

象蹴踏非驢所堪 博山來云明修棧道暗度陳倉

若以語默商量何異鉢盂安足二大士雖別塗脂傳

粉水洩不通以不二法門較之尙遠在 瀛山闇云

不二法門文殊盡其神力捶擊不開爭奈保福猶嫌

未出化門爲甚如此祖關無險易玄路有高低 天

目灝云維摩若不得文殊幾乎病殺

維摩大士去何從千古令人望莫窮不二法門休更

問夜來明月上高峰明覺顯

虛空鳥跡謾追尋幽鳥投聲又報春若識東西無異

路淨名一室不沉愁明圓

一個兩個百千萬屈指尋文數不辦暫時放在暗窗

前明日與君重打算白雲端

言言言兮飄風灑雪默默默兮雷轟電掣藕絲孔裏

騎大鵬等閒挨落天邊月懶菴語

曼殊問疾老毗耶不二門開看作家琨表粹中誰賞

鑑忘前失後莫咨嗟區區投璞兮楚國賸士璨璨報

珠兮隋庭斷蛇休點破絕眈瑕俗氣渾無却較些宏

智覺

深入不二門巧盡反成拙一默定千差常說熾然說

說拙萬古清風寒徹骨松源岳

有無語默護徒勞居士何曾動一毫世祖功臣三十

六雲臺爭似釣臺高別峰印

夜行侵早盡食程共聽鷄聲到五更忽覺投明天自

曉各安生理樂欣欣南磻間

漁人有睡時蠶婦無閒日三九夜寒天朔風吹水立

節岩秀

維摩佛以一音演說法或有怖畏或斷疑

或有怖畏或斷疑雙明一句絕鍼錐於斯切莫生欣

厭覲面還須眼似眉禾山方

維摩觀身實相觀佛亦然

眼空四海恣縱橫鼻孔揀天信脚行拏得電光爲火

把却來日午打三更或菴語

四大將無來作有一身以已去方人曾聞打水魚頭

痛我佛原來共一眞古南門

金剛世尊食時著衣持鉢入舍衛城乞食於其城

中次第乞已還至本處收衣鉢洗足已敷座而坐

須菩提言希有世尊

食訖跏趺坐石床斗閒闌氣燭天光幾多業識茫茫

者衲被蒙頭在醉鄉水菴一

衛城乞食沿門處祇苑收衣洗足時善現無端讚希

有斯文安得是如斯寶葉源

金剛應如是住如是降伏其心

希有希有佛妙理極泥洹云何降伏住降伏信爲難

二儀法中妙三乘教喻寬善哉今諦聽六賊免遮攔

傅大士

七手八脚神頭鬼面棒打不開刀割不斷閻浮跳躑

幾千回頭頭不離空王殿治父川

截斷從教來滾滾隨流未必去滔滔青山長鎖欲飛  
勢滄海合知來處高心聞責

金剛凡所有相皆是虛妄若見諸相非相卽見如  
來

法眼益別云若見諸相非相卽不見如來 寶華忍  
云大小世尊抱橋柱洗澡不肖則不然若見諸相非  
相卽見諸相雖然要見如來卽易見諸相則難 妙  
偉俊云大小寶華只解草屨裏蹉跳要見諸相非相  
更參三十年

有相有求皆是妄無形無相墮偏枯堂堂密密何曾  
閒一道寒光爍太虎治父川

映林映日一般紅吹落吹開總是風可惜擷芳人不  
見一時分付與遊蜂心聞責

金剛一切賢聖皆以無爲法而有差別

千巖長云世尊有兩個舌頭無明祇有一個舌頭一  
切賢聖皆以無爲而無差別

一金成萬器皆由匠者智何必毗耶城人人說不二  
覺海元

仁者見之謂之仁智者見之謂之智寒時向火熱時  
乘涼健卽經行困卽打睡仰面看天開口取氣保舉  
金剛一切諸佛及諸佛阿耨多羅三藐三菩提法  
皆從此經出

僧問首山如何是此經山云低聲云如何是持山  
云莫染汚 治父川云且道此經從甚處出須彌頂  
上大海波心

佛祖垂慈實有權言言不離此經宜此經出處還拈  
委便向雲中駕鐵船切忌錯會治父川

水出崑崙山起雲釣人機客問來因祇知洪浪巖巒  
闊不肯拋絲弄斧斤投子青

金剛應無所住而生其心

山堂靜坐夜無言寂寂寥寥本自然何事西風動林  
野一聲寒鴈唳長天治父川

應無所住生其心廓徹圓明處處眞直下頂門開正  
眼大千沙界現全身默堂定

東村市接西村路南舍花開北舍春山月如銀牽老  
與又貪縱日上高岑理安閒

月明星稀鳥鵲南飛繞樹三匝無枝可棲石奇雲

應無所住豁心空金屑依然著眼中驚地虎空連底  
說大千經卷一時通風雲權

單槍正馬走風塵柳色烟花敢近身羌笛一聲遼膽  
裏霜輪現處更愁人隱元琦

金剛若爲人輕賤是人先世罪業應墮惡道以今  
世人輕賤故先世罪業卽爲消滅當得阿耨多羅  
三藐三菩提

崇壽稠別云心外有法應墮惡道守住自己爲人輕  
賤博山來云縛殺多少人解脫多少人兼雌帶黃  
若以因果評入地獄如箭射

明珠在掌有功者賞妍嬌不來全無伎倆伎倆既無  
波旬失途霍曇瞿曇識我也無明覺顯

水不洗水誰不知旋嵐常靜太驅馳千年曆日如能  
算免被逐官掌上推白雲端

四序炎涼去復還聖凡祇在剎那間前人罪業今人  
賤倒却前人罪業山張無盡

綴綴功過膠膠因果鏡外狂奔演若多杖頭擊著破

竈墮竈墮破來相賀却道從前孤負我天童覺

關關幽鳥啼紅翠一榻薰風驚午睡舞袖單衫入市  
鄧張公喫酒李公醉石兩方

故邦不相使單于鬻雪吞鼉意自如沙漠十年持漢  
節忠英不假鴈傳書具足有

金剛如來所得阿耨多羅三藐三菩提於是中無  
實無虛

菩提無實亦無虛幾個男兒是丈夫丹穴不歸金鸞  
鶯碧潭空浸玉蟾蜍佛慧景

生涯如夢若浮雲活計都無絕六親留得一雙青白  
眼笑他無限往來人治父川

水中鹽味色裏膠青如來所得一款招成堪笑僧絲  
雖敏手何曾描得誌公眞牧雲門

金剛過去心不可得現在心不可得未來心不可  
得

南堂靜舉德山到潭州詣婆覓點心婆問三心不可  
得上座點那個心德山無語今夜代德山下轉語待

他道三心不可得祇向道咄咄老婆不得無禮似恁



麼莫太剛麼不然道婆子你從甚麼處得者消息來  
似恁麼又却太弱麼當時待他道三心不可得點那  
個心祇向他道與我摸熱底一隻來纔擬議便與換  
却眼睛乃頌云

過去現在未來心播土揚塵無處尋坐臥經行無不  
是承當直下莫沉吟

過去心不可得收綸罷釣秋江碧扁舟古岸恣閒眠

明月蘆花深穩密承天宗三

現在心不可得法王家法存今昔謀臣猛將定封疆  
說甚隋珠并趙璧

未來心不可得不可得中祇麼得石含玉兮地擎山  
惟證乃知難可測千古流芳誰共知清風匝地有何  
極

三清道士無仙骨八教闍黎毀梵書黑漆崑崙舞花  
鼓天親無著暗嗟吁或菴體

去歲春風燕子多社前先到舊時窠今年春色歸將  
半簾幕蕭蕭不見過寶葉源

金剛是法平等無有高下是名阿耨多羅三藐三

菩提

須彌山頭大洋海底擬欲動時錯矣錯矣拂松客

金剛若以色見我以音聲求我是人行邪道不能  
見如來

色見聲求也不妨百花影裏繡鴛鴦自從識得金鍼  
後一任風吹滿袖香塗毒策

盡却耳根并眼底不知何處見如來數聲幽鳥啼寒  
木一片閒雲補斷崖菴菴璇

金剛一切有爲法如夢幻泡影如露亦如電應作  
如是觀

幻化空身卽法身個中無染亦無塵拈匙把箸如明  
了掃地燒香不倩人慈受深

作事存心貴要精不精終是不通靈棋逢絕處著方  
妙梅到寒時香愈清蘭極雲

暑往寒來總不知有無名相一時離正如黑漆屏風  
上醉寫盧仝月蝕詩雪巖欽

華嚴普眼欲見普賢不能得見乃至三度入定徧  
觀三千大千世界了不可得白佛佛曰汝但於靜



三昧中起一念便見普眼普眼於是纔起一念見普賢乘六牙白象住在空中

翠岩芝云我道普眼推倒世尊世尊推倒普眼你道普賢在甚麼處 林臯豫云纔起一念便見普賢祇如普賢還見普眼麼 崇先奇云普眼不見普賢則且置你道世尊還見普賢麼諸人不得隨人脚跟轉世尊云但於靜三昧中起一念見底是普賢不是普賢若說是前三度爲甚不見若不是又道向空中乘六牙白象不可總作野狐精見解 破闇燈云盡大地是個普賢未舉念時早已相見了也何用作許多伎倆雖然從前汗馬無人識祇要重論蓋代功飄飄一鴈落寒空步步追空覓鴈蹤踏破草鞋跟子斷巍然獨坐大雄峯踏堂遠

華嚴佛告普眼願有人能說幻術文字中種種幻相所住處不眼曰不也佛言普眼幻中幻相尙不可得何況普賢秘密身境界秘密語境界秘密意境界而能入其中能入能見

晃晃在心目昭昭居色塵莫將銀世界喚作假銀城

北磻簡

華嚴解脫長者欲見安樂世界阿彌陀佛隨意即見

古木雲封暗吐馨微風吹動鳥啼新夜明簾外翻身轉滿袖花香滿袖春本珠珎

華嚴菩薩以菩提心爲家以如理脩行爲家法

浪宕樓頭無籍人零丁利帝可憐生惡又聚是此中入佛子住非他處成北磻簡

丈夫何必經經然蘭麝香分妓女邊酤酒烹羊且會客尤欣酩酊笑頑仙靈潤機

張公原不隱深山家住青谿白石灣編得策筇隨處賣清風明月爲誰閒海慧愜

華嚴如有大經卷量等三千界在於一塵中一切塵亦然有一聰慧人淨眼悉能見破塵出經卷廣饒益衆生

擬破一微塵分明昧此經如何破經卷出此一微塵北磻簡

華嚴我今普見一切衆生具有如來智慧德相但

以妄想執著而不能證得

短篷爛醉絲蓑翁月落江村睡正濃曉覺起來雙眼  
碧波心牽動一絲風斷橋偷

迷是誰兮悟是誰山僧贏得眼如眉新糊紙被烘來  
煖睡到天明日上時無文舉

自沽村酒醉爛如泥開得眼來日又西馳粟菴鼎

華嚴法界觀法身流轉五道名曰衆生故令衆生  
現時法身不現

佛眞法身抵死謾生自沽村酒自把瓷瓶却著衫來  
作主人北磻簡

楞伽五法三自性二種無我

破瓶豈復作瓶事焦種不因生槩芽如彼靈空槩大  
子毛輪垂法翳開花鼓山瑤

陝府鐵牛白癩嘉州大象耳聾兩個病痛一般咄哉  
漆桶不快徑山杲

楞伽佛語心爲宗無門爲法門

百八全該一句通毫端不涉示眞宗無門衍出潑天  
戶千聖同途轍不同竹溪

涅槃諸行無常是生滅法生滅滅已寂滅爲樂

徑山杲云眞生無可生眞滅無可滅寂滅忽現前蝦  
蟬吞却月 天寧琦云寂滅不現前心心生與滅龜  
毛扇子扇泥牛一點血 天奇瑞云三界大師何得  
似靈龜拽尾既是諸行無常因甚却存寂滅 興善  
廣云黃面老漢話作兩懣

涅槃譬如猛火不能燒薪火出木盡名爲燒薪

黑夜三更認子爲賊趕到天明笑殺老伯古南門

心經是大神呪是大明呪是無上呪是無等等呪  
黯淡灘黯淡灘十度船來九度翻惟有二三山陳上舍  
擔一柄傘岸上行奈我何無準範

是大神呪四大六根元不有是大明呪三世十方無  
透漏是無上呪海印圓光明已久是無等等呪士農  
工商各成就何故去年梅今年柳顏色馨香依舊等  
閒勘破悟桃花選甚法身藏北斗或菴體

應化聖賢

文殊因菴提遮女問明知生是不生之理因甚却  
被生死之所流轉殊曰其力未充

進山主問脩山主明知生是不生之理因甚被生死之所流轉脩云筍畢竟成竹去如今作筏使得麼進云你向後自悟去脩云上座作麼生進云者個是監院房那個是典座房脩禮謝 羅漢機云有者道與麼答話添上一重枷鎖殊不知文殊等閒出一語如金剛王劍纔擬議早是血濺梵天了也雖然今日却被機上座捉敗 雲松品云眉梢頭日上月下脩山主未別機宜腦頂後雲捲風馳進山主慣得其便雖然如是脩山主禮拜不是好心 木菴標云登高而招臂非加長而見者遠順風而呼聲非加疾而聞者彰菴提文殊問在答處答在問處二俱且從祇如生死還干涉得伊麼良久云白日青天切忌說夢將軍有力下重圍八戶風高馬不嘶兩眼忽開天地闊太平無象到今時中舉本

漁蓑倒挂祇麼行苦雨惡風晝掩門陣陣吹來迷古渡閒愁徒自向誰分法林音

文殊問菴提遮女曰生以何爲義女曰生以不生爲生義曰如何是生以不生生爲生義女曰若

能明知地水火風四緣未嘗自得有所和合而能隨其所宜以爲生義又問死以何爲義女曰死以不死死爲死義曰如何是死以不死死爲死義女曰若能明知地水火風四緣未嘗自得有所離散而能隨其所宜以爲死義

生無所生死無所死風動塵飛波沈浪止和合離散隨處發現滿月彎弓雙鵬一箭佛注泰

問處分明答處端當機觀面不相瞞死生生死原無際月上青山玉一團箇翁敬

文殊令善財採藥曰是藥者採將來善財徧觀大地無不是藥却來白曰無不是藥者殊曰是藥者採將來財乃拈一莖草度與殊殊曰此藥能殺人亦能活人

五祖戒出善財語云慚愧 首山念云文殊大似掩耳偷鈴 瑯琊覺云文殊可謂誠實之言要且額頭汗出口裏膠生 滄山詰云善財能採文殊善用非但寢疾毗耶直饒盡大地人抱必死之疾到文殊所教他個個脫體而去何故解用不須霜刃劍延齡何

必九還丹 梁山遠云得之於心伊蘭作栴檀之樹  
失之於旨甘露乃疾藜之園文殊當時與麼舉揚若  
不是善財聲應氣求未免一場懺懺還知二老落處  
麼處處綠楊堪繫馬家家門首透長安 天童華云  
文殊被善財換却眼睛 烏石道云盡道善財能採  
不能用文殊能用不能採殊不知兩個漢天共白雲  
曉水和明月流 崇先奇云二人互相熱瞞不顧旁  
觀者哂

是藥拈來更不疑師資相見在臨時從茲病甚無醫  
處殺活還應作者知佛印元

大地蒼生病似麻吉祥靈藥示無涯其間殺活難分  
辨又是重添眼裏花 保寧勇

藥病相治貶更褒當機殺活按吹毛毗盧海闊烟波  
靜誰把長竿釣巨鰲 照覺總

採藥與用藥相逢一會家殺人活人不眨眼白玉無  
瑕却有瑕石田薰

無著菩薩問善財曰我欲見文殊何者卽是財曰  
汝發一念心清淨卽是無著曰我發一念心清淨

爲甚麼不見財曰是真見文殊

神鼎揆云無著不見文殊顚預不少善財鉤頭有餌  
頭上安頭若起心精進得見文殊三生六十劫復頭  
不見如何真是見水中鹽味色膠青翻憐掩鼻偷香  
者眼裏無筋一世貧

無邊身菩薩將竹杖量世尊頂丈六了又丈六量  
至梵天不見其頂乃擲下杖合掌說偈曰虛空無  
有邊佛功德亦然若有能量者窮劫不可盡

白巖符云無見頂相莫說一無邊身設使百千萬億  
無邊身盡其神力窮未來劫亦量不盡雖然乃擡眸  
云白巖者裏不消一覷 法林音云白巖也是貪觀  
天上殊不知世尊無見頂相被無邊身狼藉殆盡  
點天棒月浪施功竹杖拋時親到頂夜深摸著枕頭  
邊被窩肩滿朔風冷 三峯藏

利益菩薩白然燈佛我欲得阿耨菩提唯願世尊  
教示我令速成菩提燈曰利益汝觀此世間何者  
一法是汝所問

含元殿裏話長安明暗雙雙互熱瞞無量劫來成底

事依然忘却寶華冠 菴怡

宗鑑法林卷三

宗鑑法林卷四

集雲堂 編

應化聖賢

舍利弗入城遙見月上女出城弗心思惟此姊見  
佛不知得忍不我試問之乃問甚處去女曰如舍  
利弗與麼去弗曰我方入城汝當出城云何言如  
舍利弗與麼去女曰諸佛弟子當依何住弗曰當  
依大涅槃而住女曰既依大涅槃而住而我如舍  
利弗與麼去

瀉山詰云一人入城一人出城何言如舍利弗與麼  
去若能知二人去處十二時中動轉施爲無非住大  
涅槃若也未知業識茫茫無本可據 東禪觀云舍  
利弗依大涅槃而住坐在解脫深坑月上女如舍利  
弗與麼去也是隨邪逐惡 昭覺勤云住無所住行

無所行見無所見用無所用各人脚跟下廓同太虛  
如十日並照觸處光輝苟知恁麼則與月上女同證  
無生得不退轉隨去來住無不皆在大解脫中三世  
諸佛鼻孔一時穿却說甚麼如舍利弗與麼去 法  
林音云可惜舍利弗被者女子鈍置一上待伊云諸  
佛弟子當依何住但云如月上女與麼住豈不得人  
一牛還人一馬

淡籠烟深鎖霧鷺子寧知此條路直饒撞入涅槃城  
未免隨他與麼去月上女實堪悲愛將青黛畫蛾眉  
佛慧泉

本來正體徹根源出入同途祇此門已住如來大解  
脫掌中至寶耀乾坤 悟勤

相逢打鼓弄琵琶須是還他兩作家曲罷不知何處  
去夕陽斜映暮天霞 石菴珙

大地絕纖塵面南看北斗嫁鷄逐鷄飛嫁狗逐狗走  
雪菴瑾

舍利弗因維摩詰室有一天女散花次問言汝何  
不轉却女身曰我從十二年來求女人相了不可

得當何所轉卽時天女以神通力變舍利弗作天女乃自化身如舍利弗而問言何不轉却女身弗以天女相答我今不知何轉而變爲女身天曰舍利弗若能轉此女身則一切女人亦當能轉如舍利弗非女而現女身一切女人亦復如是雖現女身而非女也卽時攝舍利弗身還復如故而問言女身色相今何所在舍利弗言女身色相無在無不在天曰一切諸法亦復如是無在無不在

白雲端云我不如汝 磬山修云舍利弗好心不得好報盡道被天女轉却女身據山僧見處天女莫道轉得舍利弗一人直饒轉得大地男子爲女身自家女身脫不得在何故旣云十二年來求女人相了不可得你那裏見舍利弗轉女身來

鷲子已圓無漏種換却身形總不知通途一貫非他物午夜胡僧步雪歸 正堂辨

舍利弗問須菩提夢中說六波羅蜜與覺時是同是別提曰此義幽深吾不能說會中有彌勒大士汝可往問弗往問彌勒勒曰誰名彌勒誰是彌勒

雪竇顯云當時若不放過隨後與一拶誰名彌勒誰是彌勒者便見冰消瓦解 昭覺勤云夢中說六波羅蜜與覺時是同是別低聲低聲此義幽深吾不能說爛泥裏有刺會中有彌勒大士可往問之推過別人又爭得舍利弗問彌勒將錯就錯誰名彌勒誰是彌勒者面皮厚三寸又云還委悉麼一句當機萬緣寢削 古南門云五更侵早起更有夜行人夢中說法覺無殊妙用神通不出渠誰是誰名總彌勒祥光起處現心珠 昭覺勤

須菩提說法帝釋雨花提問此花從天得耶從地得耶從人得耶帝釋皆曰弗也又問何處得耶釋乃舉手提曰如是如是

雲門偃云帝釋舉手處作麼生與你四大五蘊釋迦老子是同是別 天寧琦云澤廣藏山靈能伏豹放過須菩提尊者尋常將什麼說法也好與一拶

須菩提嚴中宴坐諸天雨花讚歎提曰雨花者誰云何讚歎天曰我是梵天敬重尊者善說般若提曰我於般若未曾說一字天曰如是尊者無說我



乃無聞無說無聞是真說般若

雪竇顯云避諠求靜處世未有其方他在巖中宴坐  
也被者一隊漢塗汙伊更有者老漢把不住問是何  
人早見敗闕了也我敬重尊者善說般若惡水蔞頭  
潑又云我於般若未曾說一字草裏走尊者無說我  
乃無聞識甚好惡總似者般底何處有今日復召大  
衆雪竇幸是無事人你來者裏覓個甚麼以拄杖一  
時趁下 磬山修云明覺似個築漏洞底一般空生  
梵天底不妨築著自家底漏洞還曾築著也無

賓頭盧因阿育王問曾聞尊者親見佛來是否者  
以手策眉良久曰會麼王曰不會者曰阿釋達池  
龍王曾請佛齋吾是時亦預其數

汾陽昭代云却勞尊者 翠巖真云且道什麼處見  
直饒雪天縹緲湖光澹蕩且莫說夢 保寧勇代云  
希有希有 雲居元代王薰面便唾 梁山遠云大  
王輕輕借問尊者草草承當仔細檢點將來不勝漏  
逗那裏是漏逗處國清才子貴家富小兒嬌 虎丘  
隆云尊者得大機顯大用不枉親見佛來雖然賴阿

育王放過若不放過洎合打失眉毛 密印名云尊  
者喫育王一齋而積劫薰修漏洩殆盡會打黃鶯兒  
何必金彈子惜哉 法林音出王語云將謂尊者親  
見佛來

靈山會上舊家風脫略從茲勢莫窮金斗峰前重漏  
洩莫將蔣子當天雄 正堂辨

尊者親曾見佛來雙眉策起笑顏開古今不隔絲毫  
許天上人間孰可陪佛照光

以手策起眉毛千聖從來不識一會靈山儼然說甚  
今朝昨日月林觀

策起眉毛答問端親曾見佛不相瞞至今應供四天  
下春在梅梢帶雪寒 天童淨

君王一語出如綸尊者眉毛八字分四海風清烟浪  
靜碧天無際水無垠 無準範

殃幅摩羅尊者未出家時事外道受教爲僞尸迦  
欲登王位用千人拇指爲花冠所得九百九十九  
惟欠一指遂欲弑母取指佛乃化作沙門在前囑  
遂釋母追佛追之不及乃曰瞿曇住住佛曰我住

久矣是汝不住岫聞之心忽開悟遂投佛出家

殃岫雄雄方勇銳瞿曇住住息風波殺人作佛當頭

割覆雨翻雲在剎那陳山如

從人求覓枉奔波過在孳生口數多殺却渾家仍自

殺誰能奈得你儂何野雲南

殃岫持鉢至一長者家值其婦產難長者曰瞿曇

弟子當有何法能免產難岫曰我乍入道未知此

法待去問佛却來相報乃歸白佛佛曰你速去說

我從賢聖法來未曾殺生岫奉佛語往告其婦聞

之當時分婉

天童恣云世尊移花兼蝶贈殃岫擔泉帶月歸產婦

雲在嶺頭開不徹長者水流澗底太忙生巢內有犯

四人俱依律發放了也且生下底孩兒如何理論分

付沒眼村翁一任鑽龜打瓦廣教玉云殃岫持鉢

到長者門掬水月在手弄花香滿衣值其家產難險

瞿曇弟子當有何法能免產難事因叮囑起我乍入

道待回問世尊切忌話墮及返具事白佛大似詐明

頭汝速去報我從賢聖法來未曾殺生面亦不如語

直持語往告不妨軟頑其婦得聞當時分婉且信一

半今日將古人肝膈盡情揭露了也尙有一處諸君

未經點出是那<sub>一</sub>處送語傳言祇大都上他機境使

塗糊同時繡出鴛鴦譜信彩拈來是也無檀度依

云世尊因風吹火尊者曲順人情其婦得產多少人

分疎不下噫物類之起必有所始榮辱之來必象其

德所由來尙矣天潔旻云長者開當路陷穿要使

天下人行不得世尊放黃河鐵閘直得九曲三灣盡

倒流且道殃岫分上又作麼生洪波浩渺難通信從

教點額宿龍門

月裏嫦娥不畫眉祇將雲霧作羅衣不知夢逐青鸞

去猶把花枝蓋面歸竹菴珙

華陰山前百尺井中有寒泉徹骨冷誰家女子來照

影不照其<sub>心</sub>照表領龜山景

綬仗神旗曉曉風鷄人催唱鼓鼙鼙銅壺漏永何時

歇如此相催即老翁南夏茂

斗轉霜輪徹骨清一天寒霜浸虎靈傳聲空谷無踪

跡一任韓獪吹月明龜山珙



煙雲封古洞迷却乍遊人借問三家老春光分半燈

磬山修

嚴君高臥富春磯謝公深隱薔薇洞謾道寥寥沒信  
通石女唱出雲中夢咄可知禮也具足有

冰挾蝦蟆火飛蝴蝶柳絮愁霜荷花愛日要得燕國

寧太子入秦質三宜孟

古路橫秋不可行遊人何事若伶仃霜天孤鴈一聲

悄渺渺雲山倍慘情白巖符

八百連雲雪未消日高秦樹恨迢迢長安一夜花開

盡二月春風似剪刀節巖瑤

晴光萬里含虛碧湧出冰壺玉一團隔岸曲終人不

見空餘星斗落江寒法林音二

賢聖法來不殺生一回相見一傷情不知上院夜闌

者慣聽南柯第十更

那吒太子析肉還母析骨還父然後現本身運大

神力爲父母說法

佛眼遠云肉既還母骨既還父用甚麼爲身學人到

者裏若見得去廓清五蘊吞盡十方

骨肉都還父母了不知那個是那吒一毛頭上翻身

轉百億毛頭渾不差徑山杲

那吒太子本來身卓卓無依不受塵雲散水流天地

淨籬間黃葉正爭春自得輝

骨還父肉還母日西沈水東注良久云露北磻簡

不假胞胎未是親曹山一笑起風塵夜來玉笛從何

發惱亂深閨夢裏人覺浪盛

涼夜霜飛天地秋凋殘木葉見江流一時體露金風

裏月落澄潭不可求笠山翠

乳鴉啼散玉屏空一枕新涼一扇風睡起秋聲無覓

處滿塔梧葉月明中月广屏

七賢女同遊屍陀林一姊指屍曰屍在此人在甚

處一姊曰作麼作麼諸姊諦觀各各契悟感帝釋

散花曰惟願聖姊有何所需我當終身供給女曰

我家四事七珍悉皆具足惟要三般物一要無根

樹一株二要無陰陽地一片三要叫不響山谷一

所釋曰一切所需我悉有之若三般物我實無得

女曰汝若無此爭解濟人遂同往白佛佛曰我諸

弟子不解此義惟有諸大菩薩乃解此義

黃龍心云樹子若無寧善給濟既要給濟心不虛發  
如今有求無根樹子將何抵對 寶峰文云帝釋是  
會不會若不會因甚散花請給若會又道實無此三  
般物作麼生明辨得不辜負聖女 三峯藏云聖女  
被帝釋熱瞞 福嚴容云七賢女大似買鐵獲金鑿  
石致玉得意則不無怎奈被瞞曇塗抹一上 嵩菴  
正云三般物帝釋早已拈出可惜賢女錯過

無陰陽地叫不響山無根樹子大家攀七賢女太嬌  
癡却將紅粉畫蛾眉嬌尸無此三般物那得天花撩  
亂飛佛鑑勸

屍在此兮人何在疾雷破山風振海雲飛雨散相見  
時觸骸眼裏放光彩龍牙才

無根樹子一株山翁不費誅鋤槌碎千年桃核不須  
緣木求魚蒙菴岳三

無陰陽地一片明明買賣賤死屍無處活埋露出  
三頭兩面

不應山谷一所透出千門萬戶清曉一聲杜鵑勸人

不如歸去

七珍八寶任君需三物從來的是無若向無中拈得  
出不須見佛問何如天目證

城東老姥與佛同生不欲見佛每見佛來即便回  
避雖然如此回顧東西總皆是佛遂以手掩面十  
指掌中亦總是佛

雪竇顯云他雖是個老婆宛有丈夫之作既知迴避  
稍難不免吞聲忍氣如今不欲見佛即許你切忌以  
手掩面何故明眼底戲著將謂雪竇門下教你學老  
婆禪 福嚴容云老姥不欲見佛天然氣槩東西總  
皆是佛氣槩天然於此見得老姥即佛佛即老姥不  
然有寒暑兮促君壽有鬼神兮妒君福 黃蘗琦云  
不欲見佛風平浪靜總皆是佛水漲船高且道老姥  
風騷在甚處若不同牀睡焉知被底穿 清化巖云  
雪竇失却一隻眼殊不知老婆猶帶脂粉氣在見個  
黃面老子即便迴避若見山河大地又向甚處迴避  
還有爲雪竇出氣者麼 文峰玉云婆子忒殺逞俊  
殊不知也是日下逃影

開眼也著合眼也著回避無門將錯就錯祥麟祇有一隻角掩室開

城東聖姆坐蓮臺大地衆生正眼開與佛同生嫌見佛一身難作二如來虛堂愚

平生不願佛相逢十指尖頭現紺容夾路桃花風雨後馬蹄何處避殘紅石室輝

淡掃蛾眉月下舞風流盡誰能覩玉容寂寞泪闌干一樹梨花春帶雨法林音

善財童子詣妙高峰參德雲四維尋覓七日乃見在別峰經行

鳳日珣云徧觀求覓竟不可見有道無見是真見又有道法身無相要見個甚麼恁麼解會三生六十劫也未夢見擊案一下云是處是慈氏無門無善財嵩菴正云善財於尋覓不見處却較些子及至別峰相見有甚交涉恁麼批判三十年後也要諸方檢點妙高峰頂草茸茸步步相隨不見踪若謂別山親觀面片帆已過海門東別山智

澹煙漠漠草茸茸七日徘徊信不通一步竿頭親蹉

脚海門波捲白蘋風棘田心

渺渺雲山路正窮逡巡無計可尋蹤依稀似曲繡堪聽又被風吹別調中湛然澄

瞻風撥草路方窮四顧寥寥祇有空莫怪德雲無覓處祇因親到妙高峰即念現

一念不生能觀體直下依然雲萬里三級浪高魚化龍擬人空辱夜塘水道林志

善財詣那羅素國毗目瞿沙仙人無量仙人同音讚已下牀執手佛剎現前悟真淨智卷舒自在得無勝幢法門

石菴瑀云衆中道毗目仙人將一顆黑豆換却善財眼睛殊不知毗目仙人被善財熱瞞一上至今放了手收不得如今還有爲毗目仙人作主者麼坦然古路勿迂疎霽月光風動十虛毗目善財當日事好如潘閬倒騎驢或菴體

善財後詣樓閣前彌勒彈指一聲樓閣門開善財入已還閉見千百萬億樓閣一一樓閣有一彌勒領諸眷屬并一善財而立其前彌勒復彈指曰善

男子法性如是

妙意童真末後收善財到此罷南遊豁然頓入毗盧藏悔向他山見比丘張無盡

妙峰孤頂無知識百十城遊喪善財樓閣若還彈指現分明有眼不曾開或菴體

問處分明答處端還同雙劍倚天寒一從樓閣門開後滿面慚惶無處安潮翁琰

善財初參文殊次第至樓閣所歸到普門城外欲得覲殊殊伸手過百十由旬與摩其頂卽見微塵數知識卽受行其教

上藍超因僧問善財參文殊後因甚却往南方藍云學憑入室知乃通方云到蘇摩城因甚彌勒又遣見文殊藍云道曠無涯逢人不盡投子青云然道無迷悟發證由師不住聖凡莊嚴妙行是以文殊遣去登須彌山海岸逢師市廛禮友或刀山淫舍罪枉王宮或童女童男瞿夷聖后彌勒彈指普賢親瞻再見文殊復有何事信知通方知有道曠無涯不昧光跡歷窮盡妙還知更有一人因甚不參良久云滿頭白

髮離巖谷半夜穿雲過市廛

日出昇空高下周崑崙崙源派入川流春山雲逗風無盡鴈去回南天地秋投子青

五十三個指路人因循流落百餘城草屨蹋破成何事爭似歸家罷問程鐵山仁

茫茫夢裏去遊南五十三參發指端大士臂長衫袖短善財脚瘦草屨寬大川濟

平生擔板逞婆羅參罷歸來問若何一百十城都歷徧識人多處是非多笑翁堪

五十三人一縷穿小兒雖小膽如天茫茫烟水無重數買得風光不用錢北磬簡

南方經歷幾雲烟收得珍奇貨滿船彈指便風帆到岸一時翻作大光錢無準範

善財詣佛會中參普賢見乘白象王處紅蓮座一心親近諮問法要智慧圓滿行願功成卽獲佛德

顯同果海微塵三昧

打鼓弄琵琶還他一會家木童能撫掌石女解烹茶雲散天邊月春來樹上花善財參徧處黑豆未生芽

延慶忠

廣額屠兒日殺千羊一日放下屠刀曰我是賢劫千佛一數世尊曰如是如是

護國元云者屠兒當時放下刀便了不妨令人疑著乃云我是千佛一數笑殺傍觀 東山覺云今時叢林將謂廣額是過去一佛權現屠兒且喜沒交涉又謂是殺人不眨眼底漢颺下屠刀立地成佛且喜沒交涉又謂放下屠刀云我是千佛一數者一佛多少分明且喜沒交涉要識廣額麼夾路桃花風雨後馬蹄何處避殘紅 天章玉云俊哉廣額屠兒者個刀子入手放去收來磅礴自在惜被世尊鈍置一上未免打個沒折合要識者屠兒麼意氣不從天地得要識世尊麼順水推舟力不多 城山洽云者屠兒宛有大人之作檢點將來也是瞎驢趁隊不見道丈夫自有沖天志豈向他人行處行 昔日爲刀今日佛今朝爲佛佛能刀能刀能佛無差別便見眉閒白玉毫圓悟勦 放下屠刀處棒打不回頭雲自帝鄉去水歸江漢流

選菴休

入夢新回睡起遲妝臺倒鬢整花枝不禁妃子顏如玉何必重栽眼上眉 證心修

天親大士從彌勒宮中下無著大士問經曰人間四百年彼天爲一晝夜彌勒一時中成就五百億天子證無生法忍未審說什麼法天親曰祇說者個法祇是梵音清雅令人樂聞

薦福懷云彌勒已是錯說天親已是錯傳山僧今日將錯就錯與你註破良久云諦聽諦聽向下文長付在來日 雲門澄云天親錯下名言若是內院說底法直得摩竭提國更須掩室毗耶離城猶當杜口何故萬籟有心聞不得孤崖無耳却知音 靈巖儲云將錯就錯則不無薦福若是者個法立字脚也不曾動著更說甚麼向下文長乃豎拄杖云看看木上座將百億四天下百億須彌山百億香水海百億器世界中間所有日月星辰森羅萬象菩薩聲聞人天修羅地獄畜生有情無情四足多足總鏤作一卷無畏普光明經爲汝諸人晝夜說熾然說無閒歇衆中還

有證無生法忍者麼有則出來喫棒

勝思惟梵天謂不退轉天子曰我常於此佛國土不曾見汝天子曰我亦不曾於此國土不曾見我天童悟云者兩個漢各自分疆立界各各不相見各自自尊不顧旁觀者醜 大愚鵬云不曾見汝不曾見我一對無孔鐵錘難爲勘破我當時若見各與二十拄杖

障蔽魔王領諸眷屬一千年隨金剛齊菩薩覓起處不得忽一日得見乃問曰汝依何而住我一千年覓汝起處不得齊曰我不依有住而住不依無住而住如是而住

法眼益云魔王不見金剛齊卽從祇如金剛齊還見魔王麼 徑山杲云旣覓起處不得一千年隨從底是甚麼金剛齊恁麼道互相熱瞞法眼恁麼批判也是看孔著楔卽今莫有知妙喜起處底麼喝云寐語作麼 東禪藏云富貴卽易貧窮卽難虛空無心牆壁有耳二老漢不得無過且道過在於何路從平處險人向靜中忙 雲門信云金剛齊太殺漏逗旣不

依有無而住怎麼又被魔王覷見 資福侶徵云一千年覓起處不得因甚忽一日得見莫是金剛齊滲漏麼真是魔王眼花麼

入定僧因外道問輪王衆生種非佛非羅漢不受後有身是什麼義僧入定問彌勒勒爲答了却出定語外道曰譬如陶師埴埴成器

汾陽昭代云却勞尊者往復神用 法林音云外道何不待者僧出定時便云却勞上座今有三十棒寄與兜率內院看者僧又如何折合

雙林善慧大士因梁武帝請講經士陞座以尺撫案一下便下座帝愕然誌公乃問陛下會麼帝曰不會誌曰大士講經竟

汾陽昭云講得甚好 白雲端云二大士被武帝一狀領過 本覺一云大士已是葛藤誌公重下註脚諸人如今要閱麼良久云兩段不同收歸上科 磬山修云三大老一人有定國之謀一人有安邦之智一人有過量之才可惜武帝未能構得雖然帝王自有擎天略不動干戈定太平



不向雙林寄此身却於梁土惹埃塵當時不得聽公  
老也是懷懷去國人雪寶顯

大士何曾會講經誌公方便且相成一揮案上俱無  
取直得梁王努眼睛白雲端

兩口明明無一舌同生同死爲君決那吒頂上喫痰  
藜金剛脚下流出血東山空

大士一日見武帝不起羣臣曰大士見帝因甚不  
起士曰法地若動一切不安

天寧琦云壽山從朝至暮不知走了幾遭若是法地  
誰敢動著一莖草復云我不恁麼道傳大士坐了起  
不得磬山修云楚石恁麼道起了坐不得有起得  
坐得底出來相見喝一喝云雖具一雙窮相手未嘗  
下揖等閒人

梁國令他魏國愁渡江投水暗隨流雖然寸土居無  
動爭奈雙林半樹秋投子青

大士一日披衲頂冠靴履朝見武帝帝問是僧耶  
士以手指冠曰是道耶士以手指靴履曰是俗耶  
士以手指衲衣

汾陽昭代云大士多能 五祖戒云笑殺旁觀 佛

心才云要識三教聖人體麼向武帝問處會要識三

教聖人用麼向大士指處薦取直饒體用分明請僧

門下大遠在 五峰前云武帝若是作家君王好立

刻趕者碧眼胡出國何故藉察奇言異履律有明條

獅峯遜云傳大士抖搜三百六十骨節不消武帝

一個耶字冰消瓦解

身披壞衲片雲寒脚著朝襪頂戴冠要使三家同一

轍掬沙終是不成團笑翁堪

非儒非道亦非禪杜撰修行就可憐擔閣一身三不

了至今八百有餘年一衲戒

大士頌曰夜夜抱佛眠朝朝還共起起坐鎮相隨

如形影相似欲識佛去處祇者語聲是

玄沙備云大士祇認得個昭昭靈靈 雪寶顯於欲

識佛去處別云三生六十劫乃云天下衲僧跳不出

直饒口挂壁上漢別有一竅勘過了打又云玄沙也

是打草驚蛇 九峰勸云大士向一法中而見有異

九峰卽不然夜夜困卽眠朝朝覺卽起 洞山聰云



九峰大力量人言不虛發洞山又不然因來即便眠  
覺來即便起祇知你衲僧家白日還打睡麼雖然如  
是三十年後且莫和泥合水 法昌遇云傳大士如  
張漫天網羅龍打鳳奈何麟甲羽毛總在裏許邊生  
無路若是靈禽異獸決定別有生涯 保寧勇云玄  
沙道大士祇認得個昭昭靈靈洞山道你衲僧家白  
日還打睡麼者兩轉語誰言世上無仙客須信壺中  
別有天復頌

要眠時便眠要起時便起水洗面皮光啜茶溼却  
大海紅塵飛平地波濤起阿呵呵囉哩哩囉哩  
誰有單于調換取假銀城良久云曾被雪霜苦楊花  
落也驚天衣袂

五里一個亭十里一個舖八表露堂堂來往無回互  
君不見臺山路上薰直婆慣向人前指去路 曹鑑金  
大士頌空手把鋤頭步行騎水牛人從橋上過橋  
流水不流

六月上伏八月中秋人平不語水平不流心閒  
魚行水濁鳥飛毛落大士續身不受斧鑿本菴水

狗走抖擻口猴愁搜搜頭端巖門外水自古向西流  
斷橋倫

輪囷枯木久梳風雪雨無侵花更紅節令不隨還結  
子難將化母論其功泐水浴

靈木無根長石苔森森茂葉玉花開年深結個黃金  
果不待風吹香自來幻雲用

大士頌須彌芥子父芥子須彌兼山水坦然平敲  
冰來煮茶

須彌納芥不容易芥納須彌匹似閒長河攪著成塵  
酪輕輕擊透祖師關圓悟勸

大士頌有物先天地無形本寂寥能爲萬象主不  
逐四時凋

五祖演云古人可謂錦上鋪花不妨奇特白蓮曲順  
後機亦爲頌出有中有無中無細中細細中細 寶  
壽方云有物先天地將什麼作眼無形本寂寥舉拂  
云者個吟能爲萬象主天際日上月下作麼生不逐  
四時凋諸歷代老古雖即得山僧則不然無物先天  
地有形本寂寥不爲萬象主常逐四時凋 城山洽

云大士怎麼主張引人向鬼窟裏作活計者裏卽不然有物先天地無時不寂寥能爲萬象主亦逐四時凋 摘松客云今日若與寶華相見三十棒斷不相饒何故吟豈不見君子道長小人道消

土面灰頭不染塵花街柳巷樂天真金鷄唱曉瓊樓夢一樹花開浩劫春足菴

蘇州有常州有西湖岸上垂楊柳誰家屋裏沒些兒慙愧對人開口寧遠地

忻州翁因佛陀波利尊者遊山翁見乃問甚處去利曰臺山禮文殊去翁曰大德見文殊還識否利無對

汾陽昭代云今日慶幸 雲門澄代作禮三拜老翁若更如何轉身拽杖竟去 法林音代云法林自幼服甘菊

臺山翁問佛陀波利尊者何來利曰西國來翁曰還將得佛頂尊勝經來否利曰不將得來翁曰空來何益利遂回

太陽玄云當時下得甚麼語得與文殊相見免回西

天乃展兩手似伊 法林音云不空買索

臺山翁因無著喜遊五臺翁牽牛飲水導入問近自何來著曰南方問南方佛法如何住持曰末法比丘少奉戒律問多少衆曰或三百或五百著却問此間如何住持翁曰龍蛇混雜凡聖同居日多少衆翁曰前三三後三三

汾陽昭代云識得你 雪峯存問前三三後三三意旨如何靈雲勤云水中魚山上鳥峰云意作麼生雲云高可射兮深可釣 徑山杲代云和尚如此住持直是不易 天童傑云前三三後三三如何話會良久云竹影掃地塵不動月穿潭底水無痕 長翁淨云或三百或五百銅錢鐵錢省數足百前三三後三三蘿蔔芋苳後貯滿擔諸方忽然眼開決定拍手大笑且道笑個甚麼不笑巴叉便笑杜撰雖然笑者還稀或有人問天童多少衆便向道新起妙嚴誇第一團團都在畫圖中

鄭周沙界聖伽藍滿目文殊接話談言下不知開佛眼回頭祇見翠山巖明招

千峰盤屈色如藍誰謂文殊是對談堪笑清涼多少

衆前三三與後三三明冕顯

堪笑前三與後三當初相對語喃喃却因無著分明  
見從此清涼沒可參佛印元

青山門外白雲飛綠水溪邊引客歸莫怪坐來頻勸  
酒自從別後見君稀佛眼遠

腰金上太行賊眼盡驚憚不因遭毒手誰肯燒夜香

月堂昌二

寬鞵著瘦脚短袖入長臂竿木旣隨身逢場還作戲  
前三三後三三一時堆在擔頭擔到待家中重檢點  
目前包裹露麤麤

三三之旨極幽深老漢當牙下一鍼爲報禪徒應諦  
聽船乃隨流石乃沈般若柔

坐久成勞憶故人相逢花下論閒情誰知客路天涯  
遠飲盡殘尊猶未醒且知訥

陌路相逢眼裏塵低頭禮拜味天真起來不見文殊  
面打破大唐無一人秀巖瑞

翁與無著契茶次拈起玻璃盞問南方還有者個

麼曰無翁曰尋常將什麼喫茶著無對

洞山价代展兩手又云有無且置借取者個看得麼

曹山章代云久承大士按劍爲甚麼處在一塵

長慶稜代云與麼疑客勸主人 汾陽昭云謝顧問

寶壽新代云原來你不曾到我南方在但更云無

無

自別南方涉路岐喫茶處處用玻璃如何恰到清涼

寺問著原來總不知正覺逸

玻璃寶盞對君擎茶味雖濃夢不醒更問三三多少

衆爭教人不辨輸贏象田卿

五臺凝望思遲遲白日青天被鬼迷最苦一般難理

會玻璃盞子喫茶時象潭泳

翁因日晚著曰擬投一宿得否翁曰汝有執心在

不得曰無執心翁曰汝受戒否曰受戒久矣翁曰

旣無執心何用受戒著辭翁令均提童子相送著

問前三三後三三是多少童召大德著應諾童曰

是多少

洞山价云欲觀其父先觀其子 汾陽昭於何用受

戒處代云悔出前言於童子是多少處代云識得你  
前後三三是多少大事光輝明皎皎回頭不見解空  
人滿目白雲臥荒草道吾真

前後三三謝師指南龍蛇躍躍虎視耽耽擬數看數  
欲談何談均提謾有垂鞭意象王蹴蹋亦奚堪投子舒

翁因無著問莫是文殊否老翁曰豈有二文殊著  
便作禮

趙州諗代云文殊文殊 薦福懷云無著祇有先鋒  
且無殿後老翁若不隱身去有甚面目見無著 法  
林音云須知無著作禮也未必是好心

無著見化寺無額問童子此寺名什麼童子以手  
指金剛背後曰看看師回首化寺乃隱

仙巖智云童子不是個隱身三昧將什麼面目見他  
樓臺雖有額全無試問頑童起剏初忽指金剛看背  
後年衰多被鬼挪揄佛印元

寺額突然耀指端大悲千眼莫能觀自從一覩金剛  
背直至如今作野盤正覺逸

信手書成山寺額詮題二字更分明那堪回首高巖

望一片浮雲入暮平仙巖智

鷲入桃溪曲寥寥返棹舟家私盡浪蕩西顧水悠悠  
劍去多時矣阿猷休刻求大戲燈

金陵寶誌公問一梵僧曰曾聞尊者喚我作屠兒  
曾見我殺生否曰見誌曰有見見無見見不有  
無見若有見見是凡夫見無見見是聲聞見不有  
不無見是外道見未審尊者如何見僧曰你有此  
等見耶

汾陽昭代誌云不枉西來 法林音代云未西來時  
山僧有三十棒因甚至今還不知痛

誌公十二時歌曰鷄鳴丑一顆圓光明已久內外  
推尋覓總無境上施為渾大有

天目禮云大小誌公祇向境上著倒山僧則不然有  
時因好月啓戶望前峰

誌公垂語曰終日拈香擇火不知身是道場

玄沙備別云終日拈香擇火不知真個道場 元覺  
徵云祇如此二尊宿語還有親疎也無 雪竇顯云  
一對無孔鐵鎚 昭覺勤云終日拈香擇火不知拈

香擇火 天堂覺舉誌公語云弄精魂漢有什麼限

舉玄沙語云奇怪八十翁翁入場屋真誠不是小兒戲且道利害在什麼處有智無智較三十里 報恩

秀云身是道場髑髏前見鬼無數真個道場何妨徹底承當雖然楚人失弓楚人得之未若人失弓人得之猶爲得也 龍池傳云老僧晚年無事終日祇是

拈香擇火 古南門云諸人每日拈香擇火還見寶

誌公也無若見正好喫棒

五蘊山頭古佛堂拈香擇火好承當何須向外求賢

聖終日無非是道場本覺一

野老家風迥異常太平勳業總相忘皇風一片知何

處燕舞鶯啼日正長

#### 宗鑑法林卷四

#### 宗鑑法林卷五

集雲堂 編

#### 應化聖賢

南嶽慧思大師因誌公令人傳語曰何不下山教化衆生目視雲漢作麼師曰三世諸佛被我一口吞盡何處更有衆生可教化

五祖戒代誌公又傳語云更說道理看 報慈遂徵

云且道是山上語山下語 雪竇顯云有什麼屎臭

氣 翠巖芝云思大祇見錐頭利不見鑿頭方 天

聖泰云思大祇知開口寶公平地喫交 雲居舜云

思大誌公未傳語前猶較些子 瑯琊覺云驗人端

的處 芭蕉徹云更進一步又云雖是入泥入水幾

人構得 保寧勇別思大云傳語法師合取狗口

雲居莊云兩個漢總與一坑埋却不爲分外雖然也

不得草草良久云雲自帝鄉去水歸江漢流 獅林

則云一人拖泥帶水一人斂手縮脚徐六擔板遭人

檢點召衆云寶公思大卽今在山僧拄杖頭上眉毛

厮結共展神通還見麼拈起一枝無孔笛臨風丁倒

兩頭吹 楚石琦代誌公復云勘破了也 龍翔訢  
云思大被誌公一撈直得倒退三千里 平陽恣云  
誌公傳語不是好心思大雖是本色人未免落他圈  
圖者裡還有爲思大作主者麼良久云儂家不管興  
亡事一任和雲占洞庭 樓霞成云思大高踞南嶽  
峰頂自謂羲皇上人却被誌公輕輕一撈便見手忙  
腳亂 黃蘗琦云蚌鵲相持俱落漁人之手 天目  
律云將謂思大有甚長處

一口吞盡三世佛牙如劍樹眼如鈴斷絃不必驚膠  
續祇要知音側耳聽虛堂愚

佛與衆生一口吞纖毫不立道方存杖頭日月纔挑  
起鼓動三千海嶽昏尼闍林英

目視烟霄臥白雲不知山下有乾坤從何更有衆生  
度三世如來一口吞本覺一

時清休唱太平歌大治紅爐著一毛試向其中撮灰  
燼互天紅焰已周遭蒙庵嶽

萬年杜順大士頌懷州牛喫禾 慈明云河 益州馬  
腹脹 蠅銜 天下覓醫人 驢頭 炙豬左膊上 豨虎

象田現云祇者一頌如萬仞銀山無你措脚處又如  
一團栗棘無你下柴處山僧不惜眉毛一一爲諸人  
下個註脚懷州牛喫禾上大人益州馬腹脹丘乙巳  
天下覓醫人化三千炙豬左膊上七十士有者道和  
尙恁麼也是將土泥裡洗却向他道爾小生八九子  
佳作仁可知禮也

一雨一陰風未和春從不快裡消磨桃花暗已隨流  
水空使劉郎惆悵多心閒貴

蠻婆哈醉紫三尺村老聞酸面百摺引得乞兒聳膊  
寒儼然一幅吳生筆帶溪森

花枝草蔓眼中開小白長紅越女顯可憐日暮噴香  
落嫁與春風不用媒南菴依

明州慈布袋以杖荷布囊并席內盛盂孟木履魚  
飯菜肉瓦石土木於稠人處擦下日看看又一一

拈示問人曰者個喚作甚麼

瑯琊覺云慈氏菩薩 昭覺勤云熟處難忘

彌勒既非布袋不是是非兩忘金生麗水至寶滿袋  
貴賤賤賣若解商量不勞三拜證了義註大乘月裡



螢光日下燈布袋枕頭眠一覺倚天山色碧層層野  
軒還

都盧一個布袋裡面討甚奇怪困來且得枕頭攜去  
亦無妨礙有時鬧市打開多是自家買賣白雲端

天不能蓋地不能載包括乾坤全歸布袋十字街頭  
大打開般般拈起隨人愛靈源清

懶向粧臺巧畫眉玉釵敲斷竟如癡衷腸話盡人難  
曉除是清風明月知師覆濟

布袋在通衢立有問在者裡作甚麼師曰等個人  
僧曰來也師於懷中取一橘子度與僧僧擬接師  
縮手曰汝不是者個人有時見僧前行乃撫背一  
下僧回首師曰把一錢子來

歸宗柔則云歸去來 寶壽方云者僧也許伊是個  
行家祇是猶欠些子待道等個人便好云與麼則請  
和尚先行他若更度橘子便好撫掌呵呵大笑拂袖  
而去 棲霞云布袋逢人便賣弄若不得個橘子  
幾被者僧賺却汝不是者個人賊過後張弓  
拈起而行放下便歇瞌睡阿師弄巧成拙佛意祖意

寧知裙子褊衫百結有時獨立兮誰是知音歸去來  
兮一天明月佛慧泉

咄者愁布袋眉癡兼眼大終日在街頭市行無買賣  
阿呵呵歸去來典錢却債保寧勇

拈背覓錢成漏逗回頭轉腦味真機可憐鬧市無人  
識空手肩擔布袋歸佛照光

轉得頭來已是遲恰如曾未轉頭時一錢覓得無及  
處猶自區區誑阿誰北磻箇

逢人乞一文袋裡敵國富不是下生遲嫌佛不肯作  
環溪一

布袋將示寂於岳林寺東廊下端坐磐石說偈曰  
彌勒真彌勒天童覺云分身千百億築著時時示  
時人高著時人皆不識諱卻安然而化

天童覺云愁布袋攔街截巷直是無迴避處還辨得  
麼腦後見顯莫與往來 徑山及云彌勒三百六十  
骨節八萬四千毛竅一時撒向諸人懷裡了也還識  
得也無卓拄杖云天上無彌勒地下無彌勒 寶壽  
新云盡大地是樓閣徧法界是彌勒爲什麼有識有



不識雖然且待來日 金粟元云者漢不打自招山  
僧此者路見不平要與他華壁一上彌勒真彌勒少  
賣弄分身千百億者野狐精時時示時人費力作麼  
時人皆不識切莫壓良爲賤或有路見不平底我要  
問他布袋和尚吟擬議不來驚頭便棒  
接著一個半箇覓得三文兩文誰知破布袋裡許多  
彌勒世尊 諸堂遠

長汀汀上風顛子曳杖回頭等阿誰向道那人原不  
在汝須知有轉身時 天目禮

跋陀尊者因生法師論衆微聚曰色衆微無自性  
曰空者曰祇明得因上色空未明得果上色空生  
問如何是果上色空者曰一微空故衆微空衆微  
空故一微空一微空中無衆微衆微空中無一微  
鹽官云因中色空果上色空總是夢中說夢 汾陽  
昭云休葛藤

靈光滿目簇山河幻境之中物像多體妙已知緣不  
礙執情還被境消磨 雙泉瓊

色空空色色空空礙却潼關路不通劫火洞然毫末

盡青山依舊白雲中天衣懷  
堂堂色裡無空相皎皎空中絕色形直下色空無一  
二色號原來不我名 靈隱本

波羅提尊者示異見王曰在胎爲身處世爲人在  
眼曰見在耳曰聞在鼻辨香在舌談論在手執提  
在足運奔徧現俱該法界收攝在一微塵識者知  
是佛性不識喚作精魂

徑山杲云畢竟那個是佛性那個是精魂 天寧琦  
云書頭教孃勤作息書尾教孃莫瞌睡還識孃面蒙  
麼玉容寂寞淚闌干一樹梨花春帶雨 瀛山闇云  
當時喚作佛性尊者面皮已厚三尺更說八處作用  
教壞人家男女不少雖然如是比他一等弄精魂手  
腳猶較些子 洞山瑩拈拂子拂一拂云者個是佛  
性將什麼喚作精魂又拂云者個是精魂將什麼喚  
作佛性連拂兩拂云癡人面前休得說夢攪下拂子  
大覺昇云大小尊者祇識得精魂佛性未夢見在  
或有問如何是佛性向道趙錢孫李周吳鄭王 龍  
華體云精魂佛性相去多少點石化爲金玉易勸人

除却是非難

章深路塞將北作南冒名頂替不識羞慙那堪更事  
語喃喃賺他無限癡男女錯認鞍轡作下領香體海  
古有異見王執迷生異見波羅提尊者爲君通一錢  
佛性等虛空八門常出現榮華有盛衰大道無更變  
變不變清涼須是犀牛扇南堂靜

在胎爲身隨緣托質示天真分明見得當時事晝夜  
舒光轉法輪劉與朝居士八

處世名人我今知是釋迦身堪悲擾擾昏昏者箇箇  
埋藏無價珍

在眼曰見昨夜三更光掣電照破塵根一物無始知  
身坐空王殿

在耳曰聞如何昏聩滿乾坤那知鼓響鐘鳴夜一一  
齊開衆妙門

在鼻辨香旃檀林裏親聞得徹地薰天只自知相逢  
覷面難相識

在舌談論方便須開大施門若是知音兩相見何勞  
一默與多言

在手執捉放開捏聚總由伊笑他癡老當年道運水  
般柴未是奇

在足運絳草屨躡躍無消息吾今了了報君知自是  
不歸歸便得

梵志詩曰梵志身死去魂魄見閻老讀盡百王書  
不免被捶拷

風穴沼云一稱南無佛皆已成佛道 千巖長云祇  
是現成話風穴用恰好 芥菴大云梵志俗氣不除  
風穴未免擔板且道蔣山有何長處不敬功德天誰  
嫌黑暗女

天台豐干禪師謂寒山拾得曰你共我去遊五臺  
便是我同流若不去不是我同流山曰你去遊作  
麼師曰禮文殊山曰你不是我同流

翠巖芝云大似辯才見蕭翼 寶壽万云明施縱奪  
還他寒山暗下鉤錐須是豐干若在衲僧門下并須  
喫棒 靈溪昱云五更侵早起更有夜行人

天台寒山子因趙州到遊山次見牛跡山問上座  
還識牛麼州曰不識山指牛跡曰此是五百羅漢

遊山曰既是羅漢因什麼却喚作牛去山曰蒼天  
蒼天州呵呵大笑山曰作什麼曰蒼天蒼天山曰  
者小厮兒却有大人作略

靈巖儲云寒山也是虛空裡剎窟窟趙州眼光爍破  
四天下盡力祇道得個不識祇如二人一等道蒼天  
蒼天還有優劣也無一僧云蒼天蒼天巖云識得你  
也僧擬議巖却云蒼天蒼天

寒山預知瀉山來國清受戒遂與拾得往松門接  
瀉山纔到二人從路兩邊透出作大蟲吼三聲瀉  
山屹然無對寒山曰自從靈山一別迄至於今還  
相記得麼瀉山無對拾得拈起拄杖曰老兄喚者  
個作什麼瀉山又無對寒山曰休休不用問他自  
從別從已曾三生作國王來總忘却也

永寧鼎云者兩個掣風掣顛漢使盡神通用盡伎倆  
要且出瀉山圈圓不得復頌

一擡一捺笑清風野鶴無心參碧空可歎憨憨渾不  
顧相依相盼白雲中

寒山詩曰若解捉老鼠不在五白貓若能悟理性

那由錦繡袍珍珠入蓆袋佛性止蓬茅一羣取相  
漢用意總無交

僧鑒青云好座天台山被者漢塗污了也

寒山因衆僧炙茄次山將茄串向一僧背上打一  
下僧回首山呈起串曰是什麼僧曰者風顛漢山  
却向旁僧曰你道者個師僧費却我多少鹽醬

寶峰文云寒山打者僧實爲費鹽醬多莫別有道理

黃龍清云寒山祇知爲者僧費多少鹽醬不知自  
已拋撒更多那裡是拋撒處良久云十方世界成狼  
藉一日收來五味全 獅林則云大樹大皮裹小樹

小皮纏者僧既受寒山點檢寒山也合受人點檢

城山洽代奪茄串打云茄子也不識

寒山曰井底生紅塵高峰起白浪石女生石兒龜  
毛寸寸長若要學菩提但看此模樣

洞山聰良久云還知落處也無若也不知落處看看  
須菩提入僧堂裡去也珍重

寒山偈曰吾心似秋月碧潭光皎潔無物堪比倫  
教我如何說

保福權云吾心似燈籠點火內外紅有物堪比倫來  
朝日出東 靈溪昱云大小寒山出門不認貨好與  
三十拄杖

拾得埽地次寺主問汝名拾得因豐干拾得汝歸  
汝畢竟名什麼得乃放下筇帚叉手而立主再問  
得拈埽地竟去寒山搥胸曰蒼天蒼天得曰作  
什麼山曰不見道東家人死西家助哀二人作舞  
笑哭而去

靈巖儲云寺主祇問一個姓名拾得將無量劫來氏  
族名字一齊陳出寺主直是妙智圓明分疎不下寒  
山雖將衆藝字母重爲注疏幾多人作哭笑會不識  
自己姓名者不妨疑著

大地縫塵日不清不知何法得安寧祇饒鐵鑄生筍  
帚掃到驢年轉更深梅谷悅

天台智者大師在南嶽誦法華經至藥王品是真  
精進是名眞法供養如來於是悟法華旋陀羅尼  
三昧親見靈山一會儼然未散

徑山杲云而今未獲旋陀羅尼者還見靈山一會否

若見以何爲證若不見是真精進是名眞法供養如  
來 靈巖儲云清波萬里湛寂凝然寶月淩虛光吞  
羣象正恁麼時喚什麼作旋陀羅尼三昧驀地迅雷  
一擊猛風四起雲散星飛水枯月落靈山一會又向  
甚處去也諸人要識智者麼夾路桃花風雨後馬蹄  
何處避殘紅

世尊三昧安詳起師悟藥王精進時靈鷲山中人未  
散不因南嶽有誰知楊無爲

溪山盡處夕陽斜溪上冬風雪滿沙便是江南舊行  
路和烟隔水見梅花蘿月瑩

舍盡家財與已財祇將眞法供如來當初一路今何  
在觸目靈山翠作堆天目禮

好將眞法供如來花在幽巖險處開一夜狂風吹欲  
盡落英無數點莓苔盧堂愚

法華志言大士因丞相呂許公問佛法大意師曰  
本來無一物一味却成真

資福玉云既無一物將那一味成真者揅佛法大意  
瞞許公卽得若有問資福佛法大意卽云本來物物

皆成現莫將一味認爲眞 三昧眞云認一味墮志  
言窮裏不認一味墮資福窮裏認即是不認即是

志言因集仙王質問如何是祖師西來意師曰青  
山影裏潑藍起寶塔高吟撼曉風質曰請法華燒  
香師曰未從齋戒覓不向佛邊求

江天銓云賓主二俱負墮待質云請燒香何不答云  
汝還要覓第二瓣那待志言云未從齋戒覓不向佛  
邊求何不答云向來疑著者老漢如今有問西來意  
山僧劈脊與它三十有請燒香者今日却放過何故  
傷龜怨鼈總由在我 厂阿蓋云王質當時若掩耳  
出去志言冒它是不冒它是復頌

江南爲客旅夜夜間歸船夢裏一聲啞扶橈過那邊  
山影本非眼裏見塔吟豈屬耳邊聞會得不須生別  
解一毫頭上薦全眞四航海

志言因國子助教徐獄問祖師西來意師曰街頭  
東畔底曰某甲未會師曰三般人不會

東蓮詠云徐獄當時待道街頭東畔底作禮便出不  
惟做箇伶俐道者亦免志言第二杓惡水 普明御

云街頭東畔底還是西來意也無既是因甚三般人  
不會徐獄何不進云老漢吟看志言又作甚麼伎倆  
志言因僧問世有佛否師曰寺裏文殊有

資福玉云蚯蚓穿過你眼睛蝦蟇跳進你髑髏避之  
不得卽之不能惟有寺裏文殊却没有 三昧眞云  
眼睛穿瞎也髑髏穿破也說不用避亦不用卽且道  
寺裏文殊還有也無

志言因僧問師凡耶聖耶師遂舉手曰我不在此  
住

魯菴遠云不在此住志言較些子無端舉手作麼我  
者裏清斯濯纓濁斯濯足笑看孺子之風雅  
我不在此住聖凡成牘語深林秋夜寒木落聲疑雨  
厂阿蓋

### 西天祖師

初祖迦葉尊者蹋泥次有一沙彌問尊者何得自  
爲祖曰我若不爲誰爲我爲

法眼益云我當時若見拽來蹋泥 五祖戒云迦葉  
與沙彌說得道理好 洞山价云莫要喫茶麼 保

寧勇云雖然如是旁觀者哂 西山音云大小尊者  
極善和泥合水

迦葉因外道問如何是我我祖曰覓我者是汝我  
曰者個是我我師我何在祖曰你問我覓

牧智成云大小尊者祇解就地彈雀不能仰面射鵬  
待問如何是我我和聲便打云師我何在亦和聲便  
打非但拔出他永劫邪根種子亦見我祖師門下用  
處不同

二祖阿難尊者問迦葉曰師兄世尊傳金襴袈裟  
外別傳個甚麼迦葉召阿難祖應諾葉曰倒却門  
前刹竿著

汾陽昭云不同那知 五祖戒云露 翠巖芝云千  
年無影樹今時沒底靴 泐潭清云刹竿未倒穿却  
諸人髑髏換却諸人眼睛刹竿倒後向甚麼處見釋  
迦老子 雲居莊云若向刹竿未倒時會得埋沒先  
宗刹竿倒却後會得辜負自己且道金縷外畢竟別  
傳何物三面狸奴脚踏月兩頭白牯手拏烟 漢月  
藏云世尊傳底且道在金襴袈裟外金襴袈裟內咄

金襴付外有何傳倒却門前舊刹竿不取一時爲上  
瑞百千年後與人看草堂清

花葉聯芳信有期飲光抗召劃分披而今莫問當時  
事路上行人口是碑正覺逸

提起金襴惹倒刹竿步步踏著綠水青山晏古佛

慶喜門前倒刹竿金襴傳外有何傳天然外道無師  
證爭奈威音佛已前張無盡

心心相照始相知金色頭陀別是非五里牌從郭外  
看富人不肯怨他誰道場如

瑠璃殿上付金襴棧萼聯芳得二難門外刹竿從放  
倒免教南北問風旛上方益

金襴傳外復何傳報道門前倒刹竿好笑蹋青人爛  
醉滿川桃李自無言石岩明

但薩阿竭二千年密付親承盡浪傳直至如今成露  
布刹竿依舊倚門前大洪恩

等閒饒舌話金襴使與當頭倒刹竿從此天倫轉無  
義冷光猶自逼人寒瞎堂遠

弟應兄呼畫不成誰人肯向裡頭行自從家破人亡



後直至如今事轉生月林觀

翡翠羽毛麒麟頭角弟應兄呼震動海嶽路遠夜長

休把火倒却門前剎竿著高原泉

野店山橋逐馬蹄行行桃李自成蹊誰知古岸垂楊

外別有春風舞翠微尋道啓

三祖商那和修問穆多尊者你年幾耶曰我年十

七祖曰你身十七性十七耶曰師髮已白爲髮白

耶心白耶祖曰我但髮白非心白爾曰我身十七

非性十七也

天童悟云大小祖師話作兩橛 江天銓云三祖既

善分析穆多分析更善若是我土祇好作座主奴子

有分

空林冷月碧水涼雲清風巖下一派秋聲阿肅

四祖優波穆多因訪一老比丘尼纔入門乃觸碎

鉢孟尼曰佛在世日六羣比丘甚是羸行數來我

舍尙不如此尊者紹祖位人得與麼羸行祖默然

汾陽昭代云已知錯誤 法林音云在祖師尙然況

今時耶遂大笑

五祖提多迦因四祖問爲身出家爲心出家者曰

夫出家者無我心故卽心不生滅心不生滅卽

是常道故諸佛亦常心無形相其體亦爾祖曰汝

當大悟自心明朗於佛法中度恒沙衆

芭蕉微云譬如琴瑟笙篴雖有妙音若無妙指終不

能發

七祖婆須密尊者因佛陀難提索以論義祖曰仁

者論卽不義義卽不論若擬論義終非義論提知

祖義勝心卽欽服

三昧真云者樣便稱義勝東土人人可以做祖師不

知佛陀心欽服也未 梅微惺云七祖雖不論義未

免搖動唇吻難提深領欽服也是向它人舌尖上討

分曉

九祖伏馱密多偈曰父母非我親誰是最親者諸

佛非我道誰是最道者

雲蓋本云父母非我親無有不親者諸佛非我道無

有不道者祖師得第一句雲蓋得第二句有人添得

一句許伊鼎足三分 密菴傑云父母非我親眼裏



絕纖塵諸佛非我道鐵眼銅睛覷不破汝言與心親  
蚊子敲鐵釘汝行與道合上下四維俱匍匐祇將此  
語報深恩朵朵紅蓮火裏發 伏龍長云父母非我  
親我亦非親者諸佛非我道道亦非我者祖師也不  
得第一句雲蓋也不得第二句千巖碎身如微塵何  
止頭破作七分 慧雲廣云父母非我親者是最親  
者諸佛非我道者是最道者祖師得上半句東菴得  
下半句還有道得完全句底麼便喝

見處孤危立處高急如石火利如刀到家問路家何  
在掀倒棋盤脫布袍 瞎堂遠

半生足不履地軒知蹋遍天涯得個冬瓜印子至今  
目瞪口呆 松源岳

父母非親親是誰雙眸炯炯帶雙眉含元殿上不相  
識正是岷峨相見時 石溪月

父母非親誰最親長江滾滾浪如銀一帆高挂烟波  
外始信縱橫不是塵 三圓

十祖協尊者問夜奢汝從何來曰我心非往祖曰  
汝住何所曰我心非止祖曰子不定耶曰諸佛亦

然祖曰汝非諸佛曰諸佛亦非

翠巖芝云祖師與童子一問一答總欠會在

打鼓弄琵琶相逢兩會家清風拂白月地角接天涯  
碎玉凝朝露殘陽送晚霜寒山逢拾得拊掌笑嘎嘎  
南堂靜二

諸佛亦非窮子腹肥纔一頓飽忘百日饑二十拄杖  
十分槌免教辜負兩莖眉

電捲星飛珠回玉轉打破面皮赤心片片瞎堂遠

十一祖富那夜奢因馬鳴大士問我欲識佛何者  
卽是祖曰汝欲識佛不識者是曰佛既不識焉知  
是乎祖曰既不識佛焉知不是曰此是鋸義祖曰  
彼是木義祖復曰鋸義者何曰與師平出却問木  
義者何祖曰汝被我解士豁然省悟

岸麟駿云往復所言現大機用 四航海云當時大  
士若問崇福我欲識佛卽掩住伊口令它向未開口  
處會取免得在鋸義木義中作活計

十二祖馬鳴大士因一外道索祖論義集國王大  
臣人民祖問汝義以何爲宗外曰凡有言說我皆

能破祖乃指國王曰當今國土康寧大王長壽請  
汝破外道屈伏

法林音云破也

六師不正起干戈自謂無能奈我何七十六宗令結  
舌不消一曲太平歌本覺一

十四祖龍樹大士見提婆來先令侍者將一盃水  
致面前婆見乃取一鍼投之祖大喜

龍猛孟中水提婆毘上鍼人人爭得失個個話浮沉  
不觀雲中鴈焉知沙塞深農人移片礫礫下獲黃金

瑯琊覺

漏傳長樂未央靜月瀉甘泉太液秋夜半樂聲回步

輦喚回三十六宮愁心聞黃

師資意契芥投鍼鄉鐵下水一般沉兩岸桃花無覓

處泊舟原是渡江人南菴依

十七祖僧伽難提因聞風吹殿鈴聲問伽耶曰鈴

鳴耶風鳴耶伽曰非風鈴鳴我心鳴耳祖曰心復

誰乎曰俱寂靜故祖曰善哉繼吾道者非子而誰

芭蕉口云尊者大似憐兒不覺醺 護國獻云伽耶

認魚目作明珠僧祖將燕石爲美玉仔細檢點將來  
好與一阮埋却何故屈原若不逢漁父千古誰能論  
獨醒

二十三祖鵲勒那尊者因師子尊者問我欲求道  
當何用心祖曰汝欲求道無所用心曰既無用心  
誰作佛事祖曰你若有用卽非功德你若無作卽  
是佛事

江天銓云如今一等閉目藏睛斷昏沉止妄想以無  
作爲佛事者比比皆是是皆祖師之罪人也我者裏  
灌蔬作菜種田博飯每日只在者裏用心若要求道  
一棒打折你驢腰

二十四祖師子尊者因月氏國王問其有道乃越  
國往見之祖曰大王來時好道去時亦如來時

中峰本云飯裏沙泥裏刺彷彿不同依稀相似大王  
來時好道去時亦如來時尊者黃金鑄面皮

至簡至易最尊最貴往還千聖頂額頭世出世間不  
思議彈指圓成八萬門一超直入如來地圓悟勤

師子因尉賓國王秉劍問師得蘊空否祖曰已得

蘊空曰離生死否祖曰已離生死曰就師乞頭得  
否祖曰身非我有豈況於頭王便斬之白乳涌高  
數丈王臂自落

玄沙備云大小尊者頭也不解作得主天童華云隨  
斃斃漢 玄覺遂云且道斬著斬不著童云將蝦釣  
鼈 汾陽昭云知師不吝童云將錯就錯 雪竇顯  
云作家君王天然有在童云提水放火 翠巖芝云  
當時祖引頸王舉劍與麼時有人諫得住麼至今無  
人斷得此公案如今衲僧作麼生斷童云莫要說夢  
芭蕉徹云賣寶撞著瞎波斯童云誣人之罪 瑯  
琊覺云屬賓好一口劍爭奈劍上無眼尊者好個師  
子且不解返躑童云賊過後張弓童總云者一隊漢  
被山僧剝絕了也還見師子尊者麼拈拄杖卓一下  
黃龍新云黃龍要問雪竇既是作家君王因甚臂  
落徑山杲云孟八郎漢又與麼去 天寧琦云似則  
也似是則未是 古南門云雪竇祇解歸德於君不  
善承休於祖有人辨得國王尊者白頭如新傾蓋如  
故

楊子江頭楊柳春楊花愁殺渡頭人一聲羌笛離亭  
晚君向瀟湘我向秦龍門遠

得人一牛還人一馬有往有來可知禮也佛性泰

船子下揚州浮萍逐水流一聲河滿子千古動悲愁

鼓山珪

吹毛劍舉乾坤黑臂墮山河掩日光趨起須彌頭倒

卓方知兩兩不成雙湛堂深

尊者何曾得蘊空屬賓徒自斬春風桃花雨後亂零

落染得一溪流水紅噴菴鑑

口念木瓜醫脚氣紙畫鍾馗驅鬼崇一生若解和羅

槌日日喫酒日日醉懶菴樞

師子頭落屬賓臂折各人眼底有西施誰家甕裏無

明月朴翁銘

遇著山中人便說山中話六月賣松風人間恐無價

孤峰深

劍下十分真難藏獨露身江流石不轉徒有蘊空名

北磬簡

夢中要渡深溪水伎倆多般進不能驚地覺來伎倆

盡牀頭山月已三更石菴珎

蘊空誰見法中王觀體何曾礙劍光古廟藤蘿穿戶  
牖斷碑風雨碎文章雪菴瑾

夜闌天際墮金盆膝上焦桐調轉新易水悲風輕按  
指鸞膠難續斷腸人盧堂愚

上大人丘乙巳陌上相逢論詩禮三百篇中意若何  
仲尼一言備之矣江南三月鷓鴣聲有堪聽有不堪

聽山茨際

拾得羊打得狼柴頭更遇孟八郎劍入太湖成龍去  
空遺星斗煥文章玉笈乾

二十五祖婆舍斯多因與外道無我尊論義外道  
曰請師默論不假言說祖曰不假言說孰知勝負  
曰但取其義祖曰汝以何爲義曰無心爲義祖曰  
汝旣無心安得義乎曰我說無心當名非義祖曰  
我說非心當義非名曰當義非名誰能辯義祖曰  
汝名非義此名何名曰爲辯非義是名無名祖曰  
名旣非名義亦非義辯者是誰當辯何物如是五  
十九番外道乃伏

芭蕉清云譬如象馬加諸楚毒至於徹骨方乃調伏  
太陽玄云蚌鵲相持死在漁人之手又云何用繁  
言徑山杲云婆舍斯多何用切怛當時若見他道  
請師默論不假言說便云義墮也卽今莫有與妙喜  
默論者麼或有個出來道墮也我也知你向鬼窟裏  
作活計

二十七祖般若多羅因東印土國王請齋次王曰  
諸人盡轉經師爲甚麼不轉祖曰貧道出息不涉  
衆緣入息不居陰界常轉如是經百千萬億卷  
汾陽昭代云却勞尊者心力大湍智云還見二十  
七祖看經麼行時脚跟不著地坐時心識似風飄  
報恩秀云者老漢無大人相把葫蘆馬杓翻騰一上  
當時好與掀倒打斷葛藤博山來云險處雖穩處  
剗國主探端灑不溼釘不入尊者機辨如是經還轉  
也未待你脚跟下線斷始知信受奉行  
秋高月色連雲白澹泊禪心滋味長歷歷分明今古  
意何須特地更商量大湍心

靈犀翫月璨含輝木馬遊春駿不羈眉底一雙寒碧

眼看經那得透牛皮明白心超曠劫英雄力破重圍  
妙圓樞口轉靈機寒山忘却來時路拾得相將攜手  
歸天童覺

入息未嘗居蘊界出息何曾涉萬緣一聲漁笛離南  
浦依舊蘆花深處眠懶菴需

不是塵泥難混跡尾巴露出夢人看長松坡下遂成  
隊時把劫空田地翻木菴標

五原春色舊來遲二月垂楊未挂絲卽今河畔冰開  
日正是長安花落時道宗基

般若行路次有人問汝行何急祖曰汝行何慢又  
問汝姓甚麼祖曰與汝同姓或凡或聖人莫能測  
芭蕉徹云匹上不足匹下有餘天童悟云大小祖  
師被路人換却眼睛古林如云可怪尊者大路不  
行却向草窠裏輓

般若告菩提達磨如來以大法眼付大迦葉如是  
展轉乃至於我我今囑汝聽吾偈曰心地生諸種  
因事復生理果滿菩提圓華開世界起  
蒼天更添怨苦蹋爛西天東土盡未來際英靈遭它

一網打破默菴慧

宗鑑法林卷五

宗鑑法林卷六

集雲堂編

東土祖師

初祖菩提達磨大師普通七年至梁武帝問如何  
是聖諦第一義祖曰廓然無聖帝曰對朕者誰祖  
曰不識

汾陽昭云弟子智淺五祖戒云寶實遇著瞎波斯  
保寧勇代帝吐舌示之中峰本云缺齒老胡手  
攜泥彈子要與東震旦人鬪富可謂不知量矣被梁  
王指出照乘明珠問之情知伊道個不識愚菴孟  
云或有問山僧第一義諦雙柑迤邐黃鸝下蹋遍落  
花鴛水春靈隱禮云達磨大師氣蓋神洲被武帝  
一拶直得無繩自縛去死十分雖然如是也須救取  
武帝清化嶮云盡道武帝不會祖師意殊不知達

磨被他兩度驗出骨髓

凡聖縈纏情未忘廓然無聖便驚狂梁王殿上無謀

略剛被胡人亂一場泉大道

廓然一鏃遼天不識重下錐刺梁帝不知何處去千

古萬古無消息正覺逸

煉得通紅打一鎚周遭無數火星飛十成好個金剛

鑽攤向門前賣與誰保寧勇

第一義廓兮寥兮超象帝不把多年曆日看爭辨春

分并夏至遼東白鶴去無蹤三山半落青天外上方益

不解作客勞煩主人面無慙色少喜多瞋長靈卓

始鳴阿闍一聲鐘日暖蒼龍睡正濃再擊鳳凰臺上

鼓半夜祥鸞未飛舞帝基永固如磐石胡僧虎費平

生力回指少林歸去來春風一陣花狼藉佛鑿勸

廓然無聖露全身觀面相呈已隔津莫問梁邦并魏

苑一花五葉自然春雲巖因

黃金鑿白玉椎鑿開混沌窺透出玄妙機正堂辨

金鳥飛上玉闌干黑漆崑崙對面看畢竟者些傳不

得落花流水太無端天童淨

提起須彌第一槌玉門金鎖擊難開重施背踢空勞

力應悔迢迢萬里來桑維額

萬浪千波一葦橫翩翩隻影可憐生老蕭若會截流

句楊子江頭放你行石溪月

廓然無聖來機徑庭得非犯鼻而揮斤失不回頭而

墮甌寥寥冷坐少林默默全提正令秋清月轉霜輪

河澹斗垂夜柄繩繩衣鉢付兒孫從此人天成藥病

宏智覺

陌上多開菜麥花銜泥紫燕盡梁家可憐狼藉春無

數那得風流染絳紗雪嶠信

初祖西來直指人心見性成佛

法林音喝一喝云早曲了也

急水波心下直鉤魚龍蝦鱗一時收祖師活計無多

子惱亂春風卒未休松源岳

初祖自梁涉魏至少林面壁而坐九年方得二祖

先被梁王勘破却向少林孤坐謾言教外別傳爭奈

不識者個白雲端

少室山前風過耳九年人事隨流水若還不是弄潮



人切須莫入洪波裏鼓山珪

金鰲一掣滄溟竭徒自悠悠泛小舟今日烟波無可釣不須新月更爲鉤徑山杲

祖師面壁九年餘此是西來末上機直至如今天下客強將言句空施爲省堂主

一片虎凝地丹青畫不成聖賢難啓口佛祖強安名正堂辨

喪盡家財無本可據赤手殺人彌天罪過木菴永

不契梁王暗渡江一身無地避慙惶九年面壁成何事賺却平人入鑊湯湖隱濟

雲和斜抱月光寒白雪陽春信自彈不遇知音輕側耳幾應撼碎玉闌干斯瑞法

嶢嶢嵩峯高逼雲漢誤爲神光折去一半遠門柱

初祖一日命門人曰時將至矣汝等盍各言所得時有道副曰如我所見不執文字不離文字而爲道用祖曰汝得吾皮尼總持曰如吾所見如慶喜見阿閼佛國一見更不再見祖曰汝得吾肉道育曰四大本空五蘊非有如吾見處無一法可當情

祖曰汝得吾骨最後慧可大師出禮三拜依位而立祖曰汝得吾髓乃傳衣付法

薦福懷云祖師與麼說話無計較中翻成計較無塗轍中翻成塗轍若教伊踢著德山臨濟門下免見九年冷坐被人喚作壁觀胡僧直饒如是也未免殃及兒孫 太陽玄云且道更有一人出來得個甚麼自云不得不得又云意況不到 翠巖芝云二祖被他當面塗糊莫道髓皮也不曾摸著因甚麼却紹祖位五祖演云當時若見四人怎麼各與三十棒祇如白雲也合喫二十九棒留一棒與諸人其間若有知痛癢者不惟不辜負先聖亦乃得見白雲脫或未然堂裏喫粥喫飯更須爛嚼多見箇圖吞却

神光三拜退後立瀑布巖前水長急楞嚴會上逞圓通却使老盧雙淚泣天衣懷

四維上下絕遮攔湧出冰壺映碧天無孔笛中藏六律一聲驚起釣魚船成枯木

神光三拜依位立解會都忘未端的皮毛脫盡孰親疎誰言得髓能情息圓通秀



一從三拜後千古錯流通永日無人到蕭蕭檜柏風  
龍門遠

社舞村歌笑殺人騎牛挑鴨走成羣三杯酒罷歸家  
去留得豬頭礙塞人正堂辨

鏡凹照人瘦鏡凸照人肥不如打破鏡還吾舊面皮  
懶菴樞

捏目生花立問端得他皮髓被他瞞者般瞎漢能多  
事六月無霜也道寒簡菴清

死款都來一口供情窮理極卒難容若將皮髓論高  
下爭見花開五葉紅高峰妙

夜來獨自上西樓却喜新秋月正幽試把玉簫吹一  
曲惹他多少客心愁晦堂鏡

雪壓竹枝頭風翻荷葉背胡僧白佛言應犯什麼罪  
漢關喲

初祖曰吾法於三千年後未曾移易一絲豪許  
東西縱目乾坤闊玉露澄秋氣宇高山是山兮水是  
水何曾移易一絲毫萬慮

初祖曰吾本來茲土傳法度迷情一花開五葉結

果自然成

五祖演云大師信脚來信口道後代兒孫都成計較  
要會開花結果處麼鄭州黎青州棗萬物無過出處  
好南堂欲云提本分鉗錘碎情解窠窟還他五祖  
要見開花結果處太遠在拈却鄭州黎放下青州棗  
出門便是長安道

初祖偈曰吾本求心不求佛了知三界空無物不  
如端坐靜觀心祇此心心心是佛

元叟端云坐煞達磨大師了也

初祖謂二祖曰汝但外息諸緣內心無喘心如牆  
壁可以入道二祖作種種說心說性不契一日忽  
悟乃曰可以息諸緣也祖曰莫成斷滅去在二祖  
曰無祖日子作麼生二祖曰了了常知故言之不  
可及祖曰此諸佛之所傳心體更勿疑也

萬里孤舟駕怒濤長竿意在掣金鰲連拋兩釣無消  
息惆悵空來打一遭天目證

的的西來末法僧來分此土最初燈神光冷地一吹  
滅蔥嶺忙忙祇暗登大川濟

萬里西來老骨粗不遵行止渡流沙被人打落當門  
齒啞子分明喫苦瓜或菴體

賊身未露罪全彰攪得西乾沸似湯頂上鐵枷無計  
脫却來東土強分賊無門開

心如面黑語似人蠻廓然無聖玉解連環楊子江頭  
白浪少林雪後青山楠堂益

大鵬展翅取龍吞一攪滄溟徹底渾觸碎珊瑚枝上  
月至今千古暗昏昏中峰本

東西走得脚皮穿教外何曾有別傳任你一花開五  
葉好兒終不使爺錢愚菴及

飄飄一葦渡江淮少室峰前眼不開默坐九年成底  
事當門齒缺可曾栽天隱修

初祖既葬熊耳山後三年魏宋雲使西域回遇祖  
於蔥嶺手攜隻履雲問何往祖曰西天去又謂雲  
曰汝主已厭世及歸明帝已登遐矣迨啓壙惟隻  
履存焉

師眼兮深師鼻兮大師耳兮穿師舌兮快師身兮黑  
師心兮戴手攜隻履返流沙熊耳石塔今猶在瑯琊

祖師遺下一隻履千古萬古播人耳空自肩擔跣足  
行何曾踢著自家底五祖演

梁魏山河本太平無端容此老狐精九年皮髓分張  
盡隻履空棺更誑人東山空

闍國人難挽西攜隻履歸祇應熊耳月千古冷光輝  
虎丘隆

颺下一隻履明明不覆藏兒孫纔著脚徧地是刀槍  
妙峯善

九年冷坐納敗闕隻履西歸更脫空後代兒孫徒妄  
想鸛鵲啼不爲春風雪菴瑾

死也不伏埋殮偷攜隻履西歸不被宋雲捉敗官司  
何處尋屍孤峯深

禾山方云死心先師每舉隻履西歸話以問衲子而  
實難明諸方或謂之隱顯或謂不可有兩個或謂惟  
此一事實若恁麼未識祖師意旨諸人要見麼頌云  
濁中清清中濁勿謂麒麟生隻角西行東向路不差  
大用頭頭如啐啄莫莫玄要靈機休卜度

二祖慧可大師問初祖曰諸佛法印可得聞乎祖

曰諸佛法印匪從人得師曰吾心未寧乞師安心  
祖曰將心來與汝安師曰覓心了不可得祖曰與  
汝安心竟

芭蕉徹云金剛與泥人揩背 圓悟勤云正與麼時  
法身在甚麼處 五祖戒云若即恁麼何用西來  
雲居元云彼自無瘡勿傷之也雖然如是一言已出  
驪馬難追 五祖演舉至安心處乃云白雲當時若  
見好與三十棒何故他人見將謂說安心法畢竟如  
何菩薩龍王行雨潤遮身上數重雲 雲居莊云  
殺人須是殺人劍活人須是活人刀

終始覓心不可得寥寥不見少林人滿庭舊雪重知  
冷鼻孔依然搭上脣白雲端

思量何用覓安心求得心安却苦身三尺雪深曾立  
處不知誰是雪中入佛國白

二祖當年立少林滿庭積雪到腰深叉手當胸無一  
事不求不覓不安心鼓山珪

覓心無處更無安嚼碎通紅鐵一團縱使眼開張意  
氣爭如不受老胡瞞徑山杲

不待七處徵當下便不見糊獮水上打鞦韆新羅王  
子放一箭高著眼分明穿破波斯面石岩明

二祖無端向少林庭前立雪到腰深直饒覓得心無  
有未免全身被陸沉誰菴演

屈節從長也大難雪堆斷臂仰高寒鐵牛鞭起熊峰  
下一吸黃河徹底乾或菴體

達磨九年面壁坐深雪之中得一個得一個森羅萬  
象平分破尼無著總

長安深夜雪漫漫欲覓心安轉不安縱使言前開活  
眼那知已被老胡瞞息菴觀

平地無端起骨堆將身活向雪中埋假饒覓得安心  
法還我孃生一臂來隱山璩

覓心心已覓無踪識得年辰是普通從此不消閒曆  
日春來積雪自消鎔靈叟源

金風一夜催人老吹落梧桐教誰掃驚然飛在五乳  
峰波斯拈起當作寶慧門勝

三祖僧瑤大師問二祖曰弟子身纏風恙請師懺  
罪祖曰將罪來與汝懺師曰覓罪了不可得祖曰

與汝懺罪竟宜依佛法僧住師曰今見和尚已知是僧未審何名佛法祖曰是心是佛是心是佛法無二僧寶亦然師曰今日始知罪性不在內外中間如其心焉佛法無二也祖深器之

卿瑯覺云猶欠作云何梵在 梁山觀於覓罪了不可得處云罪性向什麼處去也又云非但罪性覓者亦不見有 雲居齊云二祖深器之是肯他會佛法耶肯他說道理耶

罪已無根性已空正生風處不生風至今山谷山前水一派清流入海中佛國白

無孔笛子鼙拍板五音六律皆普偏時人不識黃番綽笑道儂家登寶殿五祖演

風恙纏身覓罪不得九萬里程展摩霄翼旻古佛

渾身臊癢倩人搔入骨搔來身已勞一下被伊搔著了平生癢處一時消水菴一

彌天罪過無門懺紅爛通身世莫醫已是四校俱踢地儘教後代亂鍼雖無門開

風恙纏身世莫醫家貧遭劫更堪悲誰知覓罪了無

處正是敗歸空屋時大歇謙

通身是病骨黏皮舉世無人識得伊縱使罪根都懺了依然失却兩莖眉癡絕沖

萬里天開一陣風雲推桂轂出烟籠秋深秋浦那清影露滴芙蓉兩岸紅無異來

三祖信心銘曰至道無難惟嫌揀擇但莫憎愛洞然明白

報恩秀云祖師道個嫌字先自憎愛了也却云但莫憎愛洞然明白又何啻揚聲而欲止響 德山繪則云至道最難須是揀擇若無憎愛怎見明白 佛川義云祖師八字打開兩手分付了也雖然直捷固然直捷怎奈極是誦譌山僧更資一路至道無難惟嫌揀擇但莫憎愛洞然明白良久云參

三祖曰毫釐有差天地懸隔

直上峰頭脚步寬得盤桓處且盤桓松林茂映彤雲赤舉眼尋思便著瞞雲松品

自來拽杖千峰外誰識斑斕是大蟲拈得松聲無著處和風吹偏碧桃紅月厂屏

三祖曰二由一有一亦莫守一心不生萬法無咎  
元潔鑒焉拈拄杖云三祖大師來也以無緣三昧智  
印三昧將須彌移至芥子孔見諸人不曾化作奮迅  
三昧穿却諸人鼻孔眼睛走入露柱裏去也卓拄杖  
三祖曰六塵不惡還同正覺

雪竇顯云拄杖子是塵有什麼過過既無應合辨主  
所以道糞掃堆頭現丈六金身且拈在一邊赤肉團  
上壁立千仞又放過一著直饒八面四方來正好連  
架打 古南門云雪竇拄杖子雖善能爲祖師作主  
要且脚跟未點地在

四祖道信大醫大師參三祖問願和尚慈悲賜與  
解脫法門祖曰誰縛汝師曰無人縛祖曰何更求  
解脫乎師大悟

牛頭未生梅子熟也緩步人間池成月下鳳書三到  
懶開眸白蓮峰頂光相射雲巖因

誰縛無人縛何更求解脫未必右軍鵝便是支郎鶴  
石田薰

四祖住新州破頭山學侶雲臻攝心不寐脇不至

席一日告衆曰吾武德年中遊廬山望破頭山紫  
雲如蓋有白氣橫分六道汝等會否弘忍曰莫是  
和尚他後橫出一枝佛法否師曰善唐太宗嚮師  
道三詔不赴就賜紫衣

慈雲之塔大醫之師瞻之仰之雙峰巍巍懶融不得  
西天盍直付黃梅路上兒楊無爲

島外尋師解縛歸雙峰山下獨幽奇却將衣盍爲人  
事乞與黃梅個小兒佛國白

絕知名迹能妨道正恐師承亦累人問法沙彌莫饒  
舌百年逆旅要同塵覺範洪

堅辭鳳闕紫泥詔玷辱宗風個古錐坐斷雙峰無寸  
草愛松留得礙人枝無門開

破頭峰頂紫雲飛三却天書老翠微滯貨雖然無用  
處不應分付小孩兒少室墜

解脫深坑得自由單提獨弄逞風流無端累及栽松  
老業識茫茫未肯休諸菴肇

破頭山下覓便宜勾引黃梅路上兒又向江南訪牛  
首賺他花鳥絕來期與牛齏

四祖付五祖偈曰華種有生性因地華生生大緣  
與性合當生生不生

小使生來氣宇雄性空內外滅眞宗破頭老祖親遭

著扇起毗嵐覆地風默菴慧

五祖弘忍大師在蘄州西山栽松四祖曰吾欲傳  
法與汝汝已年邁汝若再來吾尙遲汝師遂往周  
氏托生至七歲遇祖於黃梅祖問子何姓師曰姓  
卽有非常姓祖曰是何姓師曰是佛性祖曰汝無  
姓耶師曰性空故無

栽松何老傳衣何少前身後身一夢兩覺白藕開花

峰頂頭明月千年冷相照楊無爲二

日出而作栽松爲樂昔栽幾何今滿巖壑白頭人去

小兒歸笑殺林梢千歲鶴

垂垂白髮下青山七載歸來換舊顏人却少年松已

老是非從此落人間佛國白

誰是前身孰後身護將名字較新陳鄰家莫問去來

事我是昔人非昔人祖印明

黃梅果熟白藕花開問惟佛性體異凡胎衣傳南嶺

人將去松老西山我再來兩借皮囊成底事一壺風  
月湛無埃天童覺

栽偏滿山松暗地翻身轉雖然得信衣何曾識爺面  
石田薰

幾年活計饅頭邊萬本青松鎖翠烟夢破曹溪天地  
闢再來不值半文錢少室睦

栽松幸自可憐生剛娶隨人入火坑換得皮囊急回  
首依然鼻孔不多爭石室輝

手種青松數百株饑餐渴飲自如如無端借路重相  
見却被人傳上祖圖退翁休

約去栽松箇老人還來傳法喜童眞有孃生面無爺  
姓劫外靈苗不犯春水菴一

種得千山無空地一枝猶在饅頭邊不因脫賺周家  
女衣鉢何緣到汝傳中峯本

破頭山裏栽松日濁港江邊寄宿時大法一絲懸九  
鼎去來心事許誰知愚菴及

初生懷不怕虎等閑來擊禾山鼓也是苦阿房官裏  
稱巨富許多樓閣門無數那邊走過三五步波斯忽



遇著婆天道個性空無我我無故南菴依

五祖付六祖偈曰有情來下種因地果還生無情  
既無種無性亦無生

踢碓纔經八箇月衣孟夜半錯流傳風幡話墮聞皆  
喪今古怨牽到白拈默菴慧

六祖慧能大師聞五祖黃梅往參祖問汝自何來  
師曰嶺南祖曰欲須何事師曰惟求作佛祖曰嶺  
南人無佛性若爲得佛師曰人卽有南北佛性豈  
然祖訶曰著槽廠去祖一日各令呈偈神秀書於  
廊壁曰身是菩提樹心如明鏡臺時時勤拂拭勿  
使惹塵埃師別曰菩提本無樹明鏡亦非臺本來  
無一物何處惹塵埃祖默器之

石墜腰間春碓鳴老盧便重不便輕黃梅衣鉢雖傳  
得猶去曹溪數十程楊無爲

六祖當年不丈夫倩人書壁自塗糊明明有偈言無  
物却受他家一鉢孟死心新

桂花包裹老黃梅不向陰陽地上栽蜂蝶豈知香遠  
近難尋踪跡去還來東山演

黃梅夜半錯分付纔得星兒便亂做大庾嶺頭屑一  
堆後代兒孫遺點汙木菴永

闍下採樵斧直入碓坊春一脚踢到底黃梅信息通  
佛開光

應無所住以生心大地山河一發沉從此別開窮世  
界新州柴把賣如金菴菴先

四句伽陀不解書三更傳得本來無曹溪路上生荆  
棘直至如今在半途妙峯善

菩提無樹鏡非臺臭口分明鬼壁開幸是賣柴無事  
撩剛然惹得一身災無門開

不作樵夫作碓夫祇將脚力驗精蘊知他蹋著蹋不  
著和米和糠到鉢孟西巖惠

七百高僧總會禪眼空四海鼻揀天黃梅若也無私  
曲有甚衣孟到汝傳凝絕冲

荷條柴擔眼頭空路入黃梅伎已窮賣得藥林枝葉  
盡嶺南無地種春風中峯本

黃梅分付太倉忙半夜悽悽暗渡江將謂無人知下  
落賊身已露更和賊辛菴傳



負春原是嶺南人十字呼來九不真漏得衣孟連夜  
走至今無處著渾身退菴英

師資緣會有來由明鏡非臺語暗投壞却少林窮活  
計櫓聲搖月過滄洲萬慮單

新月澄溪上下圓冷雲抹盡落遙天城頭黑黑三聲  
鼓萬象森羅枕子邊三峯藏

六祖因法性寺風颺刹幡有二僧對論一曰風動  
一曰幡動師曰不是風動不是幡動仁者心動

雪峰存云大小祖師龍頭蛇尾好與二十棒字上座  
侍次較齒峰云我與麼道也好與二十棒保福展

云作賊人心虛也是蕭何置律五祖戒云著甚來  
由巴陵鑑云祖師道不是風動不是幡動既不是

風幡向甚處著有人與祖師作主出來與巴陵相見  
雪竇顯云風動幡動既是風幡向甚處著有人與

巴陵作主出來與雪竇相見泐潭清云不是風動  
不是幡動若是靈俐漢懸巖撒手便好承當顧後瞻

前轉生迷悶仁者心動而今還有爲祖師作主者麼  
有則出來與老僧相見天童華云一盲引衆盲相

牽入火坑黃龍新云不是風動不是幡動明眼漢

一點瞞他不得仁者心動且緩緩你向甚處見祖師  
乃擲下拂子云看徑山杲舉雪峰語畢云要識字

上座麼犀因翫月紋生角要識雪峰麼象被雷驚花  
入牙中峰本云嘗鼎一臠具知衆味非風動非幡

動仁者心動可謂嘗鼎之一臠矣使人不覺惡心嘔  
吐天寧琦云風動幡動心動與你拈却了也向什

麼處見祖師徑山秀云大小祖師爲人錯下註脚  
合喫三十棒龍池傳云不是風動不是幡動也不

是心動僧問畢竟是什麼動池召僧僧近前池打一  
掌云祇許你知不許你會又一掌云去箸菴問云

大小祖師朝打三千暮打八百金粟元云還知祖  
師落處麼書頭教孃勤作息書尾教孃莫瞌睡中間

一句不成文無限相思花雨淚  
不是風兮不是幡黑花貓子面門斑夜行人祇貪明

月不覺和衣墮水寒法昌通  
蕩蕩一條官驛路晨昏曾不禁人行渾家不是不進

步無奈當門荊棘生保寧勇

東西南北無空處上下四維隨分舉眷屬都來祇一身行盡天涯無伴侶三祖宗

不是風兮不是旛白雲依舊覆青山年來老大渾無力偷得忙中些子閒雪峯圓

滄溟直下取驪珠觀面相呈見也無到此不開真正眼膏肓之病卒難蘇道場如

指出風旛俱不是直言心動亦還非夜來一片寒溪月照破儂家舊翠微佛心才

夢遊華頂過丹丘躡盡寒雲倚石樓貪看瀑泉瀉崕壁不知身在碧江頭長靈卓

不是風旛不是心曹溪深也未爲深那咤忿怒掀騰去析徧微塵不可尋黃龍震

不是風旛是心動似倩麻姑癢處搔天外孤鸞誰得髓何人解合續絃膠崇覺空

浪靜風恬正好看秋江澄徹碧天寬漁人競把絲綸擲不見冰輪蘸水寒常菴崇

大海波濤湧千江水逆流龍王宮殿裏不見一人遊  
應菴率

不是風旛動天生李老君出胎頭上髮寸寸白如銀  
雪堂行

張翥推倒崑崙後幾人窮到孟津源堪笑不知天地者至今剛道有乾坤肯堂充

不是風兮不是旛將軍騎馬出潼關安南塞北都歸了時復挑燈把劍看天目禮

長安一片月萬戶搗衣聲秋風吹不盡總是玉關情  
孤峯深

風旛心動一狀領過祇知開口不覺話墮無門開地神歸地天神歸天殷勤奉送寶馬金錢無準範

一點私情奈得羞也曾漏洩在君侯相思正值春三月花落花開總是愁三宜孟

入暮微雲河漢遊鴈聲驚起一天秋樹高千丈西風急眨眼紅黃逐水流天岳晝

育王崇學巴陵雪竇拈畢云非風非旛無著處是風是旛無處著撥天俊鶻悉迷蹤踞地金毛遺失措阿呵呵悟不悟令人轉憶謝三郎一絲獨釣寒江雨  
六祖偈曰兀兀不脩善騰騰不造惡寂寂斷見聞

蕩蕩心無著

壽昌經云兀兀不脩善撞破虛空成幾片騰騰不造惡轉身挨倒空王閣寂寂斷見聞十方世界共慈門蕩蕩心無著驚起蟪蛄吞五嶽祇如此意還相似麼噫長江晝夜東流去海水從來不減增

六祖因僧問黃梅衣鉢什麼人得師曰會佛法人得曰和尚還得否師曰我不得曰和尚爲什麼不得師曰我不會佛法

汾陽昭代云方知密旨難傳 翠巖芝云會得卽二頭不會卽三首作麼生便有出身之路 徑山杲云還見祖師麼若也不見徑山與你指出蕉芭蕉芭有葉無了忽然一陣狂風起恰似東京大相國寺裏三十六院東廊下壁角頭王和尚破袈裟畢竟如何歸堂喫茶 天寧琦云棒打石人頭曝曝論實事 雲居莊云得與不得會與不會卽不問祖師性命因甚落在者僧手裏

信手拈來見自殊彌中消息沒工夫黃梅未許傳斯旨半夜曾將付老盧大洪恩

斬釘截鐵大巧若拙一句單提不會佛法儘他葉落

花開不問春寒秋熱別別萬古寒潭空界月 圓悟勛  
不會黃梅佛法夢中合眼惺惺此地無金二兩俗人  
酤酒三升雪菴瑾

祖師不會禪夫子不識字棒打石人頭曝曝論實事  
高峰妙

六祖因臥輪有偈臥輪有伎倆能斷百思想對境  
心不起菩提日日長師別曰慧能無伎倆不斷百  
思想對境心數起菩提作麼長

天童覺云葵花向日柳絮隨風 寶壽新云纔說乾  
三連便有坤六斷作麼生圓成一卦去要知爻象分  
明處祇在文王掌上觀

六祖示衆曰吾有一物無頭無尾無名無字無背  
無面諸人還識麼時荷澤神會出曰是諸法之本  
源乃神會之佛性師打一棒曰者饒舌沙彌我喚  
作一物尙不中豈況本源佛性乎此子向後設有  
把茅蓋頭也祇成得箇知解宗徒

法眼益云古人授記終不錯如今立知解爲宗卽荷

澤是也

一翳在眼空華亂墜神會沙彌失錢遭罪祇見鑿頭  
方不見錐頭利大丈夫小釋迦鐵鞭一擊珊瑚碎圓  
悟動

畫師五彩畫虛空落筆須知失本蹤更有唐朝吳道  
子平生紙上枉施功慈受深

鐵枷無孔要人擔累及兒孫不等閒夜半忽忘三尺  
布却將空手掩慚顏法林音

六祖一日謂門人曰吾欲歸新州汝等速治舟楫  
門人曰師從此去早晚却回師曰葉落歸根來時  
無口

法雲秀云非但來時無口去時亦無鼻孔 白雲端  
云祖師可謂善解借手行拳有般漢往往道言猶在  
耳不見道子期去不返浩浩良可悲不知天地間知  
音復是誰 五祖演云祖師恁麼道猶欠悟在  
五蘊山頭一段空來時無口去無踪要明葉落歸根  
旨末後方能達此宗本覺一

葉落歸根後曹溪一滴深山居人少到眞實好知音

龍門遠二

歸根得旨復何論洞口秦人半掩門花落祇隨流水  
遠空留窠窠野雲屯

雲開空自闊葉落卽歸根回首烟波裏漁歌過遠村  
松源岳

興在天南天盡頭未行先已到新州來時無口去無  
伴那更蕭蕭黃葉秋盧堂愚

宗鑑法林卷六

宗鑑法林卷七

集雲堂 編

旁出諸祖

牛頭法融禪師四祖信嗣因四祖到山入庵後見虎迹

便作怕勢師曰和尚猶有者箇在祖曰者箇是甚

麼師於言下有省自後百鳥不復銜花

雪竇顯代融但亦作怕勢又云泊合放過 僧問牛

頭未見四祖因甚百鳥銜花南泉願云爲渠步步踢

佛塔梯 趙州云飽柴飽水 大瀉詰云寒毛卓豎

法林音云漢地山河在 又問見後因甚百鳥不

來泉云直饒不來猶較王老師一綫道 州云飽柴

飽水 瀉云額頭汗出 林云秦宮草木秋

牛頭峰頂鎖重雲獨坐寥寥寄此身百鳥不來春又

去不知誰是到菴人明覺顯

紫氣氤氳透白雲因逢宗匠指迷津銜花百鳥空惆

悵不見菴中舊主人楊無爲

花落花開百鳥悲菴前物是主人非桃源咫尺無尋

處一棹漁蓑寂寞歸張無盡

一榻蕭然傍翠陰晝局松戶沉沉懶融得到平常

地百鳥銜花無處尋 印明

寥寥風月臥煙霞百鳥從茲不獻花仁義盡從貧處

斷世情偏向有錢家夢庵信

水因有月方知靜天爲無雲始覺高獨坐孤峰休更

問此時難著一絲毫別峰印

雨前不見花間葉雨後渾無葉底花蝴蝶紛紛過牆

去不知春色屬誰家孤峰深

著鞭騎馬去空手步行歸寂寞菴前路銜花鳥不飛  
鐵山仁

月滿陂池翠滿山尋常來往百花間一回蹋斷來時  
路嶺上無雲松自閒懶牧成

宣州安國立挺禪師牛頭威嗣因僧問五祖眞性緣起

其義云何祖默然時師侍立乃曰大師正興一念

問時是眞性中緣起僧大悟

徑山杲云未興一念問時不可無緣起也時有僧云

未興一念時喚甚麼作緣起妙喜云我也祇要你與

麼道 天寧琦云崑崙奴著鐵褲打一棒行一步

靈巖儲云盡道黃梅就下平高殊不知腳頭太嶮者

僧祇顧萬仞巖頭進步那識身在帝鄉挺禪妙喜一

人點卽不到一人到卽不點

天柱崇慧禪師牛頭威嗣因僧問達磨未來此土時還

有佛法也無師曰未來且置卽今事作麼生曰某

甲不會乞師指示師曰萬古長空一朝風月僧無

語師復曰闍黎會麼曰不會師曰自己分上作麼

生干它達磨來與不來作麼它家來大似賣卜漢

見汝不會爲汝錐破卦文纔生吉凶盡在汝分上  
一切自看僧曰如何是解卜底人師曰汝纔出門  
時便不中也

萬古長空誰下脚一朝風月休拈却一拳拳倒賣卜

人門外騰騰自寥廓雲林格

天柱因僧問如何是大通智勝佛師曰曠大劫來  
未曾壅滯不是大通智勝佛是甚麼曰爲甚麼佛  
法不現前師曰祇爲汝不會所以成不現前汝若  
會去亦無佛可成

剖義一云掀倒天關踢翻地軸不無天柱爭奈者僧  
久滯不通孤負來機勞它心力

潤州鶴林立素禪師牛頭威嗣因僧敲門師問是甚麼

人曰是僧師曰非但是僧佛來也不著曰佛來爲  
甚麼不著師曰無棲泊處

寶壽方云鶴林與麼道將謂立在高高山頂殊不知  
被者僧推在萬丈深淵裡多少時了也

十月清霜重臨風徹骨寒苦無棲泊處擺手出長安

松源嶽

道箇佛來也不著骨頭節節是黃金不消三拜勘破  
了鶴唳空山竹滿林自默恭

白日閉門常獨坐虛堂時卷夜明簾懶隨人事忘迎  
送落木金風霜信嚴幻寄庭

牢關把住擊難通佛祖都來總不容若是金毛師子  
子翻身驚過太虛空顧石圓

杭州徑山國一道欽禪師鶴林素嗣馬祖遣人送書到

書中作一圓相師發緘見遂於圓相中著一點却  
封回忠國師問乃曰欽師猶被馬師惑

保福展云甚處是惑處作麼生得不惑 雪竇顯云

徑山被惑且置若將呈似國師別作個甚麼伎倆免  
被惑去有老宿云當時坐却使休亦有道但與畫破

若與麼祇是不識羞敢謂天下老師各具金剛眼睛  
廣作神通變化還免得麼雪竇見處也要諸人共知

祇者馬師當時畫出早自惑了也 五祖戒云兩采

一賽又云三人指路擬何爲 滄山喆云還識馬祖

徑山麼一點水墨兩處成龍國師道欽師猶被馬師  
惑可謂千里同風不見道手執夜明符幾箇知天曉



徑山杲云馬祖仲冬嚴寒國一孟夏漸熱雖然寒熱不同彼此不失時節國師因甚道欽師猶被馬師惑無風荷葉動決定有魚行 天寧琦云圓相中著點日月無光天地黯黑初未惑欽師馬師先自惑累及老南陽也一場狼藉良久云平生肝膽向人傾相識如同不相識 古南門云古南有三十棒一打馬師不應自惑二打欽師不應被惑三打雪竇不應判惑更月一棒款款與諸人道破 崇先奇云馬師草草問候欽師万字折點雖然往復無差轉見道路周遮總謂忠國師道欽師猶被馬師惑殊不知字經三寫烏焉成馬

馬祖當時驗徑山同風微露密機關無端却被南陽老平地坑人似等閒佛印元

被惑之言事有由神交千里芥鍼投誰知解使雲通信我不然兮石點頭照覺總

自惑惑人非草草不失時節通一好蹋著草索骨骨驚只爲當初被蛇齧雲林格

國一因馬祖遺智藏來問十二時中以何爲境師

曰待汝回去時有信藏曰卽今便回去師曰傳語馬大師道却須問取曹溪

雲居莊云馬師大似埋兵挑鬪國一可謂遇變出奇者僧雖善通使命要且勞而無功驚拈拄杖畫一畫云三級浪高魚化龍癡人猶屏夜塘水 本覺云馬祖暗度金鍼徑山明穿玉綫若非者僧怎識文彩全彰仔細看來姤女已歸霄漢去猷郎猶向火邊蹲國一因唐代宗親加敬禮一日在大內見帝來乃起立帝曰師何以起師曰檀越何得向四威儀中見貧道

徑山杲云不向四威儀中又如何見國一

立任威儀外全身在裏頭重重賜龍袖難掩面門羞西巖惠

萬乘君王一國師尋常不離四威儀山長水遠空相憶黃葉吹風人未歸聞極雲

杭州烏窠道林禪師國一因侍者辭往諸方學佛法去師曰若是佛法老僧亦有少許曰如何是和

尙佛法師拈起布毛吹一吹侍者大悟



大瀉秀云可惜者僧認他口頭聲色以當平生殊不知自己光明蓋天蓋地 神鼎裏舉了遂於身上拈布毛吹云會麼久後不得事負老僧 徑山杲云瀉山與麼批判也未夢見鳥窠在 天寧琦云侍者能於拈起布毛處便喝免致諸方檢點我恁麼道也是爲他閒事長無明

白鳳烟霞控鳥窠 龍珠曜祖山河當初拈起布毛意體用毗盧些子多克符道者

鳥窠拈起布毛吹一道寒光對落暉雖是老婆心意切悟來猶在半途歸石門易

無風市市起波浪 碧髻羅紋正眼觀恰值黃河三凍鎖那羅延窟見龍蟠雲居祐

鳥窠吹布毛紅日午方高趙王因好劍合國人帶刀

真淨文

老倒忘機是鳥窠 西湖湖上控煙臺布毛吹起無多子鐵眼銅睛不奈何實峰乾

眼中難著透金塵悟了今人即古人大地撮來如粟米一毛頭上現全身佛鑑龜

布毛一吹當下知歸冷光徧地獨露鐵錘楚方安

遊騎紛紛驟曉風將軍施令在城東拈來金鏃些兒妙射破花心一點紅盡毒策

長林幽鳥謾嘈嘈 柳臨風舞翠濤富貴春城誰不受引人徐步上林皋三宜玉

一向曾無刀斧痕還他本色住山人無端節外生枝者惹得平空禍到門孝如元

鳥窠因白居易問如何是佛法大意師曰諸惡莫作衆善奉行曰三歲孩兒也解恁麼道師曰三歲孩兒難道得八十老人行不得

法林音云趁出姪房未還酒債自不契他居易如今一般漢坐在明白地上喚作鳥窠爲他說一上佛法得麼

惡無相貌善無形皆自心田長養成不動鋒銳輕剔破菩提煩惱等空平無量壽

袁州蒙山道明禪師五祖忍嗣因趁六祖廬行者至大

庾嶺祖置衣於石上師舉之不動乃曰我爲法來非爲衣來願行者開示祖曰不思善不思惡正恁

麼時那箇是明上座本來面目師大悟作禮曰上  
來密語密意外更別有意旨否祖曰我今爲汝說  
者卽非密也汝若返照密在汝邊

法林音云行者深無去就被箇孟八郎輕輕一撈便  
自立地放尿如今二千年來大庾嶺頭底衣鉢不知  
還在否致今無限無限衲僧箇箇瞠開眼睛單單祇  
要見本來面目真堪笑煞

正當恁麼時歷劫不曾迷步步趨三界歸家永絕疑  
龍門遠

堂堂妙相絕錙銖善惡都忘見也無萬里雲收天界  
淨海心無浪月輪孤佛性泰

夜深傳付老盧衣恨殺黃梅老古錮向道趕人休趕  
上果然落節一番歸雪溪成

十八佳人入繡房燈前無暇敘炎涼風流不是言傳  
得端在儂家自主張六愚吉

嵩山慧安國師五祖忍嗣因坦然問如何是祖師西來

意師曰何不問取自己意曰如何是自己意師曰  
當觀密作用曰如何是密作用師以目開合示之

然於言下知歸

尸阿菴云言下知歸者僧早負自己乃合掌云菴儂  
不敢望諸人與安國師相見

提鐙覓火外邊尋指示分明在己身驀地頂門開正  
眼不從自己不從人靈鷲說

嵩岳破竈墮和尚安國師嗣因嵩山有廟甚靈殿中惟

安一竈師以杖敲三下曰咄此竈祇是泥瓦合成

聖從何來靈從何起恁麼烹宰物命又打三下竈

乃傾墮須臾有青衣褰冠設拜曰我本此廟神久

受業報今蒙師說無生法得脫此處生天師曰是

汝本有之性非我彊言僧問某甲久侍左右未蒙

方便竈神得何宗旨便乃生天師曰我祇向伊道

是泥瓦合成別無道理爲伊僧佇思師曰會麼曰

不會師曰本有之性爲什麼不會僧作禮師曰墮

也墮也破也破也後有舉似安國師國師歎曰此

子會盡物我一如

禍福威嚴不在靈殘盃冷炙饗何人一從去後無消  
息野老猶敲祭鼓聲龍門遠

倚竈爲靈不自靈靈踪斷處一堆塵野老不來敲柴鼓打正因邪別是春佛靈珣

摩天鳩鳥九頭毒護世那吒八臂長水向石邊流出冷風從花裏過來香南崖勝

遭他一擊便低頭空戴儒冠學楚囚好看雲空山巖露溪聲不斷水長流普慧雲

破竈因僧從牛頭處來師問來自何人法會僧近前叉手繞師一帀而出師曰牛頭下不可有此人僧乃過師左邊叉手而立師曰果然果然僧却問應物不由它時如何師曰爭得不由它曰與麼則順正歸原去也師曰歸原何順曰若非和尚幾錯招憾師曰猶是未見四祖時道理也見後通將來僧却繞師一帀而出師曰順正之道古今如然僧作禮而退

漢雷見云破竈垂手自在縱奪臨時固是作家宗匠者僧慣能作客進退得宜可謂親見牛頭然檢點將來二俱敗露且那裏是伊敗露處三昧真云者樣伎死禪和也敢道從牛頭來破竈老人當時棒折那

嵩山峻極禪師破隨因僧問如何是大修行底人

師曰擔枷帶鎖曰如何是作業底人師曰修禪入定僧無語師乃曰汝問我善善不從惡汝問我惡惡不從善所以道善惡如浮雲起滅俱無處僧契悟後破竈墮聞舉乃曰此子會盡諸法無生

薦福懷云前頭官不容鍼後面私通車馬昭覺勤云窮善善自何來究惡惡從何起有問崇寧如何是大修行人但云修禪入定如何是大作業人但云擔枷帶鎖且道是同是別徑山杲云怎奈在髑髏前作妄想烏石道別前語云橫身當宇宙別後語云赤脚上刀山

帶鎖擔枷招罪犯安禪入定墮深坑兩頭別脫無依倚一箇閒人天地間別山智

終南山惟政禪師北宗嵩山寂嗣因唐文宗嗜蛤蜊一日

御饌中有蟹不開者帝以爲異因焚香禱之俄化爲菩薩梵相具足卽貯以金粟檀香合覆以美錦賜興善寺因問羣臣此何祥也衆言太乙山惟政禪師深明佛法帝召至問之師曰物無虛應此乃

啓陛下信心耳契經曰應以何身得度者卽現何身而爲說法帝曰身已顯矣且未聞說法師曰陛下觀此爲常耶非常耶信耶非信耶帝曰希奇之事朕深信之師曰陛下已聞說法竟上大悅

湖南音云蛤蜊說法卽是惟政注破却不是

螺螄蚌蛤類大唐天子心嗜好卽深信南無觀世音西嚴惠

合水和泥底事忙被渠點破大乖張雖然默契君王意已是全身陷鑊湯北海心

蚌蛤之中有應身更言說法亦非眞補陀大士唐天子橫眼人無隔宿恩開極雲

鑊湯深處轉身來縱使輪槌擊不開驚地豁開菩薩現者回不必更疑猜三圖二

政老當年不丈夫妄言說法自糊塗雖然賺得唐天子笑倒西天碧眼胡

西京光宅慧忠國師六祖龍圖因肅宗問師在曹溪得

何法師曰陛下還見空中一片雲麼曰見師曰釘釘著懸挂著

五祖戒云好事不如無 磬山修云且喜國師答話不涉離微不落理路可謂超今邁古獨步乾坤倘肅宗若解轉身一拶不知者一片雲又如何收卷一堂風冷澹千古意分明 白崖符云國師與麼道是曹溪所得耶不是曹溪所得耶

無開口處却開口有意歸時卽便歸趙州不在明白裏未是羶羊挂角時慧受深

國師因肅宗問如何是十身調御師乃起立曰會麼曰不會師曰與老僧過淨瓶來

帶雪含霜半倚籬橫裏露仙姿前卽昨夜春來了竹屋老僧猶未知心間貴

靜把醪酥著意傾少年公子那知情臨檻祇得塗敷粉一任人譏太俗生淡水洽

國師因肅宗問如何是無諍三昧師曰檀越蹋毗盧頂上行曰此意如何師曰莫認自己清淨法身

又復問師都不視之曰朕是大唐天子師何以殊不顧視師曰還見虛空麼曰見師曰它還眨眼視陛下否

徑山杲云要見國師麼祇在你眼睛裏開眼也錯過合眼也錯過既在眼睛裏爲甚麼却錯過妙喜麼道也錯過不少

一國之師亦强名南陽獨許振嘉聲大唐扶得真天子曾踞毗盧頂上行雪寶顯二

鐵錘打碎黃金骨天地之間更何物三千刹海夜濺濺不知誰入蒼龍窟

作者清規世莫儔金鎚曾握上龍樓良哉接破毗盧頂直得文殊笑點頭瀟山秀二

寶月含虛列數峯高低誰辨澹煙中須彌擊碎鹽官鼓降得毗盧在下風

步步踢著毗盧頂亦非自己清淨身妙入空門得空相祖師肝膽佛精神佛鑑勸

國師因南泉參乃問甚處來曰江西來師曰還將得馬師真來麼曰祇者是師曰背後底杲休去

長慶稜云大似不知 保福展別云泊不到和尚此間 五祖戒云和尚於此路熟 雲居錫云長慶保

福盡扶背後祇如南泉休去爲當扶面前扶背後

天界盛云南泉井底架高樓國師漆桶裏斫額此外兩兩三三扶面前扶背後正是揚州拾馬糞却去蘇州賣合香

國師因大耳三藏得它心通肅宗命師勘驗師問汝得它心通耶曰不敢師曰你道老僧卽今在甚麼處曰和尚一國之師何得去西川看競渡師良久再問藏曰和尚一國之師何得向天津橋上看弄胡猱師至第三次問三藏沉吟罔知去處師叱曰者野狐精它心通在甚麼處藏無對

趙州因僧問第三度不見國師未審國師在甚麼處云在三藏鼻孔裏後僧問立沙旣在三藏鼻孔裏因什麼不見沙云祇爲太近 仰山寂云前兩度是涉境心後入自受用三昧所以不見法林音云要見國師則易要見仰山則難 立沙備云汝道前兩度還見麼後雪竇顯云敗也敗也 白雲端云國師在三藏鼻孔裏有什麼難見殊不知國師在三藏眼睛裏翠巖芝云祇如三藏還見國師鼻孔麼 報慈遂云前兩度見後來爲什麼不見且道利害在甚麼處

高峯妙云大小國師平生伎倆總被者胡僧勘破

雖然賴遇聖君證明 報恩秀云若着眼睛裡有甚

難見殊不知三藏通身是國師雖然也祇道得一半

若要全道三藏未離西天時早已與國師相見了也

佛川宗云三藏待國師道即今在甚麼處但拍掌

呵呵大笑管教他一國之師分疎不下 龍池珍云

大小國師被三藏逼得無地藏身則且置祇如第三

度因甚不見龍池道非但三藏摸索不著敢保國師

自己亦未知落處在乃呵呵大笑 仙巖鑑云當時

待國師問問道自首者免罪

他心三藏太顚預胡獼覲了看划船對面國師尋不

見祇爲從前被眼瞞治父川

日應羣機必有方未知何處覓南陽自從失却胡獼

後橋上多時不作場懶菴樞

藏鋒避箭路千差萬古相饒老作家好是鷺鷥無覓

處夜深和月宿蘆花鐵山仁

國師因馬祖遣西堂藏馳書至師問汝師說甚麼

法藏從西過東立師曰祇者箇更別有藏却過西

立師曰者箇是馬師底仁者底作麼生藏曰早箇  
呈似和尚了也

保福展云大小西堂埋沒馬大師不少 法林音云

保福祇知西堂埋沒馬大師殊不知國師自己埋沒

更多

國師問僧近離甚處曰南方師曰南方知識以何

法示人曰南方知識道一朝風火散後如蛇退皮

如龍換骨本爾眞性宛然無壞師曰苦哉苦哉南

方知識說法半生半滅曰未審和尚以何法示人

師曰我者裏身心一如身外無餘曰和尚何得將

泡幻之身同於法體師曰汝爲什麼入於邪道曰

什麼處是某甲入邪道處師曰不見教中道若以

色見我以音聲求我是人行邪道不能見如來

雲門偈云身心一如身外無餘山河大地何處有耶

神鼎譚云國師與麼道龍頭蛇尾前來身心一如

向什麼處去也 靜慈昌云者僧當時待國師道若

以色見我以音聲求我是人行邪道不能見如來但

云苦哉苦哉大小國師半生半滅 東禪觀云國師



與者僧卽色聲相見離色聲相見若離色聲何異南方知識半生半滅若卽色聲又道色見聲求是行邪道莫有爲國師作主者麼我要問你既是身心一如身外無餘泡幻之身爲什麼不同法體 元潔瑩云大小國師前不構村後不迭店旣道身心一如爲什麼又道色見聲求是行邪道國師意在什麼處

國師因僧問如何是佛法大意師曰文殊堂裏萬菩薩曰不會師曰大悲千手眼

時年蔬菜賤滿地蘿蔔頭一文買一箇得老飽齣齣佛鑑勸

尋真誤入蓬萊島香風不斷松花老採芝何處未歸來白雲滿地無人埽棘田心

國師因虞軍容問師住白巖山如何修行師喚童子以手摩頂曰惺惺直言惺惺歷歷直言歷歷向後莫受人瞞

保福展云國師著一問直得手忙脚亂 法林音云賴遇軍容輕輕放過倘若再一拶國師恁麼住山直是不易管教他一國之師有口也要啞却

國師一日喚侍者侍者應諾如是三喚三應師曰將謂我辜負汝却是汝辜負我

趙州諗云如人暗中書字字雖不成文彩已彰雪竇顯便喝愚庵孟云者一喝有賓有主有照有用徑山杲云者一喝在國師侍者分上在趙州分上隨後一喝庵云相巽饒你接紫 理安問云妙喜老人前不構村後不迭店要見國師侍者三生六十劫 投子同云抑逼人作麼雪竇云躲跟漢 玄沙備云却是侍者會竇云停因長智 雲門偃云作麼生是我辜負汝處若會得也是無端竇云原來不會門又云作麼生是侍者辜負國師處粉骨碎身未報得竇云無端無端 法眼益云且去別時來竇云瞞我不得雲居錫云法眼恁麼道爲復明國師意不明國師意興化獎云一盲引衆盲竇云端的瞎有人問雪竇便打也要諸方點檢 報慈遂問僧云甚處是侍者會處僧云若不會爭解與麼應慈云汝少會在又云若於此見得便識玄沙 翠巖芝云國師與侍者總欠會在 雪竇云國師三喚點卽不到侍者三應到卽



不點將謂我辜負汝却是汝辜負我瞞雪竇不得  
雲居錫徵云且道侍者會不會若會國師又道汝辜  
負我若道不會玄沙又道却是侍者會 浮山云國  
師好肉剗瘡雲門炙癰上著艾雪竇大似隨邪逐惡  
殊不知鼻孔總在侍者手裏 笑嚴實呵呵大笑云  
諸人還知者笑落處麼若知國師直得瓦解冰消若  
不知侍者依然四棱著地還委悉麼一陽已度先春  
信臘夜寒梅破雪開 愚庵孟云山僧居平亦喚侍  
者侍者隨應侍者擎杯遞盞山僧隨手應接山僧與  
侍者兩不相負亦不相瞞夾路桃花風雨後馬蹏何  
處避殘紅

龍吟虎嘯與誰同天際雲生洞下風從此太平田舍  
老兒孫攜手賀年豐佛印元

國師三度喚侍者三度應家富小兒嬌病多諳藥性  
吾負汝隴西鸚鵡能言語汝負吾笑殺西來碧眼胡  
欲會南陽端的意大都年老覺心孤佛慧泉  
三呼三應諾彼此不相辜踏斷南陽路馨香滿道途  
五祖演

國師三喚侍者侍者三度應諾若言負汝負吾真箇  
可知禮也智海清

國師年老太多圖截鶴由來要續鳧彼此無瘡安樂  
甚何勞傷損好皮膚祖印明

寶劍連飛急透頂便通神有時輕按處驚動五湖賓  
高菴悟

世路風波不見君一回見面一傷神水流花落知何  
處洞口桃花別是春鼓山珪

啞子得夢向誰說起來相對眼瞢迷已向人前輸肺  
腑從教他自覓便宜徑山杲

三喚須知意不輕平生肝膽一時傾負吾負汝還知  
否縱有丹青畫不成水菴一

一日君家把酒盃幾年波浪與塵埃不知烏石嶺頭  
路老去相尋能幾回頑石空

一箭射雙鵬雙鵬隨手落波動岳陽城月滿滕王閣  
雪菴瑞

鐵枷無孔要人擔累及兒孫不等閒欲得掌門並挂  
戶更須赤脚上刀山無門開

一擲神栢定吉凶再占重卜轉靈通分明見了今年  
事却說明年事不同無準範

翠萼香深繡戶春數聲玉笛最關情臨軒不盡囁鵲  
淚結打同心更屬卿天章王

國師同肅宗到宮前乃指石獅子曰陛下者石獅  
子奇特下取一轉語帝曰朕下語不得請師下語  
師曰老僧罪過後耽源問師曰皇帝還會麼師曰  
皇帝會且置你作麼生會

玄沙備云大小國師被侍者勘破 頤石圓云言中  
有響句裏藏鋒國師肅宗可謂得人一牛還人一馬  
美則美矣善則未善當時若推倒石師子便行非惟  
國師不敢正眼覷著亦免見耽源落節 東蓮詠云  
肅宗若是作家待南陽恁麼問向道少賣弄不惟使  
它國師結舌亦不謬爲一朝天子

國師因馬祖遣伏牛自在馳書至師問馬大師有  
何言句示徒在曰卽心卽佛師曰是甚麼語話又  
問此外更有何言教在曰非心非佛或云不是心  
不是佛不是物師曰猶較些子在曰馬師卽恁麼

和尚此間如何師曰三點如流水曲似刈禾鎌

雪竇於猶較些子處便喝又於曲似刈禾鎌處云是

甚麼語話也好與一拶見之不取千載難忘 滄山

詰云當時但呵呵大笑復問國師此間如何待云三

點如流水又呵呵大笑教他國師進且無門退亦無

路何故入虎穴撩虎尾須是其人 姜山方云大小

國師有頭無尾待伊道不是心不是佛不是物亦向

道是什麼語話豈不光前絕後 古南門云馬祖國

師鼻孔總被伏牛穿却了也忽有箇漢出來道是什

麼語話劈脊棒云三段不同收歸上科

霜鬢老婆年七十巧臨粧次整花容一回步出香閨

外贏得春風滿面紅其天浩

國師因紫璘供奉注思益經師乃問大德注經須

會佛意始得曰若不會佛意爭解注得師令侍者

盛一盃水內著七粒米盃面安一隻箸乃問是什

麼義奉無語師曰老僧意尙不會豈況佛意

滄山果云供奉先鋒有作殿後無功當時纔見問是

什麼義祇對云章本不勞拈出踢倒便行直饒國師

通身是口也無說處

國師因與紫璘論義師陞座奉曰請師立義某甲破師曰立義已竟曰是什麼義師曰果然不見非公境界下座

廣胤標云善戰者制人不制於人紫璘當時若是箇人待道立義已竟但云情知者老漢向鬼窟裏作活計管取因形措勝縱越人之兵雖多奚益於勝哉

國師問紫璘佛是什麼義曰覺義師曰佛曾迷否曰不曾迷師曰用覺作麼奉無語

徑山杲云若不入水爭見長人 資福侶云國師也是從井救人 天嶽晝代云話墮了也

國師問紫璘甚處來曰城南來師曰城南艸作何色曰作黃色師又問童子艸作何色子曰作黃色師曰祇者童子亦可簾前賜紫對御談立

瀉山喆云國師怎麼問供奉與童子怎麼答且道還有利害麼若也辨得許你親見國師若辨不得城南草依舊作黃色 徑山杲云你道國師拖泥帶水說老婆禪得麼 海門湧云國師雖慣壓良爲賤檢點

將來也是草窠裡覷

憤使渡頭船如今不記年愛他風浪惡方是趁龜錢  
月堂昌

欲把枯腸盡底傾出門不覺又叮嚀勸君及早回頭去莫待春風柳眼青盧堂愚

國師問紫璘大德所蘊何業曰講青龍疏師曰是金剛經麼曰是師曰經文最初兩字喚作什麼字曰如是師曰是什麼奉無對

明招謙代云昔日靈山今日親見 瀉山杲云瀉山要問明招昔日靈山今日親見畢竟是什麼若下得者一拶縱使明招通身是眼也未免一狀領過 雲溪挺代云和尚人天之師字也不識

國師曰語漸也返常合道論頓也不留朕迹

上無衝天之計下無入地之謀蔡州千箇萬箇打破祇在須臾雪寶顯

二六時中合返常經行坐臥好參詳相逢不審人人會問著依前未嘶當本覺一

國師問座主講什麼經曰惟識論師曰作麼生會

惟識曰三界惟心萬法惟識師指簾子曰者箇是甚麼法曰色法師曰座主簾前賜紫對御談玄何得五戒不持

寶壽方代座主別前語云者邊是香臺那邊是露柱別後語云國師大似不曾讀論

國師因丹霞來纔展坐具師曰不用不用霞退後三步師曰如是如是霞進前三步師曰是不是不是霞遶禪牀一巾而出師曰去聖時遙人多懈怠三十年後覓箇漢也難得

保福展云丹霞食程不覺行困 滄山詰云丹霞可謂懷藏至寶遇智者乃增輝國師鴻門大啓陟者須是其人如今還有爲丹霞作主者麼出來與大滄相見有麼不是龍門客切忌遺點額 勸潭準云客路如天遠侯門似海深登彌天釋之門者須是其人接待高賓應有孟嘗君之度量苟不如是便見主賓道異雲泥不合 大滄果云丹霞一進一退暗中贏得一著國師倒東播西未免旁觀者哂 蔣山勤云賓主相見欲展不展退後進前禮過成詔猶幸南陽老

◆ 漢 羅 賦

而不耆 東禪觀云明境當臺妍來妍現熾來熾現洪鐘在架大扣大鳴小扣小鳴一卷一舒一擒一縱可謂照用兩全行說俱到且如國師末後恁麼道畢竟是褒是貶 崇先奇云國師當軒布鼓難爲擊者丹霞漁陽三弄意氣天生衆中總謂賓主穆穆殊不知雖得場榮別却雙足 雪溪挺云二老有縱有奪識咎識休不愧一回相見雖然黃石公賴遇子房若是漢高未免遭他慢罵 法林音云湯武之世可謂明良若論揖讓之風猶欠都俞在

不用不用千聖不共如是如是螻蛄蛇虺是不是徹骨徹髓進前退後遶禪牀掣電之機落二三印空

密雨柴門鳥亂啼日高紅影射花枝五陵年少風流慣愛勸殷勤上馬杯理安閑

嘉客臨門愜素懷肯將珠玉客安排話來膽露肝傾處更與黃金十二牌位中符

伯牙琴與子期耳聽不在音彈豈指一種清聲絕比倫子期去後付流水慧鑑融

洞口仙人騎白鶴九天玉女跨青鸞半隨風雨半隨

霧不是張騫誰解看法林音

國師因肅宗問百年後所需何物師曰與老僧造箇無縫塔帝曰請師塔樣師良久曰會麼帝曰不會師曰我有付法弟子耽源却諳此事請詔問之後召源問源乃有頌曰湘之南潭之北中有黃金充一國無影樹下合同船瑠璃殿上無知識

雪竇顯云肅宗不會且置耽源還會麼祇消箇請師塔樣盡西天此土諸位祖師遭者一拶不免將南作北有旁不肯底出來我要問你那箇是無縫塔 神

鼎鑪云前來國師作用不能明了次問耽源源恁麼頌且道盡善不盡善神鼎與你諸人下四轉語湘之南潭之北君臣有路中有黃金充一國淨妙體圓無影樹下合同船千聖同轍瑠璃殿上無知識凡聖路絕若與麼會去必不相賺神鼎與麼注解祇是辜負國師 保寧勇云所謂非父不生其子雖然如是瞞肅宗一人卽得爭奈天下衲僧眼何且道那箇是衲僧眼便下座 五祖演云衆中道國師良久殊不知懸鼓待槌當時肅宗若是作家君王待伊教詔耽源

但道國師何必後詔耽源源呈頌畢但云閒言語

瀛山闇云國師塔樣太圓圖生耽源塔樣太玲瓏生且道國師底是耽源底是 金粟元云好箇塔樣從古至今未嘗有一人識得耽源與麼頌非惟欺瞞皇帝亦乃辜負國師

無縫塔見還難澄潭不許蒼龍蟠層落落影團團千古萬古與人看明覺顯

無縫塔從誰手造雖然有樣不堪傳如何強寫無層級永向瑠璃殿上懸白雲端

窣堵無縫立還危寶鐸玲瓏八面垂千手大悲捫不著百重關鎖下金毘羅漢南

前面是珍珠瑠璃後面是瑪瑙珊瑚左邊是觀音勢至右邊是普賢文殊中間有箇旛子被風吹著道胡盧胡盧五祖演

無縫塔兮不見影廓然一片真如境爍迦羅眼電光流杳杳冥冥不見頂佛靈應

孤迥迥圓陀陀眼力盡處高峩峩月落潭空夜色重雲收山瘦秋容多八卦位正五行氣和身先在裏見

來麼南陽父子兮却似知有西竺佛祖兮無如奈何  
宏智覺

窄塔古形儀未舉已先知巍然存海底影落樹頭輝  
潛菴光

湘南潭北影團團面而簷楹風雨寒突出虛空無縫  
罅從教千古與人看無門關

國師塔樣最尖新靚面拈來不露文却被耽源添一  
線至今描邈亂紛紛高峰妙

月照蘆花霜風凜冽漁歌一曲滄浪裏芙蓉樓老寒  
江側三宜孟

一潭舞出三江影兩岸清光照衰嶺霜重風高不可  
留梧桐葉落沉金井伴我侶

國師因麻谷來參繞禪牀三帀振錫而立師曰汝  
既如何用見吾谷又振錫師叱曰者野狐精

雪竇顯代麻谷云泊不到此白巖符云竇符在握  
與奪從容還他南陽老作然終不免麻谷在背地裏  
冷笑

手握青鋒建大功紅旂面面總玲瓏武侯智足能擒

縱司馬謀多暫警響割據固由高捷足知機那在並  
稱雄一天星斗和雲亂送入洞庭烟雨中天岸昇

溫州永嘉真覺禪師六祖能嗣初至曹溪乃繞禪牀三

帀振錫而立祖曰夫沙門者具三千威儀八萬細

行大德何方而來生大我慢師曰生死事大無常

迅速祖曰何不體取無生了無速乎師曰體卽無

生了本無速祖曰如是如是師方具威儀作禮須

臽告辭祖曰返太速乎師曰本自非動豈有速耶

祖曰誰知非動師曰仁者自生分別祖曰爾甚得

無生之意師曰無生豈有意耶祖曰無意誰當分

別師曰分別亦非意祖曰善哉少留一宿

雪竇顯舉至我慢處便喝云當時若下得者一喝免

見龍頭蛇尾又向卓然而立處代祖云未到曹溪與

你三十棒了也浮山遠云先行不到末後太過

瑞巖愍云永嘉承虎接響祖師將錯就錯雪竇龜背

刮毛浮山馬頭安角繞禪牀三帀兮眼似銅鈴勉強

一宿兮頭如木杓松風江月少人知南海波斯生白

澤



永嘉萬里到曹溪三拜云何略不施却繞禪牀三市  
後卓然振錫底威儀本覺一

振錫曹溪生大我慢一宿少留咄哉觀漢永嘉城裏  
闡宗風江月松風無畔岸無禪才

掀翻海嶽求知已撥轉乾坤建太平二老不知何處  
去宗風千古振宗聲正法源

永嘉證道歌心是根法是塵兩種猶如鏡上痕痕  
垢盡時光始現心法雙忘性即真

百丈雪云我即不然心是根法是塵兩種猶如車兩  
輪兩輪未轉車無用兩輪轉處示車身

又曰一切數向非數句與吾靈覺何交涉

窮谷璉云永嘉大似含元殿裏更覓長安殊不知有  
水皆含月無山不帶雲雖然如是三十年後趙婆哈  
昨

又曰江月照松風吹永夜清宵何所爲佛性戒珠

心地印霧露雲霞體上衣

徑山杲云者箇阿師好與三十棒過在甚處不合將  
常住物入衣鉢下薦福璉云江月照松風吹永夜

清宵何所爲顯示大衆云薦福門下若有箇樣禪僧  
喚來洗脚何故無爲無事人猶是金鎖難報恩賢  
云妙喜雖則捉賊獻賊棒不虛發怎奈不顧自家失  
利還知伊失利處麼不許他人富甘得自家貧

又曰大丈夫秉慧劍般若鋒兮金剛燄非但空摧  
外道心早曾落却天魔膽

一指海云永嘉老頭兒原來膽小山僧則不然大丈  
夫秉慧劍般若鋒兮金剛燄非但空摧佛祖心早曾  
落却虚空膽

宗鑑法林卷七

宗鑑法林卷八

集雲堂編

旁出諸祖

河北智隍禪師六祖能嗣始參五祖後結菴長坐二十  
餘載不見情容及遇策禪師因同參六祖祖愍其  
遠來便垂開決師於言下豁然契悟前二十年所



得總無影響

當年睥睨此山阿欲著紅樓貯綺羅今日重來無一事却騎羸馬下坡陀常舒荊

白雲深處挂腰包遊罷江湖樂自饒堪笑刻舟求劍者要來陸地起波濤雪刃起

洛京荷澤神會禪師

六祖能嗣

到思和尚處思問什麼

處來師曰曹溪來思曰曹溪意旨如何師振身而立思曰猶帶瓦礫在師曰和尚此間莫有真金與人麼思曰設有汝向甚麼處著

玄沙備云果然翠巖芝云真金瓦礫錯下名言如

今喚作什麼天聖泰云神會若不見思師焉知瓦礫思和尚被他一問直得額頭汗出雲居錫云祇知玄沙道果然是真金是瓦礫

荷澤因鄉信至報二親亡師乃入堂白稚曰父母

俱喪請大眾念摩訶般若衆纔集便結椎曰勞煩大眾

寶壽方云大小荷澤雖然放去較危收來太速要莊嚴二親報地猶未可雪峰則不然或有報二親俱亡

亦入堂白稚云父母俱喪請大眾擗法鼓左手鐺右手舞十字街頭嚇跳虎顧衆云咄走開走開莫來攔我毬門路

吉州耽源騰真禪師

南陽忠嗣

問忠國師百年後有人

問極則事麼生國曰幸自可憐生須要箇護身符子作麼

五祖戒云和尚終是老婆心切保寧勇云粉骨碎

身難報此恩大瀉泰云大小耽源被國師一坐直

至如今起不得大瀉即不然待國師恁麼道但云暗

中爲照燭險處作津梁

護身符子最通靈國師起坐總將行耽源得用南方

去爲說令人睡眠醒汾陽昭

不重已靈龜自可護身符子更那堪爲君旨外通消

息秋月無風落碧潭海印信

眞正道流行脚去護身符子不須擔國師實爲耽源

切不是臨岐作對談橫川珙

耽源遊方回省覲馬祖却於祖前畫一圓相就上

禮拜祖曰汝莫欲作佛否師曰某甲不解捏目祖

曰我不如汝

雪竇云然猛虎不食其子怎奈來言不豐要識耽源麼祇是個藏身露影漢 南堂欲云耽源歸省獸個胡餅馬祖祇憤不勝其情雪竇云猛虎不食其子爭奈來言不豐檢點將來恰踢著耽源影子 古南門云耽源作個圓相佛固不欲作爭奈早已捏目馬祖道我不如汝大似信其言而不觀其行雖然馬駒踢殺天下人莫道不食其子

疋馬單槍入戰場有威全不犯鋒鏑立關金鎖雖衝斷又被他家暗箭傷位中符

毒龍角上翻筋斗猛虎身邊展脚眠自謂技堪誇敏手鼻頭誰信被人牽山容波

拈起關山笛吹殘畫閣風八十兒三歲翁不因今日節餘日定難逢雪刃起

耽源與百丈在泐潭推車次師問車在者裏牛在

何處丈以手斫額師以手拭目

承天怕云百丈何不待耽源問如何是牛驀鼻拽云者畜生管取車子須是耽源拽去

你唱陽春我白雪淙淙聲韻許誰知相將賣弄些些子贏得清風巾地吹粟菴鼎

耽源因第二世麻谷問十二面觀音豈不是聖師曰是谷便與師一擷師曰知你未到此境界

江天銓云麻谷好一擷當時因甚只令行一半 魯菴遠云江天錯下名言殊不知麻谷末後放過此前一擷更爲難勘何不當時麻谷問時便與一擷敢保麻谷瓦解冰消

耽源因仰山入門畫一圓相以手托呈却又手而立師乃以兩手交過握拳示之仰進前三步作女人拜師點頭而已

資福玉云目擊而道存尼父之見溫伯雪也祖師門下且請二大老在館驛門生住孔

渾身相見事非常送往迎來總大方轉到異中猶有序好看揖讓更趨踰顯吉祥

未詳法嗣

公期和尙因往羅漢路逢一騎牛翁師問羅漢路向甚處去翁拍牛曰道道師喝曰者畜生翁曰羅

漢路向甚處去師拍牛曰道道翁曰直饒與麼酒  
少蹺角在師便打翁便拍牛走

白巖符云者兩箇漢一拳一踢未見輸贏大似赤眼  
撞著火柴頭若論羅漢路直是遠在千里 法林音  
云待伊拍牛去亦云猶少蹺角在

問路指路兩無差互彼此拍牛有放有收機鋒相觸  
鍼芥相投蕩蕩一條羅漢路大家把手去來休如蕚用

禪月貫休禪師有詩曰禪客相逢祇彈指此心能  
有幾人知大隨舉以問師如何是此心師無對

歸宗柔代云能有幾人知 寶壽方代彈指一下

出言宛爾同眞悟對境依然還是迷珍重古今禪月  
老此心能有幾人知笑巖寶

婺州雲幽重憚禪師上堂雲幽一隻箭虛空無背  
面射去偏十方要且無人見時有僧問如何是和  
尙一隻箭師曰盡大地人無觸體

聖箭從來無向背十方凡聖總難存靈機未審從誰  
發猛虎閒將白額吞永覺賢

先淨照禪師問楞嚴大師經中道若能轉物卽同

如來若被物轉卽名凡夫祖如昇元閣作麼生轉  
嚴無對

汾陽昭代云彼此老大 寶壽方代云今日被禪師  
一問直得口挂壁上 法林音代云上座爲我換淨  
瓶水來

唐朝因禪師掘地次見一大塊戲運槌猛擊之應  
手而碎忽然大悟

老宿聞云盡山河大地被因禪師一擊百雜碎 應  
菴華云老宿恁麼道縱知因禪師落處銜鐵負鞍有  
日在者裏著得眼去也是徐六擔板

樓子和尙因從街市過經酒樓下偶整襪帶少住  
聞樓上人唱曰你既無心我便休忽然大悟

唱歌樓上語風流你既無心我也休打著奴奴心裏  
事平生恩愛冷湫湫慈愛深

你既無心我也休鴛鴦帳裏懶擡頭家僮爲問深深  
意笑指紗窗月正秋寶率鑑

因過花街賣酒樓忽聞語唱惹離愁利刀剪斷紅絲  
線你若無心我也休伽堂仁

僧肇法師曰諸法不異者不可續臆截鶴夷獄盈  
壑然後爲無異哉

雲門偃云長者天然長短者天然短又云是法住法  
位世間相常住乃拈拄杖云不是常住法 天寧琦  
云一家有事百家忙喝一喝

肇公曰三界惟心萬法唯識

塘口濱裏沈秀才頭上頂個木棺材手裏捻片車扉  
板白眼洋洋叫死來朝宗忍

肇公曰物不遷

古德以茶盞就地撲破云者個是遷不遷僧無對法  
眼代撫掌三下 綠雨蕉代云貓

憶昔西施窈窕容至今千載不相逢誰人識得西施  
面話到西施意更濃綠雨蕉

肇公曰有物流動人之常情

白雲端云肇法師剛然不知有流動者 洞山度云  
二大老各見一邊好與二十拄杖且道洞山拄杖子  
還有分付處也無若緇素得出分半院與伊良久拂  
一拂云青山祇解磨今古流水何嘗洗是非喝一喝

肇公曰旋風偃獄而常靜

江天樂云大冶精金應無變色

肇公曰功高二儀而不仁明逾日月而彌昏

白雲端云肇法師祇得半邊且作麼至是完全者乃  
云左眼半斤右眼八兩

肇公臨刑說偈曰四大元無我五蘊本來空將頭

臨白刃恰似斬春風

玄沙備云大小肇公臨死猶寐語在

圓通和尚因僧問一塵纔起大地全收還見禪牀

麼師曰喚什麼作麼僧又問法燈欽燈曰喚什麼

作禪牀

東禪齊云此二尊宿語還是明伊問處不明伊問處

滯貨不積家不發石長青苔路自滑萬象之中獨露

身渡河之後忘其筏雲林略

聖壽禪師示衆月半前用鉤月半後用錐僧便問

正當月半時如何師曰泥牛蹋破潑潭月

天童覺云兩頭得用聖壽作家直下忘功是誰體得  
放行也互換主賓把定也不留朕迹還有體得底麼

玉女夜拋梭織錦於西舍

古德一日不赴堂侍者請赴堂師曰我莊上喫油  
餐飽日和尙不曾出入師曰汝去問莊主者方出  
門忽見莊主來謝和尙到莊喫油餐

徑山杲云和尙不赴堂莊主謝臨屈一字入公門九  
牛拔不出 西遼超云一人見兔放鷹一人將錯就  
錯可謂一隊普州人但祇莊主雖然伶利未免一牽  
便動我若作莊主但向古德面前冷笑一聲管教老  
漢滿面慚惶

近在口皮邊遠在河沙國世間多少人不得油餐喫

鼓山珪

騎虎穿市過把火去偷豬主人開眼睡鄰舍叫失驢

肥菴顏

阿魏無真水銀無假潦倒鵝湖可知禮也竹菴珪

蓬萊王母宴瑤池仙子尋踪隔水迷值得樵夫傳信

至原來祇在案山西石照碑

古德何曾動口皮喫油餐飽幾人知而今冷地思量

著暗寫愁腸寄與誰肯堂充

喫了油餐不赴齋莊師特特謝師來千山萬水俱尋  
偏蹋破芒屨眼未開無著緣

張三未死人李四來索命累他東村西舍陳六王八  
官賣得田園馨夢菴

東街柳色挖烟翠西巷桃花相映紅左顧右盼看不  
足一時分付與東風南菴依

秦人慣弄楚人毬脫賺嬰兒逐兩頭不得東風相節  
拍管教狼藉在汀洲阿盤珠

學拳事棉弓寫字相科斗天地泄其元兒孫壞却手  
占波國裏覓同心赤髮波斯春木白節巖瑤

海棠無語夢癡癡粉蝶偷香得意時無奈畫樓歌又  
作黃鸝不放宿高枝雪奇靜

半架薔薇滿院香一番風過一番涼落英昨夜飄零  
處惹得遊蜂上下狂法林音

閉門作活假惺惺一拶分明露賊身若也和賊齊捉  
敗免教莊主謝臨門三圓

古德曰者一片田地分付來多少時也我立地待  
汝搆去

法眼益云山僧如今坐地待汝搆去還有道理也無  
那個親那個疎試裁斷看 昭覺勤云者一片田地  
分付來多少時也我今日當衆慶懺 慧雲盛云三  
老橫身爲物太煞婆心其奈風波似難折合山僧則  
不然者一片田地分付來多少時也我倦要睡去  
石霜尊云者一片田地分付來多少時也因甚諸人  
踢不著祇爲分明極翻令所得遲

古德因僧問一陽來復日長一綫未審佛法長多  
少德曰長一綫又問一古德德曰一綫長

薦福璨云一等共行山下路眼中各自別烟雲 高  
峰妙云就窠打劫還他二老本分鉗錘若謂佛法短  
長端的未夢見在今日忽有問西峰佛法長多少祇  
向他道東西十萬南北八千 象田現云二老宿雖  
有補綴虛空手段要且紅線未斷祇向長短上作活  
計今日有恁麼問山僧祇向他道休將玉綫較長短  
好把金鍼繡出看

古德於門上書心字窗上書心字壁上書心字  
法眼益云門上但書門字窗上但書窗字壁上但書

壁字 玄覺遂云門上不要書門字窗上不要書窗  
字壁上不要書壁字何故字義炳然 龍唐柱云門  
上書個牕字牕上書個壁字壁上書個門字何故東  
礪水流西礪水南山雲起北山雲 白巖符云老宿  
犯相違謗法眼犯增益謗玄覺犯損減謗龍唐犯戲  
論謗四個漢據款結案了也還有不甘者麼試出來  
掙一頭看 聖可玉云築萬里城連海岱牢牢鞏固  
舊山河

鍾馗夜半貼門神貼到天明看自身笑指門神像自  
己不知自己是門神天岸昇  
都來一節高一節高到極頂難轉折打個思量仔細  
看當時因底恁麼設懶放大

萬象從教當正眼何須較論是兼非誰能一鏃輕將  
起直破三關凱奏歸大戲

古德曰祖師九年面壁爲訪知音若恁麼會喫鐵  
棒有日在又一老宿曰祖師九年面壁何不慚愧  
若與麼會更買屨行脚三十年

琅琊覺云既不然而道祖師面壁意作麼生良久云



欲得不招無間業莫謗如來正法輪 天童傑云二  
老宿敲顛打瓦琅瑯覺畫虎成狸諸人要見祖師面  
壁底意旨麼窮坑難滿

古德曰佛法大有祇是牙痛

徑山杲云向道莫行山下路果聞猿叫斷腸聲 勝  
法法云若是陶淵明攢眉便歸去

古德曰長者長法身短者短法身

天童覺云且道舜若多神喚什麼作法身良久云不  
可續鼻截鶴夷獄盈壑去也

古德問曰我三年前曾斷一人命根而今日夜憂  
愁如何免得

緣雨蕉云幸無干證 法林音云猶未絕氣在

古德一夏並不爲人說話有僧歎曰我祇恁麼空  
過一夏不敢望和尚說佛法得聞正因二字也得  
老宿聞乃曰闍黎莫暫速若論正因一字也無道  
了扣窗曰適來無端不合與麼道鄰壁一老宿聞  
曰好一補羹被一顆鼠糞汚却

報慈遂徵云且道讚歎語不肯語若是讚歎爲甚道

鼠糞汚却也若不肯他有甚麼過驗得麼 翠峰顯

云誰家鍋裏無一兩顆法林音云自首者原其罪

黃龍清云二老宿祇見錐頭利不見鑿頭方祇如者

僧道不敢望和尚說佛法得聞正因兩字也得是會

不會參玄要具通方眼好向言中辯古今 徑山琇

云者僧無事生事老宿應病與藥線去絲來鍼縫不

露爭奈未會末後句在祇如鄰壁老宿恁麼又且如

何三台須是大家催

一夏調和一釜羹傳巖猶未許爭衡莫言汚了無人

見鄰壁禪翁隻眼明正覺逸

長夏無別趣調和羹一釜滋味頗馨香剛地成點汚

口是禍之門舌是斬身斧陪却三斤鐵祇因看錮鎗

慈受深

冷冷寒溜泣秋壑纔會滄溟便泛舟見說許由曾洗

耳可憐巢父更鞭牛盧堂愚

一言已出駟難追道了如何悔得來冷地被人相訐

露牙關敲定口慵開無文瑣

古德畜一童子竝不知軌則一行脚僧到菴乃教



示童子朝昏禮儀其童晚見老宿外歸遂去問訊  
老宿怪訝遂問誰教汝童曰堂中上座老宿尋喚  
其僧來問上座傍家行脚是甚麼心行者箇童子  
養來二三年幸自可憐生誰教上座教壞伊裝束  
了快去黃昏雨淋淋地被它趁出

法眼益云古人與麼顯露些子家風甚奇怪且道意  
在於何 法林音云者僧當時何不同云恁麼則菴  
主也當出院看他又如何安置

古德因僧問生死以何爲舟航德曰年盡不燒錢  
年盡不燒錢鼠穴被蛇穿直饒立會得對面隔西天  
曹源生

古德因僧問年窮歲盡時如何德曰家家盡看野  
狐兒

家家盡看野狐兒鐵笛橫拈撥亂吹吹罷不知何處  
去夕陽已挂柳梢西松源岳

家家盡看野狐兒見者雖多識者稀百怪千妖俱掃  
迹春風已到萬年枝晦叟光

古德垂語十字街頭起一間茅庵祇是不許人屢

後僧舉似南堂靜堂曰你先屢了更教甚麼人屢  
宿聞焚香遙望南堂拜謝

五祖蕉云南堂知而故犯老宿一款便招檢點將來  
總不出屢屎見解

古德曰日出心光曜天陰性地昏不知天地者剛  
道有乾坤

南石琇云與麼說話古今徹悟者如稻麻竹葦錯會  
者如稻麻竹葦以拂子畫一畫云阿耨達池深四十  
由旬闊四十由旬

古德因聖僧像被屋漏滴有人問既是聖僧爲甚  
麼有漏德無對

天台韶代云無漏不是聖僧 法林音代云上座明  
日把茅蓋頭也有五千毳徒

古德偈曰五蘊山頭一段空同門出入不相逢無  
量劫來賃屋住到頭不識主人公

有老宿云既不識他當初問甚麼人賃

古德因僧問古鏡未磨時如何德云不施功曰磨  
後如何德曰不照燭

龍池傳別云古鏡未磨時如何云見明不見暗云磨後如何云見暗不見明

古德問僧近離甚處曰東川師曰雙潤孤松烟清月白那箇是上座主人公曰始屆洞安便遭此問師曰記劍刻舟破珠求影豈不是闍黎境界喫茶去曰那箇是洞安正主師曰途中駒子不勝驛驢僧禮拜師曰胡人打令舞拍全無

仙殿鑑云古德和糠糶米者僧竊艸爲霸若是正主俱未識在

日竿曙色湧青巒萬壑千巖氣象寬誰料風雲多變態雲時雲雨滿山川永寧鼎

有二古德住菴旬日不會一日相見上菴主問多時不見向什麼處去下菴主曰在菴中造箇無縫塔上菴主曰某甲也要造一箇請借塔樣看下菴主曰何不早說恰被人借去了也

法眼益徵云且道是借也樣不借他樣

無縫塔樣子兩手擡不起被人借將去至今尋未已尋未已天上人間知幾幾月菴果

恰好被人借去了莫言鄰舍不通容團圓無縫難安筆祇抹烟雲一兩重石林羣

尊宿因僧到相看值不在遂看主事曰參見和尚也未曰未主事乃指狗子曰上人要見和尚但禮拜者狗子僧無語後古德歸得聞乃曰作麼生免得無語

雲門偈云欲觀其師先觀弟子 法林音代但向狗云待和尚歸來莫道我無語好

座主念彌陀名號次小師遂喚和尚及其回顧小師不對如是數回座主叱之小曰和尚幾年喚它即得某甲纔喚便乃惡發

石菴瑀代云我不如汝 法林音代云汝作惡發會那

僧入冥見地藏菩薩問平生脩何行業僧曰誦法華經藏曰止止不須說我法妙難思爲是說不說其僧無對

寶壽新代云何必重宣 歸宗柔代云此回歸去敢請流通 緣雨蕉云與麼則趁便回向去也 法林

音代云大士三十年後莫忘却此語

老宿因人問魚以水爲命爲甚麼却死在水裏

天龍機云是伊爲甚麼不去岸上死 綠雨蕉云沒

處去 愚菴及云怕爛却那 法林音代云梢郎子

未遇人在

雲蓋山僧乞瓦造殿有人問既是雲蓋何用乞瓦

僧無對

綠雨蕉代云春無三日晴 法林音代云有勞功用

高麗國來錢塘刻觀音聖像及舁上船竟不能動

因請入明州開元寺供養後有設問無利不現身

聖像爲什麼不去高麗國

長慶稜云現身雖普觀像生偏 法眼益別云識得

觀音未 曉菴昱云衆生顛倒迷已逐物 法林音

代云莫道山僧令行不去

有僧因童子上經次僧令著函內童曰某甲念底

向那裏著僧無對

芑溪森云者僧何不道看你狼藉是卽是風前撒攪

日下恍榔 法林音代云者童子得恁麼鈍置

藏主問僧何不看經曰不識字藏曰何不問人僧  
展手曰是什麼字藏無對

法林音代云前言不副後語

袖中寶劍摩星斗肘後靈符照八方撥轉日前關棧

子從教天下竟茫茫誰菴演

鶴立蛇行勢不休五天梵宇鬼神愁孔門弟子無人

識碧眼胡僧笑點頭六巖輝

老宿問一座主疏鈔解義廣略如何主曰鈔解疏

疏解經宿曰經解什麼主無對

法林音代云山下與汝飯喫者具眼不具眼

生平蘊業頓偏圓開口全彰字字玄拶到羅紋結角

處青山翠鎖斷雲烟粟菴鼎

台州六通院僧欲渡船有人問既是六通爲甚麼

假船僧無語

天台韶代云不欲驚衆 綠雨蕉代云理長則就

法林音代云山僧日前有人恁麼問也似今日恁麼

答

廣南住菴僧值大王出獵吏人報大王來起僧曰

非但大王來佛來也不起王乃問佛豈不是卿師  
僧曰是王曰見師爲什麼不起僧無語

法眼益代云未足酬恩 保寧勇代云相識滿天下  
今朝遇一人 天寧雲云欲觀其師先觀弟子 白  
巖符代云子不事則父不尊 河渚謙云今日小出  
大遇 綠雨蕉代云是貧道見處 法林音代云  
吏人今日勞汝證明

曹谿守衣盜侍者因僧到乃提起衣曰者是大庾  
嶺頭提不起底僧曰爲什麼却在上座手裏侍者  
無對

雲門偃云彼此不了又於無語處代云遠嚮不如親  
到又云是獅子兒 天嶽畫云負命者上鉤又云大  
師滅度久矣 法林音代云移盤喫飯漢

有一行者隨法師入佛殿向佛而唾法師曰行者  
少去就何以唾佛者曰將無佛處來與某甲唾法  
師無語

鴻山祐云仁者却不仁者不仁者却仁者 仰山寂  
代法師但唾行者行者若有語卽向伊道還我無行

者處來 資福侶代法師便打又云也祇救得一半  
天嶽畫云合取狗口 法林音代云無佛處用唾  
作麼

泗州塔頭侍者及時鎖門有人問既是三界大師  
爲甚麼被弟子鎖侍者無對

法眼代云弟子鎖大師鎖 法燈代云還我鎖匙來  
老宿代云吉州鎖虔州鎖 法林音代但度鎖匙  
云牢牢收取

及時關鎖意深深問處分明驗假真三月誰知桃李  
樹紅紅白白是陽春智觀慧

有道流在佛殿前背坐僧曰道士莫背佛道流曰  
大德本教中道佛身充滿於法界向甚麼處坐卽  
得僧無對

法眼代云識得汝 法林音代云又來山僧前放憨  
偃臺感山主到圓通院相看第一座問曰圓通無  
路山主爭得到來主無對

歸宗柔代云不期又得相見 法林音代云公驗上  
爲甚有姓無名

有人問僧點甚麼鐙僧曰長明鐙曰甚麼時點僧

曰去年點曰長明何在僧無對

長慶稜代云若不如此知公不受人瞞 法眼別云

利動君子 法林音代云曾問幾人來

老子李聃柱史曰道湛兮似或存吾不知其誰之

子象帝之先

高峰妙云咄哉者漢錯下註脚湛兮似或存吾不知

其誰之子毗耶城裏老維摩

老子曰上士聞道勤而行之中士聞道若存若亡

下士聞道大笑之

薦福璨云上士聞道勤而行之著甚死急中士聞道

若存若亡猶較些下士聞道大笑之却有衲僧氣

息三種人一時格下了也且道那個合受人天供養

宋太宗幸相國寺問僧看什麼經對曰仁王經帝

曰既是朕經爲甚麼在卿手裏僧無對

雪竇顯代云皇天無親惟德是輔 天寧琦云若問

永祚但以手頂戴經云萬歲萬歲 雪軒成云王言

如絲其出如綸 白巖符云我不似雪竇老學究待

帝問但對專爲陛下流通他若是作家君王更問流

通一句作麼生便合掌云護國仁王經卷當第二

獅峰遜代云某甲今日謝恩有分 法林音代云陛

下往年不似今日含糊

太宗幸開寶塔問卿是甚麼人對曰塔主帝曰朕

塔爲甚麼卿作主僧無對

翠峰顯代云闔國咸知 曉菴昱云誰敢動著 法

林音代云龍光佛時泊合忘却

太宗因僧朝見乃問卿甚處來對曰廬山臥雲菴

帝曰朕聞臥雲深處不朝天卿因甚到此僧無語

翠峰顯代云難逃至化 寶壽方代云不學者死漢

又云特謝陛下顧問 佛日哲代云祇因靈山一別

法林音代云貧衲眼大賴有眉毛遮却

試問臥雲深處客不知何以答昇平蕩然至化難逃

避萬里遙天一點雲北磻簡二

不違咫尺面天顏疆項猶然憶故山直下肯將身許

國與君同樂太平年

白雲巖下不貪閒直欲敲開金鎖關不是無心逃至

化大都有意面堯顏即念現

太宗因僧奏曰藏經被回祿欲乞宣賜帝召問昔

日摩騰不燒今日爲甚却燒僧無對

翠峰顯代云陛下不忘付囑 白巖符代云知陛下

不吝寶藏 綠雨蕉代云令不虛行 法林音代云

昔日摩騰今日摩騰

太宗因僧入對次奏曰陛下還記得臣僧麼帝曰

甚處相見來曰靈山一別直至而今帝曰卿以何

爲驗僧無對

翠峰顯代云貧道特特而來 崇化能代僧拈起拂

子 白巖符代云將謂陛下忘却 法林音代云鹽

茶布袋錢有人還却

靈山一別二千年聖主重逢豈偶然細掬清泉揩老

眼撥開雲霧見青天石溪月

太宗一日擎起盃問丞相王隨曰既是大庾嶺頭

提不起爲甚麼却在朕手裏隨無對

慈明圓代云陛下有力 法林音代云今日臣爲大

庾嶺消案

大地收歸掌握間鉢盂擎起有何難個中消息憑誰

委秋水秋雲秋夜寒雲酌慶

太宗因夢神人勸發菩提心次日問廷臣菩提心

作麼生發羣臣無對

翠峰顯代云實爲古今罕聞 別峰印代云王言如

絲其出如綸 法林音代云律有明條

菩提妙心作麼發曰應萬機原不差回首瞥然輕覲

著大千沙界是皇家松源岳

萬里謳歌聖化成條風塊雨樂樵耕不因嵩嶽三呼

後無象誰知真太平雙杉元

菩提心發不爲難祇在君王一念間聖聖相傳皆一

揆綿綿國祚泰山安辛菴偉

太宗因寂大師進三界圖帝曰朕居何界寂無對

綠雨蕉云總在吾皇化育中 法林音代云者回貧

道再不進此圖也

明高帝在天界寺聞漁鼓聲問僧誰家飯僧耶曰

無帝曰誰家醺願耶曰無帝曰若是都無則宜寂

寥面壁參究本來胡爲口喃喃地



起玄生云鐵輪天子寰中旨任宅千聖出頭也移易絲毫不得時有僧問如何是寂寥底意旨玄曰動也動也

錢塘鎮使在界上爲鎮將凡見僧便問若相契卽留止宿一日因二僧至遂問近離甚處曰江西馬大師處使曰馬大師有何方便曰道卽心卽佛便被揖出又有二僧到亦如前問僧曰非心非佛又被揖出

是是非非俱請出巍巍萬仞如壁立平生心膽向人傾相識還如不相識無際派

碧油幢下立功勳豁雙全獨見君一自赤心來報國邊頭刁斗不曾聞盧堂愚

截漢裁雲千丈壁卓然端是鳥難立從教過鴈與飛猿徒增日暮寒蟬泣道隆興

生成骨格傲王侯泰不居兮漢不留無限落花風掃盡餘香滿地情誰收古風

韓居士因三平遷化衆請作喪主士乃以手巾覆鈔鑪上橫一口劍置龕前曰道得卽作喪主衆無

對士便趨却鈔鑪哭曰蒼天蒼天先師遠矣

羅山閒云噫大奇大奇三平門下六百來人總被者俗漢吞却也陳老師當時若在祇將三尺布蓋却頭橫亞一柄露刃刀揭起孝幕當堂而坐看韓家個漢要作喪主也未得要不作喪主也未得進之須有禮退之須有禮

官人作無鬼論中夜揮毫次忽見一鬼出曰汝道無我吟

東山演代以手作鶻鴟策云谷谷孤靈隱遠以手加額云何似生法林音代但喚云快將紙筆來一長者因僧托鉢來家被狗齧長者乃指其僧所披袈裟曰龍披一縷金翅不吞大師全披法服爲甚麼却被狗齧僧無語

寶華忍代云未看山頭土先觀屋下郎貫之理代云山僧行年在坎命犯重煞法林音代云居士得恁麼負心

有施主進院行衆僧隨年錢知事僧曰聖僧前著一分施主曰聖僧年多少僧無對



法眼益代云心期滿處卽知 保寧勇代云祇恐施  
主力所不及 天寧琦代云鉢盂無底 寶壽方代  
云與麼則大衆今日不得半文也 貫之理代云適  
纔一分而今兩分 法林音代云消得也消得也

一官人入鎮州天王院觀神像因問院主曰此是  
什麼功德主曰護國天王官曰祇護此國偏護餘  
國主曰在秦爲秦在楚爲楚官曰臘月廿九日打  
破鎮州城天王向什麼處去主無對

法林音代云官人我者裏用你不著

青山日日摩霄漢流水年年洗海心逗到狂瀾涓滴  
盡通身泥水謾追尋聲山鼎

昔有跨驢人問衆僧何往僧曰道場去人曰何處  
不是道場僧以拳敲之曰若漢沒道理向道場裏  
跨驢不下其人無語

報恩秀云盡道者漢有頭無尾能做不能當殊不知  
却是者僧前言不副後語既知舉足下足皆是道場  
何不悟跨驢跨馬無非佛事萬松要斷者不平公案  
更與花擘一上喫拳沒興漢茅廣杜禪和早是不剋

已那堪錯過他道場惟有一佛法本無多留與闍黎  
道戶庵薩哩囉 龍唐柱云者僧太麤髓向道場裏  
亂打人 法林音代但笑云不謂出家人也有者樣  
俗氣

澧陽路上有一婆子賣餅爲業德山初出蜀就其  
買餅點心婆指擔曰上座擔頭是甚麼文字山曰  
青龍疏鈔婆曰鈔何經曰金剛經婆曰我有一問  
若答得施與點心答不得請別處去買金剛經道  
過去心不可得現在心不可得未來心不可得未  
審上座點那箇心山無語

天童悟云我若作德山祇向道山僧肚飢揀大者快  
般來及至般來却肩擔便行管教者婆子疑殺去在  
棲霞成云山僧今日勞倦 法林音代云者餒點  
心祇好婆婆喫

一婆子供養一菴主經二十年常令一女子給侍  
一日令女子抱定曰正當恁麼時如何主曰枯木  
倚寒巖三冬無暖氣女子歸舉似婆婆曰我二十  
年祇供養得箇俗漢遂遣出燒却菴

天童傑云者婆子洞房深穩水洩不通偏向枯木上  
糝花寒巖中發酸個僧孤身迴迴慣入洪波等閒坐  
斷潑天潮到底身無涓滴水仔細檢點將來敲枷打  
鎖不無二人若是佛法未夢見在 理安問云淩弱  
助強古今皆是長裙賣俏邪法難扶山僧昔年曾被  
婆子換却眼睛道者僧蹉過婆子仔細檢點將來却  
是婆子錯過者僧撫掌哈哈大笑云三十年後與汝  
諸人說破 崆峒慈云衆中道菴主未在婆子作家  
恁麼舉揚祇見錐頭利殊不知婆子不知菴主受用  
處菴主不知婆子作用處一對訝郎當各與二十棒  
何故獅巖者裏賞罰分明 東塔烹云菴主牆高數  
仞關節不通婆子暗度重關要探闔中春色若非一  
場特地爭見暗合明投 綠雨蕉云女子抱定婆子  
燒菴干他者僧甚麼事祇如枯木倚寒巖三冬無暖  
氣又作麼生展兩手云多少分明 盟石息云婆子  
高高峰頂立就下應難菴主深深海底行構上不易  
檢點將來二俱不了且道如何折合以拂子打圓相  
云幸收一片荒基在歲歲年年艸自青

不見人斑見虎斑算來莫願見人斑虎斑見後通回  
避惟有人斑避最難或菴體

鐵壁迸開雲片片黑山輓出月團團就中明暗相淩  
處天外出頭誰解看虛堂愚

貧人常妒富富者不欺貧莫信直中直須防仁不仁  
開極雲

二十年來不具眼茅菴燒却是徒爲三春暖氣無多  
子真實之言亦可師橫川珙

萬花叢裏不沾身陷殺閻浮多少人欲識者僧行履  
處軟綿團內有剛鍼無異來

敵手相逢各有奇神謀豈許外人知轉相陷害冤難  
了最毒心腸暗裏機永覺賢

雲滿深巖花滿郊乾坤化育實殷饒時人祇見朱門  
好誰識幽居價倍高天目瑋

臨崖呈巧計陷虎最無端莫謂橫身易須知活雀難  
大鼎新

婆子燒菴好花難攀偷香竊玉解把天瞞覺淚盛  
把住牢關向上行不將清節入風塵和光略借些些

子賠了夫人又折兵天岸昇

作賊者不富燒香者不貧幾多參學客月下遇花神  
濟水洗

離位之機那個知毒龍拔在富那西劈開海水止觀  
妙不見尾巴更是奇聖可主

曾怪留侯似美人自然赤帝暗消魂一椎一履相酬  
唱劫火燒來莫覓痕墨歷智

一帆開處一帆開水碧沙明兩岸苔各逞風流歸別  
浦從教鷗鷺自疑猜不韻音

正當與麼時人見衆生見露柱入燈籠山門出佛殿  
漢關喻

漢地尋幽蜀地居東吳西楚遞君書不談兵革人間  
事誘得孔明出草廬古帆順

興在天南天盡頭兩輪日月暗牽抽不知古錦迴文  
者錯喚雲門六不收法林音

一住菴婆有僧參米湖入菴乃問婆有眷屬否婆  
曰有曰在什麼處婆曰山河大地若艸若木皆是我  
眷屬曰婆莫作師姑來麼婆曰汝見我是什麼

曰俗人婆曰汝不可是僧曰婆莫溷亂佛法好婆  
曰我不溷亂佛法曰與麼豈不溷濫佛法婆曰汝  
是男子我是女人豈是溷濫

賢家能釀消愁酒但是愁人便與消顧我共君俱寂  
寞祇因連夜復連朝鎮容玄二

勸君莫惹老婆舌惹了叭叭鬧不歇況是梁山母大  
蟲得路沿家便打劫

裙拖八幅湘江水髻綰巫山一段雲賣得通身渾是  
俏幾人憐惜幾人憎天岸昇

宗鑑法林卷八

宗鑑法林卷九

集雲堂 編

大鑒下一世

衡州南嶽懷讓禪師大鑒能嗣初參六祖祖曰甚處來  
師曰嵩山來祖曰什麼物恁麼來師曰說似一物  
卽不中祖曰還可修證否師曰修證卽不無染汚

卽不得祖曰祇此不染污諸佛之所護念汝旣如是吾亦如是

轆轤參云南嶽道說似一物卽不中與麼那六祖道我亦如是臉皮厚多少

玉在池中蓮出水污染不能絕方比大家如是若承當洞庭一夜秋風起佛印元

嵩頂來來恁麼來不中一物早塵埃便歸南嶽磨轆片照得追風馬子回佛國白

說似一物卽不中八年方契賣柴翁大都模樣無多子歷劫如何用得窮朴翁語

直言發足自嵩山蕩蕩乾坤任往還一物尙無寧有似倚天長劍逼人寒無際派

堂堂日用妙無痕纔涉纖毫卽是塵照水銀蟾沉夜魄戀花香蝶醉芳魂仰山欽

遠來意氣甚揚揚固著何如雪上霜早向太陽門外立何須撥火更燒湯慈山清

甚麼物恁麼來鶻鳩啄食近生臺等閒動著忙飛去露柱空耽石女胎漢關隴

南嶽因馬祖住傳法院常日坐禪師問大德坐禪圖什麼曰圖作佛師乃取一轆於彼院前磨祖問磨此何爲師曰磨作鏡曰磨轆豈得成鏡師曰坐禪豈得成佛曰如何卽是師曰如牛駕車車若不行打車卽是打牛卽是祖於是悟旨

法林音徵云馬祖爲復悟打車耶悟打牛耶乃撫掌呵呵大笑

磨轆作鏡慕同音來問分明示本心纔喚木人回面指泥牛耕出古黃金汾陽昭

磨轆作鏡不爲難忽地生光照大千堪笑坐禪求佛者至今牛上更加鞭佛印元

磨轆作鏡相席打令一切魚龍知水爲命晏古佛車牛腦後痛加鞭棄却黃金抱麴轆逐惡隨邪至今

日卽非心佛錯流傳笑翁堪平生心膽向人傾過犯彌天已不輕帶累馬師胡亂

後至今錯認定盤星松源岳萬法俱忘百念灰等閒驀鼻拽將回鏡光一點明如

日直得木人心眼開雪巖欽

龍驤驥足困鹽車未過孫陽尙滯途拽脫繩頭鞭一  
撻風蹄索索電光驅平陽恣

南嶽因僧問如鏡鑄像成後鏡光向什麼處去  
師曰如大德爲童子時相貌何在曰祇如像成後  
爲什麼不鑒照師曰雖然不鑒照瞞它一點不得  
法眼益別云阿那箇是大德鑄成底像 寶壽方云  
大小南嶽箋釋不易雪峯則不然如鏡鑄像成後  
光向什麼處去待他眼目定動劈脊便打

觸骸裏眼見猶在枯木中龍聲更狂打破虛空光境  
盡箇中別有好商量惹受深

問處鉤深答更幽就身打劫最風流要知一點難瞞  
處江上數峰青欲浮掩室開

槎枒古幹鎖莓苔霽日相看玉蕊開常恨春歸無覓  
處不知轉入此中來雪刃起

南嶽因馬祖闡化江西遣僧往探乃命曰待伊上  
堂時但問作麼生伊道底語記將來僧至一如教  
問祖曰自從胡亂後三十年不少鹽醬僧回舉似  
師師深宵之

徑山杲云雲門卽不然夜夢不祥書門大吉 天寧  
琦云我若作大師纔見者僧出來便下禪床擒住痛  
與一頓教他歸去學似南嶽且顯師承有據自家眼  
目分明祇如徑山怎麼道與馬祖是同是別何如黑  
漆屏風上更寫盧仝月蝕詩 伏龍長云破驢脊上  
足蒼蠅 大覺昇云義出豐年還他馬祖未免帶累  
南嶽懸挂心頭

胡亂三十年不曾少鹽醬江西馬大師南嶽讓和尚  
鼓山珪

見得分明識得親舉來猶自涉途程直饒不犯毫芒  
者也是拈鎚舐指人徑山杲

家貧連子屈事急不由人開口露拴索郎當累近鄰  
或菴聲

石火光中驗正邪等閒拈却眼中沙自從不曾少鹽  
醬敢保渠儂未到家木庵永

旣已知梅熟何當復探爲欲令香闔國故使猛風吹  
雪簇瑞

掃盡狼煙志未休晴空白日使人愁太平不挂將軍

印撻劍懸戈始徹頭無異來

自住山來不自欺奇花灼灼草離離就中多少閒情  
緒除却衡山誰可知持平涇

### 大鑒下二世

江西馬祖道一禪師南嶽讓師因僧問和尚爲什麼說

卽心卽佛師曰爲止小兒唬曰唬止後如何師曰  
非心非佛曰除此二種人來如何指示師曰向伊  
道不是物曰忽遇其中人來時如何師曰教伊體  
會大道

黃蘗琦云卽心卽佛頭上安頭非心非佛無繩自縛  
不是心不是佛不是物泥裏洗土塊良久云土曠人  
稀相逢者少

百萬雄兵出將軍獵渭城不閒弓矢力斜漢月初生  
翠真巖

兎角不用有牛角不用無有無不是處馨香滿道途  
艸堂清

風勁葉頻落山高日易沉座中人不見窻外白雲深  
長靈卓

素琴張午月流水落花深寂聽希聲徹冷冷太古音  
佛心才

韶光三月景和融錦繡山川處處同碧瓦曉烟寒食  
雨朱簾晴卷杏花風慈受深

敲之卽響聽則無聲嚴冬汗溼酷熱冰清試問道途  
來往客長安去此幾多程黃龍震

鐵牛耕破洞中天桃花片片出深源素人一去無消  
息千古峰巒色轉鮮雪竇宗

卽心卽佛眉拈地非心非佛眼雙橫蝴蝶夢中家萬  
里子規枝上月三更唐堂遠

一族人煙島外村落花流水月黃昏百川到海應須  
住畢竟何曾別有源鐵山仁

馬祖因僧問如何是佛師曰卽心卽佛

高峰妙云衆中商量皆謂心本是佛佛外無心故云  
卽心是佛苦哉苦哉若作者般見解明朝後日喫鐵  
棒有分在旣然如是合作麼生石壓笋斜出巖懸花  
倒生

卽心卽佛鐵牛無骨戲海獐龍摩天俊鶻西江吸盡



未爲奇穴裏生蓮香拂拂南堂靜

卽心卽佛龍入蛇窟出將入相安邦定國石頭同

卽心便是佛嫦娥不畫眉纔將敝粉汚妍好却成嫌  
天目禮

卽心是佛礧霜狠毒起死回生不消一服瘰癧一

硬似純鋼爛似泥甜如巖蜜毒如礧圖吞又圖圖

吐賺殺江西馬簸箕中峰本

之乎者也已焉哉七字相當是秀才稍有一毫安不

穩鐵山當面勢崔嵬中峰且

誰家飯挂空囊指與小兒令看解開祇見是灰當下

命根便斷開善識

馬祖因僧問如何是佛師曰非心非佛

碧海珠荊山壁曜乾坤誰別識利刀剪却無根樹萬

疊峰巒斂烟霧圓悟勸

賣盡田園徹骨貧不知何處可容身樓頭浪蕩無拘

檢鐵笛橫吹過洞庭開善識

二月風光景氣浮少年公子御街遊銀床踞坐傾盃

樂三箇孩兒打馬毬牧庵忠

非佛非心絕謂情玄途鳥道急回程爍迦羅眼存機

變莫守寒巖異草青南巖勝

馬祖非心非佛直下更無窠窟今年樹上核桃勝似

去年柑橘正堂辨

大地衆生成正覺百千諸佛墮泥犁休將此話頻頻

舉却恐闍家老子知中峰本

馬祖因百丈南泉西堂隨侍翫月師乃問正當恁

麼時如何堂曰正好供養丈曰正好修行泉拂袖

便去師曰經入藏禪歸海惟有普願獨超物外

翠巖眞云神鼎叔翁云祇爲老婆心切翠巖卽不然

垂萬里鈎駐千里烏雕布漫天網打衝浪巨鱗還有

麼有則衝浪來相見如無且歸巖下待月明 渤潭

清云是則全是非則全非神鼎道老婆心切大似金

沙混雜玉石難分祇如馬祖末後恁麼道甚處是老

婆心切不省者箇意修行徒苦辛 開福寧云馬大

師等閒舒卷妙手天然也是貪觀雲裏雁失却渡頭

船若人檢點得出披毛遊火聚戴角溷塵泥其或見

處朦朧爲你下箇註脚經入藏禪歸海未是衲僧親



到底拂袖前行歸去來擊碎重關門大啓還有見馬  
師者麼良久云休休長安夜夜家家月幾處笙歌幾  
處愁 虎丘隆云馬駒踏殺天下人一捫直須一掌  
血三大老各展家風不覺翻成老婆心切蔡林浩浩  
商量總道翫月話奇特檢點將來克由耐何故三  
人證龜成鱉 靈隱獄於正好供養處云望梅止渴  
正好修行處云金不博金拂袖便行處云祇得一概  
獨超物外處云唵摩呢達尼吽發吒復云者一夥破  
落戶鼻孔總被穿却了也你諸人向什麼處出氣  
烏石道云百丈西堂說到行不到南泉行到說不到  
總須喫棒有分祇如馬祖恁麼道還有優劣也無以  
拂子打圓相云幸然明似鏡何用曲如鉤擊拂子  
經入藏禪歸海惟有普願獨超物外咄祇有照壁月  
且無吹葉風照覺總

經入藏禪歸海稽首歸依合掌頂戴王老師超物外  
二十年前恁麼來而今去盡閒光彩天童覺

國清才子貴家富小兒嬌大家出隻手彼此不相饒  
徑山杲

古渡無風直下鉤絲綸意在得鯨鯢馬師言下揚家  
醜千古兒孫草裏遊湛堂深

諸子營家各自肥就中一箇正堪悲滿盤盛墨無人  
買半夜持歸染皂衣大歇謙

諸子生涯各有成從來孝順兩邊生貪歡一夜渾家  
樂失曉連忙打五更無準範

窮源底是一家親個儻丰標壓四隣拽斷傀儡棚上  
索驀然鸚鵡過西秦無異來

藏山於澤澤藏舟天下無藏貫九流兩手攤開隨步  
樂騰騰三界不拘留費隱容

相將月下話家常孝順多嬌忤逆狂天曉不知何處  
去至今愁殺夜行郎慧山海

馬祖因僧問離四句絕百非請師直指西來意師  
曰我今日勞倦不能爲汝說問取智藏去僧去問  
藏藏曰何不問和尚曰和尚教來問藏曰我今日  
頭痛不能爲汝說問取海兄去僧問海海曰我到  
者裏却不會僧回舉似師師曰藏頭白海頭黑

馮山詰云者僧與麼問馬師與麼答離四句絕百非

智藏海兄都不知會麼不見道馬駒踢殺天下人

五祖演云馬大師無著慚惶處祇道得箇藏頭白海

頭黑者僧擔一擔懵懂換得一箇不會若也眼似流

星多少人失錢遭罪 高峰妙云馬師父子一門非

特佛口蛇心亦善六韜三略者僧若無諸葛孔明之

作管取喪身失命 龍池傳云三大老被箇挑脚漢

弄得家反宅亂至今父子不和還有解交者麼擲拄

杖 靈巖儲云當大寵而不驚臨大難而不怖非經

天下之大經握乾坤之化育尙不能運籌帷幄決勝

千里又何敢望篤恭而天下平馬家父子如排百萬

雄師大陣咳嗽之下全軍就縛何術而致之哉

藏頭白海頭黑明眼衲僧會不得馬駒踢殺天下人

臨濟未是白拈賊離四句絕百非天上人間惟我知

雪竇顯

湘靈二女神仙格笑倚朱門香陌陌一抹輕絳透臉

紅更加十分天真色佛鑒勸

四句百非皆杜絕陽春白雪唱彌高風清月皎無雲

夜誰把吹毛換寶刀南華易

短帽輕衫官樣窄舞徧胡笳十八拍曲罷酒闌猶未

歸歸來月色和雲白唐堂遠

百非路絕透離微四句情忘發上樓竹密不妨流水

過山高豈礙白雲飛足庵鑒

藥之作病鑑乎前聖病之作醫必也其誰白頭黑頭

兮克家之子有句無句兮截流之機堂堂坐斷舌頭

路應笑毗耶老古錐宏智覺

花塢春風滿袖香紅紅白白兩相當那堪更有多情

者麥笛一聲過野塘青獨信

自蹋千峰最上層生涯日拙百無能絕交何用區區

論故舊今看祇一藤木陳忞

殘花落盡鳥聲悲一種春愁逐亂絲妾臥空床腸斷

絕郎征塞北那能知紫巖濟

綠暗紅非壓帝城不禁簾外鷓鴣驚陳妃何事心如

鐵猶恨長門不見春鏡堂清

單槍疋馬入重城金鼓轟轟四路聞不覺狂風天地

黯回頭無處不消魂法林書二

風蕭蕭又雨蕭蕭春盡啼鵲引舊條隔岸淒清雲影

斷一輪紅日半橫橋

馬祖因百丈侍遊山次見野鴨飛過師曰是甚麼  
曰野鴨子師曰甚麼處去也曰飛過去也師乃扭  
丈鼻丈負痛失聲曰阿耶耶阿耶耶師曰又道飛  
過去也丈契悟

中峰本云設錦筵以陷獸垂香餌以釣魚惟善作者  
能之馬祖擬獲一禽深入荒艸費盡腕力打破半邊  
鐵網豈善作者哉 寶壽方云大小馬師可謂功不  
浪施然所獲亦莫過是箇野鴨子若是箇衝天俊鶴  
馬師自己還得無事也未

野鴨子知何許馬師見來相共語話盡山雲海月情  
依前不會還飛去却把住道道雪寶顯

流水有西東蘆花無背向沙鳥忽飛來漁人驚夜唱  
誰道月明無處尋元來祇在秋江上上方益

野鴨群飛勢莫留瞥然一過已高秋和聲扭著平生  
痛短梗毋勞繫鼻頭佛燈珣

野鴨從空過張三逢李大岸上繫孤舟黃牛解拽磨  
白楊順

心燈不可付祖印亦難傳野鴨飛過去扭得鼻頭穿  
橫川珙

馬祖因百丈遊山回侍寮袞袞大哭同事問汝憶  
父母耶丈曰無曰被人罵耶丈曰無曰汝哭作麼  
丈曰我鼻孔被大師扭得痛不徹曰有甚因緣不  
契丈曰你問取和尚去同事問海侍者有何因緣  
不契在寮中哭師曰是伊會也你自問取同事歸  
曰和尚道汝會也教我問汝丈乃呵呵大笑同事  
曰適來哭如今爲甚却笑丈曰適來哭如今笑  
三峰藏云雙鷄朝天

一回思想一傷神不覺翻然笑轉新雲在巔頭閒不  
徹水流澗底太忙生龍門遠

有時笑有時哭悲喜交并暗催促此理如何舉向人  
斷絃須是鸞膠續徑山泉

有時笑兮有時哭調高和寡難拘束一派清音徹九  
天風前誰解聯芳躅妙峰善

哭不徹笑不徹倒腹傾腸向君說父子非親知不知  
擡頭腦後三斤鐵松源岳

變棋局反攻藥快便乘時不費餘略痛處重加是利  
錐眼開始見鼻頭垂滿面羞慚難蓋覆笑啼賣弄月  
如眉梅谷悅

馬祖陞堂衆纔集百丈乃出卷却拜簞師便下座  
雪竇顯云諸方皆謂奇特潛麼還當麼若當譬如  
水母以鰕爲目若不當又空讚歎圖箇什麼衆中一  
般漢亂踴向前問古人意旨如何更有老底不識好  
惡對云將謂仙陀客又云來日更到座前苦哉苦哉  
當時若見他出來卷簞劈胸一踢令坐者倒者俱起  
不得且要後人別有生涯去免見反相鈍置豈不是  
箇英靈底漢 白雲端出馬祖語云我鈍置猶可你  
鈍置太煞 黃龍心云馬祖陞堂百丈卷席後人不  
善來風盡道不留朕跡殊不知桃花浪裏正好張帆  
七里灘頭更堪垂釣如今必有辨沉浮識淺深底漢  
試出來定當水脈看有麼如無且將漁父笛閒向海  
邊吹 大瀉智云曙色未分人盡望及乎天曉也尋  
常

馬祖陞堂百丈卷席正令不從拗曲作直雪竇顯

陞堂馬祖卷席百丈得人半斤還他八兩直饒縫罅  
全無未免傍觀撫掌泉大道

百萬雄師陣相觀何人却會回戈鼓將頭不猛誤三  
軍可憐正令無行處佛印元

昨日東風偶然惡桃花亂落如紅雨昨夜東風又發  
狂滿地不知何處去白雲端

陞堂卷席迴難儔杲日騰暉處處周堪笑忽雷驚宇  
宙井中之物不擡頭海印信

野鴨飛鼻頭裂卷席更來呈醜拙直饒獨坐大雄峰  
也是天邊第二月楊無爲

夜深認得歸時路不待天明便出關三尺莫耶橫在  
手至今坐斷大雄山上方益

卷起堂堂露眼睛拈來覷面更相呈鼻頭脫盡誰能  
覷把手歸來相并行楚方安

馬駒千里行卷席相隨逐秋風一夜生處處開黃菊  
石□□

鬼子挂起那吒面赤脚踏定須彌盧鐵牛鞭起黃河  
岸大洋海底食珊瑚雪竇宗

風定五湖寬收帆恣意觀波光隨水靜練色逼人寒  
舉棹逗雲鴈移舟上碧灣聲華光祖域千載與人看  
龍門遠

浩浩長江碧際空片帆高挂便乘風快哉不費纖毫  
力萬里家山咫尺通開善謙

一柄無情雪刃刀當鋒誰敢犯秋毫馬師父子親提  
掇血噴千山風怒號無辜範

大將登壇八面風卷旗息鼓四壘空太平氣象清如  
許方見王師不戰功慈山清

太平無象錦皇淵天子黎明御鳳樓端拱垂裳歸聖  
主調羹變理有賢侯古梅列

馬祖見南泉行食過乃問桶裏是什麼泉曰合取  
口

天井新云馬祖問處南泉不知南泉答處馬祖不會  
若也會江西兒孫不致埽土

馬祖不安院主問和尚近日尊候如何師曰日面  
佛月面佛

昭覺勤云此箇公案知得落處便能獨步丹青如或

不知往往枯木巖前蹉路去也是他本分作家到者  
裏須有驅耕夫牛奪饑人食底手脚方始得見他馬  
大師爲人處不然總沒交涉諸人到者裏且作麼生  
得平穩去 崇慶古云當時院主可惜放過若不放  
過好與云情知和尚病在膏肓 白巖符代院主云  
怪不得醫人說和尚不解忌口

日面佛月面佛五帝三皇是何物二十年來曾苦辛  
爲君直下蒼龍窟屈堪述明眼衲僧莫輕忽雪竇顯  
日面月面星移斗轉失曉波斯討頭不見翠巖眞  
少年公子忽猖狂半夜穿雲入洞房二八仙娥百般  
巧眼睛之上繡鴛鴦野軒選

日面佛月面佛夜夜朝朝好風物馬駒踢殺天下人  
軒轅照破精靈窟楊無爲

蒲團上端坐鍼眼裏穿線西風一陣來落葉兩三片  
保寧勇

日面月面星流電卷鏡對像而無私珠在盤而自轉  
君不見爐鎚前百鍊之金刀尺下一絲之絹 天童覺  
日面東兮月面西誰言任運落前溪山桃落盡春歸

去猶有子規枝上啼上方益

什那駒子氣生獐蹴蹋盧頂上行正患脾疼却頭

痛病來猶有巧心情張無盡

了鬟女子畫蛾眉鸞鏡臺前語似癡自說玉容難比

竝却來架上著羅衣五祖演

東街柳色拖烟翠西巷桃花相映紅左顧右盼看不

足一時分付與東風佛鑑懃

金烏纔唱日方中王道平平觸處通爭奈馬駒生太

早依前踢殺太虛空正覺逸

日面月面虛空閃電雖然截斷天下衲僧舌頭分明

也祇道得一半俞道婆

打起黃鶯兒莫教枝上啼啼時驚妾夢不得到遼西

與牛游

朱砂鏡裏開顏笑白玉盤中展脚眠大抵人生難得

共得團圓處且團圓佛性素

古殿無人到者稀蒲團端坐有誰知不因院主通消

息爭得寒光萬里輝中際能

日面月面突出難辨擬欲擡眸空中兩片無準範

日面佛月面佛飛來峰接三天竺南高峰對北高峰  
六條橋鎖垂楊綠入就雪

爭看燈影動干戈戰馬紛馳來又過燭罷一時歸去  
也譙樓又奏角聲多石磧湖

南冠而楚語不忘故國音造次與顛沛無由見淺深  
君不見三十年來鹽醬話幾番辛苦爲沉吟天水廣

學得風流飾粉郎一朝兩度巧梳粧改頭換面無人  
識元是東村李二娘爾庵本

鑿井耕田出作入息不識不知順帝之則神歌社舞  
自成調笑殺東村王大伯晴雲啓

一毫縮就冰絲結四面玲瓏了沒痕無耳石人消息  
盡泥牛產出鐵崑崙法林音

馬祖示衆凡有言句是提婆宗以此箇爲主

截雲駒云山僧有時一句子不作一句子商量有時  
一句子却作一句子商量薰拈拄杖云馬大師來也

復卓一卓云事因丁屬起展轉話難明靠拄杖  
玉環珠回著眼看有相干處沒相干祇將此箇以爲

主喝一喝一劍倚天星斗寒石溪月



滿天風雪出門遊正馬橫身百草頭聞道平原狐兔  
狡頻將鷹眼看吳鉤天岸昇三

全憑三寸舌縱橫六國相將賀太平斗大金章懸肘  
後蘇秦原是舊蘇秦

松直棘曲鵲噪鴉鳴本無有意不道無情爲欲魚龍  
知性命頻將折箸攪滄溟

馬祖因僧參乃畫一圓相曰入也打不入也打僧  
纔入師便打僧曰和尚打某甲不得師靠却杖便  
休

雪竇顯云二俱不了靠却拄杖擬議不來劈脊便棒

雲居莊云大師令雖行爭奈無風起浪者僧棒既  
喫了要且有理難伸復云作麼生會他休去底道理

寶壽新云放則兵隨將轉收則馬聽鑼聲既論力  
敵兩攻不無各有一能其運籌帷幄決勝千里獨許

神駒何則祇圖邦國靖終不貴封侯

門頭隨分應震虛善犯何如擬慎初奪却馬師蒺藜  
杖坐觀天下競分疎笑嚴寶

鐵鎖高垂不可攀子規啼處夜初闌月光此際情無

限幾箇曾經度玉關夫山儲

馬祖因僧於面前作四畫上一畫長下三畫短曰  
不得道一畫長三畫短離此四畫外請和尚答師  
乃於地畫一畫曰不得道長短答汝了也

南陽忠別云何不問取老僧 潯山果云借婆衫子  
拜婆年 高峰妙云字經三寫烏焉成馬西峰忍俊  
不禁爲諸人改正去也良久召侍者云分明記取

馬祖一日問百丈甚處來曰山後來師曰逢著一  
人麼曰不逢著師曰爲什麼不逢著曰若逢著即  
舉似和尚師曰甚麼處得者消息來曰懷海罪過  
師曰却是老僧罪過

國清英云人既不見因甚各擔一擔罪過 獅峰遜  
云逢著不逢著則且置且道是什麼人若識得此人  
馬祖百丈與他挈屨有分

大鑒下三世

洪州百丈懷海大智禪師馬祖一嗣再參馬祖侍立次  
祖豎起禪牀角拂子師曰卽此用離此用祖安舊  
處問子已後開兩片皮以何爲人師取拂子豎起



祖曰卽此用離此用師挂拂舊處祖振威一喝師  
當下大悟一日謂衆曰佛法不是小事老僧昔被  
馬大師一喝直得三日耳聾黃蘗聞舉不覺吐舌  
汾陽昭云悟去便休說什麼三日耳聾石門聰云  
若不三日耳聾何得悟去汾陽云我與麼道較他石  
門半月程雪竇顯云如今列其派者多究其源者  
少總道百丈於喝下大悟還端的也無然刁刀相似  
魚魯參差若是明眼漢瞞他一點不得祇如馬祖道  
嗣後開兩片皮將何爲人百丈豎拂爲復如蟲禦木  
爲復啐啄同時諸人要會三日耳聾麼大冶精金應  
無變色東林聰云當言不避截舌當爐不避火迸  
佛法豈可曲順人情東林今日向驪龍窟內爭珠去  
也百丈大智不無他三日耳聾汾州石門爭免箇二  
俱瞎漢祇者三箇老漢還曾悟去也無良久云祖禪  
不了殃及兒孫渤潭英云大衆且道馬祖當時是  
百丈悟了喝不悟了喝山僧今日不惜眉毛爲汝註  
破良久云前三三後三三雲蓋智云發大機顯大  
用非馬祖而誰能爲卽此用離此用獨百丈得其旨

爲甚麼被馬祖一喝直得三日耳聾不入驚人浪難  
逢得意魚黃龍新云黃龍路見不平要問雪竇既  
是大冶精金應無變色爲甚麼三日耳聾從前汗馬  
無人識祇要重論蓋代功昭覺勤云然則作家共  
相提唱不妨各有爲人眼要且祇明得馬祖百丈大  
機未明得他大用諸人還知者一喝麼直似奮雷霹  
靂聽者喪膽亡魂要會三日耳聾正如擊塗毒鼓聞  
者喪身失命豎拂子云或有人問卽此用離此用和  
聲便打隨後與一喝復云還見馬祖百丈麼瑞巖  
愍云無辨龍蛇眼目難以荷負正宗無超佛祖機謀  
難以定論古今馬祖一喝何止百丈三日耳聾直得  
盡浮幢王刹海若聖若凡被他轟破耳門聽事不眞  
喚鐘作甕諸人還知落處麼雲收雨霽長空闊一對  
鴛鴦畫不成愚菴孟云馬大師融治乾坤指揮神  
策百丈握闔外威權黃蘗便攬旗奪鼓所向無敵故  
知機用爲列祖之神髓萬類之鉗錘汾州謂悟去便  
休說甚麼三日耳聾石門云若不三日耳聾爭得悟  
去恁麼批判古人還甘麼老僧不避腥羶試爲斷看

烽火漁陽樓上月曲中都是斷腸聲 南菴依薦登

如意云神器不可以不冥始可以有靈銅片銅片如有靈願得照見情人千里形擊如意

蹋著船頭把釣竿浪颺風緊得魚難翻思幾處雲爲雨祇見四方爭出山翠巖真

一喝叢林辨者稀耳聾今古強鍼錐燈籠撫掌呵呵笑露柱低頭却皺眉海印信

未明大智再參尋相逐相隨用不任斷浪絕流全體現一聾二日孰知音照覺總

客情步步隨人轉有大威光不能現突然一喝雙耳聾那吒眼開黃蘗面真淨文

木馬踢殺閻浮人泥牛飲渴滄溟水霹靂滿空山嶽摧看看平地波濤起保寧勇

雨霽游雲尙未歸晴空忽地一聲雷嶺梅已得春消息不比山桃一例開上方益

江西一喝動乾坤大用全機是滅門三日耳聾風過樹果他黃蘗喪兒孫鼓山珪

馬駒脚下喪家風四海從茲信息通烈火燄中撈得

月巍巍獨坐大雄峰徑山杲

父子相逢臭味同龍泉寶劍再磨礪要明馬祖當年喝大地山河盡耳聾慈受深

迅雷吼破澄潭月當下曾經三日聾去却膏肓必死疾叢林從此有家風虎丘隆

父子相將草裏遊人前拈弄幾含羞迅雷一震驚天地直得滄溟絕點流懶庵需

喝聲絕處怒雷收喪盡家風一不留總使戰爭收拾得却因歌舞破除休石庵瑤

世路風波不見君愁腸暗寫共誰論迅雷纔震清颺起白日一天星斗分木庵永

精金無變色因甚聾三日一字入公門九牛拔不出肯堂充

含春笑日花心艷帶雨隨風柳態妖珍重兩般堪比處醉時紅頰舞時腰海舟慈

養成頭角戲春潮餘尾猶將電火燒霹靂一聲看變化須彌踴跳五雲霄淨明瑤

一聲塗毒聞皆喪徧地觸骸無處藏三寸舌伸安國

劍千秋凜凜白於霜隱元琦

欲賺英雄到馬陵頻頻滅竈却添兵火光照出脾心  
字始歎空成豎子名豁堂品

步亦步兮趨亦趨當陽一喝盡忘渠掀翻海岳倒流  
注蝦蟹魚龍誰敢謁法林音二

相攜相將客路長驢馱馬載兩相當臨岐一語斷腸  
處麥笛橫吹過野塘

百丈因馬祖寄三盞醬至師上堂開書了拈拄杖  
指曰道得即不打破衆無語師打破歸方丈

送醬三瓶通遠信當時打破衆還驚父慈子孝誰相  
委莫道禪家太不情本覺一

令行誰敢犯鋒銳肅寂沙場八表降可恨不逢擒賊  
手輸他做得好風光林野奇

江城五夜角聲蚤韻遞東風穿戶曉帳內佳人睡正  
濃夢隨流水過蓬島百愚斯

百丈因雲巖問每日區區爲阿誰師曰有一人要  
巖曰因甚不教伊自作師曰它無家活

雲居莊云解弄不須霜刃劍延齡何必九還丹 徑

山琇云盡道百丈口吞佛祖眼蓋乾坤未免拖泥帶  
水殊不知曾爲浪子偏憐客自愛貪杯惜醉人

百丈上堂衆方集以拄杖一時打散復召大衆衆  
回首師曰是什麼

黃蘗上堂衆方集以拄杖一時打散復召大衆衆回  
首蘗云月似彎弓少雨多風 雪竇顯云若是雪竇

上堂衆方集以拄杖一時打散便休 天童覺云下  
媒求鵠直釣釣魚各有接物利生底手段若是牢籠

不住呼喚不回底漢又作麼生以杖擊香臺一下

百丈因僧問如何是奇特事師曰獨坐大雄峰僧  
禮拜師便打

天童華云大小百丈答話不了 徑山及云百丈祇

好無佛處稱尊或有問徑山如何是奇特事但云汝  
等皆當作佛他若禮拜更向道但辦肯心必不相賺

祖域交馳天馬駒化門舒卷不同途電光石火存機  
變堪笑人來捋虎鬚雪竇顯

大機大用豈虎然獨坐雄峰自有權稍若錯傳王令  
者腦門須喫棒三千白雲端 宗鑑法林卷九

宗鑑法林卷十

集雲堂 編

大鑒下三世

百丈每上堂有一老人常隨衆聽法一日衆退惟老人不退師問汝何人也曰吾非人也於過去迦葉佛時曾住此山因學人問大修行人還落因果也無對曰不落因果遂五百生墮野狐身今請和尚代一轉語貴脫野狐身師曰汝問乃問大修行人還落因果也無師曰不昧因果老人於言下大悟作禮曰敢乞依亡僧事例師令維那白椎告衆食後送亡僧衆驚異食後師領衆至山後巖下以杖挑出一死野狐乃依法火葬師至晚上堂舉前因緣黃蘗使問古人錯抵對一轉語五百生墮野狐身轉轉不錯合作箇什麼師曰近前來與汝道蘗近前與師一掌師拍掌笑曰將謂胡鬚赤更有赤鬚胡

潯山問仰山云黃蘗常用此機爲復天生得從人得仰云亦是稟受師承亦是自性宗通潯云如是如是

天聖泰云三生六十劫 法昌遇云不落因果爲什麼墮野狐不昧因果爲什麼脫野狐直饒道得落處分明也未出他野狐窟在法昌當時若見但與他拈出雪峰古鏡教伊動轉不得然後放出子湖狗子盡却性命免見兒孫今日成羣作隊法昌與麼舉論大似持螯酌海明眼人前一場笑具何故曾經大海難爲水慣聽無絃不易琴 黃龍新問元首座野狐意旨作麼生元云甜瓜徹蒂甜苦瓜連根苦 大瀉智云費盡自己心笑破他人口 徑山杲云不落與不昧半明還半晦不昧與不落兩頭空索索五百生前個野狐而今冷地謾追呼喝一喝云座中既有江南客何必樽前唱鷓鴣 高峰妙云前不落後不昧還有得失也無若無因甚有墮有脫若有試出來分明道看有麼有麼總是一隊野狐精莫怪山僧歷夏爲賤 獅林則喝一喝云當時下得者一喝前後五百生一時粉碎 法林音云我當時若在但以手斫額云貓管取者一隊野狐精逃竄無地乃呵呵大笑明鏡當臺鑑者稀禪人到此擬何之直饒點破秋天

月元來祇是野狐兒瑯琊覺

百丈野狐語至言龜恒薩阿竭吾有吾廬翠巖真

語路分明在憑君仔細看和雨西風急近火轉加寒  
道吾真

明明道不落老人何曾錯的言不昧百丈何曾會  
不會將不錯渾然宣妙覺不落與不昧卓爾標正位  
全機因果有來由脫體升沉無忌諱非自非是誰是  
言下迷宗生擬議再問重教舉一回潛觀徹底起風  
雷逆風喝轉雷聲絕飲氣歸家較醜拙他日如何舉  
似人雄峰撐破秋天月靈源清

畫師畫地獄畫出百千般駐筆從頭看特地骨毛寒  
百丈政

五百生前墮野狐元來用處太心纖一字尙能招是  
報那堪心地更模糊佛述昱

不落不昧僧俗本無忌諱丈夫氣宇如王爭受囊藏  
被蓋一條柳標任縱橫野狐跳入金毛隊大庾嶺圓  
六合英雄無限幾個能和痛癢臨川羨人取魚不如  
歸家結網寶峰祥

萬丈洪巖倚碧空人間有路不能通奈何一點雲無  
礙舒卷縱橫疾似風兜率悅

韓信收齊密用機食其烹處共攢眉到頭自有榮身  
策蓋代之功復是誰道場如

大智虛明徹果因一言超脫野狐身雄峰極目烟霄  
裏列曜分輝拱北辰雲溪恭

百丈野狐因果何如善財未了再見文殊瀟山秀

化形來問大修行當下金鍬刮眼睛轉得野狐成百

丈夜來依舊野干鳴張無盡

醉眠醒臥不歸家一身流落在天涯佛祖位中留不

住夜來依舊宿蘆花龍門遠

百丈野狐塞鴈銜蘆李廣神箭張顛艸書鼓山珪

不落不昧石頭土塊陌路相逢銀山粉碎拍手呵呵

笑一場明州有個憨布袋徑山果

一尺水一丈波五百生前不奈何不落不昧商量也

依前撞入葛藤窩阿呵呵會麼若是你灑灑落落

不妨我哆哆和和神歌社舞自成曲拍手其間唱哩

囉天童覺

不味不落錯錯錯不落不味莫莫莫坐致太平

實難摸索月林觀

諦觀五百生前事不味何如不落親因果歷然殊可

怕人人盡道野狐精牧菴忠

颯颯春風動物華園林開葉又開花歸來謾與佳人

說鸞鏡臺前雲鬢斜白楊順

世人住處我不住世人行處我不行全身跳入野狐

窟贏得風流五百生肯堂充

百丈堂前辨野狐紫羅帳裏撒珍珠誰家別館池塘

裏一對鴛鴦水上浮靈巖安

動口生荊棘移身墮野狐趙州來關富東壁挂葫蘆

或菴體

百丈野狐石女無夫一回淚下滄海乾枯率菴琮

墮狐身與脫狐身葉落花開幾度春名利祇隨騎馬

客是非不到釣魚人樓翁語

不落不味誣人之罪不味不落無繩自縛可憐柳絮

隨春風有時自西還自東三峰印

聽雨連宵倦孤燈照硯寒春歸花下響處處鳥啼殘

一足子

禹碑高聳峙岫嶺怪狀奇形無限愁更有蒼藤鎖石

嵒礧今錯古倩誰收法林音

百丈因瀉山五峰雲巖侍立次乃問瀉山并却咽

喉唇吻作麼生道山曰却請和尚道師曰不辭與

汝道恐已後喪我兒孫又問五峰峰曰和尚也須

并却師曰無人處祈願望汝又問雲巖巖曰某甲

有道處請和尚學師學巖曰和尚有也未師曰喪

我兒孫

高峰妙云大小瀉山推惡離已今日忽有人問西峰

并却咽喉唇吻道將一句來卽向道柴荒米貴忍饑

無暇抵對大慈言云當時百丈與麼問大似揚聲

止響好與二十笞帚者三個漢忒煞不唧喙且放過

一邊傍有僧云和尚也欠唧喙在慈云我不如你

却請和尚道虎頭生角出荒艸十洲春盡花凋殘珊

瑚枝上日杲杲雪竇顯三

和尚也并却龍蛇陣上看謀略令人長憶李將軍萬

里天邊飛一鶚



和尚有也未金毛獅子不踞地兩兩三三舊路行大  
雄山下空彈指

却請和尚道千人萬人所不到杲日朦朧海面紅清  
風凜凜霜天曉佛鑒勲三

和尚也并却後人要踢前人腳其餘利鈍不同途畢  
竟到頭輸一著

和尚有也未且向自身明見地未能展翼逆風飛少  
遂青雲千里志

借略用略也以軍遣軍就韜行韜也以將殺將五霸  
之仁也久假而不歸三皇之道也至誠而皆諒若是

英才頓超榜樣天奇瑞

逢毒施毒手求仁未必仁可憐家不造個個逞頑驕  
浩然華

擬欲瞞人却自瞞藏頭露尾幾多般賺人最是中秋  
月風送蘆花玉一團法林音

百丈因普請鋤地次有一僧舉起鋤頭忽聞鼓鳴  
乃拋下大笑便歸師曰俊哉此是觀音入理之門  
歸院乃喚其僧問適來見什麼道理便與麼僧曰

適來肚饑聞鼓聲歸來喫飯師乃笑

或作  
山

鏡清总云當時瀉山會裏無一人 臥龍云當時瀉

山有一人法林音云有無且置畢竟是那一人 昭

覺勤云者僧洪音大震直得千五百人眼目定動及

乎勘證將來却打個背翻筋斗若不是百丈爭見汗

馬功高及乎道有一人祇得一半道無一人祇得一

半今日鍾魚鼓板齊震有呵呵大笑者但向道觀音

菩薩來也林云祇得一半

風前一曲動離愁那箇行人不舉頭手把花枝半遮

面不令人見轉風流無準範

天生個樣鐵崑崙機智偏能入海門無限差珍收拾

了却來空手敘寒溫簡翁敬

一聲因地觸骸乾大笑呵呵露一斑謾道他家無活

計風流賣盡足傍觀本珠明

百丈因一女子哭上法堂師曰作甚麼曰父母俱

喪請和尚選日師曰明日來一時埋却

朝宗忍云女子全身甲冑直透重關百丈運籌帷幄

決勝千里要得邦家平帖須是二老始得



百丈山頭坐不遙女子山下哭嗶咷一時埋阿清涼地至孝方能今古超汾陽昭

此理分明答教人爺孃俱喪向師申誰道分燈傳正法一時埋却始爲親延壽慧

父母俱喪一時埋却鷹疾草枯鳥飛箭落雄峰一路滑如苔千古聲光阿喇喇石碣勸

百丈因黃蘗問從上相承底事如何指示於人師據座蘗曰後代兒孫將何傳授師曰將謂你是箇人便歸方丈

雲峰悅云百丈老人大似憐兒不覺醜雖然如是盡法無民雲居愛云到者裏能有幾人天童覺云言滿天下無口過行滿天下無怨惡還他百丈老漢黃蘗不是不知有且要此話大行還會百丈歸方丈麼林間楓葉落化外水天秋寶壽新云總饒有收有放未免夷嶽盈壑由你一擡一捺難逃續鳧截鶴畢竟作麼生卽得也是掉棒打月

國泰由來自偃兵路逢劍客也須呈雖然猛虎不食子正令他時作麼行本覺一

尋常父子最相親纔說家私便不仁曾向電光中走馬不妨劍刃上橫身虛堂獨照千峰月枯木深含萬國春不觸化機前已錯那堪回首覓秦津幻寄庭

百丈因僧問抱璞投師請師一決師曰昨夜南山虎咬大蟲曰不謬眞詮爲甚不垂方便師曰掩耳偷鈴漢曰不得中郎鑑還同野舍薪師便打僧曰蒼天蒼天師曰得與麼多口曰罕遇知音拂袖便出師曰百丈今日輸却一半至晚侍者曰和尚被者僧不肯了便休師便打者曰蒼天蒼天師曰罕遇知音者禮拜師曰一狀領過

逢強卽弱遇柔卽剛你行我立你頡我頽扶過兮斷橋流水推落兮三千仞之呂梁補苴造化錯雜陰陽君不見一喝曾聾三日耳雷音直透大雄岡木陳忞全殺活能縱奪血烹紅鼎中放出遼天鸚聊把玉鞭垂收歸攪海鱷地軸天關轉握中或明或暗許誰度遠菴體

百丈因潯山侍立次問誰曰靈祐師曰汝撥爐中有火否山撥曰無師船起深撥得少火舉示之曰

此不是火山發悟次日入山作務師曰將得火來麼曰將得來師曰在甚處山乃拈一枝柴吹兩吹度與師師曰如蟲禦木

徑山杲云百丈若無後語泊被典座瞞天寧琦云百丈却因後語被人覷破帶累典座隨邪逐惡天寧幸是無事汝諸人在者裏覓個甚麼以拄杖一時趁散

拈起都來祇一星豁然騰焰亘天明連延野火猶難救直得三年草不生保寧勇

力士曾遺額上珠搜尋無處幾嗟吁傍人爲指珠元在始覺平生用意龐大洪遂

用盡工夫夜欲闌東挑西撥見還難驚然豈爆寒灰裏便把柴頭作火看別山智

重重何必逞風流個事纔知便合休縱使見烟非是火也須燒手更燒頭寶葉源

根尋到底得星兒冷焰騰輝是此時拈一莖茅輕點著不知燒殺五須彌雪巖欽

百丈謂衆曰有一人長不喫飯不道饑有一人終

日喫飯不道飽衆無對

夾山豫云百丈大師說饑說飽喫與不喫則且置且道你還識此人麼潦倒疎慵無事客閒眠高臥對青山

池州南泉普願禪師馬祖一嗣示衆喚作如如是變了也今時師僧須向異類中行歸宗聞曰雖行畜生行不得畜生報師曰孟八郎又恁麼去也

德山密云南泉中毒也 瑯琊覺云山僧則不然遇水喫水遇草喫草焉知畜生行 法華舉云作麼是異類中行石牛常臥三春霧木馬時嘶秋夜泉 愚菴孟云似地擎山不知山之孤峻如石含玉不知玉之無瑕大通智勝遷座而成正覺善財童子別峰而見德雲僧云智不到處切忌道著道著即頭角生却爲甚麼作者般語話咄孟八郎又與麼去也 慧雲盛云南泉既行荒艸歸宗又入深村不知今時師僧如何進退設有恁麼去也是瞎驢趁大隊張公移住在深村被賊潛身入後門鍋子一時偷去了更來敲碗甌兒孫保寧勇

喚作如如已變名廓然無聖豈容情其間妙叶皆同  
類不有玄暉辨濁清護國欽

涅槃寂滅本無名喚作如如早變生若問經中何極  
則石人夜聽木鷄鳴本覺一

寒披襟上胡牀睡說甚三頭與六臂孟八郎怎麼去  
張公喫酒李公醉雪刃起

南泉示衆文殊普賢昨夜三更起佛見法見每人  
與二十棒趁出院也趙州曰和尚棒教誰喫師曰  
王老師過在什麼處州禮拜而出

雲門偃云深領和尚慈悲某甲歸衣鉢下得個安樂  
又代云與衆除害 報慈遂徵云且道趙州禮拜是  
冒南泉不冒南泉 昭覺勤云南泉動絃趙州別曲  
苦痛蒼天寒山拾得若是崇寧則不然燈籠露柱昨  
夜起佛見法見各與二十棒令歸本位去也或有個  
漢出云和尚棒教誰喫祇對他道落賓落主 高峰  
妙云南泉雖則頂門具眼賞罰分明檢點將來也是  
虚空裏釘橛若無趙州後語未審如何折合今日忽  
有人起佛見法見但向他道善哉善哉時節若至其

理自彰

普賢昨夜闢文殊趁出還同兩手祛却道趙州行正  
令從茲王老一時無佛印元

霧起龍吟風生虎嘯兩口一舌異音同調文殊普賢  
佛法見南泉趙州日月面據令而行指顧間盡情貶  
向鐵圍山圓悟勦

鴛鴦繡出世無雙好手元來更有強呈罷各歸香閣  
去金鍼難把度蕭郎佛燈珣

二俱不了隨合多少縱使夜行投明未到月堂昌

布鼓當軒爲擊來臥龍驚起出巖隈千峰秀色憑誰  
寫一帶澄江古鏡開無菴全

春風吹落碧桃花一片流經十萬家誰在畫樓沽酒  
處相邀來喫趙州茶石鼓夷

南泉到莊所莊主預備迎奉師曰老僧居常出入  
不與人知何得排辦如此莊曰昨夜土地報和尚  
今日來師曰王老師修行無力被鬼神覬破侍者  
便問既是善知識爲甚被鬼神覬見師曰土地前  
更下一分飯

報慈遂云甚麼處是土地前更下一分飯 因聖穎  
云南泉被者僧一問未免向鬼窟裏作活計 雲居  
錫徵云土地前一分飯是賞伊是罰伊祇如土地覲  
見是南泉不是南泉 翠巖真云衆中多有道蘇嚙  
蘇嚙便是土地前一分飯如斯理論深屈古人何故  
祇知枝詞蔓說不知南泉道理還會麼執之失度必  
入邪路放之自然體無去住 天童覺云老僧當時  
若見莊主與麼道便與捉住云放汝不得何故來說  
是非者便是是非人 報恩秀云天童雖解捉鬼賣  
未免莊頭鬼亂山僧卽不然若見莊主與麼道便與  
彈指三下云噉度嚙度嚙地尾婆訶

石上栽花分外奇枝頭春色暗芳菲馨香徧界無人  
臭一任狂風取次吹伊菴權

春色滿園關不住一枝紅杏出牆來莫訝王孫多意  
氣從來韻致付天才肖風哲

南泉曰江西馬祖說卽心卽佛王老師不恁麼不  
是心不是佛不是物恁麼道還有過麼趙州禮拜  
而出僧隨問上座禮拜便出意作麼生州曰汝却

問取和尚僧問師曰諗上座意作麼生師曰它却  
領得老僧意旨

黃龍心云古人恁麼道譬如管中窺豹但見一斑設  
使入林不動艸入水不動波猶是騎馬向冰棱上行  
若是射鵰底手何不向蛇頭揩癢良久云鴛鴦繡出  
自金鍼 徑山杲云兩個老漢雖善靴裏動指殊不  
知旁觀者醜 天寧琦云南泉趙州總被者僧一狀  
領過

不是心兮不是物那吒夜入蒼龍窟鐵鞭擊碎明月  
珠從教大地如翻墨雪竇宗

深深深汲古今淺淺淺渾成現水瑩玉壺江澄素練  
跳出桃花三汲浪戴角擎頭乘快便點額魚馬師口  
下空躊躇圓悟勤

剔起便行三萬里祇今休去八千年分明更爲從頭  
舉一任諸方取次傳鼓山珙

金剛南際老番王反著欄衫入大唐牛首旃檀多賣  
了惟垂鼻孔不囊藏正堂辨

不是心不是佛不是物通身一具金鎖骨趙州參見

老南泉解道鎮州出蘿蔔吳元昭

不是心不是佛不是物以拂子擊禪牀爲君擊碎精  
靈窟天上人間知不知鼻孔依前空突兀誰菴演

突出難辨辨得出師子翻身師子窟哮吼一聲天地  
空驚起須彌高突兀月林觀

不是心佛不是物六六依然三十六因思長慶陸大

夫解道含笑不合哭尼無著持

華嶽三峯翠插天上頭無路可躋攀不知誰有神仙

手折取峰頭十丈蓮開善謙

剃頭頭生光洗脚脚清爽脫衣上牀眠拈著通身癢

雪菴瑾

夫子不識字達磨不會禪大唐天子國依舊化三千

松源岳

破業亡家後渾身沒處安倒拈無孔笛吹過汨羅灣

如菴用

不是心佛物開口已話墮更擬問如何好與劈面唾

殺六巖輝

百尺朱樓臨峽裏新妝能唱美人車皆言賤妾紅顏

好要自狂夫不憶家弘覺恣

天外銀河直下飛謫仙題就已遲遲如何擲筆懸巖  
畔亂撒冰珠總是詩神仙瀛

秋風落鴈聲聲羽暮雨青來點點山惆悵不堪回首  
再白雲盡處是鄉關日休寤

南泉問黃檗黃金爲世界白銀爲壁落是什麼人

居處曰是聖人居處師曰更有一人居何國土檍

叉手而立師曰道不得何不問王老師檍却問更

有一人居何國土師曰可惜許

天寧琦云直是好笑當時若作黃檍待道更有一人

居何國土但云者野狐精南泉通身是口也須飲氣

吞聲能仁鑑云潛行密用如愚若魯還他黃檍若

是家有諍子國有諍臣猶欠一著待云道不得何不

問王老師但云可惜許縱使南泉通身伎倆到者裏

施展不開自聞心云南泉慣向虛空釘橛黃檍善

能陸地張帆雖然二俱作家檢點未是好手當時若

問萬峰更有一人居何國土但厲聲云道甚麼擬動

眉輪劈脊便棒非惟捉敗者賊亦免使露布葛藤

南泉問黃檗定慧等學明見佛性是否曰十二時  
中不依倚一物始得師曰莫便是長老見處否曰  
不敢師曰漿水錢且置艸屨錢教誰還

雲峰悅云若不同牀睡焉知被底穿 徑山杲云路  
逢劍客須呈劍不是詩人不獻詩 天寧琦云又是  
得便宜又是落便宜 愚菴孟云老僧則不然南泉  
還漿水錢黃檗償艸屨錢不見道賊是小人智過君  
子 法林音云二老每人好與二十棒且道過在甚  
麼處

兩陣交鋒戰不難埋兵挑鬪何人曉祇解輪槍趁勢  
來喪身失命有多少海印信

獵獵奔馳勢不休艸深風勁更堪愁翻身獅子無尋  
處空使行人說路頭佛慧泉

昨夜銀蟾跨箕尾驀然一陣天風起卷盡千重萬重  
雲碧空寂寂凝如洗佛鑑勲

李下不得整冠瓜田豈可納履行藏自要分明免見  
傍人說你懶菴樞

市市機輪深陷虎當陽坐斷眼通身明投暗合無回

互兩散雲收日月新六三圖

南泉因僧問師歸丈室將何指南師曰昨夜三更  
失却牛天明起來失却火

龍翔訢云大小南泉和泥合水中峰則不然或有人  
問即向道拄杖子今日開封 天界盛云恁麼則住  
持不易雖然須是王老師始得 芙蓉覺云南泉將  
三百六十骨節八萬四千毛竅一時捺在者僧面前  
了也龍淵則不然或有人問將何指南向道饑渴渴  
飲閒坐困眠

昨夜三更失却牛天明起來失却火腰未繫兮屨未  
穿面不洗兮頭不裹保寧勇

奴顏婢膝走人間羞見羊裘七里灘文叔雖爲天子  
貴子陵元作故人看希叟

野老忘機事事閑柴門雖設未曾關偶然拾得無鬚  
鎖依舊拋他途路間覺溪盛

相逢月下是嵯臺藉艸清樽連夜開明日酒醒應滿  
地空教饑鷄啄莓苔菴菴

南泉曰我十八上便解作活計趙州曰我十八上



便解破家散宅

神鼎譚云你道破家散宅底好解作活計底好初參之士須取前語久參先德直須破家更有一言萬里匡州 法林音云神鼎老人錯下名言喝一喝云一喝華山分兩路萬年流水不知春 普賢素云十八上便解作活計囊無繫蟻之絲廚乏聚蠅之糝十八上便解破家散宅南頭買賤北頭賣貴檢點將來各好與三十棒者裏且放過一著何故曾爲浪子偏憐客自愛貪杯惜醉人

南泉因山下有一菴主人謂近日南泉和尚出世何不去禮拜主曰非但南泉直饒千佛出與亦不能去師聞乃令趙州去勘州去便設拜主不顧州從西過東從東過西主亦不顧州曰艸賊大敗遂拽下簾子便歸舉似師師曰我從來疑著者漢次日師乃與沙彌攜茶一餅盞三隻到菴擲向地上乃曰作日底昨日底主曰昨日底是什麼師於沙彌背上拍一下曰賺我來賺我來雪竇顯云南泉趙州被者擔板漢勘破了 爲山誌

云菴主坐觀成敗南泉趙州向淨地上喫交 智海禾云是卽是菴主祇解把定封疆不能同生同死當時趙州禮拜但云者賊我識得你待伊從東過西從西過東便拽拄杖趁出看趙州別有什麼伎倆 甌峰承云那裏是者擔板漢勘破南泉趙州處若是明眼衲僧向者裏勘破雪竇也不難

宮烏棲去玉樓深微月生簷夜夜心香釐不回花自發春來空帶辟寒金入就雪

好個擔板漢橫身一條鐵智勇李將軍兩度拗不折出師重決龍蛇陣當鋒連下頂門楔馬陵道下死龐涓千古英雄常淚血達變權

俊鷄翻霄趁不及涵秋鑑出難逃匿令人千古憶嫖姚一戰清風生八極遠菴體

肌骨天生潔且貞自來心事若冰清錦衣公子空相憶費盡重重擲玉聲聞善信

南泉因東西兩堂爭貓兒師見乃提起貓曰道得卽救取貓兒道不得卽斬却衆無語師便斬之趙州自外歸師舉前話示之州乃脫艸履安頭上而



出師曰汝若在卽救得貓兒也

保福展云雖然如是也祇是破艸屨 翠巖芝云大

小趙州祇可自救法林音云大小趙州自救不了

雪峰存問德山南泉斬貓意旨如何山以拄杖便打

趁出復召云會麼峰云不會山云我與麼老婆猶自

不會 大滙智云南泉據令而行趙州見機而作雖

然如是未免挂人唇吻大滙要與南泉把臂共行遂

拈拂子云若道得卽奪取去衆無語乃云啼得血流

無用處不如緘口過殘春 中峰本云南泉劍爲不

平離寶匣趙州藥因救病出金瓶雖然慶快一時爭

奈古佛家風掃土矣 報恩秀云正當恁麼時盡十

方世界情與無情一齊向王老師手中乞命當時有

個漢出來展開兩手不然攔胸抱住云却勞和尚神

用縱南泉別行正令敢保救得貓兒 博山來云生

擒活捉王老師全提起死回生諗古佛手段救得救

不得總不干他事且道節文在什麼處 愚菴孟云

還識南泉麼他是生鐵鑄就渾鋼打成要向驪龍領

下摘珠阿修羅手中奪印趙州雖善來機也是得張

白狐裘脫秦虎口者兩堂是蘇秦張儀投秦入趙豈

知天然王道寧可以口舌勝耶 吳聖玉云南泉據

虎頭趙州收虎尾死貓兒却被二老弄活爭奈兩堂

雲水一死不再活如今要得活麼孽眼云貓

提起兩堂應盡見拈刀要取活狸奴可憐皮下皆無

血直得橫屍滿道途白雲端

雪刃含光射斗牛不惟天地鬼神愁命根落在南泉

手直下看看兩段休保寧勇二

狸奴頭上角重生王老門前獨夜行天曉不知何處

去楚山無限謾崢嶸

伯牙之琴鸞膠可續調古風淳霜月可掬南泉南泉

龍象繼躅佛心才二

艸屨頭戴與誰論四海無風浪自平解道曲終人不

見江頭贏得數峰青

五色狸奴盡力爭及乎按劍總生盲分身兩處重相

爲直得悲風動地生龍門遠二

安國安家不在兵魯連一箭亦多情三千劍客今何

在獨許將軍建太平

手握乾坤殺活機縱橫施設在臨時滿堂兎馬非龍  
象大用堂堂總不知胡安國

南泉提起下刀誅六臂修羅救得無設使兩堂俱道  
得也應流血滿街衢光孝慙

克已堂前開飯店股肱屋裏販揚州頭戴艸鞋呈醜  
拙湊成一對好風流或菴體

盡力提持祇一刀狸奴從此脫皮毛血流滿地成狼  
藉暗爲春風染小桃無準範

一刀成兩段釋得二僧爭艸鞋頭戴出貓兒無再生

橫川珙

設使南泉不舉刀艸鞋何地賣風騷相逢若問兩堂  
客鼻直眉橫總姓貓紫柏可

乾魚怕死不吞鉤却有螺螄跳上舟還把螺螄來作  
餌釣空跋鱉始方休入默音

誓掃匈奴不顧身三千貂錦喪邊塵可憐無定河邊  
骨猶是春閨夢裏人綠雨蕉

南泉因趙州問離四句絕百非請師道師便下座  
歸方丈州曰者老和尚尋常口吧吧地今日被我

一問直得無言可對侍者曰莫道和尚無語好州  
打一掌曰者一掌合是王老師喫

白巖符云老趙州大似個新出紅爐底彈子犯著則  
筵破面門雖然總不出王老師圈圓且道那裏是王  
老師圈圓

離四句絕百非作者相諳識得伊跳下禪牀便歸去  
從他鷄子搏天飛智門祚

宗鑑法林卷十

宗鑑法林卷十一

集雲堂編

大鑒下三世

南泉問座主講甚麼經曰彌勒下生經師曰彌勒  
幾時下生曰現在天宮未來師曰天上無彌勒地  
下無彌勒

洞山价舉問雲居居云天上無彌勒地下無彌勒未  
審誰與安名洞山被問直得禪床震動乃云吾在雲

巖曾問老人直得火爐震動今日被子問直得通身汗流 太陽玄云如今老僧舉起也有解問者致將一問來乃云地動也 徑山杲云禪床動火爐動地動則不無三個老漢要見南泉直待彌勒下生始得忽有個漢出來道天上無彌勒地下無彌勒却教什麼人下生又作麼生抵對但向他道老僧罪過

禪床驚震被塗糊惹得兒孫不丈夫拄杖劈頭連打出也教知道赤鬚胡龍門遠

上天下地無彌勒安名立字是何因黃金自有黃金價終不和沙賣與人文殊道

雲居悟云昔日東山和尚謂衆云天上無彌勒地下無彌勒十字街頭立被人喚作賊且道此人被他喚作賊歡喜則是煩惱則是元來也不歡喜亦不煩惱何故爲伊有個著到處頌云

被人喚作賊吞聲便飲氣雖然言語惡真個好滋味不向如來行處行丈夫自有冲天志

南泉在方丈內坐次問良欽空劫中還有佛否欽曰有師曰是阿誰曰良欽師曰居何國土欽無語

洞山瑩代轉身便行 海門涌云良公當時若能輕彈一指管教王老師不作等閒看

南泉示衆王老師自小養一頭水牯牛擬向溪東牧未免食它國王水艸擬向溪西牧亦未免食它國王水艸不如隨分納些些總不見得

雲門偃云且道牛內納牛外納直饒你說得納處分明我更問你覓牛在 潞山喆云雲門祇解索牛不解穿他鼻孔拈拄杖云三世諸佛天下老和尚鼻孔盡被山僧拄杖一時穿却且道山僧鼻孔在什麼處良久云誣人之罪以罪科之 長慶稜云你道南泉前頭爲人後頭爲人雪竇云一時穿却 雲峰悅云說甚麼納些些盡乾坤大地色空明暗情與無情盡在山僧者裏放行則隨緣有地把住則逃竄無門且道放行好把住好 昭覺勤云和光順物與世同塵不犯鋒鎗收放自在是南泉本分草料山僧自小養一頭水牯牛有時孤峰獨立有時鬧市縱橫不論溪東溪西一向破塵破的且道卽今在什麼處 天童傑云南泉起模畫樣長慶披沙揀金雲門鼻孔先穿

雪竇據款結案拈拄杖更有一個在什麼處擲下拄

杖 靈隱嶽云王老師傾腸倒腹則不無示見移風

易俗在山僧祇養得一頭驢一向東倒西攔順時一

日何雷千里萬里劫時直是一步不移且道與王老

師水牯牛相去多少良久云漁人舞棹野老謳歌

天童覺云南泉牧牛可謂奇特直是一切處關防不

得爲甚麼如此是他隨分納些些 報恩秀云南泉

水牯牛無鼻孔你者一隊漢作麼生穿所以勝默老

人道在一切同一切一切處敗不得且道隨分納些

些後如何薊蕘莠稗愁耘鋤蹄角皮毛趁慣時 古

南門云南泉祇知落草求人爭奈妄生頭角引得諸

大宗師都向草中打輓未得個淨絕還見南泉撒手

處麼將此深心奉塵刹是則名爲報佛恩

垂垂楊柳暗溪頭不同東西却自由幾度醉眠牛背

上數聲橫笛一輪秋 懶 垂 樞

南泉水牯自天然隨分些些任變遷大笑一聲天地

窄更無佛法與人傳 月 林 觀

不放溪東西隨分納些兒冷煖祇自知分明說向誰

水菴永

不如隨分納些些喚作平常事已差綠草溪邊頭角

露一簑烟雨屬誰家 鐵牛印

南泉水牯忘鞭索南北東西共一家王稅及時都納

了牧童橫笛遠山斜 天 日 禮

不如隨分納些些渴飲饑食祇自知爛蹋春光烟雨

足橫身宇宙更由誰理 安 問

和和和東西幾何南北幾何歸去歸去免風免雨耕

耨以時宴我倉庾 希 溪 森

南泉謂僧曰夜來好風僧曰夜來好風師曰吹折

門前一株松曰吹折門前一株松又謂一僧曰夜

來好風曰是什麼風師曰吹折門前一株松曰是

什麼松師曰一得一失

翠巖真云衆中商量甚多有云前來據實抵對所以

云得後來不合云是什麼風所以云失然祇知車書

混同泥玉一所何哉不知道之根源理之深淺要會

麼路逢劍客須呈劍不是詩人莫獻詩 昭覺勤云

大凡酬唱隨機著眼辨龍蛇別縑素所謂打鼓弄琵琶

琶相逢兩會家祇如南泉道一得一失敢問阿那個  
得阿那個失者裏須是向上人始得還委悉麼揭王  
擇乳素非鴨類

南泉訪百丈丈問甚處來師曰江南來丈曰還將  
得馬大師真來麼師曰祇者是丈曰背後底吟師  
拂袖便去

八面當風祇者是拂袖之談動天地堪愛賣身王老  
師不作賤兮不作貴龍門遠

兄難兄弟難弟馬祖真祇者是撼動西江十八灘水  
面無風波自起石溪月

南泉問神山什麼處來曰打羅來師曰手打脚打  
山無語師曰你問我我與你道山便問手打脚打  
師曰分明記取已後遇明眼人舉似它

雲巖晟代云無手脚者始解打 保寧勇代云和尚  
具一切智

南泉巡堂次牽一頭牛入堂首座以手撫牛背一  
下師便休去趙州以艸二束放在首座前

國清英云趙州南泉大似屋裏販揚州首座怎麼可

知禮也

等將草料好供看何故皮毛要一般惹起群中相似  
者翻令頭角不完全寶葉源

南泉問維那今日普請作甚麼曰搜磨師曰磨從  
你搜不得動著中心樹子那無語

保福代云比來拽磨如今却不成 法眼代云怎麼  
即不拽也 資福玉代云和尚已動爭禁得它人不  
動 江天銓代云我若在拉來曳磨 礪南音舉云  
不得動著中心樹子首犯者罪加倍比來曳磨如今  
却不成前言不副後語怎麼即不曳也謝子勤勞和  
尚已動爭禁它人不動癩兒牽伴我若在即拉來曳  
磨刺腦入膠盆總云好箇中心樹子無端被南泉七  
花八裂了也吹餘不避腥羶也入一分不得動著中  
心樹子便云合取狗口管教王老師有口瘡却

南泉問陸亘大夫去彼將何治民曰以智慧治民  
師曰怎麼則彼處生靈盡遭塗炭去也

神鼎揆云文韜武略滿腹甲兵致君澤民即不無陸  
重要作祖師門下客亦未可在若具宗門向上爪牙

說甚生靈遭塗炭王老師也須照顧始得復頌

生靈塗炭起死回生拔眼中屑抽腦後釘翻思素墨

悲絲染自古雕文喪德人

南泉魯祖杉山歸宗四人離馬祖處於路分袂師

插拄杖曰道得也被者箇礙道不得也被者箇

礙歸宗拽拄杖打師一下曰祇是者箇王老師說

甚麼礙與不礙魯祖曰祇此一句大播天下宗曰

還有不播者麼祖曰有宗曰作麼生是不播者祖

作掌勢

難兄難弟一三三四同母而生個個相似竿木隨身

逢場作戲莫言礙塞不得一句播大播地佛靈勳

礙與不礙龍吟霧起播與不播蠅附驥尾南北東西

千里萬里俊哉正覺顯

南泉同三人喫茶次魯祖提起茶盞曰世界成時

便有者箇師曰今人祇識者箇不識世界宗曰是

師曰師兄莫同此見麼宗却拈起盞曰向世界未

成時道得麼師作掌勢宗以面作承掌勢

昭覺勳云魯祖簸土揚塵南泉和泥合水歸宗火鼠

灰飛杉山坐觀成敗還委悉麼箭鋒相拄不相饒四  
人共拈一隻盞

南泉曰三世諸佛不知有鰲奴白牯却知有

大瀉智云三世諸佛既不知有鰲奴白牯又何曾夢

見灼然須知向上有知有底人始得且作麼生是知

有底人喫官酒臥官街當處死當處理沙場無限英

靈漢堆山積嶽露屍骸 博山來云手拓地尾連天

王老師異類中行也三世諸佛不知有掬明月於無

影樹頭鰲奴白牯却知有剪白雲於不應山谷何人

知此意除是長嘯者 愚菴孟云我要問諸人如何

是鰲奴白牯知有底事有對云黃金國土瑠璃地獅

子巖前水草香菴云你作恁麼語話銜鐵負鞍有日

在

三世諸佛不知有一一面南看北斗鰲奴白牯却知

有戴角擎頭師子吼四棱蹋地又團圓八角磨盤空

裏走擬推尋劈脊攖拈得鼻孔失却口爲問普化一

頭驢何似子湖一隻狗圓悟勳

三世諸佛不知有老老大大外邊走眼皮蓋盡五須



彌大洋海裏翻筋斗徑山泉二

鰲奴白牯却知有瀑布不溜青山走堪笑無端王老  
師錯認簸箕作炭斗

越鳥巢南枝翼馬嘶北風鰲奴并白牯寸步不曾通  
千山都坐臥萬派盡朝東天王纔合掌那吒撲帝鍾  
或菴體

波波掣掣豨豨毳毳百不可取一無所堪默默自知  
田地穩騰騰誰謂肚皮寬普周法界渾成飯鼻孔纍  
垂信飽食天童覺

野老祭江神乞兒打筋斗莫作兩般看等是揚家醜  
樸翁銘

君子道消小人道長有功者罰無功者賞拍盲禱子  
走天涯空費草鞋百千繡淑安周

二八嫦娥赤雙手反著藍衫拖地走劈頭撞翻三脚  
驢倒騎歸來變作狗夢菴律

季布祇重然諾子房不貴封侯端坐孤峰絕頂知君  
未善優游豈不見曹山不墮尊貴大瀉變作水牛天  
水廣

南泉因座主辭師問甚處去曰山下去師曰第一  
不得謗王老師曰爭敢謗和尚師乃噴嚏曰是多  
少主便出去

石霜諸云不爲人斟酌 先曹山云賴也 雲居膺  
云非師本意 長慶稜云請領話 雲居錫徵云座  
主當時出去且道是會不會

南泉山上刈茅次有僧問南泉路向什麼處去師  
拈起鎌子曰我者鎌子是三十文錢買曰我不問  
者箇南泉路向什麼處去師曰我用得最快

茅鎌三十文錢買觀面高提第一籌直下便知歸去  
路也須更上一層樓圓通仙二

撥艸瞻風探祖禪誰知艸裏有南泉分明一句無私  
語徹骨風生天地寒

恩恩禪客問南泉款段徒勞痛下鞭今日爲君重漏  
泄翻翻孤雁下遶天道場如

南泉入園次見一僧乃拋瓦礫擲之其僧回首師  
乃翹一足僧無語師便歸僧後請益曰和尚適來  
擲瓦礫打某甲豈不是警覺某甲師曰翹足又作



麼生僧無對

石霜諸因僧問南泉翹足意作麼生霜舉手云還恁麼也無

南泉因僧問和尚百年後向什麼處去師曰山下作一頭水牯牛去曰某甲隨和尚去還得也無師曰汝若隨我即須銜取一莖艸來

類中難辨要分明戴角披毛卒未醒銜取艸來方定動頭頭物物自真靈汾陽昭

行履從來異類中不知頭角與誰同若銜枝草時相見擺尾搖頭四野風佛印元

異類中行得自由拽穿鼻孔卒難收草枝銜得相逢處高臥深雲任白頭佛慧泉

南泉住菴時有一僧到師向其僧曰我上山待到齋時作飯自喫了送一分來山上少時其僧自喫了却一時打破家伙就牀臥師待不見來遂歸見僧臥師亦去一邊臥僧便起去師住後曰我往前住菴時有箇伶俐道者直至如今不見

五祖戒云也是貧兒思舊債 翠巖芝云兩箇漢前

不至村後不至店 高峯妙云南泉雖則步步蹋實

未免隨人起倒者僧縱解飽食高眠決定不知飯是米做高峯恁麼告報設有一字虛妄永墮拔舌地獄

愚菴孟云當時者僧風儀令人可愛南泉過後思君子見之晚矣彼時下山來何不掘個坑將者僧埋却豈不據款一結有僧云老漢吟菴乃與一頓棒趁出 雲菴悅云南泉雖有陷虎之機要且未盡其善

當時見他高眠枕席但呵呵大笑管取疑殺者漢

聖可王云說甚麼二十年不見道者打破鍋盪時早不見了也泉去身邊臥尋踪捕影二十年後恁麼學意在於何從前汗馬無人識祇要重論蓋代功

吹毛劍利逆水波清丈夫氣志不順人情君征塞北

我伐西秦千古萬古共樂昇平南堂靜

短袴長衫白苧巾呬呬月下急推輪洛陽路上相逢

著盡是經商買賣人盧堂愚

一把黃金鍊鐵頭引他白日鬼來偷自從去後無踪

跡入眼青山總是愁中峯本

五陵公子休誇富百禱高僧不厭貧春到江南二月

後黃鸞啼偏杏花村山夫正

南泉甌月次趙州指月問曰何時得恁麼師曰王  
老師二十年前亦恁麼來曰祇今作麼生師便歸  
方丈

天童覺云二十年前且置二十年後作麼生還知王  
老師行履處麼室內無靈牀渾家不著孝 紫梅周  
云樂平者裏也不管你二十年前二十年後正當八  
月十五夜又作麼生良久云寧可截舌不可犯諱  
劍落寒潭漫刻舟霜花浪急使人愁漁翁罷釣歸深  
鵲一隻鴛鴦落渡頭上方巖

碧天新月影沉澗水底蛟龍驚不眠頭角忽然相抵  
觸飛烟走霧滿平川古帆舟

南泉同歸宗麻谷去禮國師路次師於地畫一圓  
相曰道得卽去宗便於相中坐谷卽作女人拜師  
曰與麼則不去也宗曰是什麼心行師於是乃相  
喚便回

翠巖芝云當時若見每人與一棒且圖天下太平  
雲居錫云此來要禮國師南泉因甚麼却相喚回且

道古人意作麼生 報慈遂微云祇如南泉與麼道  
是肯底語不肯底語 五祖演云三人是慧炬三昧  
莊嚴王三昧 鸛福行云漢武求仙不得仙王喬端  
坐却昇天雖然三人中有見得國師底有見不得國  
師底 南華曷云動絃別曲還他麻谷歸宗掣鼓奪  
旗偏宜南泉老漢直得同行不同步黨理不黨親白  
雲盡處是青山行人更在青山外 天童覺云我當  
時若見便與抹却圓相不惟打破南泉窠臼亦乃教  
歸宗無著處麻谷呈伎倆不得南泉云恁麼則不  
去也果然果然 天寶樞云三大老途中與麼呈伎  
倆要見國師驢年也未得在 中峰本云南泉畫地  
爲牢歸宗墮坑落漚麻谷恭而無禮檢點將來一人  
眼空四海一人舌挂梵天一人入地獄如箭 笑巖  
寶云三人未發足前鼻孔已在國師手裏直造中途  
果見弄粥飯氣 磬山修云三大老雖同條生不同  
條死各有出身之路然三人中有一人堪爲師若揀  
得出許你具擇法眼 天井新云一人買帽相頭一  
人將錯就錯一人看樓打樓更有一人額頭汗出

由基箭射猿繞樹何太直千箇與萬箇是誰曾中的  
相喚相呼歸去來曹溪路上休登陟復云曹溪路坦  
平爲甚休登陟明覺顯

漫漫大地盈尺雪江湖一片難分別漁翁披蓑月下  
歸誰道夜行人路絕保寧勇

巧奪豪拈浪苦辛誰能於此辨疎親落花芳艸空岐  
路細雨斜風不見人晏古佛

南泉麻谷與歸宗道眼元來總不通去禮國師瞻相  
好區區祇到半途中疎山如

手攜花鼓到城根反著麻鞋過短門笑把柴頭書古  
字大家來步月黃昏月堂昌

野店齋餘聊問津作家竿木鎮隨身相逢盡道休官  
去林下何曾見一人尼無著

金鍼繡出玉鴛鴦石女擎來不覆藏剛被木人偷眼  
覷至今兩兩不成雙萬菴柔

孩兒三個抱花鼓打得南邊動北邊斗柄夜垂天欲  
曉笛聲吹散玉樓前南詢參

南泉詢座主曰你與我講經得麼主曰和尚爲某

甲說禪某甲爲和尚講經師曰不可將金彈子換  
銀彈子去

法林音代僧云不謂宗門下也是者揅扭捏鼻孔  
盤走珠兮珠走盤當機脫略好生觀世人知責不知  
價信手拈來也不難正堂辨

南泉曰王老師賣身去也還有人買麼一僧出曰

某甲買師曰不作賣不作賤你作麼生買僧無對

趙州代云明年與和尚作一領布衫 臥龍球云和

和尚某甲去也 禾山殷代云是何道理 明招謙

代拍旁僧背云好著不著去 雪竇顯云雖然作家

競買要且不解輪機且道南泉還肯麼翠峰也擬酬

個價直令南泉進且無門退亦無路良久云別處容

和尚不得 隱靜岑云某甲報恩有分 雲居莊云

鼻索在某甲手裏 笑巖寶云山僧今日斬新出箇

價直教老漢更屬人不得屬已不得待云不作賣不

作賤你作麼生買但道請和尚還歸方丈喫茶 愚

菴孟云翠峰祇可作南泉奴祇如進且無門退亦無

路還容得翠峯麼 古南門云諸老宿與麼拈提還

愜南泉意麼殊不知南泉以己方人因慈悲之故有落艸之談當時待伊恁麼問但云與麼則和尚與某甲平出也既顯自己手脚便不虛他一番法施還會麼子期去不返浩浩良可悲不知天地間知音復是誰 龍池珍云和尚三行半倩誰寫 天目律云王老師祇求要人著價殊不知婢使奴兒千古自招王老明明要賣身一時分付與旁人可憐天下爭酬

佛印 價 父易雖成契不真笑嚴實懷

南泉舖席大開張差寶希珍壓市行競買雖多酬價少至今天下錯商量豎軒還

賣身王老難爲價實賤俱非不易酬若使當時無退悔喚來分付與園頭海印信

不作責兮不作賤翻覆高低隔一線利害分明說向人伶俐補僧見不見默堂定

年老心高出入無度貪程夜行打失火炬咄劈破鬼門關悉喇悉喇嚙嚙嚙嚙夢菴律

南泉因僧問訊叉手而立師曰太俗生其僧便合掌師曰太僧生僧無對

徑山杲云合掌太僧生叉手又俗氣總不恁麼時尊體無頓處無頓處有巴鼻庵蘇嚙蘇嚙悉喇悉喇喝近來王令稍嚴不許攙行奪市 天寧琦云叉手太俗合掌太僧不僧不俗誰敢安名檢點將來也是梁生招箭且道落在者僧分上南泉分上

合掌太僧叉手又俗撒手出門山青水綠換步移身振古風木人共唱無生曲大洪遂

南北東西無不利令人深愛老南泉眉毛厮結如相似鼻孔遼天不著穿龍門遠

南泉因趙州問知有底人向什麼處去師曰山前檀越家作一頭水牯牛去曰謝師指示師曰昨夜三更月到窗

雲峯悅云若不是南泉後語泊被打破蔡州 徑山

杲云雲峯失却一隻眼殊不知祇因後語當下打破蔡州 洞山瑩云雲峯看樓打樓徑山因孔著楔若約補僧眼目敢保俱未夢見且道洞山有甚長處良久云獅子不食鵬殘俊鷹不打可兔搜脫鼻孔何處是亂拋泥水恣縱橫日斜倒坐騎驢

去又見東山片月生保寧勇

眼中見慣是尋常又不驚人又久長留得寒窗夜來

月三更依舊照茅堂鼓山珪

度體裁衣量水打確毫髮不差且居門外徑山泉

檀越家中作水牛收來放去任優游不曾犯著人苗

稼何必南泉對趙州照堂一

掣開金殿鎖撞動玉樓鐘食程未歸客徒自覓行踪

木菴永

窈窕佩香濃思君趁曉風落花羞對面轉步蹋芳叢

曉山曙

有身慵臥象牙牀轉步牽裾到畫堂覆面若無三尺

布幾乎羞殺負心郎白岩符

南泉遣書與茱萸曰理隨事變寬廓非外事得理

融寂寥非內僧還書了乃問如何是寬廓非外茱

曰問一答百也無妨曰如何是寂寥非內茱曰觀

對聲色不是好手僧又問長沙如何是寬廓非外

沙澄目視之曰如何是寂寥非內沙閉目視之僧

又問趙州如何是寬廓非外州作喫飯勢曰如何

是寂寥非內州以手作拭口勢師聞乃曰此三人  
不謬爲吾弟子

昭覺勤云南泉雖則養子之緣其奈憐兒不覺醜殊  
不知者三人一人有目無足一人有足無目一人足  
目俱無雖然如是皆可與南泉爲師爲甚如此理事  
分明

南泉因僧問父母未生前鼻孔在什麼處師曰父  
母已生了鼻孔在什麼處

國清英云去時鼻孔擦天來時腳踏實地爲什麼討  
人處分良久云不因楊得意爭見馬相如

南泉會下典座辦兩分食詣園中管顧園頭食時  
展鉢次忽有念佛鳥鳴園頭乃敲鉢一下又鳴再  
敲一下鳴旣住頭乃問典座曾麼座曰不會又敲  
一下

法林音代座云比來兩分如何又要三分豈不令他  
園頭口啞不然將食饋在鳥前看園頭又作麼生

廬山歸宗智常禪師馬祖一日對神次有講僧來

參忽見一蛇過師以錫斷之僧曰久嚮歸宗元來

是箇癡行沙門師曰你癡我癡曰如何是癡師豎起鋤頭曰如何是細師作斬蛇勢曰與麼則依而行之師曰依而行之且置甚處見我斬蛇僧無對雪峯問德山古人斬蛇意旨如何山便打峯便走山召云存衲子峯回首山云他後悟去方知老漢徹底老婆心 翠峯顯云歸宗祇解慎初不能護末德山頗能據令未明斬蛇乃云大眾看翠峯今日斬三五條以拄杖打散

大用縱橫掣電機爍迦羅眼尙膠竊迷徒夢裏爭唇吻却憶隨他去一隨海印信

千尋竿上翻筋斗大海波心擲釣鈎大體還他肌骨好不搽紅粉也風流南華曷

歸宗因李渤刺史問三乘十二分教即不問如何是祖師西來意師乃豎起拳曰會麼曰不會師曰飽學措大拳頭也不識曰某甲實不會師曰會得則途中受用不會則世諦流布

法林音云歸宗祇知他人措大不知自己措大更甚乃豎拳云者是祖師西來意會得一任途中受用世

諦流布會不得途中受用世諦流布總隔三塵在忽有箇云此是拳頭法林不妨云也祇要你者據道金山銓云刺史放憨歸宗饒舌祖師西來意總未夢見在

歸宗示衆吾今欲說禪諸子總近前來大眾近前師曰汝聽觀音行善應諸方所僧問如何是觀音行師彈指曰諸人還聞麼曰聞師曰一隊漢向者裏覓箇什麼以拄杖打趁呵呵大笑歸方丈

無學彈指超圓通耳根淨透出聞不聞妙哉觀音行棒頭指出金剛王險惡道中爲津梁 龜悟勤

歸宗與南泉同行一日告別煎茶次泉曰從前與師兄商量語句彼此已知向後忽有人問畢竟事作麼生師曰者一片田地好卓菴曰卓菴且置畢竟事作麼生師乃踢却茶鉢便起曰師兄喫茶了某甲未喫茶師曰作者箇語話滴水也消不得泉休去

五祖戒云南泉祇解作客不解作主 滄山詰云南泉逢強即弱歸宗逢弱即強三十年同行畢竟事不



通商量雖然如是猶較王老師一線道 昭覺勤云  
驚羣之句誰不聳然有般道南泉構他歸宗不著所  
以遭他呵叱殊不知行人更在青山外蔣山不惜眉  
毛爲諸人下箇注脚南泉探頭太過歸宗壁立萬仞  
且道還有出身路也無喝下須教三日壘 天童華  
云南泉貪程太急歸宗薄處先穿二老雖發明馬祖  
正眼要且極則事未夢見在何故家住東州

歸宗因小師辭乃問甚處去曰諸方學五味禪去  
師曰諸方有五味禪我這裏祇有一味禪僧問如  
何是一味禪師便打僧曰會也會也師曰道來道  
來僧纔開口師又打

黃檗運云馬大師出八十員善知識箇箇肩渡渡  
地惟有歸宗較些子 翠峯顯云以強欺弱有甚麼  
難我者裏有一味禪爲甚不學但向道收待伊拈起  
有般無眼漢祇管喫吽吽雪竇門下誰敢 昭覺勤  
云若非黃檗深辨端倪泊乎勞而無功 天井新別  
云祇因黃檗深辨端倪所以勞而無功 資福先云  
歸宗幸是好一味禪無端傷鹽傷酢却成五味了也

如今有辭去學五味禪但云善爲道路若是個漢必  
然別有生涯 天寧琦舉黃檗語畢云說什麼較些  
子直是未在我者裏祇有一味禪便與掀倒禪牀見  
之不取思之千里

五味與一味喫了須噫氣金輪峰下令行時凜凜清  
風誠可畏石岩明

私醞香醇價又輕至今官路少人行歸宗一味如連  
苦蹉過叢林幾後生長靈卓

雪裏梅花霧裏山看時容易畫時難早如不入時人  
眼多買糴敕畫牡丹雪谷未

歸宗泥壁次白舍人來師便問君子儒小人儒曰  
君子儒師乃打泥盤一下白遂過泥師接得便使  
良久曰莫使爲俊快底白侍郎否曰不敢師曰祇  
有過泥分

堂堂非是小人儒得得深雲訪隱居已與過泥殊不  
恥更何言外見親疎實業源

歸宗因僧問如何是玄旨師曰無人能會曰向者  
如何師曰有向師乖曰不向者如何師曰誰求玄



旨又曰去無汝用心處曰豈無方便門令學人得入師曰觀音妙智力能救世間苦曰如何是妙智力師敲鼎蓋三下曰還聞麼曰聞師曰我何不聞僧無語師以棒趁下

三聲鼎蓋普門開苦海勞生喚不回九十春光今又半空飛花片點莓苔絕岸翻

歸宗因僧問如何是佛師曰向你道還信否曰和尚言重安敢不信師曰祇你是曰如何保任師曰一翳在眼空花亂墜僧有省

法眼益云若無後語何處討歸宗 雪竇向祇你是處別云侍者寮喫茶去

歸宗因僧問如何是觸目菩提師翹足曰會麼曰不會師曰三箇見在一任選取

觸目菩提一撒沙示渠三箇更周遮衲僧相見呵呵笑春鳥喃喃罵落花海印信

歸宗因普請入園取菜乃畫圓相圍却一株以標插之曰輒不得動著便去少頃來見菜猶在遽以棒趁曰者一隊漢無一箇有智慧底踢倒標子拔

### 菜而歸

雲居莊云設有僧拔却者一株菜莫契得歸宗意麼拈拄杖敲香几云歸宗和尚來也靠拄杖下座

歸宗因江州刺史李渤問嘗聞彌納芥子渤則不疑芥子納須彌莫是妄談否師曰人傳史君讀萬卷書是否曰不敢師曰身如椰子大萬卷書向什麼處著李俛首而已

放開日月明把定乾坤黑一割不回頭滿地生荆棘龍宮海藏兮非多石火電光兮非急君不見紫霄峰下墨池邊八駿如風追不及佛慧泉

萬卷詩書一時頭角纔跨宗門便施謀略古歸宗真老作祇顧滿彎弓不知誰見雙鷗落絕毫絕釐如山如岳堂堂氣宇冠儒林浩浩清風播寥廓凝禪妙

宗鑑法林卷十一

宗鑑法林卷十二

集雪堂 編

大鑒下三世

杭州鹽官齊安國師馬祖一嗣一日喚侍者將犀牛扇

子來者曰破也師曰扇子既破還我犀牛兒來者無對

投子同代云不辭將出恐頭角不全雪竇顯云我要不全底頭角 石霜諸代云若還和尚即無也竇云犀牛兒猶在 保福展代云和尚年尊別請人好竇云可惜勞而無功 資福寶作一圓相於中書牛字竇云適來爲甚不將出 雪竇顯云若要清風再振頭角重生請諸禪德下一轉語乃問扇子既破還我犀牛兒來時有僧云大眾參堂去竇喝云拋鉤釣鯢鯨祇得箇蝦蟆 雲居舜云三伏當時正須扇子爲侍者不了事雖然如是鹽官太絮何不大家割捨侍者當時見他道還我犀牛兒來祇對云已颺在搥棹堆頭了也 地藏恩云從上知識各說異端作盡伎倆其奈總未知犀牛兒所在山僧見處也要諸人共

知扇子既破還我犀牛兒來別處容和尚不得 寶壽新代云幸遇某甲若是別箇一場禍事

犀牛扇子用多時間著元來總不知無限清風與頭角盡隨雲雨去難追明覺顯

扇子破索犀牛圈圖中字有來由誰知桂轂千年晚妙在通明一點秋天童覺

明月冷相照清風卒未休鹽官無限意何用覓犀牛 辨堂清

犀牛扇子用多年歷掌清機授手傳頭角不全收拾取雨餘風月滿長川 佛燈珣

犀牛扇子有來由幾度拈來幾度休荷葉亂傾珠的皜一番雨過碧溪頭 懶菴

格外提持識者稀英雄到此盡磨迷驀然一豁雙睛瞎萬象森羅發上機 碧露夢

鹽官問座主業何經論曰華嚴經師曰華嚴有幾種法界曰廣說則重重無盡略言有四種師豎拂曰者是第幾種法界主沉吟師曰思而知慮而解鬼家活計曰下孤鐙果然失照

保福展代云若禮拜即喫和尚棒 禾山殷代云某甲不煩和尚莫怪 法眼益代拊掌三下 昭覺勤云鹽官以強凌弱則且置如何道得一句恰好免得他道鬼家活計良久云劍閣雖險夜行更多 大滙泰代云向下文長付在來日 徑山杲代云兩段不同收歸上科

鹽官示衆虚空爲鼓須彌爲椎什麼人打得

南泉云王老師不打者破鼓 法眼益云王老師不打 雪竇顯云打者甚多聽者極少且問誰是解打者莫謗鹽官好南泉云王老師不打者破鼓法眼云王老師不打兩箇既不奈何一箇更是懺懺又云王老師不打還肯他諸方也無代云千年田地八百主 黃龍心云南泉法眼祇知瞻前不能顧後且如鹽官道虚空爲鼓須彌爲椎什麼處是破處還檢點得出麼直饒檢點得破處分明我更問你覓鼓在 天童華云南泉法眼大似喫李子祇向赤邊較山僧今日與鹽官相見去也虚空爲鼓須彌爲椎要打便打莫問是誰乃拈拄杖卓一下 天童傑云鹽官提水

放火南泉撥亂星飛法眼埋兵挑鬪諸尊宿各出隻手并無一人性懃祇是隨例扛鼓祥符直捷爲諸人道虚空爲鼓須彌爲椎漆桶參堂去 天寧琦云且道甚處是他破處聽年夢見麼 寶壽新代云聽能仁鑑云二尊宿節拍相隨大似桑林之舞可謂解和雖然未免隨人脚跟轉大巖今日要與鹽官相見虚空爲鼓須彌爲椎薦拈拄杖卓一下云切忌聞著南泉王老太無端却逐鹽官作樂官西祖令嚴行禁止免他禪會錯欣歡南巖勝

國師費力置面鼓猶勝塗毒萬千千解打南泉非好手至今天下勿聲冤整牛平

鹽官會下有主事忽一日見鬼使來追乃告曰某甲身充王事未暇修行乞容七日得否使曰待爲白王若許七日後來不然須與便至言訖不見至七日後復來竟覓其僧了不可得

洞山价代云被他覓得也 天童悟微云前頭鬼使因甚見後頭鬼使因甚不見 脫却爛草鞋颺下破木杓報汝鬼大王弄什麼手脚

理安問

因風吹火力無多燎倒青藤裡綠蘿烟盡灰飛忘喫  
鐵大王著甚鬼懣懣漢關喲

鹽官因僧問如何是本身廬舍那師曰與老僧過  
淨餅來僧將淨餅至師曰却安舊處著僧復問師  
曰古佛過去久矣

雲門偃別云無朕迹 雪竇顯云直得一手指天一  
手指地爭得無還會麼雲在嶺頭閒不徹 瀉山詰  
云山僧則不然忽有人問但云大眾歸堂去若人向  
大瀉門下薦得古釋迦不先新彌勒不後且轉身一  
句作麼生道明年更有新條在惱亂春風卒未休  
東禪觀云盲者難以與手文彩積者難以與手音聲  
者僧既不薦來機國師祇成虛設雲門道無朕迹扶  
國師不起雪竇云一手指天一手指地爭得無也扶  
國師不起以拂子畫一畫云前來葛藤一時畫斷且  
道畢竟如何是本身廬舍那擲拂子下座法林音云  
東禪恁麼道還扶得起國師麼 南堂欲云國師不  
得雲門泊合勞而無功總似雪竇未免白日見鬼如

今或有人問但向道一氣不言含有象萬靈何處謝  
無私

鳥之行空魚之在水江湖相忘雲天得志擬心一絲  
對面千里知恩報恩人間幾幾宏智覺

誰在玉樓相話舊一聲幽鳥最關情莫言未諳啼痕  
苦春釀花奴愁正深 天章王

居然已在蟾蜍窟丹桂婆娑顧盼中何事男兒不意  
氣空教娥鬟倚秋風 白巖符

鹽官因法空禪師到問經中諸義師一一答了却  
曰自禪師到來我總未曾作得主人曰請和尚便  
作主人師曰今日夜也且歸本位安置空下去明  
旦師令沙彌屈空到師却顧沙彌曰咄者沙彌不  
曉事教屈法空禪師屈得箇守堂人來空無語

酬酢慙慙全道義和光應物探來賓洪鈞律轉花千  
樹客情猶自不知春旁敲正打喪却全身數聲黃鳥  
青山外占斷風光作主人 達變權

空逐烟花入汴京客情步步隨人轉通身出沒老鹽  
官龍駕輿驂善舒卷滯澁禽有何限衝霄逸翮從來

鮮遠菴體

明州大梅法常禪師馬祖一嗣住山後馬祖令僧問和尚見馬祖得箇什麼便住此山師曰馬祖向我道卽心卽佛我便向者裏住曰馬祖近日又別師曰作麼生曰又道非心非佛師曰者老漢惑亂人未有了日任它非心非佛我祇卽心卽佛僧回舉似祖祖曰梅子熟也

禾山殷因僧問大梅怎麼意作麼生山云眞獅子兒天井新云卽心卽佛非心非佛牙齒無筋舌頭無骨梅子熟也是黜罰語是證明語長安今夜家家月幾處笙歌幾處愁西遞超云馬祖添箇八兩連前湊成一斤大梅已足一斤何妨佯推八兩雖然如是未識他父子鍼芥水乳在咄咄自領三十棒祇將馬祖鉛刀子裂破漫天鐵網羅碧沼夜敲荷葉雨至今貧恨一身多一關薄

荷衣松食住深雲蓋是當年錯見人埋沒一生心卽佛萬年千載不成塵瑩雲南

卽心葉薄妾冰清卽說黃金妾不應假使偶然通一

笑半生誰信守孤燈寶翁敬

多謝尊前窈窕娘好將幽夢惱襄王禪心已作沾泥絮不逐東風上下狂五祖蕪

大梅因龐居士問久嚮大梅未審梅子熟也未師曰熟也你向甚處下口曰百雜碎師伸手曰還我核子來士無語

翠巖芝云此二人大似把手上高山又云二人前不至村後不迭店寶峰文云且道二人相見還有優劣也無大梅幟代龐公云嚼破裏頭仁用核作麼復呵呵笑云怎麼道也是臘月扇子國清英云二大老本是同根生相煎何太急

大梅梅子熟龐老已先知正眼驗眞妄相逢拍手歸松源岳

龐公親到豎降旗一劍當頭斬萬機不是從前生敵破爲他梅子熟多時辛菴

大梅因夾山與定山同行定曰生死中無佛卽無生死夾曰生死中有佛卽不迷生死二人互相不肖同上大梅夾乃問不知那箇親那箇疎師曰一

親一疎夾曰未審那箇親師曰且去明日來次日  
上方丈夾再問師曰親者不問問者不親夾山住  
院後曰當時在大梅失却一隻眼

雲峰悅云夾山祇知失却一隻眼殊不知換得一隻  
眼 翠峰顯云夾山畢竟不知換得一隻眼大梅當  
時聞學以棒一時打出豈止劃斷兩人葛藤亦乃爲  
天下宗匠 昭覺勤云生死爲諸佛根基諸佛乃生  
死爐韞若解險絕承當卽證六通八解 雪竇雲云  
祇如失却一隻眼換得一隻眼同別在甚麼處若檢  
點得出許你具一隻眼不然更爲下箇註脚失却一  
隻換一隻今朝却是四月一一年三百六十日每日  
盪盪兩度溼參 古南門云翠峰醉後添杯不知大  
梅牙如劍樹二老葛藤早已劃斷夾山失却一隻眼  
過後方知那一隻眼向甚處去也古南確實評量有  
佛無佛死生生死一翳在眼空花亂墜  
未曾拈出定盤星多少行家怨不平待得權衡來就  
手方知斤兩自分明心聞貴  
同行自古不相冒峰頂老人何足論山凹落盡桃花

片流水依前遶竹門懶菴

竹籬茅舍酒旗斜一箇葫蘆敗兩家酒後不知天與  
地歸來滿地是桃花雪菴

苦瓜連根苦甜瓜徹蒂甜兩般滋味惡終後入黃泉  
應菴

佛之一字強安排有無生死一坑埋大梅老子舌無  
骨臘月蓮花火裏栽雲巢

青天白日切忌尋覓更問如何抱贓叫屈無門開

大梅因僧問如何是西來意師曰西來無意

鹽官安閑云一箇棺材兩箇死漢 玄沙備云鹽官  
是作家 雪竇顯云三箇也有 黃龍新云三箇也  
有是死漢是活漢 昭覺勤云一串穿却

活中死眼無作有用方寸不移十方獨弄巧拙不到  
處鹽官有出身親言出親口雞犬關比鄰月堂昌二  
因事長智認渠遺累翻身曉行全家富貴競頭擡薦  
自埋沒逆順是非誰可出提起是令放得行兩手扶  
犁水過膝

大梅一日示徒曰來莫可抑往莫可追從容聞廳



鼠聲乃曰卽此物非它物汝善護持吾當逝矣

雪竇顯云者漢生前莽鹵死後顛預卽此物非他物是何物還有分付處也無有般漢不解截斷大梅脚跟祇管道食程太速 寶峰文云旣非他物是什麼物 地藏恩云是什麼語話 興善廣云者漢臨殂猶口中水漉漉底卽此物非他物顛預不少咄

師初得道卽心是佛最後示徒物非他物窮萬法源徹千聖骨真化不移何妨出沒永明禪

婺州五洩山靈默禪師

馬祖一嗣

初謁石頭便問一言

相契卽住不契卽去頭據座師便行頭召闍黎師回首頭曰從生至死祇是者箇回頭轉腦作麼師大悟乃拗折拄杖棲止焉

洞山价云當時若不是五洩先師大難承當然雖如此猶涉程途 長慶云險 玄覺云那箇是涉在途處有僧云爲伊三寸途中薦得所以在途覺云爲復薦得自已爲復薦得三寸若是自已爲什麼成三寸若是三寸爲甚麼悟去且道洞山意作麼生 翠巖芝云石頭據座五洩回首石頭召他却成多事 雲

峰悅云大小石頭坐不定把不住似者擔板漢放去便休又喚回被他糊塗一上道我向者裏有箇悟處驢年夢見 滙山行云五洩當時便去可謂坐斷天下人舌頭旣被喚回已是糊塗不少拗折拄杖也是賊過張弓祇如石頭據座意作麼生 地藏恩云祇合與麼去不合與麼來

在途在舍若爲酬莫把先師一例求雄雄氣字如王者未免半邊無髑髏龍門遠

欲去高聲喚得回當時心眼一齊開要知不假修持力生死悠悠任往來成枯木

幽州盤山寶積禪師

馬祖一嗣

初參馬祖作街坊一日

出門見人昇喪歌郎振鈴曰紅輪決定沈西去未委靈魂往那方孝子哭哀哀師忽省悟

雲居莊云大小盤山祇認得箇昭昭靈靈者裏若有者般人必然別有生涯且道是什麼生涯鴛鴦繡出從君看不把金鍼度與人

哀哀相應便承當畢竟魂靈往那方踴躍自然全體露始知徧界不曾藏海印信

未審靈魂往那方無棲泊處露堂堂水向石邊流出

冷風從花裏過來香月林觀

忽聞幕下哭哀哀頓使天台對五臺風月一天今古

在通身是口也難開誰菴演

薤歌聲咽些聲長聽得哀哀忽斷腸依舊紅輪西畔

沒大千無地著淒涼天目禮

薤露淒涼亦可憐白楊丹旆去翩翩哀聲裏無消

息打著南邊動北邊北礪簡

盤山一日於街市見人買肉曰精底割一塊來屠

兒放下刀叉手曰長史那塊不是精底師大悟歸

舉似祖祖印可之

箇事分明不覆藏頭頭物物自相當千言萬語無人

會又逐流鶯過短牆南華曷

江邊送客上扁舟相對漁翁暗擲鉤一掣錦鱗隨手

上遠山疊疊水悠悠妙峰善

半畝荒塘一鑑開天光雲影共徘徊啼鶯喚醒佳人

夢故友親從邗上來拳石沃

盤山曰若言卽心卽佛今時未入玄微若言非心

非佛猶是指蹤極則

天童覺云有錢不解使解使又無錢作麼生得十成

去娶他年少婦須是白頭兒報恩秀云今時路頭

不得全體非心非佛有缺神用欲得十成去除是三

冬向火六月賣冰始得所以道娶他年少婦須是白

頭兒然則調和琴瑟一句作麼生道長翁短婆婆遞

互厮折磨

盤山曰三界無法何處求心四大本空佛依何住

磻磯不動寂爾無言覲面相呈更無餘事珍重

三界無法何處求心白雲爲蓋流水作琴一曲兩曲

無人會雨過夜塘秋水深翠峰顯

青青入座當軒竹黯黯遮門對面山更有一般堪羨

處夜深流水響潺潺佛鑑勸

三界無法何處求心山容雨過松韻風吟橫眠倒臥

無餘事一任莓苔滿地侵佛性泰

山舍無塵分外清石榴花發透簾明槐陰滿地日卓

午夢覺流鶯時一聲掩室開

依依楊柳欲藏鴉社後東風卷落花理策邀朋何處

好山南山北看桑麻愚谷園

江上漁翁把釣垂生涯隨處不須歸夜深月下饒清

夢風壓輕雲貼水飛雲幾喜

盤山示衆心月孤圓光吞萬象光非照境境亦非

存光境俱忘復是何物

洞山价云光境未忘復是何物 雲門偃云直饒恁

麼猶是半途未是透脫一路良久云天台華頂 徑

山杲云白鷺下田千點雪黃鸝上樹一枝花 清化

隱喝一喝云字經三寫烏焉成馬 東明鑑舉光境

俱忘復是何物喝一喝云是什麼光境未忘復是何

物乃舉拂云喚者箇作什麼復喝一喝

光非照境境非存光境俱忘復是痕百鳥不來春已

老落花流水遶孤村肯堂充

描不成兮畫不成臥龍長怖碧潭清擬心湊泊終難

會達者應須暗裏驚松源岳

玉露暗飄無影樹金風微動夜明簾木人鞭起泥牛

吼不許蒼龍臥碧潭笑隱祈

盤山曰諸禪德譬如擲劍揮空莫論及之不及斯

乃空輪無迹劍刃無虧若能如是心心無知全心  
卽佛全佛卽人人佛無異始爲道矣

徑山杲於心心無知下云咄我王庫內無如是刀

愚菴孟云若論本色衲子實無如是刀若論本色衲

子實有如是刀一僧旁哂云不見盤山道學者勞形

如猿捉影孟云咄情知你坐在鬼窟裏

盤山曰可中學道似地擎山不知山之孤峻如石

含玉不知玉之無瑕若如此者是名出家

雪竇顯云晝行三千夜行八百是我尋常用底且拈

放一邊汝諸人向什麼處見盤山 徑山杲云若能

如是捏目生花 翠巖詰云要見盤山則易要見徑

山則難 靈巖儲云開眼也著閉眼也著甚處不是

盤山良久喝一喝云瞌睡漢醒也未

山旣孤峻遊人罕至玉旣無瑕莫辨真僞黃龍祈

山忘孤峻玉無瑕到處仙源是我家堪笑葛洪曾未

悟遠從句漏問丹砂天目禮

盤山曰向上一路千聖不傳

慈明圓云向上一路千聖不然 瑯琊覺云上來講

讚無限良因 楊岐會云口上著 徑山杲云向上  
一路熱盤鳴聲 天童傑云向上一路掘地覓天  
薦福環云向上一路千聖不傳深諦律尼娑婆訶向  
上一路千聖不然蘇嚕悉喇娑婆訶諸人與麼領會  
歌羅歌羅 天寧琦云諸大老盡力道祇發明得向  
下一路若是向上一路驢年夢見麼 平陽忞云盤  
山道向上一路千聖不傳抱贓叫屈作麼慈明道向  
上一路千聖不然且莫詐明頭徑山云向上一路熱  
盤鳴聲合眼跳黃河千巖道向上一路在你脚底接  
竹點青天先老人道向上一路蹋破草鞋糊獼倒上  
樹者五箇漢被山僧一時領過了也畢竟作麼生是  
向上一路拈拄杖起身云歸堂喫茶 開先金云向  
上一路良久云屋漏看星眠 天井新云向上一路  
墮坑落壑夜夢不祥書在壁上 廣教玉云向上一  
路三生六十劫 法林音云向上一路咄  
盤山向上路何言罕見行人耳有穿口上著來無較  
處方知千聖不能傳白雲端  
不傳不然海口難宣須彌頂上駕起鐵船徑山杲

千聖不傳到今日口上著來無等匹洞庭山脚太湖  
心行人路上空啾唧松源岳

盤山將順世告衆曰有人描得吾真麼衆將所寫  
眞呈皆不契普化出曰某甲描得師曰何不呈似  
老僧化乃打筋斗而出師曰者漢向後掣風狂去  
在

保福展云普化掣頭不少盤山醜拙更多 長蘆了  
撼身云快活殺我也若無繫破乾坤底眼怎見吾金  
璞玉復云山僧依普化樣子摹得一本今夜展開要  
使大衆瞻仰遂打一筋斗歸堂 棲霞成云若是臨  
濟大師三十棒一棒也少不得賴過盤山放過且道  
者棒落在什麼處你若道更好劈脊我也知你瞎棒  
亂做 國清英云咄一人傳虛萬人傳實  
師真醜拙不堪呈用盡身心笑殺人彼中莫覓絲頭  
意白鼻崐崙賀新正龍門遠  
徹底冰壺無影象倒翻筋斗摹難成千峰雨歇黃梅  
後桂魄還從海上生雪菴瑾  
清奇古怪孃生面妙筆丹青作麼施者斯十分傳得

似依然畫虎祇成狸寶葉源

蒲州麻谷寶徹禪師馬祖一嗣到臨濟問大悲千手眼

那箇是正眼濟曰大悲千手眼那箇是正眼速道  
速道師近前曳濟下禪牀却坐濟近前曰不審師  
擬議濟便喝曳師下牀却坐師便出去

因聖穎云禪德此二尊宿如此意作麼生令人盡道  
照用照什麼盪一切人祇解自騎馬去捉賊自持刀  
去殺賊二人偏能奪賊馬捉賊奪賊刀殺賊雖然如  
是臨濟得便宜却是失便宜 仰山欽云二老恁麼  
激揚雖則百千手眼一時俱露又怎免得二俱瞎漢  
且道還有檢點得出麼瞎 天寧琦云二老主賓互  
換縱奪可觀如猛焰燒空忽雷震地相似雖然與他  
大悲千手眼有何交涉祇見波濤湧不見海龍宮  
多年塞上祇聞名今日陣前親見面正馬單槍戰數  
場好是見機開一箭保寧勇

相逢狹路轉身難一陣交鋒瞬息間旗鼓縱橫渾莫  
辨試問何人得勝還普融平

賊隊相逢午夜時擡旗奪鼓討便宜驚然天曉重相

見滿面羞慚各自歸別山智

倒駕檣帆弄海風掀翻地軸逞英雄扶開領下驪珠  
色一鉢收歸兩毒龍理安問

醉酣楊柳樓頭月歌盡桃花扇底風交錯觥籌無限  
意相看銘酌總顏紅芥隱現

麻谷與南泉二三人去謁徑山路逢一婆乃問徑  
山路向甚處去婆曰驚直去師曰前頭水深過得  
不婆曰不溼問又問上岸稻得與麼好下岸稻得  
與麼佳婆曰線被螞蟥喫却也師曰禾好香婆曰  
沒氣息又問婆住甚處婆曰祇在者裏三人至店  
婆煎茶一瓶攜盞二隻至謂和尚有神通者即喫  
茶三人相顧問婆曰看老朽自逞神通去也於是  
傾茶便行

承天怡云婆子如驍騎臨陣爭奈探頭太過麻谷三  
人似老將巡邊把定有餘檢點將來猶欠一著

陝路相逢不等閒旗槍倒卓話翩翩及乎話到中原  
事汝陟高崗我涉川磬山鼎

麻谷持錫到章敬繞禪牀三匝振錫一下卓然而

立敬曰是是又到南泉亦如是泉曰是不是師  
曰章敬道是和尙爲甚道不是泉曰章敬卽是是  
汝不是此是風力所轉終成敗壞

長慶稜代谷於是處云和尙佛法身心何在又代  
谷於章敬卽是是汝不是處云是什麼心行 保福  
展別云但振錫一下而出又云章敬南泉可謂一是  
一非又云麻谷依稀似曲纔堪聽又被風吹別調中  
雲居錫云章敬未必道是南泉未必道不是又云  
麻谷當初但持錫出去恰好 雪竇顯代兩處俱云  
錯 漚山詰云章敬道是落在麻谷穀中南泉道不  
是亦落在麻谷穀中今日忽有人恁麼來但云未到  
者裏好與三十棒 泐潭清云章敬道是也好與三  
十拄杖南泉道不是也好與三十拄杖何故是與不  
是全彰妙義章敬南泉一場失利 勝默光云是無  
可是非無真非是非無主萬善同歸梟鷄晝夜徒自  
支離我無三寸鼈得喚龜迦葉不肯一任攢眉 天  
寧琦云苦瓜連根苦甜瓜徹蒂甜  
此錯彼錯切忌拈却四海浪平百川潮落古策風高

十二門門門有路空蕭索非蕭索作者好求無病藥  
翠澤顯

章敬道是南泉非逆水之波透出誰可憐箇漢皮無  
血罵與青龍不解騎南堂靜

是是放出南山眞鼈鼻是不是勒回千里追風驥  
終成敗壞可憐生塞斷咽喉無出氣無出氣有巴鼻  
趙州東壁挂葫蘆堪笑維摩談不二窮谷連

妙轉之機掣電飛目前生殺盡交馳明珠自有明珠  
價休向籬邊彈雀兒不菴永

麻谷一日使厨次僧問風性常住無處不周和尙  
爲甚却搖扇師曰你祇知風性常住且不知無處  
不周曰如何是無處不周師却搖扇僧作禮師曰  
無用處師僧著得一千箇有什麼益

昭覺勤云者僧一期可觀可惜有頭無尾若不是麻  
谷作家泊合放過且道那裏是落節處撥開向上竅  
能有幾人知 漚山果云者僧祇知腦門著地不覺  
當面錯過當時若據令而行何處更討麻谷  
麻谷一日紙帳內坐以手巾蓋頭披雲入見便作



哭聲良久出去法堂繞禪牀一匝却入撥開帳見  
師去却手巾而坐乃曰死中得活萬中無一師便  
下牀就位作拙坐具勢雲近前把住曰前死後活  
你還甘麼師曰甘卽甘阿師堪作甚麼雲推開曰  
知道你前言不副後語

昭覺勤云入寺看額見表知裏披雲慣作高賓拈尾  
作頭拈頭作尾麻谷孟嘗門下看他酬對不道他不  
知有祇爲用意太深當時待伊道死中得活萬中無  
一但云蒼天蒼天何故得人一牛還人一馬

九十笑他先百步何如騎馬勝騎牛不須重較多和  
少歸到家山卽便休虛堂愚

乍云乍雨孟春寒疊亂青山不一看坐久無聊不堪  
甚悶人天氣失人歡西烟傳

麻谷問僧甚處來曰不審師又問甚處來僧珍重  
師下禪牀擒住曰者箇師僧問著便作佛法抵對  
僧曰大似無眠師放手曰放汝命通汝氣僧作禮  
師欲扭住僧拂袖便行師曰休將三歲竹擬比萬  
年松

磬山鼎云麻谷擬將斷貫穿者僧鼻孔殊不知自己  
鼻頭却被牽上曳下復頌

山川桃李笑成蹊一抹烟雲樹樹齊看徧春來花事  
好鷓鴣深入亂蜂曉

虔州西堂智藏禪師馬祖一嗣僧問有問有答賓主歷

然無問無答時如何師曰怕爛却那

後有僧舉似百丈丈云一合相不可得長慶稜別

云人人盡道休官去林下何曾見一人雪竇顯云

何不與本分草料昭覺勤別云收得安南又憂塞

北南堂欲云諸老與麼答話可使千古流芳若要

塞斷衲僧咽喉猶未在今有人恁麼問但云冬至寒

食一百五上元定是正月半洞山瑩別云心不負

人面無慚色

終日論文不記年禪心淡薄契幽玄白雲繚繞青山

在一法無私萬古傳大溈智

陰雲四望失孤邨洞口秦人鎮掩門無數桃花流不

盡溪邊猶有舊斑痕法林音

西堂因李翱尚書嘗問僧馬大師有甚言教僧曰

或說卽心卽佛或說非心非佛翽曰總過者邊一  
日間師馬大師有甚言教師呼尙書翽應諾師曰  
鼓角動也

如菴彰云盡道李翽勘驗者僧殊不知在者僧面前  
敗闕一上又向西堂處討巴鼻却被一拶直得轉身  
無路還有爲他轉身者麼僧纔出菴遽云不是弄潮  
手休入洪波裏

西堂普請次乃曰因果歷然怎奈何怎奈何時有  
僧出以手拓地師曰作甚麼曰相救相教師曰大  
衆者箇師僧猶較些子僧拂袖便走師曰獅子身  
中蟲自食獅子肉

昭覺勤云西堂洞明綱要始終正令全提者僧異類  
中行其奈龍頭蛇尾敢問大衆因果歷然一句作麼  
生道是則龍女頓成佛非則善星遭陷墜

燕趙悲歌士相逢劇孟家寸心言不盡前路日將斜

平陽恣

月皎波澄際雲消雨霽時一江紅葉亂無地寄相思

顯吉祥

西堂曾燒殺一僧一日現身索命師曰你還死也  
無對曰死也師曰你既死覓命者是誰便乃不見  
形

幻有傳徵云者僧現身索命是真要命是不真要命  
西堂恁麼語是果還伊命是不還伊命

曾經鏖戰苦不負聖恩心忽聽綸音下山川艸木吟  
馨山鼎

南嶽西園墨藏禪師馬祖一嗣一日自燒浴僧問和尚  
何不使沙彌童行師乃撫掌三下

曹山寂云一等是拍手撫掌就中西園奇怪俱抵一  
指頭禪蓋爲承當處不諦當僧却問西園撫掌豈不  
是奴兒婢子邊事山云是云向上還有事也無山云  
有云如何是向上事山叱云者奴兒婢子 天童覺  
云識尊卑知貴賤西園是作家分玉石辨金鍮曹山  
不出世者僧雖解切磋琢磨也祇向奴兒婢子邊著  
倒還知麼放曠淋漓兩不傷猶是夜明簾外客  
尋得桃源好避秦桃紅又見一年春花飛已是隨流  
水引得漁郎來問津 三宜孟 宗鑑法林卷十二

宗鑑法林卷十三

集雲堂 編

大鑒下三世

潭州東寺如會禪師馬祖一嗣嘗患門徒以卽心卽佛

之談誦憶不已且謂佛於何住而曰卽心心如畫

師而曰卽佛遂示衆曰心不是佛智不是道劍去

久矣汝方刻舟

心不是佛智不是道青山白雲落花芳艸若是伶俐

阿師終不回頭轉腦鼓山珙

雨散雲收後崔嵬數十峰倚闌頻顧望回首與誰同

徑山杲

太平時節歲豐登旅不齎糧尸不局官路無人夜無

月唱歌歸去恰三更開善謙

昨日因過竹院西隣家稚子隔溪啼山寒水肅半黃

落無數歸鴉卜樹棲虛堂愚

天晴日頭出雨下地上溼盡情都說了祇恐信不及

無門開

心不是佛智不是道舉得十分未敢相保攜條拄杖

閒行切忌回頭轉腦照堂一

禪和包小娘腰老虎毛將軍刀更有江流上一條紙

畫橋漢關

東寺因崔相國入殿見雀拋糞於佛頂上乃問一

切衆生皆有佛性爲甚却拋糞於佛頭上師曰它

終不向鷄子頭上拋

法燈欽代云怕佛 金山銓云面赤不如語直 磬

山鼎云崔相好一杓可惜放過待道終不向鷄子頭

上拋遂與一搨使東寺也知些臭氣好

東寺問仰山甚處人山曰廣南人師曰我聞廣南

有鎮海明珠是否曰是師曰此珠如何曰黑月卽

隱白月卽現師曰將得來否曰將得來師曰何不

呈似老僧曰某甲昨到瀉山被索此珠直得無言

可對無理可伸師曰眞獅子兒善能哮吼

佛鑑懃云東寺祇索一顆仰山傾出一栲栳 天寧

琦云仰山雖是個獅子兒怎奈把鎮海明珠作豌豆

賣却千古之下遭人檢點今日黨理不黨親便是東

寺到來須勘過了打 洞山瑩云可惜東寺被他

珠光一燦直得龍頭蛇尾當時何不喚侍者快將糞箕掃帶來

善舞太阿鋒決無傷手厄慣編猛虎鬚必有全身策鎮海珠巧呈似離色離聲離名字旃檀林裏蕙旃檀獅子窟中吼獅子圓悟勤

無言可對口纔開已是和光吐出來東寺不知何意志深深一丈掘坑埋雲衲慶

東寺因仰山機緣相見了却入客位復具威儀再上人事師纔見乃曰已相見了也山曰與麼相見莫不當否師便歸方丈閉却門山歸舉似瀉山瀉曰寂子是什麼心行山曰若不與麼怎識得伊保福展云仰山大似蚊子上鐵牛 承天宗云仰山識得東寺強說道理即得相見即不可直使瀉山親來也未能得與東寺相見在

袁州南源道明禪師馬祖一嗣上堂快馬一鞭快人一

言有事何不出頭來無事各宜珍重僧問如何是一言師乃吐舌曰待我有廣長舌相即向汝道黃鳥聲乾綠柳陰長門猶說不逢春玉簫吹處花空

落翠輦過時月已淪違菴體

南源因洞山來參纔上法堂師曰已相見了也洞便下去至明日却上問昨日已蒙和尚慈悲不知甚處是與某甲相見處師曰心心無間斷流入於性海曰泊合放過遂辭去師曰多學佛法廣作利益曰多學佛法即不問如何是廣作利益師曰一物莫違即是

知有前期在難分此夜中母將故人酒不及石尤風

彌菴怡

越州大珠慧海禪師馬祖一嗣僧問如何是佛師曰清談對面非佛而誰

法眼云是即沒交涉

偃蹇蒼髯十萬本參差翠玉數千竿風敲月戶三秋冷雨打茅堂六月寒石溪月

大珠曰身口意清淨是名佛出世身口意不淨是名佛滅度

黃龍南云也好箇消息古人一期方便與你諸人討箇入路既得箇入路又須得箇出路登山須到頂入

海須到底不到頂不知宇宙之寬廣不到底不知滄海之淺深既知寬廣又知淺深乃頌

一踢踢翻四大海一擲擲倒須彌山撒手到家人不識鵲噪鴉鳴拍樹間

大珠問座主蘊何經論曰講金剛經師曰若言如來有所說則爲謗佛若言不是佛說又是謗經除此之外試與老僧說看

法林音代云和尚幸是大人

百非四句都拈了敢問云何會此經却是虛空能講得熾然常說有誰聽本覺一

洪州百丈惟政禪師

馬祖一嗣

老宿見日影透牕乃問

牕就日日就牕師曰長老房中有客歸去好

牕就日兮日就牕前塵不了費商量房中有客還歸

去歸到無歸始見常侶嚴荷

惟政問南泉諸方善知識還有不說似人底法也

無泉曰有師曰作麼生是日不是心不是佛不是

物師曰恁麼卽說似人了也曰某甲卽與麼和尚作麼生師曰我又不是善知識怎知有說不說底

法曰某甲不會請和尚說師曰我太煞爲汝說了

也或作涅槃

鴻山詰云百丈祇知瞻前不知顧後當時待伊道某甲不會但云老僧亦不會百丈若下得此一語非惟與南泉爲宗匠亦乃與天下人爲宗匠天奇瑞云者兩箇漢拈頭失尾拈尾失頭既有不說底法還許你賓主問答也無饒你檢點得出進退無門更誇精細轉見不堪諸人到此作麼生請歸堂珍重

涅槃老子願風吹囉哩哩囉爭得知隔嶺幾多人錯聽一時喚作鷓鴣詞白雲端

不會誰不會相逢且喫茶不尋雲水路爭得到僧家

長靈卓

鷓鴣續斷絃泥血化驢乳從來不爲人今古參佛祖

箭旣離絃無返回將欲奪之必固與語時默默時語

人從陳州來却往許州去圓悟勸

倒腹傾腸說向君不知何故尚沉吟而今便好猛提

取付與世間無事人徑山泉

一個拽來還拽去一人牽去又牽來深山一段無根

樹直至如今鋸不開千歲長

惟政因入京路逢官人喫飯忽見驢鳴官人召曰  
頭陀師舉頭官人却指驢師却指官人

保福展云惟政因齋慶讚 法眼別云但作驢鳴

支提愛云一家有事百家忙

京兆章敬懷惲禪師馬祖一嗣因百丈遣僧來囑曰待

伊陞堂次乃展坐具禮拜了將伊一隻鞵以袖拂  
却上座倒覆向下其僧至一如丈教師乃曰老僧  
罪過

黃龍新云百丈逞盡神通不消章敬道箇老僧罪過

鼓山珪云黃龍孟八郎猶欠一著在祇知百丈逞  
神通殊不知百丈伎倆俱盡祇知章敬道箇老僧罪  
過不知章敬一款便招會麼蛇吞蝦蟆猶自可更有  
蜈蚣在後頭

章敬因僧問心法雙忘指歸何所師曰郢人無汚  
徒勞運斤曰請師不返之言師曰即無返句

洞山云道即甚易罕遇作家 魯菴遠云語不知邪  
正邪正足以障語言不知賓主賓主足以害言章敬

知即知其如障語害言何

洪州泐潭法會禪師馬祖一嗣問馬祖如何是祖師西

來意祖曰低聲近前來師近前祖打一擗曰六耳

不同謀來日來師至來日獨入法堂曰請和尚道

祖曰且去待老僧上堂時出來與汝證盟師乃悟

曰謝大眾證明繞法堂一匝便去

黃龍南云在古人尙六耳不同謀那堪今日三二百

衆浩浩地商量禍事福事 昭覺勤云南老不妨因

風吹火未免隨語生解若有問道林西來意但云水

長船高泥多佛大

雞聲茅店月華明客夢沉迷尙未醒開得眼來天大

曉鬢頭垢面便奔程絕象鑒

十八佳人嫁未酬每憑媒妁善搜求一從嫁却潘郎

後便解人前不識羞竹屋簷

六月炎天雪滿巔那知身到清涼山文殊舉手金剛

窟收取玻璃盞子還鑿山脩

池州杉山智堅禪師馬祖一嗣因普請擇廠次南泉拈

起一莖曰者箇大好供養師曰非惟者箇百味珍



饒它亦不顧泉曰雖然如是箇箇須嘗過始得

報慈遂徵云且道是相見語不是相見語 翠巖芝

徵云祇如杉山與麼道還免得無過麼若免得未具  
眼在免不得又違前話

杉山喫飯次南泉收生飯曰生吟師曰無生泉曰

猶是末纔行數步師召曰長老泉回顧曰作麼師  
曰莫道是末

神鼎揆云衲僧家粥足飯足便休黏牙搭齒堪作甚  
麼兩箇漢各與二十拄杖與麼判斷還有過麼檢點  
得出亦領三十拄杖

古老巡堂親掠生渡水行舟不易耕莫道無生猶是  
末纖毫不了亂縱橫智門祚

生前一曲賴同條別管清音調自高一夜西風吹不  
散梅花奏落徹雲霄神鼎揆

杉山一日與歸宗南泉路次逢虎各從邊過了泉

問歸宗適來見虎似箇甚麼宗曰似箇貓兒復問  
師師曰似箇狗子師却問泉泉曰似箇大蟲

大滙智云三個老漢聚頭寐語若要徹一時參取者

大蟲始得復頌

一虎三人見不同高低各自立宗風爲伊途路不得  
力空過浮生一夢中

一物兩也也大奇三人那箇可爲師頂門未具金剛  
眼透出縱橫孰辨伊開先瑛

五五二十五大蟲元是虎狗子與貓兒豈可同時語  
夜閉門早關戶須信利牙爪可怖家家門首透長安  
盡是學子朝天路佛鑑勸

筠州逍遙禪師馬祖一嗣因鹿西和尚曰念念攀緣心

心永寂師曰昨日亦有人恁麼道曰道什麼師曰  
不知曰請和尚道師以拂子蘸口打西拂袖便出  
師召衆曰大衆直是頂門上著眼也鑑它不破

蔣山勲云老僧雖頂門無眼也驗得他骨出何以見  
得古墓毒蛇頭戴角南山猛虎尾吒呀

撫州石鞏慧藏禪師馬祖一嗣昔爲獵人因趁鹿遇馬

祖乃問見鹿過否祖曰汝是何人曰獵人祖曰汝  
解射麼曰解射祖曰一箭射幾箇曰射一箇祖曰  
汝不解射曰和尚解射否祖曰解射曰一箭射幾

箇祖曰射一羣曰彼此生命何得射他一羣祖曰汝既知如是不自射曰若教某甲自射直是無下手處祖曰者漢曠劫無明煩惱今日頓息師遂擲下弓箭投祖出家

清涼欽云且作麼生是一箭射一羣底道理直是三  
千大千世界生命也不消一箭 雪竇顯云馬師一  
箭一羣信彩射得有甚用處不如石鞏一箭一箇却  
是好手翠峰今日效古人之作擬放一箭高聲喝云  
看箭又云中也 翠巖芝云馬祖一箭一羣猶未善  
在山僧一箭射蠱動含靈無不中者雖然如是祇道  
得一半更有一半留與諸上座道

石鞏因僧問生死到來如何回避師曰者底無生  
死

圓悟勤云還識者底麼俊鶻沖霄去惜鳥泊籬頭  
鐵機信云大小石鞏只顧食程不顧失脚

幽蘭春谷襲人衣香徑離披樵客歸欲執斧柯重伐  
柯年殘枝葉逐雲飛 磬山鼎

石鞏凡見僧以弓架箭示之一日三平至師曰看

箭平乃撥開臂曰此是殺人箭活人箭又作麼生  
師乃扣弓弦三下平乃作禮師曰三十年張弓架  
箭祇射得半箇聖人遂拗折弓箭平後舉似大顯  
顯曰既是活人箭爲什麼向弓弦上辨平無對顯  
曰三十年後要學此話也難

雲門問長慶作麼生免得他道半個聖人慶云若不  
還價怎辨真僞門云人水見長人 首山念云人人  
盡道三平中的莫屈他也無良久云機關不是韓光  
作莫把智襟當等閒 雪竇顯云要先拗折不難怎  
奈三平中的了然則老宿要活三平且未免張弓架  
箭 支提愛云射虎不真徒勞沒羽 高峰妙云石  
鞏張弓旁若無人三平承箭弄巧成拙然雖如是半  
箇聖人又作麼生落花有意隨流水流水無心戀落  
花 中峰本云穿百步楊透九重鼓固是眼親手便  
其如半箇聖人有隱身之術石鞏之技窮矣 鼓山  
賢云拔臂當箭宛有大人之作然祇認得殺人箭再  
問活人箭錯過多少時也鞏爲作死馬醫雖然救得  
也祇是半箇了也 法林音云又道一箭射一箇

三十年來事一弓一弓擬定囊中寧知半聖雖投款納壁牽羊信不通正覺逸

張弓架箭豈徒然中的雖多命不全半聖投機無別意功高何必畫凌烟佛慧泉

張弓架箭三十年射得三平半不全爭似萬人齊指處斜陽一雁落秋天佛國白

解壁當宵箭因何祇半人爲從途路曉所以不全身

靈巖安

認得斑斑急上弦吼風一鏃去驚天近前仔細來觀觀誰把藍田石射穿心間貴

石鞏問西堂藏你還解捉虛空麼曰捉得師曰作

麼生捉堂以手撮虛空一下師曰你不解捉堂却

問師兄作麼生捉師把堂鼻孔曳堂作忍痛聲曰

大煞曳人鼻孔直欲脫去師曰直須恁麼捉虛空

始得

寶壽方云我若作西堂待道還捉得虛空麼亦云捉

得云作麼生捉直把石鞏一脚踢倒白巖符云旋

乾轉坤不無石鞏當時被西堂近前劈面便掌又作

麼生

朗州中邑洪恩禪師馬祖每見僧拍手鼓唇曰鳴

哪鳴哪仰山至從東過西從西過東復向中心立

師曰什麼處得此三昧山曰於曹溪脫印子上學

來師曰接什麼人曰接一宿覺乃問和尚甚處得

此三昧師曰我於馬大師處學來

瑯琊覺云愁人莫向愁人說法林音云笑殺旁觀

曹溪脫印傳來錯章敬師承受處處盡將謂胡鬚天下

赤元來更有赤鬚胡正覺逸

仰山善問中邑善應覆去翻來拍拍是令慈愛深

中邑因仰山問如何得見性去師曰譬如一室有

六牕內有一獼猴外有一獼猴從東邊喚猩猩獼

猴即應如是六牕俱喚俱應山禮拜曰適來蒙和

尚警噉無不了知更有一事祇如內獼猴瞌睡外

獼猴欲相見時如何師下禪牀捉山手作舞曰猩

猩我與汝相見了也

信相顯云諸人要見二老麼我也與你說箇警噉中

邑大似箇金師仰山將塊金來使金師酬價金師亦

盡價相酬臨成交易賣金底更與賄秤金師雖然暗  
喜心中未免偷疑何故若非細作定是賊賊 雲居  
錫云中邑當時若不得仰山者一句語何處有中邑  
也 崇壽稠云還有人定得此道理麼若定不得祇  
是箇弄精魂手脚佛性我在什麼處 報慈遂云若  
不是仰山怎得見中邑且道什麼處是仰山得見中  
邑處 東塔明云大小中邑錯下名言又喚作佛性  
又喚作彌猴復鼓掌呵呵笑云是何言歟 翠巖詰  
云大小中邑被仰山一拶未免手忙脚亂翠巖則不  
然如何得明見佛性劈脊便棒何故免得惺惺貪瞋  
睡勞他六戶喚頻頻

凍眠雪屋夜摧顏窈窕籬門夜不開寒檣園林音變  
態春風吹起律筒灰天童覺

人人有箇老彌猴暮四朝三卒未休喚著便能知落  
處八花瓢上輓金毬慈受深

一室虛涵對六窗彌猴留在更無雙忘懷絕慮彌猴  
死一國安寧六國降南堂靜

一室蕭然五窗廓爾中邑仰山自作自起拈弄一箇

彌猴作出千般舉止澣盆澣盆我識得你脫山癡

洪州潯潭常輿禪師馬祖一嗣因南泉來見師面壁而

坐泉撫師背師曰阿誰曰普願師曰如何曰也尋

常師曰汝何多事

面壁堆危引客過問誰那更問如何道尋常已成多

事檢點農家事更多西學惡

汾州大達無業國師馬祖一嗣僧問如何是佛師曰莫

妄想又僧問如何是佛師曰卽心是佛

雪竇顯於莫妄想處云塞却鼻孔於卽心是佛處云

挂却舌頭 昭覺勤云正當恁麼時舌頭又挂却鼻

孔又塞却還有轉身吐氣處也無便打 古南門云

一轉語無繩自縛一轉語金鎗不辨一轉語堆山積

獄更有一轉語三十年後

王令威嚴誰敢擬纔毫纔動鐵輪隨時人祇見錐頭

利幾人能見利頭錐彌庵語

無業示衆若有一毫頭聖凡情念未盡未免入驢

胎馬腹裏去

白雲端云直饒一毫頭聖凡情念淨盡亦未免入驢

胎馬腹裏去 磬山脩云未盡淨盡山僧今日齊拈  
却諸人還見一毫頭麼喝一喝云切忌鑽龜打瓦  
無業何太切白雲何太孤胡鬚將謂赤更有赤鬚胡  
南巖勝

一道如絃直心親手更親箭穿紅日影方見射鷹人

鼓山珙

信州鷲湖大義禪師馬祖一嗣因唐憲宗詔入麟德殿

論義法師問如何是禪師以手點空法師無對宗

曰法師講無窮經論祇者一點尙不奈何

說理談真面紫宸鷲湖大義枉勞神由來佛性難名

遯爭似君王默契親天目證

鷲湖又問諸碩德曰行住坐臥畢竟以何爲道有

曰知者是道師曰不可以智知不可以識識安得

知者是乎有曰無分別是道師曰善能分別諸法

相於第一義而不動安得無分別是乎有曰四禪

八定是道師曰佛身無爲不壞諸數安得四禪八

定是乎衆皆杜口

徑山杲云相罵饒你接葉根三饒你潑水 天寧琦

云僧投寺裏宿賊打不防家

鷲湖舉順宗問尸利禪師曰大地衆生如何得見

性成佛去利曰佛性如水中月可見不可取師曰

佛性非見必見水中月如何攫取帝乃問何者是

佛性師曰不離陛下所問帝默契之

灊山闇云若道不離陛下所問即是佛性鷲湖眉毛

亦須倒豎何故祇曉眼橫不知鼻直 法林音云奴

見婢殷勤

因地而倒因地起離地求起無是理不離所問語雖

親認著依前還不是枯禪鏡

洛京佛光如滿禪師馬祖一嗣因唐順宗問佛從何方

來滅向何方去既言常在世佛今在何處師曰佛

從無爲來滅向無爲去法身等虛空常在無心處

帝大悅

法身廣大等虛空生滅何須較異同夾路桃花風雨

後馬蹏何處避殘紅月江印

灊溪禪師馬祖一嗣問僧甚處來曰定州師曰定州近

日有甚奇特事曰某甲旦過但聞鹽貴米賤苦無

奇特事師曰我者裏也只如此靈粥淡飯與僧別  
無奇特事你又來者裏覓箇甚麼

雅淡梳粧色色眞眉清目秀總分明幸然不染輕較  
氣似錦花添數十層韻吉詳

京兆與善惟寬禪師馬祖一嗣因僧問狗子還有佛性

也無師曰有曰和尚還有也無師曰無曰一切衆  
生皆有佛性和尚爲甚麼却無師曰我非衆生曰  
既非衆生莫是佛否師曰不是佛曰畢竟是何物  
師曰亦不是物曰可見可思否師曰思之不可及  
見之不可議是名不可思議

法林音於不是佛處別云是佛則有也

拈却者僧問去却京兆答沿歌歸去來清風偏六合

五祖演

裂破須彌鼻孔踢翻大海乾坤面前百千諸佛盡是

我家兒孫安方

京兆因僧問道在何處師曰道在目前曰我何不  
見師曰汝有我故所以不見曰我有我故卽不見  
和尚還見否師曰有汝有我展轉不見曰無我無

汝還見否師曰無我無汝阿誰求見

神鼎揆云京兆爲憐三歲子不惜兩行眉究竟勞而  
無功者僧祇解傍門尋討不覺身在帝鄉試問無人  
無我畢竟是誰求見薰喝一喝云毗婆尸佛早留心  
直至如今不得妙復頌

了無一物堪比論鼻孔依然搭上脣暖日燦開巖畔  
雪何山松柏不青青

京兆草堂禪師馬祖一嗣曾參海昌昌問什麼處來師

曰道場來昌曰者裏是什麼所在師曰賊不打貧  
兒家

汾陽昭代和聲便打

覓得桃源好避秦桃源花笑最關情自從拓落乾坤

外那管消長風雨聲壽山鄉

潭州三角山總印禪師馬祖一嗣示衆若論此事眨上

眉毛早已蹉過也麻谷便問眨上眉毛卽不問如

何是此事師曰蹉過也谷乃掀倒禪牀師便打

長慶稜代云悄然保福展云三角賊過後張弓

翠峯顯云兩箇有頭無尾漢眉毛未曾眨上說什麼



此事蹉過尋有僧問眉毛爲什麼不眨上峯便打

昭覺勤云喚作此事已是好肉剗瘡了也何況更云  
眨上眉毛早已蹉過麻谷翠峰賊過後張弓則固是  
更有一個鶩拈拄杖下座 天寶樞云二大老怎麼

剛唱不妨雷轟電卷石裂巖崩若是此事白雲萬里

古南門云三角眉毛若無翠峰泊合打作兩橛卽

今有問劈脊便打討甚眉毛 廣教玉云二大老大

似饑鷹分肉猛虎奪食雖則競價相酬未免取笑旁

觀山僧今日搥鼓陞座諸人簇簇上來總不敢動著

不用干戈管取風和雨沐天下太平其間一挨一拶

若言蹉過欺誑平人若言不蹉過畢竟喚什麼作此

事喝一喝下座 湘翁云三角殺人不用劍雪寶

活人不用刀麻谷擘海吞龍者僧藏機陷虎秦春今

日作箇甚麼風頭稍硬各請照顧眉毛

放下便穩四棱蹋地突出當陽人天不會天章玉

正令威嚴斷不容星移斗轉覓無蹤將軍勒起當頭

馬殺氣紛紛滾黑風 默堂定

龍蛇陣上走神驄電卷星馳較莫齊旂鼓一時俱奪

了美人猶在隔河西道隆興

暖風斜日引孤筇石徑誰憐碧草封覓得家園春已

去雲山極目翠重重雪刃起

三角曰凡說法須用應時應節有僧問四黃四赤

時如何師曰三月杖頭挑曰爲甚麼滿肚皮貯氣

師曰怎奈一條繩何曰如何得出氣去師曰直待

皮穿

平地安身未肯休花陰柳徑逐時流教滿肚無閒

氣始信渠儂得自由意受深

三角因僧問如何是三寶師曰禾荳粟曰意旨如

何師曰大衆歡喜受持

三角對酬禾荳粟龍宮海藏難收錄雲門曾問疎山

僧便道如今粥飯足大洪遂

利山禪師馬祖一嗣因僧問衆色歸空空歸何所師曰

舌頭不出口曰爲什麼不出口師曰內外一如故

大慧杲云事存函蓋合理應箭鋒挂須還利山始得

若是徑山卽不然或問衆色歸空空歸何所芍藥花

開菩薩面櫻欄葉散夜叉頭爲甚麼如此但辦肯心

必不相賺 漏澤杲云山僧則不然或有人恁麼問  
但云此去武塘不遠爲甚如此祇要你家會麼良  
久云莫怪坐來頻勸酒自從別後見君稀 禪朗鑑  
云大慧雖則順殊却有一種奇特且道奇特在甚麼  
處復頌

鐵額銅頭老古錐吹毛截鐵爛如泥乾坤一踢通三  
際懵懂禪流幾箇知

池州魯祖寶雲禪師馬祖一嗣尋常見僧來便面壁南

泉聞曰我尋常向師僧道向佛未出世時會取尙  
不得一箇半箇它恁麼驢年去

保福問長慶云祇如魯祖節文在甚處被南泉潛麼  
道慶云退已讓人萬中無一 羅山閒云陳老師當  
時若見背上與五火叔何故爲伊解放不解收 玄  
沙備云我當時若見也與五火叔 玄覺云且道玄  
沙五火叔打伊著不著 雲居錫云羅山玄沙總與  
麼道爲復一般別有道理若擇得出許上座佛法有  
會處 翠巖芝云何勞如此若有僧來見箇什麼知  
時好又云我卽不然未具胞胎不得會會得卽打折

你腰 徑山杲云魯祖不得南泉幾乎覷破壁 笑  
巖寶云當時若有箇衲僧入來便與掀倒不惟打斷  
諸老葛藤亦免魔魅人家男女 雲門信云魯祖面  
壁若作佛法商量入地獄如箭射 雲中鳳云直饒  
不作佛法商量亦入地獄如箭射 西遯超云南泉  
大似人栴檀林燒一爐香見咸陽火投一束柴雖然  
若不遇知音夜光投人鮮不按劍 東塔烹云將謂  
無人證明

虎徑龍泉遠竹巖鳳棲霜倚鶴和杉誰人會得宗師  
意扭轉乾坤好不參尅符道者

祖師面壁播諸方無限禪人謾度量無事晚來江上  
立數株寒柏倚斜陽瑯琊覺

魯祖山前古路通熙微一逕沒西東杜鵑聲裏春光  
老零落桃花藉地紅普融平

葉落江頭一望長幾莖喬木倚斜陽曾經巴峽猿啼  
處鐵作心肝也斷腸箇堂機

背後面前揚家醜揭地洪音師子吼分付仙陀知不  
知法身午夜藏北斗足菴鑒

家財喪盡沒絲毫祇箇一身猶恨多却向池陽最深處殺人空手不持刀石菴瑠

澹中有味妙超情謂綿綿若存兮象先兀兀如愚兮道貴玉雕文以喪淳珠在淵而自媚十分爽氣兮清磨暑秋一片閒雲兮遠分天水天童覺

不施紅粉懶梳粧無限傷春在畫堂隔岸黃鸝啼不住同心結上繡鴛鴦龍池珍

參得蚌蛤禪自有人賞識寒食是清明二五剛一十濟水泚

池陰腦後三斤鐵王老眉峰一段鋼鑄就一枝無孔笛閒吹月下引鸞凰玉笈乾

數峰寒逼紫垣高一望令人聳骨毛況是黃昏又微雨長風拂拂虎聲號白巖符

王母乘鸞天地震聲色遙面丰神俊無端不遇知音者七竅徒勞鑿混沌法林音

昨夜秋風動白蘋碧天寥廓淨無垠一鉤新月沉滄海無限魚龍任吐吞三圓

魯祖因僧問如何是不言言師曰汝口在什麼處

曰某甲無口師曰汝尋常將什麼喫飯僧無對

洞山价代云他不饑喫什麼飯翠峰顯云好劈脊便棒者般漢開了口合不得合了口開不得汾陽

昭云祇爲不會五祖戒云和尚不妨具眼黃龍新云翠峰祇知者僧開了口合不得合了口開不得

不知魯祖被者擔板漢勘破天童覺云者僧祇解握死蛇不能捋虎鬚當時待他問你口在什麼處猛

與一喝拂袖便行直饒魯祖全機管取做手脚不及南堂欲云當時者僧若是個漢待道你口在什麼

處便與掀倒禪牀非惟使魯祖高豎降旂且免雪竇馬後落節

得因失有是在非邊根源未斷枝派相連不言言口何在轉得身來難下載一帆風過洞庭湖對面須知

已違背月堂昌

魯祖因洞山來參禮拜了侍立少頃而出却再入來師曰祇怎麼祇怎麼所以如此洞曰大有人不官師曰作麼取汝口辯洞乃侍奉數月

廣阿蓋云洞山再入魯祖便道大有人不肯管取洞

山經身傳本

澧州茗溪道行禪師馬祖一嗣嘗曰吾有大病非世所

曾山僧問吾有大病非世所醫未審是什麼病山云措簇不得底云一切衆生還有此病也無山云人人都有云和尚還有此病也無山云正覓起處不得云一切衆生爲甚麼不得山云若病卽非衆生云諸佛還有此病也無山云有云既有爲什麼不病山云爲伊惺惺 愚菴孟云吾有大病一物可醫且道是什麼物拈得出可與茗溪同參

唐州紫玉山道通禪師馬祖一嗣

因于顛問佛法至理

師曰若問須去情理公曰便請師曰問將來公曰如何是佛師召相公公應諾師曰更莫別求公後到藥山問如何是佛山召相公公應諾山曰是什麼公有省

長慶稜云藥山一等是道甚是奇特雲泥有隔羅山云不得草草當時賴遇是于顛可中草窠裏撥著箇焦尾大蟲何處有藥山也慶云作麼生山云還知于

顛是煨了底金麼 大瀉智云于顛當時若會見藥山云是什麼祇向道賺我來拂袖便去不惟作箇慳慨丈夫亦乃不鈍置紫玉 大瀉泰云摘驪龍領下珠取輪王髻中寶如鐘待扣似谷傳聲八面玲瓏更無回互諸人要見于顛悟處麼眞金已出鑛煨煉轉光輝

如何是佛更莫別求相續來也四大部洲月林觀

更莫別求是什麼丈夫爭肯墮窠窠夜來雲散家林曉依舊庭松挂薜蘿笑巖寶

烟濛濛又雨濛濛谷口溪橋過幾重臘月春風猶未暖隔牆先見一枝紅古南門

紫玉因于顛問如何是黑風吹其船舫漂墮羅刹鬼國師叱曰客作漢問怎麼事作麼手失色師曰者便是黑風吹其船舫漂墮羅刹鬼國

就身打劫壯吾曹喚得賢侯智眼高忿色不知何處去珠回玉轉透雲袍南巖勝

潭州華林善覺禪師馬祖一嗣

裴相國訪問曰師還有

侍者否師曰有祇是不可見客曰何妨師乃喚大

空小空二虎自菴後出裴驚悚師曰有客且去二  
虎於是哮吼而去公曰師作何行業感得如斯師  
提起數珠曰會麼曰不會師曰老僧常念觀世音  
法林音云相國何不待他說常念觀世音再作惶恐  
勢看他又如何

常念觀音力伏猛獸道眼通明萬緣何有良哉大士  
時時垂手念茲在茲安樂長壽龍門遠

新羅渤海竺乾此土月白風清三界獨步對景無心  
馴菴有虎忽然提起數珠時誰識當陽第一機奇奇  
敵勝還他獅子兒南堂靜

宗鑑法林卷十三

宗鑑法林卷十四

集雲堂 編

大鑒下三世

五臺山隱峯禪師馬祖一嗣一日辭祖祖曰甚處去師

曰石頭去祖曰石頭路滑師曰竿木隨身逢場作

戲便去纔到石頭便繞禪牀一匝振錫一下問是

何宗旨頭曰蒼天蒼天師無語回舉似馬祖祖曰

汝更去見它道蒼天蒼天便囑兩聲師又去一依

前問頭乃囑兩聲師又無語歸舉似馬祖祖曰向

汝道石頭路滑

清化囑云馬祖有決勝千里之謀隱峯有萬夫不當

之勇惟石頭老漢坐觀成敗因甚如此曹溪波浪如

相似無限平人被陸沉

石頭路滑人難到到者方知滑似苔兩度三回雖踣

倒通身泥水又歸來虛堂愚

唱徹黃金縷重吹紫玉簫倚樓人不見風過樹頭搖

□□□

諸葛名士蜀得其龍綸巾羽屐坐制英雄赤壁歸來

周郎悵望旣生瑜何生亮恨亭挺

隱峯在襄州破威儀堂祇著襯衣於砧椎邊拈椎

曰道得卽不打衆默然師便打一下

法眼益云隱峯奇怪甚奇怪要且打不著又云其時

一衆出自偶然 翠巖芝云此語有勘破處且道勘

破阿誰 雪竇顯云果然果然 東禪觀云彼時堂

中是有人耶無人耶若有人可容得伊若無人爭容

得伊又云笑殺旁觀 城山洽云當時若有人奪椎

子却打云勘破了也看者漢作何合煞

隱峯因南泉指淨餅曰淨餅是境你不得動著境

與我將水來師將淨餅傾水於泉面前泉休去

歸宗常云隱峯也是亂瀉 勝法法云隱峯猶欠一

匙在南泉休去伯牙與子期不是閒相識祇如歸宗

恁麼道是肯他不肯他

南泉不指淨餅隱峯何曾瀉水從教打瓦鑽龜佛法

不在者裏鼓山珪

眼中無翳休挑刮鏡上無塵不用磨信步出門行大

路橫擔拄杖唱山歌妙喜泉



南泉特地指餅隱峯便來瀉水兩人自不識羞掘地深埋自己照堂一

落英片片逐東風狼藉春光滿地紅設使向前收拾得餘香猶有過牆東幻寄庭

隱峯推車次馬祖展足在路上坐師曰請師收足祖曰已展不縮師曰已進不退乃推過損祖足祖歸執斧立法堂曰適來輾損老僧脚底出來師便引頸於祖前祖乃置斧

法林音云逢強即弱遇柔能剛馬祖父子可謂鍼芥相投雖然不免傷鋒犯手何不待馬祖云已展不縮便云學人罪過看馬祖又作個甚麼伎倆

煞神當令不容情撞倒當頭太歲星逐鹿過山都不看由來虎將愛強兵六雪間

磁州馬頭峯神藏禪師馬祖一嗣示衆知而無知不是

無知而說無知

南泉云恁麼依師道始道得一半黃蘗云不是南泉駁他要圓前話

從頭數到一二三倒數却成三二一直饒善會大行

算指指巡文數不出中菴空

峨眉峯頂月朦朧古木寒泉知幾重與路爲讎行莫到宛然出思落花中節巖秀

片片殘紅水際飛霞流萬里自光輝摘芳人去無消息紫燕銜來點翠微法林音

衢州烏白禪師馬祖一嗣因玄紹二上座參師乃問發足甚處玄曰江西師便打玄曰久知和尚有此機要師曰汝既不會後面箇師僧抵對看紹擬近前師打曰信知同坑無異土參堂去

雪竇顯云宗師眼目須主潛麼如金翅摩海直取龍吞有般漢眼目未辨東西拄杖不知顛倒祇管說照用同時人境俱奪鴻山語云烏白大似巨靈逞摩太華之威蒼龍展奪驪珠之勢直得乾坤失色日月潛輝乃拈拄杖云諸人還識烏白麼若也識去橫按鎮鄞囊中獨據若也未識棒頭有眼明如日卓拄杖白雲端云衆中商量道拄杖在烏白手裏以強凌弱有什麼難苦哉作者般見解水亦難消所以道醍醐上味爲世所珍過斯等人翻成毒藥要識烏白麼

橫按鎖鑰全正令太平寰宇斬癡頑 昭覺勤云雪  
寶明辨古今分別邪正若不知有爭解恁麼道雖然  
如是祇見烏白放行處未明烏白把住處要知烏白  
把住處麼直得釋迦彌勒猶爲走使不敢正眼觀著  
若使據令而行盡大地人總須喫棒 天目禮云盡  
道烏白用處如燒尾霹靂殊不知性命落在二僧手  
裏似敗陣將軍投戈散地 雲居莊云平地上巉崖  
孤峻處平坦諸方祇知烏白具超宗越格底手段且  
不知烏白徹底老婆心會麼棒打石人頭曝曝論實  
事 愚菴孟云烏白祇管據令而行彌勒釋迦立在  
下風試問玄紹還甘麼若甘則瞎却天下人眼若不  
甘則瞎却烏白眼若是甘與不甘一并收下也是瞎  
驢趁大隊 資國秀云烏白盡法不管無民翠峯也  
是順殊填墨昭覺雖則緇素精明祇知烏白把住處  
未明烏白放行處要知放行處麼竹密不妨流水過  
山高豈礙白雲飛  
赤身挨白刃死中還得活一箭自迷踪萬車齊喪轍

竹菴珪

烈焰不容蚊蚋泊大海那堪宿死屍任是三頭并六  
臂望風無不豎降旗 徑山杲

鎖鑰在握當堂坐擬欲衝前便喪軀縱使機鋒如電  
拂到頭未免病棲蘆 懶菴需

當陽兩口藏鋒劍背觸停思便喪身慣展機先白拈  
手不應無罪陷平人 幻寄旋

烏白問僧近離甚處曰定州師曰定州法道何似  
者裏曰不別師曰若不別便轉彼中去使打僧曰  
棒頭有眼不得艸艸師曰今日打著一箇也又打  
三下僧使出去師曰屈棒原來有人喫在曰爭奈  
杓柄在和尙手裏師曰汝若要山僧回與汝僧近  
前奪棒打師三下師曰屈棒屈棒曰有人喫在師  
曰艸艸打著箇漢僧禮拜師曰却與麼去也僧大  
笑而出師曰消得恁麼消得恁麼

開先金云雲行雨施雷奔電掃縛虎放虎入草出草  
烏白與者僧相見可謂主賓互換縱奪可觀因甚却  
道消得恁麼且道是肯伊不肯伊 資福廣云多錢  
善賈長袖善舞隨時消息步中規矩善論掌上身飛

人棄我取總欠一著在 幻寄庭云多少人在雪竇  
頰上敲瓶打瓦不知雪竇命脉在烏臼棒頭上  
呼即易遣即難互換機鋒仔細看劫石固來無可壞  
滄溟深處立須乾烏臼老幾何般與他杓柄太無端  
明覺顯

相見不虛圖分明付與渠汝醉我扶起我倒汝還扶  
交互爲賓主相將人帝都高歌大笑九衢裏天上人  
間惟我爾佛性泰

風風雨雨轉吞聲樹底游絲不斷情倒卷飛花上層  
閣美人閒把玉欄凭三峯藏

賊劫賊機就機天關撥轉星辰動地軸掀翻海獄移  
噴蛟龍一開乾坤動鼎沸寒聲徹閭維遠華體

石臼禪師馬祖一嗣參馬祖祖問甚處來師曰烏臼來

祖曰烏臼近日有何言句師曰幾人於此茫然祖  
曰茫然且置悄然一句作麼生師乃近前三步祖  
曰我有七棒寄打烏臼你還甘否師曰和尚先喫  
某甲後甘

昭覺勤云艸窠裏撥出一箇半箇有什麼共語處雖

然却是猶放過一著在 天井新云兩箇漢成則俱  
成敗則俱敗仔細看來總是乞兒索舊債  
石臼發脚太遲馬祖開口太早十字街頭要錢須是  
打他揶揄月堂昌

石臼因僧問如何是地藏手中珠師曰你手中還  
有麼曰不會師曰莫瞞大衆復頌曰不識自家寶  
隨它認外塵日中逃影質鏡裏失頭人

貪觀天上月失却手中撓石臼山下路歸計轉迢遙  
覲面光輝曰拍手笑吾曹日道笑他箇什麼爲人不  
得力佛燈珣

喪盡自家寶何須問外塵萬緣俱照破方見本來人  
塗毒策

古寺禪師馬祖一嗣丹霞來訪經宿明旦粥熟行者祇

盛一鉢與師又盛一鉢自喫殊不顧霞霞亦自盛  
粥喫者曰五更侵早起更有夜行人霞謂師曰何  
不教訓行者得恁麼無禮師曰淨地上不要點污  
人家男女霞曰泊不問過者老漢

出鳳巢雖無弱翅宿龍門客豈遽巡莓苔一任松風

掃古寺從來不受塵木陳恣

家富小兒嬌強兵無弱將泥牛哂月浪千尋石筍抽  
條高萬丈達變權

本溪禪師馬祖一嗣一日坐次龐居士至師纔顧視士

以拄杖畫一圓相師近前蹋却士曰與麼不與麼  
師亦畫一圓相士亦近別蹋却師曰與麼不與麼  
士却拋下拄杖而立師曰來時有杖去時無杖曰  
幸自圓成徒勞側目師撫掌曰奇哉奇哉一無所  
得士拈拄杖便行師曰看路看路

各呈見解互換機鋒石火莫及電光罔通拋下拄杖  
而立不同艸艸拈起拄杖便行亦豈恩恩者裏著得  
隻眼許你親見龐公石溪月

起摸畫樣弄精魂拂跡除蹤更見人行到水窮山盡  
處滿天雲散月華明磨堂遺

十九條平路終無一局同欲分先後手側目辨來蹤

正覺顯

本溪因龐公問丹霞打侍者意旨如何師曰老老  
大大見人長短曰爲我與師同參所以借問師曰

若怎麼從頭舉來共你商量曰老老大大不可共  
你說人是非師曰念公年老曰罪過罪過

一對鐵鎚如綿團一雙烏鴉如白鶴忽然狹路相逢  
不免將錯就錯佛鑒勸

韶州乳源禪師馬祖一嗣上堂西來的的意不妨難道

大衆莫有道得者出來試道看有僧出纔禮拜師  
便打曰是甚麼時節出頭來

後人學似長慶慶云不妨不妨保福展代云爲和

尙不惜身命承天宗云宗乘也不易扶豎者兩箇

老漢扶不起我道者僧若不出頭棒即是乳源自喫

潞山果云者僧若具眼纔見開口便好向道老和

尙少賣弄不惟勘破乳源亦乃坐斷天下人舌頭

廣胤標云者僧若是箇漢待伊纔拈棒便好接住送

一送云和尚也須自領一半始得管教者老漢一場

懣懣

祖意西來豈易量擡眸已自錯承當闍黎不解知時

節開眼堂堂入鑊湯此山應

西來的的意何如學唱多憐在半途勾賊到家還破

賊信知身佩辟兵符趙善期

乳源因仰山作沙彌時念經聲高師咄曰者沙彌  
念經恰似哭山曰慧寂祇恁麼未審和尚如何師  
乃顧眎山曰若恁麼與哭何異師便休

箭鋒挂劒刃交移星轉斗換象抽爻回首暮雲歸未

合臺眸新月上林梢遠變權

象王回顧師子返躑玉轉珠回山青水碧在殼頻伽

聲卽奇出羣果有搏風翻遠庵體

齊峰禪師馬祖一嗣因龐居士問此去峰頂有幾里師

曰什麼處去來曰可謂峻硬不得問著師曰是多

少曰一二三師曰四五六曰何不道七師曰纔有

七便有八曰得也得也師曰一任添取曰不得堂

堂道師曰還我恁麼時龐老主人公來曰少神作

麼師曰好箇問訊問不著人曰將謂將謂

天童華云發大機顯大用且非電光石火疾焰過風

要須平地上嶮崕孤峻處平坦看他二老深入虎穴

透徹淵源至於結角羅紋游刃磅礴得大自在因甚

華頂峰未曾到祇如齊峰云還我恁麼時龐老主人

公來士云少神作麼歸宗者裏擬著箇眼也要諸人  
瞥地良久云竹影掃塔塵不動月穿潭底水無痕

齊峰一日與龐居士並行士乃前行一步曰我強

如師一步師曰無背向老翁要爭先在曰苦中苦

未是此一句師曰怕公不甘曰老翁不甘齊峰堪

作什麼師曰若有棒在手打不倦士便打一摑曰

不多好師始拈棒被士把住曰者漢今日一場敗

闕師笑曰是我拙是公巧士乃拊掌出曰平交平

交

江天銓云線中有尋龐公只知背水輪中有贏齊峰

慣會滅竈雖然共出馬師之門究竟未觀馬師之面

絲綸收放烟波裏穩坐磯頭垂釣鈎今古不傳真妙

訣蘆花月映一天秋德實信

洪州水潦禪師馬祖一嗣問馬祖如何是西來的意

祖乃當胸踢倒師大悟起來呵呵笑曰也大奇也

大奇百千三昧無量妙義祇向一毫頭上識得根

源去

瑯琊覺云大衆你道水潦還曾悟也未 天童覺云

馬大師不合放過待伊起來恁麼道但問祇者一毫頭從甚處得來待伊擬議更與一踢 理安問云垛

生招箭 鼓山霈云乞兒見小利

馬駒一踢驢兒倒地大笑起來羊鳴犬吠野軒聲

一踢倒時堪大笑從前伎倆盡徒勞蛇頭却要重措

養萬萬千千出一毫白雲端

水潦承機徹祖意馬駒一踢曉根源虛空撲落無閒

地却向滄溟駕鐵船照覺總

筠管釀來應已熟不惜醉裏帽欹斜醪醺浪有幽香

在是酒元來不是花懶庵樞

說道春來好狂風大放顛吹花隨水去翻却釣魚船

雪庵瑾

拆塊破葛巾補條破葛褲趕著南山驢走却北山兔

搖棉戶喫豆腐自從轉過簸箕來至今兩腿酸如酢

介旭遐

水潦因僧到乃畫圓相放師肩上師撥三下却畫

圓相指其僧僧禮拜師打曰者掠虛漢

保寧勇別僧拜處但睡之而去復頌

趨去拳來乃是當如何得不見參商依公定度無偏黨短自短兮長自長

水潦因僧問如何是沙門行師曰動則影現覺則

冰生

資福王云動則影現不動時不可無影也覺則冰生

不覺時不可無冰也謂沙門眼尚不得況於行乎

水牯從它露地眠何勞短笛又加鞭自由自在長林

下一日如同過百年寓谷志

袁州楊岐甄叔禪師馬祖一嗣僧問如何是祖師西來

意師提起數珠僧罔措師曰會麼曰不會師曰某

甲參見石頭來曰見石頭得何意旨師指庭前鹿

曰會麼曰不會師曰渠儂得自由

露溼雲凝曉不收暮霞猶桂樹梢頭西峰夜半猿啼

後笑看蟾光海面浮無異來

毗陵芙蓉太毓禪師馬祖一嗣一日因行食到龐公前

公擬接師乃縮手曰生心受食淨名所呵去此一

機居士還甘否曰當時善現豈不作家師曰非關

它事曰食到口邊被人奪却師乃行食公曰不消



一句

昭覺勸云善現作家芙蓉奇特盡被龐公一狀領過了也祇知道不消一句且道是那一句端坐受供養施主常安樂

芙蓉因龐公問馬祖著實爲人處還分付吾師否師曰某甲尙未見它作麼生知它著實處曰祇者見知也無討處師曰居士也不得一向言說曰一向言說師又失宗若作兩向三向師還開得口麼師曰直是開口不得可謂實也公撫掌而去

昭覺勸云芙蓉何不道分付與我待問如何是著實處便好與一掌待他眼目定動更與一掌何故且要打斷許多葛藤佛川宗云者兩箇撮驢糞漢也甚奇怪雖然暗地拋竿要且瞞野山不得

浮杯禪師

馬祖一嗣

一日凌行婆來茶次婆乃問盡力道不得底句分付阿誰師曰浮杯無臘語曰未到浮杯不妨疑著師曰別有長處不妨拈出婆斂手哭曰蒼天中更添冤苦師無語婆曰語不知偏正理不識倒邪爲人即禍生後有僧舉似南泉泉曰

苦哉浮杯被者老婆摧折一場婆聞笑曰王老師猶少機關在幽州澄一禪客逢見婆便問怎生是南泉猶少機關在婆乃哭曰可悲可痛一罔措婆曰會麼一合掌而立婆曰伎死禪和如麻似粟一舉似趙州州曰我若見者吳老婆問教伊口啞一曰未審和尙怎生問它州便打一曰爲甚麼却打某甲州曰似者伎死漢不打更待幾時連打數棒婆聞曰趙州合喫婆手裏棒僧舉似州州哭曰可悲可痛婆聞此話合掌歎曰趙州眼光燦破四天下州令僧問如何是趙州眼婆乃豎起拳頭僧回舉似趙州州作偈曰當機覲面提覲面當機疾報汝凌行婆哭聲何得失婆以偈答曰哭聲師已曉已曉復誰知當時摩竭國幾喪目前機

高峰妙云山僧始初一看將謂總是白拈賊及手再辨端倪却是浮杯較些子何故不因漁父引怎得見波濤濠山閻云凌行婆具超方作略雖趙州南泉亦讓一籌不如浮盃老人不用干戈善能捉敗且道何人爲證乃以手捥胸云蒼天

掌內摩尼曾不顧誰能護惜孃生禪浮盃不會老婆  
禪直至如今遭點污徑山果三

電光石火尙猶遲伎死禪和那得知轉面回頭擬尋  
討夕陽已過綠楊西

眼光爍破四天下婆子拳頭無縫罅當機覷面事如  
何猛虎脊梁誰解跨

動弦別曲葉落知秋擬議不來休休休休中庵室

年少行藏獨倚樓一家女子百家求祇因不入浮盃

網對鏡看看白盡頭笑翁堪

鎮州金牛禪師馬祖一嗣每日自作飯供僧齋時昇飯

桶主僧堂前作舞呵呵大笑曰菩薩子喫飯來

長慶云金牛大似因齋慶讚 僧問大光誨長慶道

因齋慶讚意旨如何光乃作舞僧禮拜光云見甚道

理便禮拜僧却作舞光云者野狐精 東禪齊云祇

如長慶大光是明古人意別爲他分析諸人每日持

盞過堂爲當與古人一般別有道理若道別且作麼

生得別來若道一般恰到他舞時又被喚作野狐精

有會處麼若未會脚眼在什麼處 翠峰巖云雖

然如是金牛不是好心 截流策云雪竇中毒也不  
見道陰陽怕懵懂

白雲影裏笑呵呵兩手持來付與他若是金毛獅子  
子三千里外見諸譌明覺顯

菩薩子喫飯來一喚令人眼豁開却憶上方曾打鼓  
親持鐵盃詣天台長疊卓

長連牀上狐屎尿三聖堂前狗吠春跳出金牛窠窟

子月明照見夜行人佛眼遠

欄衫席帽積塵埃柳巷花街去復來拈得舊時鼐拍

板逢人偏愛舞三台佛心才

鴛鳥落水魚鼈死毒龍行處草木枯坐中若有江南

客休向樽前唱鷓鴣簡堂機

等將珍異爲鋪開錯玉傾珠知幾回莫道東君多意

氣清香來自雪中梅穆堂桂

金牛見臨濟來橫按拄杖方丈前坐濟見遽撫掌

三下遂歸堂師却下人事了便問主賓相見各有

軌儀上座何得無禮濟曰道什麼師擬開口濟便

打一坐具師作打勢濟又打一坐具師曰今日不

著便遂歸方丈

瀉山祐問仰山此二尊宿還有優劣也無仰云優則總優劣則總劣 瀉山果云一人焦輒打著連底凍一人得便宜是落便宜 靈隱禮云驅耕夫牛奪饑人食不無臨濟若是毒蛇頭上搭癢猛虎口裏橫身須讓金牛始得

張公欲勸李公酒反被李公罰一杯相席能行急口

令醉歸山月上寒梅旅庵月

提起吹毛沁骨寒追風千里急如湍自從一定綱維後百萬軍中識范韓證心脩

崧山禪師馬祖一嗣因與龐居士喫茶士舉橐子曰人

人盡有分爲什麼道不得師曰祇爲人人盡有所以道不得曰阿兄爲什麼却道得師曰不可無言也曰灼然灼然師便喫茶曰阿兄喫茶爲什麼不揖客師曰誰曰龐公師曰何須更揖後丹霞聞乃曰若不是崧山幾被箇老翁惑亂一上士聞之令人傳語霞曰何不會取末舉橐子時

七碗清風生兩腋一回舉著便惺惺相逢不用輕相

揖須要當頭道姓名正覺顯

崧山與龐公見衆僧摘菜次師曰黃葉卽去青葉卽留士曰不落青黃又作麼生師曰道取好曰互爲賓主也大難師曰却來此間強作主宰曰誰不與麼師曰是曰不落青黃就中難道師笑曰也解與麼道曰珍重大衆師曰大衆放你落機處

佛鑑勸云龐公當時若下一轉語方得話圓且道下得什麼語但道某甲亦放過長老踉過處且道那裏是踉過處諸人還檢點得出麼若檢點不出山僧更爲註破乃頌

踉過處甚分明無耳僧人仔細聽但得白雲消散盡夕陽斜照數峰青

不落青黃道取好互爲主賓也大難珍重衆僧使下去後回相見作何顏大圓智

則川禪師馬祖一嗣因龐居士相看次師曰還記得見石頭時道理否曰猶得阿師重舉在師曰情知久參事慢曰阿師老耄不啻龐公師曰二彼同時又爭幾許曰龐公鮮健且勝阿師師曰不是勝我祇

則川與龐公摘茶次士問法界不容身師還見我  
否師曰不是老僧洎答公話曰有問有答蓋是尋  
常師摘茶不聽士曰莫怪適來容易借問師亦不  
顧士喝曰者無禮儀老漢待我一一舉向明眼人  
師乃拋却茶籃便歸方丈

相逢相識謾相邀碧水溪深隔斷橋無限說辭殊不  
聽急扃門戶更徒勞保寧勇

一老機關誰共委  
幘頭捋下髮  
鑿山深不記來時

則川方丈內坐龐居士來見乃曰祇知端居丈室不覺僧到參時師垂下一足士便出行三兩步却回師乃收足士曰可謂自由自在師曰我是主曰阿師祇知有主不知有客師喚侍者點茶士作舞而出

衲子懷中寶文星袖裏珠夫子步亦步夫子趨亦趨  
 雲從龍風從虎獅子嘖呻象王回顧北斗藏身月中  
 趁兔蹋破草鞋不移寸步樂行不如苦住富客不如  
 貧主趨前退後說來端舞袖高歌却回去正覺顯

忻州打地禪師馬祖一嗣自江西領旨常晦其名凡人致問惟以棒打地示之一日被僧藏却棒然後致

問師但張其口僧問門人曰和尚打地意旨如何  
門人卽於竈內取柴一片擲在舖中

紫府山前真正事拄杖常擎在手中南北問津無限  
衆惟將打地報盲禪汾陽昭

棒棒打著地始信無虛棄祇見鑿頭方失却錐頭利  
慈受深

端坐似無爲逢人卽打地嚇得虛空神走入波斯鼻  
寶壽樂

石林禪師馬祖一嗣見龐居士來乃豎拂子曰不落丹

霞機試道一句子士奪却拂子却自豎起拳師曰  
正是丹霞機曰與我不落看師曰丹霞患啞龐公

患聾曰恰是師無語士曰向道偶爾

擔東過西移前作後馬首千差佛面百醜月堂昌

作家相見別無道理彼旣搖頭此亦擺尾頭尾相應

須存終始多少杜撰禪和一向撥波求水佛鑑勸

潭州秀溪禪師馬祖一嗣因谷山問聲色純真如何是

道師曰亂道作麼山却從東過西立師曰若不恁

麼卽禍事也山又從西過東立師乃下禪牀行兩

步被山捉住曰聲色純真作麼生師便打一掌山  
曰三十年後要箇人下茶也師在師曰要谷山者  
漢作什麼山呵呵大笑

神鼎揆云澤廣歲山靈能伏豹卽不無祇是太煞纖  
纖何不當時待問聲色純真云云便和聲連棒打饒

谷山有通身伎倆也須瓦解冰消何也當斷不斷反  
招其亂 金山銓云大小谷山刺腦入膠盆

樓前巧燕雙雙語林上嬌鶯對對飛因看古人無義  
語等閒又得一聯詩佛鑑勸

兩陣交鋒笑似瞋雙眉倒卓眼生筋谿山雲月誰爲  
侶南北東西絕北隣諸堂遠

聲色自純真雖言道易親月臨清碧嶂薄霧鎖寒筠  
合國方興盛野老仍蹙蹙淨名曾漏泄曼室便拋珍

神鼎揆

江西樟樹禪師馬祖一嗣道吾來相看值師臥次吾乃

近前牽被覆之師曰作麼曰蓋覆師曰臥底是坐  
底是曰不在者兩頭師曰爭奈蓋覆何吾便喝

樟樹臥起道吾蓋覆一喝當頭掀翻露布昭覺勸

相逢不相避箇裏聊遊戲喝一喝云翻天覆地愚山  
清秋月色十分滿海底雲犀吐復吞光彩爛然收不  
得讓勢和影倒金樽幻奇庭

柳樹因道吾從外歸師問甚麼處去來曰親近來  
師曰用箴者兩片皮作麼曰借師曰它有從汝借  
無作麼生曰祇爲有所以借

覺王空云暗抽橫骨不借而借明剉舌頭借而不借  
拈拄杖云柳樹道吾鼻孔總被覺王拄杖子穿却了  
也衆中還有爲二人出氣者麼復卓一下

親近從來無近處假借何如不借親一輪明月光千  
古勞鹿世間多少人靈鷲誠

柳樹向火次道吾問作麼師曰和合曰恁麼則當  
頭脫去也師曰隔闊來多少時耶吾便拂袖而去  
三昧真云道吾拂袖去冒它不冒它還是別有道理  
諸方批判無不云一入深村一投荒艸未免屈抑它  
二老不踢諸方途轍者另出手眼看山僧道一人探  
頭太過一人拂尾偏急且要與天下人勘驗

百靈禪師馬祖一嗣 一日路次見龐居士乃問南嶽得

力句曾舉向人也無士曰曾舉來師曰阿誰士以  
手自指曰龐公師曰直是妙德空生也讚歎不及  
士却問阿師得力句阿誰得知師戴笠子便行士  
曰善爲道路師更不回顧

徑山杲云者箇話端若不是龐公幾乎錯舉似人雖  
然如是百靈輸他一著何故當時若不是箇破笠子  
有甚面目見他龐公 天寧琦云百靈戴笠便行得  
力句可謂分明舉似因甚妙喜道百靈有甚面目見  
他龐公也是扶強不扶弱 天童悟云百靈若非徑  
山直饒戴破笠子也無出頭分

潭州龍山隱山禪師馬祖一嗣 山居因洞山與密師伯  
從山下過見溪流菜葉洞山曰深山無人因何有  
菜隨流乃共撥艸溪行五七里見師羸形異貌因  
相與問訊師曰此山無路闔黎從何處來洞山曰  
無路且置山主從何而入師曰我不從雲水來曰  
山主住此山多少時師曰春秋不涉曰山主先住  
此山先住師曰不知曰爲甚麼不知師曰我不從  
人天來曰山主見何道理便住此山師曰我見兩



箇泥牛翻入海直至如今絕消息洞山始具威儀  
作禮便問如何是主中賓師曰青山覆白雲曰如  
何是主中主師曰長年不出戶曰賓主相去多少  
師曰長江水上波曰賓主相見有何言說師曰清  
風拂白月洞乃辭退師因有偈曰三間茅屋從來  
住一道神光萬境閒莫把是非來辯我浮生穿鑿  
不相干遂燒却菴更深入層峰焉

天童覺云主也雲藏頂相賓也雪壓眉棱相去也門  
司有限言說也玉振金聲我此四句且道與隱山是  
同是別

泥牛入海無消息天上人間何處覓謂言春去秋復  
來步步乘騎得渠力保寧勇

撥艸瞻風海上遊海山深處葉隨流相將行到水窮  
處果見厖眉老比丘者比丘冷秋秋清風爲綫明月  
爲鉤合乾坤作釣舟孤峰絕頂垂綸坐不風流處  
也風流南堂靜

眼目高低鼻孔橫淺深輕重不多爭蚊虻蠹上挨肩  
入鸞鷺牙根借路行便把長河攪酥酪敢將粟柄作

禾莖隱山未是潛身處出沒任他烏兔更磨堂遠

宗鑑法林卷十四

宗鑑法林卷十五

集雲堂編

大鑑下三世

洪州西山亮座主馬祖一嗣參馬祖祖問見說座主大

講得經論是否師曰不敢祖曰將什麼講師曰將  
心講祖曰心如工伎兒意如和伎者爭解講得師  
抗聲曰心既講不得虛空莫講得麼祖曰却是虛  
空講得師不肯便去將下階祖召座主師回首祖  
曰是什麼師豁然大悟使禮拜祖曰者鈍根阿師  
禮拜作麼師曰某甲所講經論將謂無人及得今  
日被大師一問平生功業一時冰消禮謝而退乃  
隱於洪州西山更無消息

法眼益云看他古人恁麼慈悲教人如今作麼生會  
莫聚頭向者裏妄想

馬師瞎却亮師眼一入西山更不返我有三十二藤  
條寄與山中蒼擔板東山空

昨夜月初明柴門猶未閉貓兒捉老鼠引得狗兒吠  
懶菴樞

弓絃難結鴛鴦紐御街那栽栗棘蓬堪笑香嚴饒舌  
老今年猶勝去年窮正堂辨

却是虛空講得經雨花狼藉曉風清賺人深入西山  
後多少閑黎又錯聽閒極雲

却是虛空講得經願輒瓦認正堪聽向來扭捏孃生  
鼻錯認葫蘆是帝餅閒谷印

襄州龐蘊居士見馬祖一參馬祖問不與萬法爲侶者  
是甚麼人祖曰待汝一口吸盡西江水卽向汝道

### 士頌旨

育王觀云馬大師祇知開口易不覺舌頭長當時若  
問育王但向道直得虛空落地自然出他一頭何故  
車不橫推理無曲斷 能仁鑑云馬大師與麼答話  
大似不知問頭來處致令龐公向死水裏浸殺能仁  
恁麼道且道意在於何不圖打艸祇要驚蛇 石塔

忍云龐家個漢大似赤貧之士偶於十字街頭拾得  
一文錢逢人便自誇富可見俗氣未除馬大師又如  
歷代管輅孟浪公子揮金如土齒不關風隨口答將  
來總之老不戒性設有人問與國不與萬法爲侶者  
是甚麼人但向他道今日設齋檀越皆是山陰道上  
客祇教他應接不暇爲甚如此卓拄杖云傷心江上  
客不是故鄉人

風吹日炙露屍骸泣問仙人覓地理忍俊不禁多口  
老陰陽無處可安排保寧勇

吸盡西江向汝道馬師家風不艸艸截流一棹破烟  
寒天水同秋清渺渺天童覺

一口吸盡西江水洛陽牡丹新吐蕊簸土揚塵無處  
尋擡眸撞著自家底五祖演

大海波濤闊小人方寸深海枯終見底人死不知心  
鼓山珙

一口吸盡西江水鷓鴣啼在深花裏自有知音笑點  
頭由來不入聾人耳寶峰照

一口吸盡西江水龐老不曾明自己爛醉如泥膽似

天鞏縣茶瓶三隻紫松源嶽

密怛哩呱密咀哩智開口動舌是甚滋味因你莫癡

簡堂機

秤錘擲出油閒言長語休腰纏十萬貫騎鶴上揚州

憐堂仁

淨躰裸赤灑灑沒可把喏可知禮也退菴休

一口吸盡西江水千手大悲提不起確柴生花春畫

長狸奴白牯皆歡喜普菴玉

龐公問馬祖不昧本來人請師高著眼祖直下覷

公曰一種沒絃琴惟師彈得妙祖直上覷公乃作

禮祖歸方丈公隨後入曰適來弄巧成拙

雲峰悅云且道是賓家弄巧成拙主家弄巧成拙若

揀得出三十棒一棒也較不得若揀不出明年更有

新條在惱亂春風卒未休 瑯琊覺云一夜作竊不

覺天曉 智海逸云二老漢一個開口了合不得一

個合口了開不得更有一個未欲說破乃呵呵大笑

歸方丈 徑山杲云馬大師覷上覷下則不無爭奈

昧却本來人居士雖然禮拜也是圖圖吞個聚馬師

歸方丈士隨後入云適來弄巧成拙救得一半 雲

居莊云我要問龐公喚什麼作本來人喚什麼作沒

絃琴拈拄杖云不是放過馬大師直是不欲說破卓

一下 萬峰藏云馬大師者回被俗子擒下也 棲

霞成云龐公若無後語幾被馬大師瞞過祇如末後

禮拜馬祖便歸方丈者裏還有人勘得破麼若勘得

破許你具納僧眼

龐公見丹霞來霞作走勢公曰猶是拋身勢作麼

生是囀呻勢霞便坐公向前以拄杖畫箇七字於

下畫箇一字曰因七見一見一忘七霞便起去公

曰更坐少時猶有第二句在霞曰向者裏著得語

麼公遂哭出去

因七見一見一忘七月在中央天無四壁十方虛空

掃踪滅跡通身是口說不出青黃碧綠亂搽抹南

堂靜

因七見一尋踪訪跡見一忘七青天白日第二句中

因凶得吉劍挂虛堂歸去來忠義之言難可失哀哀

哀方菴顯

龐公訪丹霞於霞前立少時便出去霞不顧公却來坐霞却來士前立少時便歸方丈公曰汝出我入未有事在曰老翁出出入入有甚了期公曰略無些子慈悲曰引得箇漢到者田地公曰把甚麼引霞拈起公幞頭曰恰似一箇師僧公拈幞頭安霞頭上曰恰似一箇俗人霞應諾三聲公曰猶有些子氣息在霞拋下幞頭曰大似箇烏紗巾公亦應諾三聲曰昔時氣息爭解忘得公彈指三下曰動天動地

一出入徐行款步庠序威儀風流僧措互換誰分僧俗禮義於茲富足正覺逸

燒木佛老有甚心肝賣策籬翁家破人殘相追相逐相激相歡難難倚天長劍兮射斗光寒攪海蒼龍兮不觸波瀾看看家家有路透長安南堂靜

龐公見丹霞來遂不語亦不起霞乃提起拂子公便拈起毬子霞曰祇與麼更別有在公曰此回見師不似於前曰不妨減人聲價公曰本來要折倒汝一上曰與麼則啞却天然口去公曰汝啞却本

分猶累我啞却霞擲下拂子便行公召然闍黎霞不顧公曰不惟思啞兼亦思聾

動絃別曲葉落知秋聾盲槌拂彼此相齏有意氣時添意氣不風流處也風流壺毒策

挂角羴羊亡氣息倚天長劍用無痕纖波不動寒蟾影無限魚龍暗吐吞正覺顯

龐公因辭藥山山命十禪客相送至門首公乃指空中雪曰好雪片片不落別處有全禪客曰落在甚處公遂以一掌全曰也不得艸艸公曰恁麼稱禪客闍黎老子未放你在曰居士作麼生公又掌曰眼見如盲口說如啞

翠峰頰云好雪片片不落別處但握雪團便打雲居悟云若人問雲居落在什麼處即向伊道落在雪裏大眾會麼 磬山修云我若作全禪客待道好雪片片不落別處便好云不落別處則且置你道在什麼處來他擬開口驀面使掌教者老漢別有生涯始得 青龍斯云盡謂全禪客被他龐公折挫一上殊不知龐老兒被全禪客生生陷在雪坑裏至今出頭

不得

雪團打雪團打龐老機關沒可把天上人間不自知  
眼裏耳裏絕瀟瀟瀟瀟絕碧眼胡僧難辨別 翠峰顯  
落在雪裏不犯脚手釘紫鐵舌也難下口揮掌雪團  
劈面來打著金剛腦背後雲居悟

三尺寒光射斗牛莫耶提處鬼神愁蠻夸不識將軍  
令誤入重圍血頸流治父川

頭上漫漫脚下漫漫挂定即易警轉還難金剛寶劍  
逼人寒不墮機鋒句外看石溪月

龐公曰有男不婚有女不嫁大家團圓頭共說無  
生話

楊無爲別云男大須婚女大須嫁討甚閒工夫更說  
無生話 百丈源云兩個漢雖則聲調不同要且舌  
頭皆一今日有一人男也婚女也嫁逢僧喜說無生  
話人間不問幾千秋但覺乾坤粟米大富與貴榮與  
華太虛空中之乎者也獨有當戶青山原是一幅圖  
畫乃以拂子空中畫一畫

收拾山雲海月情團圓鼻直與眉橫龜毛拂子兔角

杖敲得虛空噪噪聲石溪月

春至花開秋後葉落父子團圓識甚好惡枯禪鏡  
不說是不說非揚眉瞬目好裏放癡父慈子孝無他  
事渾家一味討便宜尼闍林英

龐公曰心如境亦如無實亦無虛有亦不管無亦  
不拘不是聖賢了事凡夫

徑山杲云白滴滴青寥寥水不能濡火不能燒是個  
甚麼切不得問著問著瞎却你眼以拄杖擊香臺一  
下 天寧琦云要作了事凡夫更須進前三步法林  
音云要作了事凡夫直須退後三步 薦福如云楚  
石道要作了事凡夫更須進前三步且作麼生進五  
老雲九江水卷舒出沒太虛中究竟在吾皇化裏  
龐公曰十方同聚會箇箇學無爲此是選佛場心  
空及第歸

天童傑云十方同聚會鐵壁银山箇箇學無爲日月  
照臨此是選佛場龍蛇涵雜心空及第歸凡聖同居  
薦拈拄杖橫按云龐居士在者裏坐地是汝諸人還  
見麼遂擲下云三生六十劫

幘頭塵土靴爛破選佛場中無兩箇若道心空及第  
歸頂上一槌難放過佛慧泉

風月山川共一家誰來語下定龍蛇太白不曾登便  
殿筆頭昨夜自生花心間責

喪盡生涯賣策籬白拈夥裏討便宜看來伎倆祇如  
此也道心空及第歸佛照光

龐公曰護生須是殺殺盡始安居會得箇中意鐵  
船水上浮

昭覺勤云且道殺個什麼殺衆生物命凡夫見解殺  
六賊煩惱座主見解殺佛殺祖大闡提人見解裨僧  
分上畢竟殺個什麼 徑山琰云祇知開口易不覺  
舌頭長

龐公一日曰難難十擔油麻樹上攤婆應聲曰易  
易百艸頭邊祖師意靈照曰也不難也不易饑來  
喫飯困來睡

徑山杲云三個俗漢同行不同步同得不同失雖然  
笑殺旁觀 大覺昇云三個俗漢好各與三十何故  
者是什麼所在說難說易卽今還有出得難易者麼

設有也是臘月扇子 理安洸云雖則家肥生孝子  
國霸產謀臣理安苦在痛與三十免致分疆列界

口喃喃略不休却把策籬作伙遊有個女兒不肯  
嫁他年定作老了頭懶菴樞

冤家復冤家面面咸相觀品弄沒絃琴清聲播千古  
息菴觀

三個默兒共過橋一伸一屈一彎腰水中倒影分長  
短笑殺旁觀業欲哨夢菴律

龐公以家業盡投湘水女子靈照日以策籬鬻於  
市中

髮角堆雲美態嬌策籬數柄杖頭挑入廬寧可無人  
問撞著行家定不饒圓照本

爺將活計沉湘水累女沿街賣策籬不是家貧連子  
苦此心能有幾人知無際派

父既心空及第歸女兒依樣畫蛾眉一家祇了一家  
事那得閒錢買策籬無量壽

龐公因賣策籬下橋喫撲靈照一見亦去爺邊倒  
公曰汝作甚麼曰見爺倒地某甲相扶公曰賴是



無人見

龐公跌倒靈照扶起兩旣不成一何有爾國清英

居士倒地靈照扶起乞兒伎倆討甚巴鼻童華

孝順藏忤逆人前醜莫遮今生親骨肉夙世惡冤家  
南夏茂

龐公倒地靈照扶起至今幾百年清風猶未已猶未

已東海鯉魚千尺紫已菴深

龐公問靈照曰古人道明明百艸頭明明祖師意

如何會照曰老老大大作各箇語話公曰你作麼

生曰明明百艸頭明明祖意公乃笑

萬里無雲銀漢橫大方玄路等閒行阿爺智量世希

有女子圓光頂上生或菴體

龐老家聲千古在說難說易互相酬就中靈照較些

子祖意分明百艸頭成首座

龐公將入滅謂靈照曰視日早晚及午以報照遽

報曰已中矣而有蝕也公出戶設次照即登父座

合掌坐亡公笑曰我女鋒捷於是更延七日

家有金棚樂新翻調不同分明恨離別却是喜相逢

西嶽惠

一棚戲舞渾家樂鼓樂喧天恣擲撥戲衫卸下許誰  
知無端笑倒黃番緯北海心

龐公歸示寂于公頓州牧問疾公曰但願空諸所  
有慎勿實諸所無好住世間譬如影響言訖枕頓

膝而化

欲識窮源處何人爲指迷夕陽鷄犬外桃李自成蹊

虛堂題

龐婆入鹿門寺作齋維那請疏意回向婆拈梳子

插向髻後曰回向了也便出去

龐婆移轉髻邊梳一段風流舉世無萬事便將公道

斷維那不用筆頭書慈受深

維那對妻要官揚返被婆婆笑一場單轉牙梳車結

脚相逢猶更錯商量默堂定

大鑑下四世

洪州黃檗斷際希運禪師百丈海嗣上堂汝等諸人盡

是蓮酒糟漢與麼行脚何處更有今日還知大唐

國裏無禪師麼時有僧問祇如諸方聚衆開堂爲

什麼却道無師曰不道無禪祇是無師

瀉山問仰山作麼生仰云鷲王擇乳素非鴨類瀉云此實難辨

五祖戒出僧語云謝和尚說得道理好

石門聰云黃檗垂示不妨奇特纔被布衲拶著失却一隻眼

翠巖真云諸方盡道黃檗坐却者僧又道黃檗被者僧上來直得分析不下何爲也翠巖輒生擬議

豹澤毛未嘗下食庭禽養勇終待驚人

承天宗云五祖眼光照破圓天下要見黃檗猶未可若要扶豎正法眼藏須是黃檗宗師

瀉山詰云莫怪從前多意氣他家曾踢上頭關

法昌遇云我要無禪底作國師

徑山杲云且道是醍醐句是毒藥句

天童悟云黃檗大似龍頭蛇尾當時待道諸方匡徒領衆又作麼生何不和聲連棒打出

洞山瑩云黃檗雖則眼蓋乾坤氣吞寰宇要且太煞誇囂還

有知伊落節處麼良久云險

資福廣云黃檗此語淚出痛腸不知者以爲淩駕諸方恁麼則深屈古人

也弁山管見略露一斑良久云短歌不能長

無師充塞大唐國唾酒糟漢會不得竹寺閒過春已

深落花亂點莓苔色佛慧泉

岐分絲染太誇誇葉綴花聯敗祖曹妙握司南造化

柄水雲器具在甄陶屏割繁碎剪除氎毛星衡藻鑑

玉尺金刀黃檗老察秋毫坐斷春風不放高天童覺

身上著衣方免寒口邊說食終不飽大唐國裏老婆

禪今日爲君註破了徑山杲

象外橫該宇宙身聖凡極盡不容塵衲僧意氣合如

此當場誰是奪標人雪竇宗

荊棘林中宣妙義蒺藜園裏放毫光千古萬語無人

會又逐流鶯過短牆慧通且

鬼門貼卦鬼猶驚又見毛頭掃帚星若得過關公驗

正夜深把手御街行中菴空

不是無禪是沒師貓兒尾上繫研槌夜深打殺牀頭

鼠路上行人那得知中峯本

年去年來唾酒糟迷花醉柳浪兒曹雙眸驢糞換却

去含笑臨行奉一年紫柏可

得意扁舟挂滿帆好風面面絕遮欄笛聲吹盡梅花

調落日潮生五月寒大嶺丕

大唐國裏無禪師  
午夜霜天月影遲  
逗到更闌人跡少  
却將紈扇掩花枝

法林音

黃檗因百丈問甚處來師曰大雄山下采菌子來  
曰還見大蟲麼師便作虎聲丈拈斧作斫勢師遂  
與丈一擗丈吟吟而笑便歸陞堂謂衆曰大雄山  
下有一大蟲汝等語人也須好看百丈老漢今日  
親遭一口

仰山問潞山作麼生潞云百丈當時便合一斧斫殺  
因什麼到如此仰云不然潞云作麼生仰云百丈祇  
解騎虎頭不解把虎尾潞云子甚有嶮崖之句 五  
祖戒云百丈大似做賊人心虛黃檗熟處難忘 雲  
居莊云盡道百丈無陷虎之機黃檗有超師之作如  
斯理論刺腦入膠盆以拂子畫一畫云劈開華嶽連  
天秀放出黃河徹底清 渠菴成云百丈有陷虎之  
機黃檗有齧鐵之用齧拶相逢足可觀光惜乎未領  
其終致使古今不了 林友卉云盡謂黃檗機用超  
師百丈深爲讚賞殊不知老賊處心不良深深掘個  
陷穽縱饒黃檗牙爪通身畢竟不能跳出

箭鋒相拄自無差理合天然子奉爺大地撮來無寸  
土太阿三尺定龍蛇

智觀慧

黃檗因百丈問運闍黎開田不易師曰隨衆作務  
丈曰有煩道用師曰爭敢辭勞丈曰開得多少田  
也師將鋤築地三下丈便喝師掩耳而去

瑯琊覺云百丈一喝垂絲於萬丈潭中黃檗掩耳獨  
聳於千峰頂上 潞山詰云黃檗開田功不浪施百  
丈住持令不虛行

相見言談理不虧等閒轉面便相揮畢竟水須潮海  
去到頭雲定覓山歸龍門遠

黃檗因六僧新到五人作禮一人提起坐具作一  
圓相師曰我聞有一隻獵犬甚惡曰尋羶羊聲來  
師曰羶羊無聲到汝尋曰尋羶羊迹來師曰羶羊  
無迹到汝尋曰尋羶羊蹤來師曰羶羊無蹤到汝  
尋曰與麼則死羶羊也師便休去明日上堂曰昨  
日尋羶羊僧出來僧便出師曰昨日公案未了老  
僧休去你作麼生僧無語師曰將謂是本色衲僧  
元來祇是義學沙門連棒打出

翠峰顯云祇如聲響蹤跡既無獵犬向甚處尋逐莫是絕聲響踪跡處見黃檗麼諸禪德要明陷虎之機須是本色衲子 古南門云黃檗鉤頭有餌者僧隨鉤直上雖然既是獵犬因甚羴羊到面前也不識當時待黃檗云羴羊無聲到汝等便把住云者老漢元來祇在者裏縱黃檗有陷虎之機又向甚處施設龍華體云當時待道羴羊無聲到汝等便好云不勞再勘拂袖便出直饒黃檗迴身是眼也鑑伊不出

黃檗在鹽官殿上禮佛時唐宣宗爲沙彌問曰不著佛求不著法求不著僧求長老禮拜當何所求師曰不著佛求不著法求不著僧求常禮如是事彌曰用禮何爲師便掌彌曰太蠢生師曰者裏是什麼所在說蠢說細隨後又掌

膝下黃金貴掌中天地寬風雲欣際會四海盡滄寒  
西巖慧

轟雷掣電奮全機正值潛龍睡熟時忽地夢回春恨斷曉風吹雨過前溪閒極雲

黃檗曰自達磨大師到中國惟說一心惟傳一法

以佛傳佛不傳餘佛以法傳法不說餘法法卽不可言之法佛卽不可取之佛佛乃本源清淨心也瑞巖愍云黃檗將達磨大師鼻孔出氣將謂無人檢點山僧不是抑他威光祇要家平戶怙

黃檗在南泉爲首座一日齋時捧盃向南泉位中坐泉入堂見乃問長老甚年行道師曰威音王已前泉曰猶是王老師兒孫師便捧盃過第二位坐泉休去

潯山祐云欺敵者亡仰山云不然須知黃檗有陷虎之機潯云子見處得與麼長 翠峰顯云可惜王老師祇見雞頭利我當時若作南泉待伊道威音王已前卽便於第二位坐令黃檗一生起不得雖然如是也須救取南泉 雲峰悅云盡道黃檗有陷虎之機南泉有殺虎之用殊不知者老賊有年無德喫飯坐處也不依本分若向雲峰門下說甚威音王已前更有大於王老師者直須喫棒趁出 徑山泉云何待問他甚年行道纔入堂見他在主位便捧鉢向第二位坐直饒黃檗有陷虎之機擬向甚處施設 寶華

忍云有收有放互換主賓黃檗固是作家不但騎虎頭亦解收虎尾南泉更爲好手爲山云欺敵者亡也是火上著油仰山云須知黃檗有陷虎之機大似冷處著把火四大老分疆列土各自稱尊全提則俱全提敗闕則俱敗闕今日將四大老縛做一團拋向諸人面前了也還有爲四大老出氣者麼靈隱禮云祇將者兩個漢放在語下作個註脚今日有坐山僧位者麼有則山僧捧鉢便歸方丈看他作麼生合煞彼此老來誰記得人前各自強惺惺一坑未免俱埋却幾個如今眼子青龍門遠

威音王佛是兒孫王老當時開大言黃檗見機分主伴典型千古定宗門疎山如

明明攪動一缸屎却把麝香燒旖旎許多香氣不曾聞渾身坐在屎缸裏蒙菴岳

一往軍旗利今何陷不仁多因征伐熾竟虧王者倫道隆興

黃檗一日捫拳曰天下老和尚總在者裏我若放一綫道從伊七縱八橫着不放過不消一捫僧便

問放一綫道時如何師曰七縱八橫曰不放過時如何師曰普

雲門偃因僧問如何是七縱八橫門云念老僧年老云如何是普門云天光回照云如何是天光回照門云路皆少人知

黃檗行脚時寓大安寺因裴休入寺指壁間畫像問僧何像僧曰高僧真儀公曰真儀可觀高僧何在僧無對公問此間有禪僧否僧曰近有一僧投寺執役頗似禪者令請相見乃理前問真儀可觀高僧何在師則聲喚相公公應諸師曰在什麼處公有省

徑山杲云裴公將錯就錯脫盡根塵黃檗信口垂慈不費腕力似地擎山不知山之孤峻如石含玉不知玉之無瑕雖然如是黃檗祇有殺人刀且無活人劍今日大資相公或問雲門真儀可觀高僧何在雲門亦召相公公若應諾雲門卽向道今日堂中特謝供養天寧琦云裴相國道高僧何在分明換却眼睛黃檗便召相公剛把鉢盂安柄老妙喜與人錯下註

脚便道似地擎山不知山之孤峻如石含玉不知玉之無瑕錯過了也天寧則不然亦召相公公應諸劈脊便棒免教者漢向死水裏淹殺 博山奉云黃檗因風吹火用力不多檢點將來祇有殺人刀且無活人劍

鄧城寶劍沉埋久一道寒光射斗牛不是張華辨端的祇應千古枉拖留惹受深

翰墨場中喚得回桂林昨夜覺開暗香漏泄堪題處散作人間調鼎才自得輝

花椒舖上天靈蓋郵店那來人見愛一遇耆婆顧盼過價高從此世無寶瑟子選

黃檗遊天台路逢一僧如舊識熟視之目光射人乃偕行屬澗水暴漲植杖而立僧率同渡師曰兄要渡自渡僧乃褰衣躡波若履平地回顧曰渡來渡來師曰咄者自了漢我早知當斫汝脛其僧嘆曰真大乘法器我所不及

慧雲盛云黃檗當時見他渡去好向道你祇解恁麼去不解恁麼來待其轉來拈拄杖痛與一頓

道人猛利能親近漾笠中流驗作家憶昔高人何處去夜深明月色平沙虛堂愚

可溪綠雨初晴浮笠波心掌撐半伎兩由來祇此放教急急奔前程石溪月

黃檗到京行化至一家門首吟添益聲一嫗出棘扉問曰太無厭生師曰尚未布施何言太無厭生嫗便閉却門師異之

千尺絲綸直下垂錦鱗後刺上鉤時斜風細雨歌歸去醉倒蓬牕百不知別峰印

添鉢家常乞食時柴門掩處莫遲疑白拈手段重拈起鐵眼銅睛換却伊野牛平

蠅見血鷄捉鴿爭來踢膠漆相投難提掇處轉風流虛堂愚

黃檗因裴相國捧一尊像跪請曰乞師安名師召相公公應諾師曰與汝安名竟公拜曰謝師安名翠峰顯代裴公當時便喝 徑山杲云二老可謂如水入水檢點將來不無滲漏今日蔡郎中或捧一尊像請雲門安名即向道清淨世身毗盧遮那佛若云



謝師安名更向道下坡不走快便難逢 天寧琦云

裴公捧像黃檗安名冷地看來如阿家教新婦相似

直是好笑笑須三十年妙喜既不能坐斷未免隨例

顛倒便喚作清淨法身毗盧遮那佛周人以柏般人

以栗 大義蜀云裴公謾天索價黃檗就地還錢雖

然占得便宜未免傍觀者哂且道是賓家是主家

裴相當時忘却名被人喚著又惺惺不知未具胞胎

日誰敢塗糊此性靈佛印元

裴公悟處絕諸譌尺水能翻萬丈波霹靂機中反活

眼鋒鉞句裏罷干戈峰頭路暫經過濃綠萬枝紅一

點動人春色不須多湛堂深

土木形骸權號佛呼來喚去強名誰要知個裏難安

立相國須當大姓裴開極雲

黃檗因南泉問什麼處去師曰擇菜去泉曰將什

麼擇師豎起刀子泉曰汝祇解作賓不解作主師

以刀子點三下

黃龍新云今時師僧往往將南泉黃檗作擇菜會却

黃檗因南泉曰老僧有牧牛歌請長老和師曰希

運自有師在因辭泉泉門送提起笠子曰長老身

材大笠子太小生師指笠曰大千沙界總在裏許

泉曰王老師吟師戴笠便行

相見錦江頭相攜上酒樓會醫還少病知分不多愁

龍門遠

游刃恢恢饒有地目中無復見全牛動絃能別曲葉

落早知秋一笠藏千界一步過閭浮收虎尾騎虎頭

更嫌何處不風流平陽恣

杭州大慈寰中禪師百丈海嗣上堂山僧不解答話祇

解識病時有僧出師便歸方丈

法眼益云衆中喚作病在目前不識 報慈遂云且

道大慈識病不識病者僧出來是病不是病若言是

病每日行住不可總是病若言不是病出來又作麼

生 翠峰顯云大凡扶豎宗乘須辨個得失且大慈

識病不答話時有僧出便歸方丈雪竇識病不答話

或有僧出劈脊便打諸方識病不答話有僧出必然

別有長處敢有動著大唐天子祇三人 翠巖芝云

昔僧出來大慈歸方丈並無個道理甚麼處是識病

處也須仔細 黃龍南云可惜放過當時見伊出劈

脊便打待伊知得行棒來處免見千古之下遭人檢

點黃龍今日也識病會答話忽有個漢出來掀倒禪

牀合作麼生支準諸上座請代一轉語看 天童覺

云大慈翠峰二俱作家要且祇顧目前不防脚下或

有個不識好惡底漢出來便掀倒禪牀直饒你全機

大用祇恐做手脚不辦正當恁麼時還有識病底眼

麼 保寧茂云大慈祇好依方修合自病却難下藥

南堂欲云翠峰可使千古流芳要且未得剝絕若

據山僧見處直須打了挖出何故大海不宿死屍

平陽恣云大唐天子祇三人翠峰太煞肋臂自點諸

方必然別有長處布袋裏盛錐子不吐頭是好手雖

然既已見義不爲非勇如今山僧亦識病不答話若

有僧出便乃呵呵大笑若是諸方長處座中儘有江

南客

輕如毫末重如山地角天涯去復還黃葉殞時風骨

露水邊依舊石欄斑虛堂愚

龍馬負圖也親傳造化神龜浮沙也豈識吉凶當時

透得田單計一縱兵牛信不通天奇瑞

霜催秋葉滿秋山古路無人鳥自還出谷白雲飛不

定數行征鴈影班班三宜孟

興至持竿駕小舟乘風泛入五湖秋櫓聲驚起蘆花

鴈却逐流沙過別洲谷隱啓

大慈因僧辭問甚處去曰江西去師曰將取老僧

去得否曰更有過於和尚者亦不能將去師便休

洞山代云得 法眼別云和尚若去某甲提笠子

汾陽昭代慈云知汝力微 淨因成云者僧可謂擔

頭不泊蠅是則固是要且祇是孤生獨死漢 天童

覺云大慈合作伴不著者僧不如獨行也須是恁麼始

得直饒大慈古佛也不奈者擔板漢何且道者漢別

有什麼長處 寶壽方別云某甲無者閒氣力

大慈示衆說得一丈不如行取一尺說得一尺不

如行取一寸

洞山价云說取行不得底行取說不得底 雲居膺

云行時無說路說時無行路不行不說時合行甚麼

路 洛浦安云行說俱到則本分事無行說俱不到

則本分事在 天童覺云絕是非沒踪跡相逢不識  
面識面不相逢諸尊宿各有長處如今舌頭上無十  
字關脚跟下無五色綫要行便行要說便說若有人  
問如何是要行便行向伊道步如何是要說便說向  
伊道啊

大慈因趙州問般若以何爲體師曰般若以何爲  
體州呵呵大笑而出師明日見趙州埽地次却問  
般若以何爲體州放下埽帚撫掌大笑師便歸方  
丈

翠峰顯云前來也笑後來也笑笑中有刀大慈還識  
麼直饒識得也未免喪身失命 馮山語云纔見呵  
呵大笑便與一掌明日問待伊大笑又與一掌大慈  
若下得者兩掌可謂生鐵鑄就風吹不入宗師家一  
等搖撼乾坤直教如旱天霹靂萬里無雲轟一聲教  
他眼目定動豈不俊哉要識二老麼莫怪從前多意  
氣他家曾謁聖明君 黃龍新云趙州金鎗不辨玉  
石不分直饒分去也未夢見大慈在 黃龍震云般  
若非是無體二老不能知般若非是無用二老不能

用若是能知能用一言可以截斷衆紛何必再三  
南華曷云兩個漢祇解掩耳偷鈴不解移風易俗或  
有問南華般若以何爲體勢脊便打待伊眼目定動  
却問般若以何爲體伶俐漢忽然踴著必定自知落  
處 古南門云翠峰與賊過梯占南則不然前來也  
笑後來也笑則眼衲僧分疎不下忽有個漢出來道  
以何爲體呵呵笑推到當頭陷虎機烏帶香從花裏  
出龍含雨向洞中歸心問責

玉勒金鞍出帝都杏花山由柳扶蘇一鞭一步春風  
裏踴躍狀元驚去國驚歸

天台平田普岸禪師百丈游歸訪茂源源纔起迎師便

把住曰開口即喪閉口即喪去此二途請師別道

源一手掩鼻師放問曰一步較易兩步較難源曰

著甚死處師曰若非和尚不免落方檢點

主山高與案山低幾見雲開又合時彷彿暮霞堪對

處兩峰相似正淒淒絕象鑑

斷撲撲逢是對頭爭來踢去兩相酬中間手面交加

處鶻眼鷹睛莫可求竹屋簡

平田因僧參師打一拄杖僧近前把住拄杖師曰  
老僧適來造次僧却打師一拄杖師曰作家作家  
僧禮拜師把住曰是老僧造次闍黎造次僧大笑  
師曰者箇師僧今日大敗也

鼓山賢云平田伸縮安閒自是慣戰老將者僧前倨  
後恭這他活陷這個弄巧成拙雖然今日討者師僧  
亦不可得

祖令初行亦可觀從它互換太無端幸然打著其閒  
漢卿賊終來識不難本覺一

廣州安和寺通禪師百丈海嗣仰山作沙彌時一日喚

寂子與我將牀子來山將到師曰却送舊處著山  
從之師復召寂子山應諾師曰牀那邊是什麼物

曰枕子師曰者邊是什麼物曰無物復召寂子山

應諾師曰是什麼山無對師曰去

高峰妙云潦倒安和用心不臧仰山命蹇爲魅所著

山僧怎麼道也是通風乘炬

宗鑑法林卷十五

宗鑑法林卷十六

集雲堂 編

大鑒下四世

福州長慶大安禪師百丈海嗣住瀉山時號懶安室中

每問僧有句無句如藤倚樹意旨如何疎山仁聞

特入嶺請益值師泥壁天便問有句無句如藤倚

樹豈不是和尚語師曰是曰忽遇樹倒藤枯句歸

何處師放下泥盤呵呵大笑歸万丈山隨後曰某

甲三千里賣却布單特爲此事而來和尚何得相

弄師喚侍者取錢二百與者上座去且囑曰向後

有獨眼龍爲汝點破在山後到明招處舉前話招

曰瀉山可謂頭正尾正祇是不遇知音山亦不契

猶問樹倒藤枯句歸何處招曰却使瀉山笑轉新

山大悟乃曰瀉山元來笑裏有刀遙禮悔過

瑯琊覺云有句無句如藤倚樹樹倒藤枯好一堆爛

柴 開福寧舉有句無句語了良久云會麼深秋簾

幙千家雨落日樓臺一笛風 天目禮云有句無句

如藤倚樹坐斷千差毒蛇當路樹倒藤枯句歸何處

老僧直得五年分疎不下 高峰妙云有句無句金  
烏吞玉兔如藤倚樹癩馬繫枯椿樹倒藤枯一冬燒  
不盡句歸何處石虎當途踞呵呵大笑龍頭蛇尾捺  
倒爛泥裏剛刀不斬無罪之人且道馮山過在甚處  
乃呵呵大笑下座 報恩秀云當時若問萬松樹倒  
藤枯句歸何處但向道蒼天蒼天爲什麼不見道春  
行冬令

樹倒藤枯呵呵大笑不許夜行投明須到遊子貪程  
去不歸及至歸來親已老親已老不須嗟猶勝當日  
未還家佛慧泉

樹倒藤枯伸一箇呵呵大笑有來由驢羊挂角無尋  
處直至如今笑未休海印信

冷刀吹毛笑裏來慳迦羅眼不容栽一目金龍曾學  
爪髑髏覺痛頂門開大洪頂

江海閒把直鉤垂也有金鱗上釣時三跳若能乘變  
化免教漁父皺雙眉枯木成

掀翻海嶽求知已雪刃橫身立太平野老不知堯舜  
力蓼蓼打鼓祭江神木菴永

若將此語定綱宗孤負明招獨眼龍笑裏忽分泥水  
路方知千里共同風徑山果

樹倒藤枯笑未休箇中誰解辨宗由堂堂差路馮山  
老空去空來一肚愁楚方安

笑裏憑誰眼豁開龜毛須向火中栽脚跟有路雲泥  
隔千里區區謾往來湛堂深

轉得眼來十萬里千江雨市寒波起若能借便使風  
帆無明海裏尋知已中菴空

領得馮山笑裏刀方知不枉到明招元來樹倒藤枯  
後了得三年五載燒石林叢

白雲一片迷幽谷要把虛空尋面目逢人點破便知  
非翻身跳入野狐窠未覺賢

關心一語累胸頭歲月忘風是幾秋不爲絕情人不  
忍焉知談笑有戈矛雪奇靜

芍藥花開滿院香佳人閒繡羅衣裳重重錦縫無人  
識別綫牽成雙鳳凰晦石琦

長慶口僧問一切施爲是法身用如何是法身師  
曰一切施爲是法身用曰雖却五蘊如何是本來

身師曰地水火風受想行識曰者箇是五蘊師曰者箇異五蘊

一亘晴空猶是翳千波競湧未爲濤兩途拈却無情

謂處處春風綻柳桃雪關關

洪州百丈涅槃禪師百丈海嗣一日謂衆曰汝等與我

開田了我爲汝說大義偈開田了請和尚說大義

師展兩手示之據全書攷柳碑爲正

白雲端云百丈說大義祇止於此當時再參馬祖底

向甚處去也若言更有在未免與蛇畫足且道作麼

生見得百丈老人立地處乃云客來無茶點蒿湯當

禮儀 嵩山詰云百丈說大義可謂今古罕聞光前

絕後大瀉即不然但向道開田勞力請歸堂歇教他

天下衲僧亡鋒結舌何故鶴有九臯難翥翼馬無千

里謾追風 天童華云白雲要見百丈再參馬祖底

直是好笑笑須三十年又道作麼生得知百丈立地

處也與笑三十年客來無茶點蒿湯當禮儀也與笑

三十年三笑而九十年爲復笑白雲批判未當爲復

別有道運諸人檢點得出山僧拄杖兩手分付苟或

未然幾度醉歸明月夜笙歌引出畫堂前

展開兩手當時說大義流通滿世間莫謂入荒田不

揀而今到處草漫漫牧菴忠

大義開田剎祖基分明書契示傳持兒孫不肯遺先

業乞食年年役路岐懶菴需

普請開田力已齊紛紛帶水又拖泥展開兩手人休

問昨夜三更月落西此菴元

滯貨多年要脫身巧粧綺語說諸人及乎拈出當陽

賣索價遼天誰敢親高峰妙

誅秦破磧碎文章戴笠披蓑古道場大義自來無蓋

覆何勞展手更商量石湖泐

趙州觀音院從諗禪師南泉願嗣初謁南泉泉問汝是

有主沙彌無主沙彌師曰有主沙彌曰那箇是你

主師近前躬身曰仲冬嚴寒伏惟和尚尊候萬福

泉器之許其入室

解把一莖野草喚作丈六金身會得頭頭皆是道眼

中瞳子面前人顏如如

試問如何是主人進前叉手敘寒溫但知北極羣星



拱不見黃河徹底渾寶葉源

趙州一日問南泉如何是道泉曰平常心是道師曰還可趨向也無泉曰擬向即乖師曰不擬爭知是道泉曰道不屬知不屬不知知是妄覺不知是無記若真達不疑之道猶如太虛廓然蕩豁豈可強是非耶師於言下悟理

馮山果云恁麼也不得不恁麼也不得恁麼不恁麼時如何豎拂子云鯨吞海水盡露出珊瑚枝靈隱  
獄云青天白日悟箇什麼咄咄驪珠擊碎蒼龍窟  
經山琇云古人將心肝五臟一時吐露了也摩霄俊鶴便合乘時止潏困魚徒勞激浪獨立蓮云考般說話正是鬧市裏颺戲輒相似直是著者方知趙州既是打著當下如暗得燈如貧得寶粉骨碎身未足圖一句了然超百億

若謂平常心是道枝蔓向上更生枝貼肉汗衫如脫了喚來眼上與安眉鼓山珪  
勸君不用苦勞神喚作平常轉不觀冷淡全然沒滋味一回學著一回新徑山泉

白日遲遲兮花菲菲白雲流水兮兩相依長安路上人跡稀南泉也落第二機慈受深

玄途不涉透離微道合平常發上機無影樹頭春色曉金鷄啼在不萌枝足菴鑒

悟得平常達本鄉時人多怕落平常青春祇有九十日爛醉都無一百場雪菴瑾

趙州因僧問如何是毗盧頂相師曰老僧自小出家不曾眼花

天童華云大小趙州語上偏枯若有問天童如何是毗盧頂相但向道大底大小底小天童傑云若向趙州語下見坐殺天下衲僧若向應菴語下見走殺天下衲僧山僧又且不然忽有問祇向道颺輒

趙州因僧問如何是清淨伽藍師曰丫角女子曰如何是伽藍中人師曰丫角女子懷胎

橫胸抱腹藏龍種剖膽披肝觸鳳胎勿謂此兒容易得須知出自痛腸來汾陽昭

丫角女子出天真清淨伽藍蓋得人世俗不知林下意無錢難得買紅裙佛鑑勸

高空秋色有誰知  
畫閣佳人展笑眉  
自惜容顏人不見  
臨風頻把玉簫吹  
笠山寧

丹青下筆絕躊躇  
應手便成山水圖  
懸向堂前人盡看  
知他何處是工夫  
履巖斯

趙州因僧問未有世界  
早有此性世界壞時此性  
不壞如何是不壞之性  
師曰四大五蘊曰此猶是  
壞底如何是不壞之性  
師曰四大五蘊

昭覺勤云千尺寒潭徹底清

趙州因僧問方外忽有人問  
趙州說什麼法如何  
抵對師曰鹽貴米賤

鹽貴米賤諸事成現擬欲商量  
腦後拔箭額菴

趙州因僧問如何是出家  
師曰不履高名不求苟得

允藏顯云者僧問極平常  
趙州答無奇特雖然如是  
爛泥裡有刺切忌蹈著

三途迴絕出家兒身不寒  
分腹不饑竹杖敲殘山頂  
月倒吹鐵笛詠新詩無異本

趙州因僧辭問甚處去  
曰諸方學佛法去師聖佛

曰有佛處不得住無佛處急走過  
三千里外逢人不得錯舉  
曰與麼則不去也師曰摘楊花摘楊花  
徑山杲云有佛處不得住生鐵秤  
錘被蟲蛀無佛處急走過撞著  
嵩山破竈墮三千里外逢人不得錯舉  
兩箇石人相耳語恁麼則不去也  
此語已行徧天下摘楊花摘楊花  
庵摩尼達哩吽噯吒天童覺云沉  
空滯跡犯手傷鋒俱未是  
衲僧去就直須不入人行市不上  
他床榻正不立玄偏不附物方能  
把住放行有自由分靈隱嶽舉  
徑山語畢云大慧老人盡力祇道  
得到者裏還知香山落處麼鐵山  
崩倒壓銀山盤走珠兮珠走盤  
密密鴛鴦閒繡出金鍼終不與人  
看天寧琦云妙喜老祖唱之於前  
天寧遠孫和之於後門前種高苳  
高苳生火筋火筋開蓮華蓮華結  
木瓜木瓜忽然顛落地撒出無限  
白芝蕪何也祇要入拍寶壽新云  
斬新鐵蒺藜直透兩重關欲透兩  
重關嶺頭依舊月彎彎法林音舉  
徑山語畢云徑山老人事負他趙  
州不少法林不懂諸方檢責也隨  
處有佛處不得住火星入禪無佛  
處急走過遭殃

帶禍三千里外莫錯舉十字街頭惡又聚怎麼則不去也笑倒東村王大姐摘楊花摘楊花古墓毒蛇頭帶角南山猛虎尾髦髻怎麼道祇是辜負他妙喜喝一喝云徒將未歸意說與欲行人

截斷三關過者稀臨鋒誰解振全威楊花摘處何人見風送滿天似雪飛佛慧泉

青山不異白玉無瑕茫茫流水擾擾黃花有佛處纖毫立無佛處萬別千差長安路上未歸客尋溪僧自摘楊花天童覺

無奈雪霜苦怕見楊花落打破趙州關清風滿寥廓愚菴及

不行鳥道不居鴈醉眼摩娑白晝眠謾道逢人不錯舉摘楊花是季春天博山來

長亭短亭匆匆莫已不禁分手詩吟連理寄菴

趙州因僧問三身中那箇是本來身師曰缺一不

可

義山訥云大小趙州被人一撈直得分疎不下今日若有恁麼問山僧便起身叉手而立待它眼目定動

劈脊便打

趙州因僧問曾聞和尚親見南泉是否師曰鎮州出大蘿蔔頭

東塔煮云或有問東塔問和尚親見龍池是否但問道問話即得禮拜了退 青龍操云趙州塞者僧口則得塞天下人口則難

陶潛彭澤惟栽柳潘岳河陽祇種花何似晚來江上望數峰蒼翠滿漁家海印信

趙州古佛尙多言蘿蔔出生鎮府田天下衲僧多敲齧齒間蹉過老南泉文殊道

參見南泉王老師鎮州蘿蔔更無私拈來塞斷是非口雪曲陽春非楚詞徑山泉

鎮州出大蘿蔔頭師資道合有來由觀音寺裏有彌勒東院西邊有趙州鼓山珪

青出於藍冰生於水寸步不通白雲出里或菴體

些兒活計口皮邊點著風颭與電旋謾說鎮州蘿蔔大何曾親見老南泉石菴詔

福州荔枝青州棗萬物無過出處好爐裏揀底不是

精金細箱蓄者非是至寶趙州本爲定干戈惹得烽  
烟空嫋嫋三宜孟

趙州因秀才問佛不違衆生願是否師曰是曰某  
甲欲覓和尚手中拄杖得否師曰君子不奪人所  
好曰某甲非君子師曰我亦不是佛

義山訥云趙州古佛與奪自由自非過量人未免向  
是非窠裏走却海門涌云趙州當時何不兩手授  
之待擬接劈脊便打不惟使他慶快平生亦使後人  
知我衲僧家別有作用

當機轉處不躊躇瑠璃盤內走明珠趙州老子村校  
書一條拄杖兩人舁石菴瑤

奪鼓擎旗許趙州開疆展土尙虧謀不因病久知鍼  
穴難定灸焦癥上頭松山補

趙州參百丈丈問甚處來師曰南泉來曰南泉近  
日有何言句示徒師曰無事之人祇須悄然去曰  
悄然一句且置茫然一句作麼生道師進前三步  
丈便喝師作縮身勢丈曰大好悄然師便出去

瑯琊覺云趙州老人向獅子窟中換得爪牙 昭覺

勤云作家相見彼此難構茫然悄然進前退後捏不  
成塑不就大路不行草裏走 平陽恣云賊是小人  
智過君子雖然有一正賊有一草賊

門裏有門外有不作君平犯牛斗獅子吼野干鳴摘  
出離婁眼裏睛一手縮一手伸重陽決定九月九掀  
翻海嶽訪知音赤骨徃窮露雙肘瞎堂遠

趙州因官人問和尚還入地獄否師曰老僧未上  
入地獄曰大善知識爲什麼却入地獄師曰我若  
不入阿誰教化你

福嚴容云趙州老漢手脚不同不惟入水拖人且能  
面奪旗幟雖然未免露柱勘破

突出無孔一鐵鎚仙陀碧眼車攢眉他家自有通霄  
路逐氣尋聲那得知天谷照

趙州示衆佛之一字吾不喜聞

幻覺菴云諸人切忌恁麼會既不恁麼會又作麼生  
會乃頌

佛之一字不喜聞去年依舊今年春今年春間降大  
雪陸墓烏盆變白盆

碧天雲淡晚風寒醉把瑤琴月下彈將謂調高人不知誰知自被指頭瞞侶巖前

趙州晚參今夜答話去也有解問者出來時有一

僧使出禮拜師曰比來拋輓引玉却引得箇墜子覺鐵業因法眼問先師意作麼生覺云如國家拜將乃問甚人去得或有人出云某甲去得須云汝去不得眼云我會也長慶稜問覺鐵業那僧纔出禮拜爲甚麼便將爲墜子覺云適來那邊亦有人怎麼問慶云向伊道什麼覺云亦向伊怎麼道寶壽沼云射虎不真徒勞浪羽報慈遂云甚麼處却成墜子去藥林中道纔出來便成墜子祇如每日出入行住坐臥不可總成墜子且道者僧出來具眼不具眼翠峰顯云靈利漢聞舉便知落處然雖如是放過覺鐵業夫宗師語不虛妄出來必是作家因甚拋墜子玉要識趙州麼從前汗馬無人識祇要重論蓋代功昭覺勤云盡道趙州得逸羣之機一期施設不妨自在者僧要擊節扣關閃電光中卒做手脚不辨覺鐵業能近取譬不墜宗風法眼有通方鑑才便知落

處敢問諸人既是宗師爲甚麼拋輓祇引得箇墜子探竿影草幾人知正似將軍一面旗斬將安營都在我倒騎驢馬上須彌惹受深

千年田八百主誰當機辨來處趙州要答話拋輓引墜子覺老話端倪如拜將相似去得去不得言下分繩素箇裡高於萬仞峯不動纖毫擒佛祖圓悟勤

趙州問南泉道非物外物外非道如何是物外道泉便打師捉住棒曰已後莫錯打人去泉曰龍蛇易辨衲子難瞞

翠峰顯云趙州如龍無角似蛇有足當時不管盡法無民直須喫棒了趁出古南門云南泉真箇憐兒不覺醜若是其人何待人趁自須掩鼻便出

軟繩藏鋒入陣來盡將擒下眼掌開死生一決英雄士文武雙行將相才保軍勇

要別真金裏識棒頭有眼明如日賞罰明兮禮樂全作家父子誠難得梅谷悅

趙州因僧問如何是佛師曰殿裏底曰殿裏底豈不是泥龕堞像師曰是曰如何是佛師曰殿裏底

酸甜滋味本天然帶葉連枝顆顆圓南瞻部洲人未識庵摩羅果信虛傳保寧勇

不立孤危機本峻趙州老子玉無瑕當頭指出殿裏底剗漚茫茫眼裏花雪堂行

一尊殿裏佛兩度放毫光準擬酬高價無疑亂度量蒙施聰

九九昨朝八十一夜夢不祥書門吉東村王老祭清明錯費鐵錢三百漢關喙

趙州問沙彌喝參向侍者曰教伊去侍者纔教去沙彌便珍重師曰沙彌得入門侍者在門外

雲居錫云什麼處是沙彌得入門侍者在門外者裏會得便見趙州注林音云者裏會得辜負趙州天

植維云青天白日雷霆驚羣剖出五臟心肝與人解黏去縛就中可惜當門栽荆棘致令多少人進退不

得還有出得底麼喝一喝

得入門在門外說向人不會更高聲我耳背

鼓山挂

瑟瑟風松蕭蕭雨檜師子敲人韓獪逐塊徑山泉

斑鳩黃鳥共春風花裏交曉怨落紅鶴背仙人吹玉

箇雙雙驚起碧雲東綠雨蕉

趙州因僧問狗子還有佛性也無師曰無曰上至

諸佛下至螻蟻皆有佛性狗子爲甚麼却無師曰

爲伊有業識在又僧問狗子還有佛性也無師曰

有曰既有爲甚麼入者皮袋裏來師曰知而故犯

翠巖芝云說有說無兩彩一賽如今作麼生資福

觀因僧問狗子爲什麼無佛性福云逢人便敲殺云

因甚麼又道有佛性福云見主便搖尾

言有業識在誰云意不深海枯終見底人死不知心

真淨文

有無雙放便雙收趙老機關世莫儔試上海門高處

望千江萬派盡東流普融平

佛性分明脫有無酢酸何用挂葫蘆薄霧輕烟留不

住扁舟已過洞庭湖瞎堂遠

無直路却紫紆趙州東壁上依舊挂葫蘆有張公喫

村酒李公醉不醒面南看北斗石菴珙

狗子佛性無斫額路上逢子湖業識性在遭一口大

地全無碧眼胡狗子佛性有春風吹動千株柳知而



故犯可憐生一一面南看北斗無庵全

狗子佛性有狗子佛性無直鉤原求負命魚逐氣尋  
香雲水客嘈嘈襍襍作分疎平展演大舖舒莫怪儂  
家不愼初指點瑕玼還起璧秦王不識蘭相如

天童覺

狗子有賣扇老婆日遮手狗子無種瓜先得喫葫蘆  
天稟元來各不同盧仝不飲劉伶酒三宜孟

趙州因僧問狗子還有佛性也無師曰無

趙州露刃劍寒霜光燄燄更擬問如何分身作兩段

五祖演

力壯年高膽更雄清風隨虎雲從龍哇咻無限尋聲  
跡挂角羶羊不見蹤寶峰祥

趙州狗子無佛性萬疊青山藏古鏡赤腳波斯入大

唐八臂那吒行正令開巖

乙巳大人丘葵林爲寇讎利牙如劍戟生殺有來由

南巖勝

連馬連人劈一刀虛空迸血湧波濤千千萬萬人爭

看誰解分開蓋膽毛中菴空

狗子佛性無老蚌吐明珠西川鳴杜宇江南鳴鷓鴣

文殊道

趙州狗子無佛性當空掘出秦時鏡光明渾不見星  
兒上下四維皆徹映誰菴演

大食波斯飲百杯停停把柁商人魁逆風使過黃牛  
峽不問瞿塘灘瀨堆東山空

狗子無佛性羅睺星入命不是打殺人被人打殺定  
南書記

二十四州鐵鑄成一箇錯颺在大街頭無人踢得著

明菴然

無之一字殺人無數多少英雄橫屍當路鎮山仁

二八佳人刺繡遲紫荊花下嘯黃鸝可憐無限傷春

意盡在停鍼不語時劫堂仁

趙州狗子佛性無十分春色播江湖幾多摘葉尋枝

者空使雛陽花滿途高峰妙

長江一望渺寒烟極目中流四惘然可惜夜深明月

下更無人問渡頭船愁山清

家家有幅遮羞布放下便能當雨露獨怪當年老趙

州擲却頭巾頂却禪石兩方

何處秋風起蕭蕭送鴈羣朝來入庭樹孤客最先聞  
且拙訥

石梁橋背滑如苔一派銀河直下催今古遊韃蹋未  
倦幾人摘取瀑花回鏡堂清

趙州上堂金佛不度爐木佛不度火泥佛不度水  
眞佛屋裏坐

徑山杲云趙州和尚吐心吐膽怎麼告報了也還有  
知恩報恩者麼 仰山欽云揭示如來正體發明向  
上宗猷趙州固是好手祇是不合強生節目山僧見  
處又且不然金佛度爐木佛度火泥佛度水眞佛除  
切忌話墮忽有箇漢出來道你怎麼說正是強生節  
目拍膝一下云將謂無人證明

泥佛不度水神光照天地立雪如未休何人不雕僞  
翠峰顯三

金佛不度爐人來訪子湖牌中數箇字清風何處無  
木佛不度火常思破竈墮杖子忽擊著方知孤負我  
木佛不度火甘露臺前逢達磨惆悵洛陽人未來面  
壁九年空冷坐三聖昌三

金佛不度爐坐歎勞生走道途不向華山圖上看豈  
知潘園倒騎驢

泥佛不度水一道靈光照天地堪羨玄沙老古雖不  
要南山要鰲鼻

三佛形容總不眞眼中瞳子目前人若能信得家中  
寶啼鳥山花一樣春治父川

泥佛不度水毗嵐風忽起大地黑漫漫衲僧爭敢視  
高峯妙三

金佛不度爐鐵裏夜明珠一槌俱粉碎清光何處無  
木佛不度火掣開金殿鎖內外絕遮攔時人猶懣懣  
趙州因尼問如何是密密意師以手招之尼曰和  
尚猶有者箇在師曰却是你有者箇在

法林音云當時待他道和尚猶有者箇在何不使休  
去且教他疑三十年

密密深深意最長幾人冷地錯商量師姑若會趙州  
意鐵打心肝也斷腸慈受深

兜羅綿樣硬聲頭河北風流老趙州鹹處著鹽淡添  
水軒渠一笑更無休正堂辨

猛虎深藏淺草窠幾回明月入烟蘿頭門縱有金剛眼未免當頭踉過他高峰妙

趙州因僧問如何是道師曰牆外底曰不問者箇

道師曰甚麼道曰大慈師曰大道透長安

烏石云道石溪則不然有人問如何是道但云昨日

有人從四安來今朝出廣德去且道與趙州是同是

別良久云看脚下 天奇瑞云者僧祇解問路不知

當面蹉過趙州貪渡行人那防失却船錢 大慈頌

云今日有人問如何是道但云富春到天目一百二

十里且道與古人是同是別乃嘘一聲

趙老家風不熱瞞問他大道答長安有誰平步歸家

去多是區區自作難水庵一

大道透長安言端語亦端隱盡雪消去春來依舊寒

松源岳

大道透長安天晴莎艸乾秋涼更快便去去有何難

可惜者僧脚步短舉頭惟見黑漫漫百痴元

宗鑑法林卷十六

宗鑑法林卷十七

集雲堂 編

大聖下四世

趙州因僧問吾界叱率夜降闍浮於中摩尼爲甚  
不現師曰這什麼悟再問師曰毗婆尸佛早留心  
直至如今不得妙

黃龍云趙州老漢若無後語未免奔馳太平則不  
然纔見他道爲甚不現連聲便打教他痛後反思管  
取光明燦爛 天童華云者則公案諸方未有人批  
判齊山今日與諸人著一轉語洗脚上船

趙州上堂至道無爲惟嫌揀擇纔有語言是揀擇  
是明白老僧不在明白裏是汝還護惜也無時有  
管閒說不在明白裏護惜箇甚麼師曰我亦不知  
曰和尚既不知爲甚麼不在明白裏師曰問話即  
得發拜了退

翠峰顯云趙州倒退三千里 天童覺云者僧也如  
切如磋不能見機而變趙州也如琢如磨幾乎事不  
解交與中祇管道退身有分殊不知盡力提持還體

悉得麼焦顛打著連底凍 天童悟云大小趙州大  
似推惡雞已何不與本分草料 古南門云趙州貴  
圖本分不知翻成分外雖然不得五丁力蠶葉路不  
開汝等諸人問甚護惜不護惜并須喫古南棒我今  
爲汝保任此事終不虛也

至道無難言端語端一有多種二無兩般天際日上  
月下檻前山深水寒髑髏識盡喜何立枯木龍吟消  
未乾難難揀擇明白君自看翠峰顯

至簡至易同天同地揀擇明白云何護惜口似椎眼  
如眉涉語默蚊憐夔堪笑卞和三獻玉縱榮別却一  
雙足圓悟勤

亂撒明珠顆顆晶走盤應不貴金聲誰家女子能鍼  
線一串穿來不臘星無菴全

世間無物可羅籠獨有嵯峨萬仞峰忽若有人猛推  
落騰身雲外不留蹤隨菴緣

趙州因僧問至道無難惟嫌揀擇是時人窠窟否  
師曰曾有人問老僧直得五年分疎不下

翠峰顯云識語不能轉死却了也好與二十棒者棒

須有分付處若辨不出且放此話大行復頌  
象王嘯呻獅子哮吼無味之談案斷人口南北東西  
鳥飛兔走

五年分疎不下一句元無縫罅祇知推過商量誰信  
分明酬價玲瓏底相知莽鹵底相訝寧可與曉事人  
相罵不可共不曉事人說話宏智覺

風雨濛濛鳥雲變變最風上山狐狸入海隨後追尋  
龍王不在咄咄堂定

天高地厚尋常事海闊山重更要論霹靂震摧山鬼  
窟獨攜雙劍定乾坤無菴全

瑞鳳五彩祥鸞一角可憐無眼人何處分斑駁斑駁  
分陝府鎮牛沒星秤大嶺不

趙州因僧問至道無難惟嫌揀擇如何是不揀擇  
師曰天上天下惟吾獨尊曰此猶是揀擇師曰田  
庫奴甚處是揀擇僧無語

圓悟勤云人多錯會道至道本無難亦無不難只是  
惟嫌揀擇若恁麼會一萬年也未夢見在  
似海之深如山之固蚊虻弄空裏猛風螻蟻撼波心

鐵柱揀兮擇兮當軒布鼓翠峰顯

團團秋月印天心是物前頭有一輪入穴蝦蟆無出路却冤天道不公平白雲端

當門一脉透長安遊子空嗟行路難不是人前誇俏措金鎚擊碎萬重關無菴全

人頭似鏡官法如爐禾熟登場不納租米裏有蟲麥裏有麩田庫奴至道無難會也無千巖長

趙州因僧問至道無難惟嫌揀擇纔有語言是揀擇和尚如何爲人師曰何不引盡曰某甲祇念到者裏師曰至道無難惟嫌揀擇

水漚不著風吹不入虎步龍行鬼號神泣頭長三尺知是誰相對無言獨足立翠峰顯

驅山塞海也尋常所致文明始是王但見皇風成一片不知何處有封疆白雲端

紫綾紅錦青絲線巧手織來成一片其中縫罅不能無爭奈時人竟不見佛眼遠

日暖風和鶯囀新柳垂金線紫東君東君不惜無私力一點花紅一點春無菴全

趙州因見僧埽地乃問與麼埽還潔淨也無曰轉埽轉多師曰豈無撥塵者曰誰是撥塵者師顧視曰會麼曰不會師曰問取雲居去僧後問雲居如何是撥塵者居曰者瞎漢

古塘云當時待問誰是撥塵者便接過埽帚痛與一頓爲甚如此不見道爲人須爲徹

趙州因僧問道人相見時如何師曰呈漆器

翠峰顯云諸禪德還有識趙州底麼出來共相商量若未能辨明大好從頭舉與你點破四九三十六收古南門云趙州已是無折合翠峰更添鹽添醬雖然還有識得趙州底麼三生六十劫

漱石冷冷古澗陰喬松千尺帶寒青多應祇看昂霄操誰信根頭有茯苓南夏茂

多年神禹碑篆古形猶奇憑誰高著眼撫掌共掀眉雪簇瑞

趙州因僧問白雲自在時如何師曰爭似春風處處閒

爭似春風處處閒花開花落豈相關白雲自在猶難

擬飄鼓無心滿世間佛印元

趙州因僧問學人乍入蔡林乞師指示師曰喫粥了也未曰喫粥了也師曰洗盃盂去其僧省悟

雲門偃云且道有指示無指示若言有趙州向伊道箇什麼若言無者僧爲甚悟去 翠峰顯云我不似雲門爲蛇畫足直言向你道問者如蟲禦木答者偶爾成文雖然與麼瞎却衲僧眼作麼免得此過要會麼還你趙州喫粥了也未拈却者僧喫粥了翠峰與你拄杖子歸堂 雲峰悅云雲門與麼道大似爲黃門裁鬚與蛇畫足雲峰則不然者僧於此悟去入地獄如箭 黃龍心云雲門雪竇雖則善能鋤強輔弱捨富從貧要且不能安家立國乃問僧祇如上座朝來亦喫粥亦洗盃而今是迷是悟其僧禮拜起龍喚近前我有一柄拂與你歸堂 龍門遠云山僧今日喫粥了也洗盃盂了也祇是不悟既是爲善知識爲甚麼不悟還會麼豈可喚鐘作瓮終不指鹿爲馬善人難犯水銀無假冷地忽然覷破管取一時放下 開福寧云且道那裏是者僧悟處幾般雲色出峰頂

一樣泉聲落檻前 徑山杲云雲門大似阿修羅王耗動三有大城諸煩惱海隨後喝云寐語作麼復云雲峰雖善背手抽金鏃翻身控角弓爭奈蹉過雲門何又云趙州與者僧若不得雲門一生受屈而今諸方有一種瞎漢往往盡作洗盃盂話會了 天寧琦云見雲門則易見妙喜則難諸禪在甚麼處 雲居莊云趙州以楔出楔雲門看樓打樓者僧悟去還有勘破處也無良久云風不鳴條雨不破塊 古南門云住住翠峰但知雲門爲蛇畫足自亦未免靈龜拽尾忽若總拈過時如何瞎 佛日智云大慧道諸方拈掇甚多下註脚者亦不少未嘗有一人分明說破妙喜今爲諸人分明說破喫粥了便洗盃盂且道還會指示也無黑豈從來好合醬比丘尼定是師姑大慧老漢牙如劍樹口似血盆原來祇在者裏洗盃盂話何曾說得破隆安今日不惜唇齒直下分明說破喫粥了便洗盃盂趙州東壁挂葫蘆拈得鼻孔打失口達磨不是老臊胡

床窄先臥粥稀後坐躋躋踳踳漚漚落落要會趙州



洗盃孟了事沙彌消一箇泉大道

梅花落盡杏花披未免春風著出襖一氣不含有  
象萬靈何處謝無私白雲端

喫粥了也洗盃孟家常逐日最相如西來何處半零  
落六祖癡頑不讀書三祖宗

喫粥了洗鉢孟何曾指示曹溪路謾言隨衆三十年  
記得展單忘却飭揚無爲

之乎者也衲僧鼻孔大頭向下禪人若也不會問取  
東村王大姐落堂準

推窮物理成家計會合時機便識心多謝春風無厚  
薄貧家桃李也成陰護國元

相逢陪酒又陪歌醉倒途中要我駝駝到家中猶罵  
詈不知醒後又如何且菴仁

鶴立松梢月魚行水底天風光都占斷不費一文錢  
息菴觀

乍入蔡林乞指示大施門開無礙滯往往靈山授記  
人未有如斯箇次第正覺逸

錦衣公子坐花蔡鳳管鸞簫曲未終却笑桃華貪結

子幾回錯恨五更風天岸界

梵語般若波羅蜜此云智慧到彼岸雲棲寺裏李和  
尙每日起來念一遍壽聖聲

梧桐一葉落金井颯颯西風徹骨冷一陣吹來雙鬢  
寒花容嫩娜爲誰整法林音

趙州因與文遠行乃指一片地曰者裏好造箇巡  
舖文遠便去路旁立曰把將公驗來師遂與一摺

遠曰公驗分明過  
法林音云無端無端還知趙州敗闕處麼也須勘過

了打  
雖然公驗各隨身去住皆由守舖人踏破艸鞦歸去

後落花啼鳥一般春佛靈勸  
天子居鬧市裏山僧在百艸頭擺手御街來往不怕

巡火所由竹菴珎  
鑽頭鬧監遠侍者刺腦膠盆老趙州兩箇人前誇好

手面皮三寸不知羞蒙菴聰  
趙州在東司上見文遠過驚召文遠遠應諾師曰

東司上不可與汝說佛法

老僧正在東司上不將佛法爲人說一般屎臭旃檀香父子之機俱漏泄鼓山珪

趙州有密語文遠不覆藏演出大藏教功德實難量

徑山杲

明明道不說此理憑誰識春風一陣來滿徑花狼藉

蒙菴聰

趙州因僧問百骸俱潰散一物鎮常靈時如何師

曰今朝又風起

今朝又風起鬧市莫插棠觸著閻羅王帶累陰司鬼

徑山杲

今朝又風起不必更疑猜就地撮將黃葉去入山推

出白雲來天寧琦

今朝又風起老君元姓李寥寥宇宙間極目誰知己

喝一喝靈巖儲

趙州因僧辭師問甚處去曰閩中去師曰彼中兵

馬隘你須回避始得日向甚處回避師曰恰好

聞說閩中兵馬多丁寧遊子避干戈臨岐指箇藏身

處無限雄師不奈何正覺逸

七圓歸路日爭鋒回避須教不見蹤恰好藏身何處是青山雲外萬千重佛慧泉

趙州因一僧遊五臺問一婆曰臺山路向甚麼處

去婆曰驀直去僧便去婆曰好箇師僧又怎麼去

有僧舉似師師曰待我去勘過明日師便去問臺

山路向甚處去婆曰驀直去師便行婆曰好箇師

僧又怎麼去師歸謂衆曰臺山婆子我爲你勘破

了也

報慈遂徵云前來僧也怎麼道後來僧也怎麼道且

道那裏是勘破處又云非惟被趙州勘破亦被者僧

勘破翠峰顯云還知天下衲僧出者婆子圈圓不

得麼琅琊覺云大小趙州去者婆子手裏喪身失

命雖然如此錯會者多寶峰文云大小趙州也好

喫婆子手中棒過在甚處檢點得出方解不受人瞞

有麼喝一喝滙山詰云天下衲僧祇知問路不知

脚下泥深若非趙州老漢爭顯汗馬功高仰山欽

云錯婆子心肝趙州五臟一捏捏碎撒在諸人懷裏

了也且道是有勘破無勘破良久云錯會者多高

峰妙云盡道趙州勘破婆子若據高峰見處正是婆  
子勘破趙州以何爲驗以手指云驚直去 瑞巖溫  
云婆子如蟲禦木偶爾成文趙州見義勇爲翻成特  
地會麼雲收雨霽長空闊一對鴛鴦畫不成 笑巖  
實云當時纔見道好箇師僧又恁麼去但祇鼓掌呵  
呵大笑而歸不惟與天下行脚衲僧增銳亦使者婆  
子向去則有生涯 弁山音云且道那裏是趙州勘  
破處祇爲梅花寒未徹故來霜上又加雪凍開平地  
起龜文連累青山迸白血

傑出蔡林是趙州老婆勘破有來由而今四海清如  
鏡行人莫與路爲讐黃龍南

言中辨的老禪和蔦直臺山路不蹉勘破却回人莫  
問岳陽船子洞庭波雲峰悅

蔡林老作世無儔凜凜威風四百州一擊鎖關曾粉  
碎恩大難將雨露酬真如詰

撥動干戈老趙州坐觀勝敗有良謀婆勘破人誰  
委多少禪流錯路頭海印信

撥動烟塵老古錫坐觀勝負有誰知從來古路平如

掌自是行人不見歸圓覺演

婆指臺山路不差遊人恁麼去無涯趙州勘破歸來  
後四海五湖同一家艸堂清

老婆心切勿交加要路逢渠指不差休問禹門求變  
化風雷祇在葛洪家晏古佛

高握金鞭出禁城霜風凜凜馬蹄輕烟塵掃盡歸來  
後四海行人賀太平普融平

臺山一路坦平自是行人不慣明鏡醜婦之冤智者  
愚人之患疎山常

玉簫吹作鳳鸞吟惹動遊人離別心一陣東風卷寥  
廓四方八面少知音佛智裕

劈面三拳連顯七掌盡大地人不知痛癢鼓山珪

年老或謂不謬傳趙州古佛嗣南泉招魂喪命因圖  
像良馬追風累索牽勘破了老婆禪說向人前不值  
錢天童覺

趙州勘破百發百中趁得老狸打破油瓷佛照光  
本是山中人愛說山中話五月賣松風人間恐無價

蒙菴岳

自小丹青畫不成年來始覺藝方精等閒擲筆爲龍  
去換却時人眼裡睛高峰妙

生鏤疾藜當面擲瑠璃坑壙繞身開勸君莫問臺山路多少平人被活埋中峰本

孔文舉楊德祖不是冤家不聚頭無端論及家禽果  
鳥道玄鹽梅苦焉知來者不如今清風弔地波騰火  
具足有

幾人不戰自成功  
獨許南陽老臥龍  
自借東風鏖赤壁  
賺他血淚滿江紅  
菩提珍

麝香李子枕頭瓜一曲池臺滿  
晚花客馬醉行溪柳路慈翁解點白雲茶邱溪森

侵曉乘涼偶獨來不因魚躍見萍開  
卷荷忽被微風觸瀉下清香露一杯  
嘯峰然

昨日師僧經過今日阿誰勘破再過三五七朝麻雀  
定如鵝大漢關喙

古路迢迢直坦平邊笳才動烽煙生欲知南北相淩

趙州問僧甚處來曰摘茶來師曰閒

道著不著何處摸索背後龍鱗面前驢脚翻身筋斗  
孤雲野鶴阿呵呵雲蓋智

趙州示衆把定乾坤眼綿綿不漏絲毫我要你會  
你且作麼生會

天童覺云還端的也未祇饒你者裡會得七穿七穴  
我也知你出趙州圈圓不得 寶壽新云漏與不漏  
虛空著楔會與不會混沌增眉饒你把得定放得開  
猶未是十成穩當大眾還識乾坤眼麼從來不借三  
光力照徹山河萬斛金

趙州一日敲火問僧曰老僧喚作火汝喚作甚麼  
僧無語師曰不識玄旨徒勞念靜

法燈欽別云我不如你

趙州眼光光燦破四天下鉢盂上安柄至今成話權

直下是非著不得著不得處好承當木人昨夜通消息南海波斯過大唐野菴璇

趙州因二僧相推不肯做第一座主事白師師曰  
總作第二座事曰第一座教誰做師曰裝香來事  
曰裝香了也師曰戒香定香慧香解脫香

天童華云趙州一槌不妨驚羣動衆檢點將來也是  
泥裏洗土塊若是薦福門下不用相推第一座也有  
人第二座也有人第三座也有人雖然如是不免從  
頭註破第一座鑊眼銅睛靚不破第二座陽春白雪  
無人和第三座真實身心同達磨且道與趙州是同  
是別 愚菴孟云趙州著箇座元於佛祖位上使天  
下羣林無敢正座規繩自此一跌直至如今整理不  
上還有人爲法社正紀綱者麼不必相推請來相見  
如無山僧擯却聖僧去也

趙州因僧問祖意教意是同是別師曰會得祖意  
便是教意

波斯讀梵字莫窻人作詩烏頭彷彿子依稀竹密  
不妨流水過山高豈礙白雲飛

湛堂準

趙州因一婆子送錢請轉藏經師受施了却下禪  
牀轉一币乃曰傳語婆轉藏經已竟其人回舉似

婆婆曰比來請轉全藏如何祇爲轉半藏

報慈遂云什麼處是欠半藏處且道那婆具甚麼眼  
便與麼道 徑山杲云衆中商量道如何是那半藏  
或云再遶一币或彈指一下或咳嗽一聲或喝一喝  
或拍一拍恁麼見解祇爲不識羞若是那半藏莫道  
趙州再遶一币直饒繞百千萬币於婆子分上祇得  
半藏設使更遶須彌山百千萬億币於婆子分上亦  
祇得半藏假饒天下老和尚亦如是遶百千萬億币  
於婆子分上也祇得半藏設使山河大地森羅萬象  
若艸若木各具廣長舌相異口同音從今日轉到盡  
未來際於婆子分上亦祇得半藏諸人要識婆子麼  
鴛鴦繡出從君看不把金鍼度與人 天寧琦云者  
婆子謂趙州祇轉得半藏弄假像眞當時何不向未  
繞禪床時會取 車溪冲云且道那裏是他轉半藏  
處還會麼五五二十五欲識全藏麼良久云善吉維  
摩談不到目連驚子視如盲 寶壽方云且道那半  
藏還曾有人轉得麼山僧今日爲你轉去也良久云  
如是如是又良久云是不是

走下禪床行一轉看了如來五千卷婆子年高眼尙  
明夜深月下穿鍼線慈受深

趙州一市天輪轉婆子知音未足酬普爲人天開正  
眼大千沙界一毫收足菴鑒

不知兀坐常輪轉空下禪床遶一遭背面却言虧一  
半老婆惡業自家招天目禮

趙州劍氣衝牛斗婆子神符懸肘後一條拄杖兩人  
扶好手手中誇好手殺六賊輝

雲飛石壁山增色月落寒潭水畫眉最喜上林詩興  
好黃鶯啼在綠楊枝陸堂瑩

趙州因僧侍次指火問曰者箇是火你不得喚作  
火老僧道了也僧無對復挾起火曰會麼曰不會  
師曰此去舒州有箇投子和尙汝往問之必爲汝  
說因緣相契不用更來不相契却來僧到投子子  
問近離甚處曰趙州子曰趙州有何言句僧舉前  
話子曰汝會麼曰不會子下禪牀行三步却坐問  
曰會麼曰不會子曰你歸去舉似趙州僧回舉似  
師師曰還會麼曰不會師曰投子與麼不較多也

我喚作火汝即不可已道了也喚作甚麼楊無爲

趙州喚作火全身入艸窠我今不是渠渠今正是我

月林說

趙州因僧問如何是祖師西來意師曰庭前柏樹

子曰和尙莫將境示人師曰我不將境示人曰如  
何是祖師西來意師曰庭前柏樹子

五祖戒代云和尙何以將別人物作自己用

千里靈機不易親龍生龍子莫因循趙家奪得連城  
璧秦主相如總喪身翠峰顯

萬木隨時有凋喪趙州庭柏鎮長榮不獨凌霜抱貞  
節幾奏清音對月明黃龍南

深院盤根翠色幽老僧曾指示禪流年年不改凌霜  
節下載清風何日休正覺逸

趙州庭柏衲僧苦厄井口轆轤橫吞不得野軒選

趙州庭柏森然直露滴風清添翠色摘葉尋枝不可  
求盤根萬古終無極大湫秀

趙州庭下柏森森摘葉尋枝古到今明眼衲僧如覩  
著西來祖意合平沉楊無爲



一兔橫身當古路蒼鷹纔見便生擒後來獵犬無靈性空向枯椿舊處尋承天宗

蘇武不拜韓信臨朝恁麼會得十萬迢迢蕭蕭成

趙州庭柏說向禪客黑漆屏風松蘿亮榻佛日才

百寶光攢無見頂是大神呪最靈奇揭諦波羅僧揭諦石人半夜失烏鷄正堂辨

岸眉橫雪河目含秋海口鼓浪航舌駕流撥亂之手

太平之壽老趙州老趙州擾擾萊林卒未休徒費工

夫也造車合轍本無伎倆也塞壑填溝宏智覺

庭前柏樹子好箇大棺材買却有人買擡却沒人擡

漢關喲

趙州問僧發足甚處曰雪峰師曰雪峰有何言句

示人曰尋常道盡十方世界是沙門一隻眼你等

諸人向甚處趙州曰闍黎若回寄箇鉢子去

保福展云南有雪峰北有趙州 翠峰顯云者僧既

不從雪峰來可惜趙州鉢子 琅琊覺云衆中有云

寄鉢去埋却雪峰若道寄盃孟去便道盛粥飯用狂

解還夢見麼不是僧繇手謾說畫丹青 清化嶧云

2

若是山僧見道闍黎若回寄箇鉢子去便云不將去

若問爲什麼不將去但云和尚者裏少他不得 法

林音云者僧親從雪峰來因甚翠峰道不從雪峰來

若道得不負趙州鉢子

南望雪峰猶萬里北遊未謁趙州關賺他一柄鈍鉢

子二百餘年去不還正覺逸

石橋一路滑如苔閩嶺風高凍不開相見盡言遊歷

去幾人曾到雪峰來佛慧泉

雪峰何處趙州寄鉢子沙門一隻眼狼藉乃如此

阿呵呵大唐國裏鼓聲起新羅國裏舞婆娑別峰印

大地一隻眼誰敢扇其中鉢子寄將去那知到雪峰

橫川珙

仰面颺塵逆風把炬無損於人自招焚污輪與竹軒

高枕人白雲看老霜燒樹石兩方

五陵春色十分肥惱亂東風不盡吹醉喚不歸江上

客子規聲斷綠楊枝天鐸恩

趙州問僧曾看法華經麼曰曾看師曰衲衣在空

閒假名阿練若誑惑世間人汝作麼生曾僧擬禮

拜師曰汝披衲衣來麼曰披來師曰莫惑我曰作麼生得不惑去師曰莫取我語

翠峰顯云大小趙州龍頭蛇尾諸人若能辨得便乃識破趙州如或不辨箇箇高擁衲衣莫惑翠峰好古南門云祇如趙州恁麼問者僧恁麼答還是者僧惑趙州趙州惑者僧

趙州因僧問黑豈未生芽時如何師曰好合醬

趙州活計得能忙黑豈箇箇入醬缸今日有來麤磨過破砂盆裏響瑤瑤萬峰蔚

趙州問院主何來曰送生來師曰鴉爲甚飛去曰怕某甲師曰十年知事作恁麼語話主却問爲甚飛去師曰院主無殺心

殺心殺心月落寒潭秋水深要掣金鰲吞釣起可憐覲面少知音緣雨蕉

趙州與官人遊園次兔見驚走官問和尚是大善知識兔見爲甚麼走師曰老僧好殺

夜叉羅刹毒凶心華峰如峻海如深已向人前呈劍刃遲回又過黑雲岑緣雨蕉

趙州問南泉如何是異類中行泉以手拓地作驢鳴師便一踢歸堂曰悔悔泉令侍者問悔箇什麼師曰悔不更與兩踢

天井新云南泉欠趙州一著趙州輸南泉一機作麼生會千年故紙好合藥

功蓋三分國名成八陣圖江流石不轉遺恨失吞吳且知訥

漢高辛苦事干戈帝業興隆俊傑多猶恨四方無壯士還鄉悲唱大風歌覺圓胤

宗鑑法林卷十七

宗鑑法林卷十八

集雲堂編

大鑒下四世

趙州問南泉明頭合暗頭合泉便下座歸方丈師曰者老漢被我一問直得無言可對首座曰莫道和尚無語好自是上座不會師便掌曰者一掌合

是堂頭老漢喫

五祖戒云正賊走了遍賊人喫棒又云南泉當斷不斷反招其亂 雲居舜云諸人作麼生會有底便道首座落他圈圓與麼會又爭得山僧道趙州大似旁若無人

大事當陽已皎然十分須是更周圓堂中上座黑如漆冷地爲誰喫暗拳保拳男

趙州出外路逢一婆子乃問什麼處去婆曰偷趙州筍去師曰忽遇趙州又作麼生婆便與一掌師休去

翠峰頤云好掌更下兩掌也無勘處 五祖演云趙州休去作麼生商量白雲露箇消息貴要諸人共知婆子雖行正令一生不了趙州被打兩掌敲定牙關婆子去路一身輕似棄趙州高名千古重如山 南堂欲云將謂胡鬚赤更有赤鬚胡 龍池傳云趙州休去是肯伊不肯伊 古南門云趙州今日小出大遇 圓照森云還識趙州麼雲縷縷風細細寄言行路兒莫上山頭去 歐峰承云賊是小人智過君子

彎弓直射勢難當陷虎之機理最長端是貪他一粒米誰知失却半年糧海印

虎穴魔宮到者稀老婆失脚人懷疑趙州喫掌無人會直至如今成是非道道

去若丘山重來如一羽輕去來無別路傾蓋白頭新 暗堂

一路雄兵犯界河烟塵塞路絕人過安邦賴有張良在盡角城頭唱楚歌雪竇宗

驢馬加鞭上酒樓何如坐地看揚州是非長短俱裁了鼠竊終難似狗偷無準

何事臨場欠作家祇緣別有好生涯饒人不是癡男女最毒於菟無齒牙九達達

鞭鐮交揮力抗奇星流電卷類難齊名圖麟閣家山舊芳草籠烟鳥亂啼御之龍

趙州示衆看經也在生死裏不看經也在生死裏諸人且作麼生出得去僧便問祇如俱不留時如何師曰實即得若不實爭能出得生死

看經也在生死裏飯糲裏坐無喫底不看經也在生

死裏錦衣堆裏無著底忽然鳥鵲叫一聲反身湧躍  
渾家喜休擬議如今拋向衆人前千手大悲提不起  
□□□

趙州因居士問和尚年尊有幾箇牙師曰祇有一  
箇士曰祇有一箇如何喫飯師曰雖然一箇下下  
敵著

或菴體云趙州開口自然下下敵著功魁佛祖道蔭  
人天山野重說偈言光揚盛事

大用全提古佛牙輝天鑒地別無他日邊乘興立功  
業文彩風流出當家

趙州因僧問激清絕點時如何師曰猶是人家客  
作漢

密菴傑云者僧置箇問端不妨嶮峻爭奈趙州有起  
膏肓底手段雖然如是總落在天童手裏畢竟如何  
喝一喝

趙州曰老僧二十年不雜用心惟二時粥飯是雜  
用心處

玉關度了久班師猶向人前動鼓聲祇道馬行芳艸

地不知身已陷重圍無文燦

趙州問新到僧曾到此間麼曰曾到師曰喫茶去  
又問僧曾曰不曾到師曰喫茶去後院主問爲甚  
麼曾到也喫茶去不曾到也喫茶去師召院主主  
應諾師曰喫茶去

保福展云趙州慣得其便 開福寧云趙州門下不  
揀高低一椀茶普同供養得其味者方知冷灰裏  
九轉透瓶香如或未辨端倪不免重下註脚南北東  
西萬萬千趙州待客豈徒然莫嫌冷淡無滋味慣把  
芝麻一例煎以拂子擊禪牀一下

曾到還將未到同趙州依舊展家風近來王令關防  
緊從此人情總不容佛印元

寶匣龍泉發夜光寥寥長挂在虛堂四來高客如相  
訪茶罷休勞話短長大潯秀

驪珠絕類玉無瑕馬載驢馱帝子家曾到不曾休擬  
議與君全泛一甌茶羅漢南

趙州老漢熱心腸一盞鑪茶驗當行回首路傍橋斷  
處白蘋紅蓼映斜陽浙翁琰

喫茶去夜雨催紅上花案隊狂蜂逐影飛不知春  
個知歸去去喫茶千重枯樹忽開花子規夜半猶啼  
血金勒東風路轉賒抱璞雖

曾聞慣釣任公手爭似西江月一鉤幾度魚龍吞不  
得一聲羌笛出雲樓任優游收卷絲綸書自由咄大  
鼎新

趙州因僧問高法歸一一歸何處師曰我住青州  
作領布衫重七斤

昭覺勸云摩醯三眼一句洞明似海朝宗千途共轍  
雖然如早更有一著在忽有問蔣山一歸何處但云  
饑來喫飯困來打眠元叟端云趙州好語要且不  
起來機中峰則不然萬法歸一一歸何處至大四年  
西山洪水泛漲一夜衝倒三座石橋山門頭石獅子  
作大哮吼山河大地悉皆震動你輩貪眠漢子知甚  
東西南北仰山欽云大小趙州脚跟下紅線不斷  
等閒問著便見牽東補西道林則不然萬法歸一一  
歸何處劈脊便與三十雖則太煞傷慈要且一時慶  
快拈拄杖云祇今莫有與麼問底麼乃靠拄杖云放

過一著高峰妙云趙州抱泥帶水不特不能爲者  
僧斬斷疑情亦乃賺天下謂曾死在葛藤窠裏西峰  
則不然今日有怎麼問俱向他道狗祇熱油鑪天  
竺雲云要頭祈將去要皮剝將去要心剝將去且喜  
是箇法子奈得自拈賊何弁山圓云鵲蚌相持俱  
落漁人之手

編辯曾拔老古錘七斤衫重幾人知而今拋向西湖  
裏下嚴淒風付與誰翠峰顯

問來更切布衫翻指出青州是舊遊皓月當空沉巨  
浸鯨鯢無奈不吞鉤照覺總

夜半墨漆黑提得一箇賊點火照來看元是王大伯  
鼓山珪

等閒提起七斤衫多少禪流著意參盡向青州作窠  
窟不知春色在江南蓮菴

渡湯無冷地黃河輓底流金剛難插業腦後挂燈毬  
或菴

四面洪濤萬丈深上天無路地無門箇中有埋應難  
訴不是愁人也斷魂高峰妙

斧爛柯消局未殘天香吹鶴下瑤壇滿盤黑白輕翻  
轉拂袖蒼梧玉珮寒中峰本

周德者可以自守周利者可以普濟連盤托出有誰  
相契鮮花賦艸翠梧丹桂天奇瑞

長江影浸一天秋霜葉颼颼風骨愁野老忽歌新水  
令浪花驚起月邊鷗即念現

趙州因真定帥王公攜諸子入院師坐而問曰大  
王會麼曰不會師曰自小持齋身已老見人無力  
下禪牀王愈加禮重翌日令客將傳語師下禪牀  
受之侍者曰和尚見大王來不下禪牀今日將軍  
來爲什麼却下禪牀師曰非汝所知第一等人來  
禪牀上接中等人來下禪牀接下等人來三門外  
接

踟躕迎上客曲肱對旌幢不是家風別他居禮義鄉  
西巖惠

折脚禪牀接斷薪猶堪偃首揖高賓明知列土熏天  
富難鬪他家徹骨貧石溪月

人王爭似法王尊不下禪牀接上根休說君臣猶有

間入山先要主賓分月坡明

趙州因侍者報大王來也師曰萬福大王曰未到  
師曰又道來也

黃龍南云頭頭漏泄罕遇仙陀侍者祇解報客不知  
身在帝鄉趙州入草求人不覺渾身泥水 白雲端  
云侍者雖然罔措爭奈王令已行王令既行則海晏  
河清一句作麼生道野老不知堯舜力鑿鑿打鼓祭  
江神 徑山琇云侍者報客不知客是何人趙州蝦  
爲子屈不覺打失眼睛且道徑山恁麼意在於何巡  
人犯夜 佛曰暫云今日御駕親臨設有侍者報萬  
歲來也便與劈面掌云莫誑山僧好何故天威不遠  
顏咫尺何曾少間至尊前

報客傳言信已通叉手低頭便鞠躬對面一雙青白  
眼當頭蹉過住山翁楚安方

驥子驚駘滿道途皮毛誰敢辨精麤若無伯樂當時  
鑒失却追風千里駒慈受深

許由臨溪洗耳巢父不飲牛水侍者親入帝鄉趙州  
祇在艸裏南巖勝



來也宮殿隨身去也笙歌滿路侍者白頭如新趙州  
傾蓋如故別峰印

春山倒影一江紅鶯柳情多戀玉聰莫恨不工仙子  
筆祇緣身在畫圖中白髮翁

趙州到一菴主處問有麼有麼主豎起拳頭師曰  
水淺不是泊舟處便行又到一菴主處問有麼有  
麼主亦豎起拳頭師曰能縱能奪能殺能活便作  
禮

支提愛云趙州祇見錐頭利 雲居舜云趙州當時  
甚生意氣雖然如是要且鼻孔在二菴主手裏 龍  
門遠云菴主一等豎拳趙州因甚肯一箇不肯一箇  
要識趙州麼拍禪牀左邊一下要識二菴主麼拍禪  
牀右邊一下良久云易開終始口難保藏寒心 瀉  
山果云泣露千般艸吟風一樣松爲甚麼肯一箇不  
肯一箇者裏見得透釋迦不先彌勒不後迦彌要津  
天長地久苟或不然爲你下箇註脚良久云苦不如  
是爭知如是 昭覺對云佛祖命脉列聖錯認換却  
移星驚天動地有般漢才出窠窟祇管道舌頭在趙

州口裏殊不知自己性命已屬他人若能握向上綱  
宗與二菴主相見便可以定龍蛇別縑素正好著力  
還知趙州落處麼切忌顛預 理安洸云鴛鴦繡出  
從君看不把金鍼度與人 蓮柎策云趙州著繡草  
鞋到處行脚不怕疑殺人乃向二菴主手裏納敗闕  
顧左右云甚處是伊納敗闕處兩行孤雁撲地高飛  
一對鴛鴦撲地雙立 雲菴悅云水淺不是泊舟處  
言中有實能縱能奪便禮拜句裏藏鋒如今有般無  
主孤魂祇管較得較失不惟蹉過古人亦乃埋沒自  
已還知落處麼大冶精金應無變色

問答元來記一般當頭一著莫顛預將軍自有嘉聲  
在不得封侯也是閒無迹是  
無星秤子兩頭平提起應須見得明若向箇一等空  
兩知錯認認定澄星佛性泰  
摩訶薩囉九會從平地起風雷等閒喚出菴中  
主問云云江水逆回佛心才  
拍手拋擲笑老爺棺材未出死屍斜不如掘地深埋  
却管取來年喫嫩茄蔬堂遠

閃爍旌旂驟往來幾人遙望起疑猜此時若得樊公  
脚一踏鵲門兩扇開無準範

江北江南總前幾一輪化日照無私邊笳却在東風  
外石女聽來笑滿眉無趣空

短棹輕帆狎怒濤東行西止得逍遙去留不出蘆花  
岸陸地追尋人自勞報恩疏

江南絲柳迎風舞嶺上青松帶露寒世事近來多判  
復人人偏愛紫羅冠慧山海

一樣豎拳兩樣醺醺昏馬策沒來由巫峽博得絲千  
丈四海五湖下釣鈎法林音二

單槍疋馬立功勳韜略雙全獨見君薊北荆南齊定  
了英名千古鎮河汾

趙州因文遠在佛殿禮佛師見以拄杖打一下曰  
作麼曰禮佛師日用禮作麼曰禮拜也是好事師  
曰好事不如無

中峰本云文遠云禮佛也是好事不妨頑軟趙州云  
好事不如無話墮了也要知趙州老人話墮處麼待  
伊磕破腦門卽向伊道

之遠客一不落此時瞻禮紫雲堂趙州拄杖雖然  
短亦敲華山千箇中徑山泉

禪句瞻紫雲不覺腦中遭箇个生心膽向人  
傾相識還同不識誠蒙龜聽

趙州因僧問如何是趙州師曰東山西南門北  
門

經山泉云名僧問趙州趙州待人一馬還人  
一牛人不語水不流曾麼受恩深處宜先退得

意濃便如休天寧琦云盡道者僧神通跳趙州  
關不過大丈夫漢衆決擇未到弓折箭盡即便拱

手歸降何不著一轉教他納款去且道著得箇甚  
麼語磬山修云者僧問問頭也甚奇怪他未會

爭敢入虎穴持虎鬚道他會爭肯恁麼休去  
句裏呈機劈面來爍迦羅眼絕纖埃東西南北門相

對無限輪槌擊不開翠峰顯  
四廓關關鎖趙州幾於城下起戈矛將軍戰馬今何

在野艸閒花滿地愁照覺總  
袖裏金鎚一擊開東西南北絕纖埃石橋南畔臺山

路報你遊人歸去來普融平

南北東西老趙州見人騎馬也騎牛清風月下尋歸  
路夫子門前問孔丘唐堂遠

趙州因僧問初生孩兒還具六識也無師曰急水  
上打毬子後僧却問投子急水上打毬子意旨如  
何子曰念念不停留

法林音云正上不足正下有餘

六識無功伸一問作家曾共辨來端茫茫急水打毬  
子落處不停誰解看翠峰顯

何謂識兮還具六八萬四千殊不足初生孩子尙喃  
喃急水打毬攔口築白雲端

朝日茫茫打箇毬生來念念不停留若知落地無蹤  
跡始會雲門六不收慈受深

趙州因僧問和尚姓甚麼師曰常州有日甲子多  
少師曰蘇州有

蘇州有常州有須信親言出親口趙州古佛豈徒然  
世界壞時渠不朽若能於此究根源決定面南看北  
斗翠峰顯

常州有蘇州有咭嚙舌頭獅子吼壽山高兮福海深  
八十一分九箇九若能直下便回光千古萬古名不  
朽佛鑑勸

蘇州有與常州有三月江南啼鷓鴣堪笑有年無德  
漢被人拶著強分疎退耕寧

趙州問一座主講什麼經曰講涅槃經師曰問一  
段義得否曰得師以脚趂空吹一吹曰是什麼義  
曰經中無此義師曰脫空謾語漢此是五百力士  
揭石義也不誠

老宿代云和尚瞞某甲瞞大眾 翠峰顯別云和尚  
慣得其便

一趂方令地轉翻一吹還又轉入關講師不識圓陀  
義空捨前山過後山圭堂居十

揭石從來義不同洪波深處逞神通高標不在蘆花  
岸隊隊雙雙趁曉風默堂定

趙州因僧問久嚮趙州石橋到來祇見略約師曰  
汝祇見略約且不見石橋曰如何是石橋師曰度  
驢度馬

鐘送黃昏鷄報曉趙州何用閒煩惱裂破虛空作兩

就怎奈當初不放光鼓山珪

好一殿功德總是過去佛百福相嚴身不使旃檀刻  
日日香烟夜夜燈看來當甚乾羅蔔徑山泉

趙州因遊方時到臨濟纔洗脚濟便問如何是祖  
師西來意師曰正值山僧洗脚濟乃近前作聽勢  
師曰會即便會咱喏作麼濟便歸方丈師曰三十  
年行脚今日錯爲人下注脚

法雲秀云衆中商量道趙州不識臨濟作賊却爲他  
下箇註脚臨濟當時作聽勢何不劈耳便掌若恁麼  
商量何曾夢見趙州識得臨濟殊不知兩箇盡是老  
賊不知一箇好手敢問諸人那箇是好手 教忠光  
云臨濟有驗人眼趙州又飽桑林等閒略言風規自  
然頭正尾正還會麼若不得流水還應過別山  
洗脚處更不安排側聆時却是咱喏趙州臨濟二老  
人相見何勞下註脚鼓山珪

人眼似鼓椎一人頭如木杓兩箇老不識羞至今  
無處安著徑山泉

趙州因僧辭乃問甚處去曰雪峰去師曰雪峰忽  
問汝和尚有何一句汝作麼生道曰却請和尚道

師曰冬寒夏熱又問忽更問汝畢竟事又作  
麼生僧無語師代曰某甲習從趙州來不是傳語  
漢其僧後到雪峰峰間甚處來曰趙州來峰問趙  
州有何言句僧舉前話峰曰須是我趙州始得  
玄沙備聞乃云大小趙州敗闕也不知 云居錫云  
甚處是趙州敗闕處若檢點得出是上座眼

趙州見僧來使面壁書梵字僧展坐具禮三拜師  
轉身僧收坐具出去師曰苦苦僧呵呵大笑

苦苦向誰語發機要是千鈞弩 十三天撲帝鍾大  
地山河俱作舞典牛游

苦中樂樂中苦趙州名 傷欠悟直饒頓放根身也  
是泥裏洗土 四光

不味 陽第一籌臨機拳趂不輕饒焦顛打著連底  
凍赤眼撞著火柴頭掩室開

趙州在南泉作爐頭值普請摘菜乃在堂內叫曰  
救火救火大衆一齊到僧堂師乃閉却門衆無語  
泉乃拋鑰匙從窗入師使問曰

義山前 我不學南泉益油添薪時見他閉却門

拈土塊就門上書兩箇封字要他趙州至今出身無計

趙州到黃檗見來便閉却方丈門師乃把火於法堂內叫曰救火救火檗開門捉住曰道道師曰賊過後張弓

保福展云黃檗有頭無尾趙州有尾無頭 五祖戒云黃檗祇會買賤不會賣貴趙州因禍致福 翠峰顯云直是好笑笑須三十年忽有箇衲僧問笑笑甚麼笑賊過後張弓 南堂欲云重門擊柝黃檗過於隄防齧鐵破關趙州慣得其便雖然兩不相傷笑破翠峰鼻孔 古南門云雪竇好一笑祇是不合隨趙州語跡走畢竟如何賊賊

一擒一縱二施能戟去槍來兩陣陳彼此機關誰委悉至今疑殺李將軍海舟慈

賊逢賊手全無樞紐百弩千弓一時發白日青天何處走乳峰慣得其使陣後虛張笑口咄看狗靈巖儲

趙州到雲居居曰老人大何不覓箇住處師曰什麼處是從諗住處曰山前有箇古寺基師曰和

尙自住取又到茱萸萸曰老人大何不覓箇住處師曰甚麼處是從諗住處曰老人大住處也不知師曰三十年弄馬騎今日却被驢撲

雲居錫云甚處是趙州被驢撲處 馮山喆云雲居茱萸爲人猶如爲己爭奈趙州不入者圈圓雖然如是不得雪霜力焉知松柏操 大滙泰云二老祇解把住不解放行趙州祇解放行不解把住檢點將來未爲全美且雙放雙收一句作麼生道畢竟水須朝海去到頭雲定覓山歸

展陣開旂各運謀箭鋒相敵未輕休等閒露出翻身句直得千江水逆流施室開

突出山前古寺基趙州問得便攢眉寥寥今古無人共一片斷雲天外飛率菴琮

趙州因僧問如何是佛法大意師曰貓兒是一百五十文買底曰不問貓兒如何是佛法大意師曰者家子是大王送底曰謝師答話師曰作家作家月舟載云水不無受觸則響木本無火因鑽則炎趙州要成己或人豈惜隋珠十璧然末梢頭可惜放



過雖則放過也却有些話講莫道不利害好

趙州因僧問二龍爭珠誰是得者師曰老僧祇管看

翠峰顯云看卽不無爭卽不得且道扶者僧扶趙州雲居莊云爭者不得得者不爭趙州祇管看要且不失珠 古南門云爭卽不無看卽不得且道珠在甚麼處

風雲頭角黑黦皺苦死交爭額上珍淨洗眼來閒地看老僧未免費精神圓悟勤

珠在浪花深處白拈雲攫霧志悠哉老僧祇管從邊看得失從渠眼自開嘆菴鑒

趙州因僧問如何是祖師西來意師曰欄中失却牛

欄中失却牛有問卽有酬更若求玄妙獼猴氣毬

慈雲照

趙州上堂纔有是非紛然失心還有答話分也無僧舉似洛浦浦扣齒又舉似雲居居曰何必僧回舉似師師曰南方大有人喪身失命曰請和尚舉

師纔舉前話僧指旁僧曰者箇師僧喫却飯了作

甚麼語話師休去後僧請益師曰坐底見立底立底見坐底

坐底見立底立底見坐底咄哉老趙州白日眼見鬼無準範

宗鑑法林卷十八

宗鑑法林卷十九

集雲堂編

大鑒下四世

趙州因僧問如何是南泉真師下禪牀立又問如何是和尙真師上禪牀坐

師下禪牀立神號并鬼泣師上禪牀坐龍蟠并虎臥一槌打與兩分張拈起元來是雙破本覺一

趙州因一秀士曰和尚是古佛師曰秀才是新如來

廣寒宮殿淨無埃已是逢君八字開丹桂不須零碎

折等閒和樹拔將來南叟茂

趙州因僧問毫釐有差時如何師曰天地懸隔曰

毫釐無差時如何師曰天地懸隔

法林音云問者有殊答惟一致且道趙州還起來機也無

一道如弦直長安信已傳萬邦皆入貢四海息狼烟  
施室開

趙州因僧問路逢達道人不將語默對未審將甚  
麼對師曰人從陳州來不得許州信

病餐毒藥訪良醫醫使元餐藥治之病去藥回滋味  
別舌頭具眼者方知佛性泰二

世有逃形畏影人奔陳告訴護勞神若知形影元無  
二坐對高堂秋月輪

趙州示衆此間佛法道難即易道易即難別處難  
見易識老僧者裏易見難識若能會得天下橫行  
識不識見非見說易說難如油入麪糰源竭

趙州因僧問如何是祖師西來意師曰冬至一陽  
生

花開千萬朵石頭抽笋兩三莖泥埧金剛開口  
今明朝冬至一陽生佛靈應

龍門遠  
柳色黃金嫩梨花白雪香若知春氣力特地好風光

徑山景  
冬至一陽生乾坤通一線可憐無限人不識孃生面

趙州一日於雪中臥曰相救相救有僧便去身邊  
臥師便起去

翠巖芝云者僧在趙州圈圓裏還有人出得麼天  
童華云者僧如蟲禦木要見趙州天地懸殊有般瞎  
漢便道山僧扶強不扶弱殊不知我王庫內無如是  
刀喝勝法法云者僧祇解救人不解自救

湘江暮雪冷風狂漁父逍遙戲小航貧子灘邊爭共  
樂寒沙獨陷可慙惶報恩秀

仙姬蟬鬢自天成傾國傾城絕比倫世固有能彷彿  
者祇差脂粉得人眼越機敏

趙州到道吾纔入堂吾曰南泉一隻箭來也師曰  
看箭吾曰過師曰中

翠峰顯云二俱作家蓋是道吾趙州二俱不作家箭鋒不相拄直饒齊發齊中也祇是個射垛漢 報慈遂云且道二大老相見還有優劣也無若檢點得出許你於中字上有個入處 古南門云二老露個爪牙不枉同條雖然祇如翠峰道直饒齊發齊中也祇是個射垛漢是肯伊不肯伊會麼好手手中呈好手紅心心裏中紅心擊禪牀一下

季春芽苡生前徑三月桃花茂小園可惜芳春人不識樹頭百舌更能言海舟慈

趙州因僧問如何是較人獅子師曰歸依佛歸依法歸依僧莫較老僧

天寧琦云者僧也祇是個喋屎狗爲甚麼趙州一見便撒屎彩奔齷家

門藏古老珠在盤中閒撥動精光攢獨憐不遇蛟奴追千載令人恨不寬仁趾蹶

蛟宅不可獨一觸禍隨跟腥風扇毒雨頃刻天爲昏子清吳

趙州因僧問世界變爲黑穴未審此箇落在何路

師曰不占曰不占是甚麼人師曰田庫奴

蒲菴健云者僧置箇問頭大似石上栽花不妨奇峭趙州善於入林不動草入水不動波向空劫已前控他箇入處最爲敏手祇是田庫奴未肯點頭在

趙州曰不得閒過念佛念法念僧僧便問如何是學人自己念師曰念者是誰曰無伴師叱曰者驢大慧杲云者僧雖然無伴成羣作隊聒擾殺人趙州雖好一頭驢祇是不會喫草 子山仁云惜哉趙州古佛被徑山老人貶入驢隊裏至今無出頭分還有救得者麼作驢鳴便轉

趙州曰老僧三十年前在南方火爐頭有一則無賓主話直至如今無人舉著

淨慈聞云森羅萬象明暗色空日夜舉揚趙州古佛不是不知祇爲食程太速

蒙頭不覺齁齁睡開眼從教醺醺紅若謂平常便無事須防荳爆冷灰中心間責

無賓主話意深深流落蔡林古到今火冷灰寒口挂壁衲僧凍死不知心石田薰

趙州因僧問如何是祖師西來意師曰版齒生毛九年面壁自虛淹爭似當初一句傳板齒生毛猶可事石人蹋破謝家船投子青

新開玉盃出僊桃何事人間配濁醪古逕源迷人去後萬年谷口挂雲濤伴我侶

趙州與文遠論義曰鬪劣不鬪勝勝者輸胡餅曰請和尚立義師曰我是一頭驢曰我是驢胃師曰我是驢糞曰我是糞中蟲師曰你在彼中作麼曰我在彼中過夏師曰把將胡餅來

五祖戒云禍不單行 瑯琊覺云趙州文遠也是蕭何制律 徑山杲云文遠在糞中過夏面赤不如語直趙州貪他少利贏得箇胡餅檢點將來也是普州人送賊畢竟如何鷺王擇乳素非鴨類 天童覺云當時文遠趙州高高標不出低低望不及眼自爭先得籌因打劫贏 天寧琦云當時待趙州道我是一頭驢便好道輸却胡餅了也老漢取餅就手奪得便行 寶華忍云文遠勝裏輸明輸暗勝趙州輸裏勝明勝暗輸纔勝卽輸輸卽勝算來胡餅都無分而今

拈出大家看動著些兒成話柄咄

兩陣交鋒勢莫窮信旗獵獵卷秋風邊庭不用深深入勒馬歸來却有功惹愛深

上馬金送去下馬銀接還存亡漢室在其間思歸不解亭侯印一劍如何破五關不見道行路難路難不在登高山石兩方

得便宜者常帶羞贏官司者常叫屈爲甚如此小雪見大雪屯米底折一橛三宜五

洗耳其如落一籌飲牛何事占高流堪憐兩字輕天下也賸閒名在九州卽念現

趙州因一婆子臨齋入堂曰者一堂師僧盡是婆婆生得底祇有大底孩兒忤逆不孝師纔顧視婆子便出

石菴浮云者婆子對大眾前納敗了也若不走出有何面目見他趙州 侶巖荷云婆子步步登高不覺全身負墮趙老願後瞻前未免當斷不斷山僧若見怎麼道但言更須識取阿爺始得管教者吳老婆慚惶無地

趙州因僧問真如凡聖皆是夢言如何是真言師

曰庵部林噉

蔣山大云趙州答話如探囊取物未免索鹽奉馬有

問蔣山如何是真言祇向他道草枯風勁各寮謹慎

火燭

趙州因僧問四山相逼時如何師曰無路是趙州

天獄畫云者躲跟漢有甚用處復頌

無路是趙州捉敗白拈賊要打鬼骨臀逢人謾搖舌

趙州臨順世令僧持拂子與趙王曰若問何處得

來便說此是老僧平生用不盡底

一生受用意無盡者箇都來有幾莖分付趙王千古

在任他南北競頭爭保寧勇

長沙景岑招賢禪師南泉一日遊山歸首座問和

尚甚處去來師曰遊山來日到甚麼處師曰始從

芳艸去又逐落花回曰大似春意師曰也勝秋露

滴芙蓉

翠峰顯云謝師答話 寶壽方云當時待道始從芳

艸去又逐落花回便好云和尚此回遊山不易看者

漢又作何去就

大地絕纖埃何人眼不開始從芳艸去又逐落花回

羸鶴翹寒木狂猿嘯古臺長沙無限意咄翠峰顯

拂拂山香滿路飛野花零落艸離披春風無限深深

意不得黃鸝說向誰上方益

芳艸纖茵迎步綠落花鋪錦拂衣香歸來說似諸禪

子蕩蕩風光遶畫梁

長沙因竺尚書來謁乃喚尚書書應諸師曰不是

尚書本命曰不可離却卽今抵對別有第二主人

麼師曰喚尚書作至尊得麼曰恁麼則總不抵對

時莫是弟子主人麼師曰非但抵對與不抵對無

始劫來是箇生死根本乃示偈曰學道之人不識

真祇爲從前認識神無量劫來生死本擬人喚作

本來人

徑山杲云卽今抵對者既不是本來人却喚甚麼作

本來人良久云我恁麼道且作死馬醫 理安洸云

區鑛別金長沙好手妙喜雖是直截提持要且未能

起膏肓之疾如今有般漢不能出意想窠臼五蘊身

田道覺有第二人苦哉若與麼闍老子打算飯錢  
莫言不道

長沙因僧問如何是上上人行履師曰如死人眼  
曰上上人相見時如何師曰如死人手

死人眼死人手金烏飛玉兔走直截根源取之左右  
張翁醉倒臥官街元是李翁喫私酒印空更

長沙示衆我若一向舉唱宗乘法堂前艸深一丈  
四祖澤云如斯舉唱未當宗乘山僧則不然直使盡  
大地無寸土更須三十棒何故鯨吞海水盡露出珊  
瑚枝 大覺昇云何止艸深一丈山僧若舉唱宗乘  
直得盡大地人誦謗不已雖然如是不入驚人浪難  
逢稱意魚

長沙因僧問了卽業障本來空未了應須償宿債  
祇如二祖是了不了師曰空又問雲門門曰確

長沙空雲門確信手拈非造作離心意識參出聖凡  
路學纔有絲毫騰蛇遶脚大渴秀

長沙一日遣僧問同參石霜會曰和尚見南泉後  
如何會默然曰和尚未見南泉已前作麼生會曰

不可更別有也僧回舉似師師示偈曰百尺竿頭

不動人雖然得入未爲真百尺竿頭須進步十方

世界現全身僧便問祇如百尺竿頭如何進步師

曰朗州山澧州水曰不會師曰四海五湖皇化裏

徑山杲云要見長沙還須更進一步若有人問如何

是者一步待我款款地與你葛藤 保寧全云妙喜

道要見長沙更進一步保寧則不然要識長沙更退

一步畢竟如何換骨洗腸重整頓通身手眼更須參

博山來云會公坐殺法身不通凡聖岑老碧天雲

外更鬪精華白牯牛觸牧多方死貓兒解弄也活與

盲人點眼聾者開聰會公還識痛癢麼

玉人夢破一聲鷄轉盼生涯色色齊有信風雷催出

蟄無言桃李自成蹊及時及節力耕犁誰怕春疇沒

脛泥天童覺

未得經冬莫妄歡須教徹骨透心寒忽然夢醒三春

暖萬紫千紅匝地看天奇瑞

喪盡平生雙手空闍闍無地可相容玉鞭無復驅星

月別有閒情策曉風田野歌聲韻亦工宗源遠



長沙因張拙秀才看千佛名經問百千諸佛但見  
其名未審居何國土還化物也無師曰黃鶴樓崔  
灝題後秀才還曾題也未曰未會師曰得閒題取  
一篇好

瀉山果云若是箇漢纔見長沙恁麼道但云黃鶴樓  
要題也不難未審百千諸佛居何國土若下得者一  
拶非惟坐斷長沙舌頭亦乃名標青史 昭覺勤云  
齏刀劈面解辨者何人劈面當胸承當者有幾若能  
向奔流度刃疾談過風處見長沙橫身爲物去不消  
一捏其或隨言證入露布便謂問東答西振轉話頭  
且喜沒交涉畢竟作麼生是長沙端的處殺人刀活  
人劍 磬山修云長沙雖得殺人刀活人劍不無龍  
頭蛇尾山僧則不然待他問聲未絕便喚云秀才他  
擬應諾遽索云居何國土 青獅信云可惜百千諸  
佛被長沙埋向一座黃鶴樓裏喚作註解得麼癡人  
面前不得說夢 龍門遠云秀才問佛居何國土長  
沙爲甚麼却恁麼道秀才尋常嘲風吟月因甚長沙  
面前一詞不措若是黃鶴樓有甚麼難題處聽取山

僧題破

容顏甚奇妙光明照十方我適曾供養今復還親覲  
黃鶴樓中四望賒滿天風月居詩家百千諸佛居何  
土風起長江湧浪花音融平

百千諸佛倒騎牛背面分明失路頭却問老師何處  
去勸君更上一層樓黃龍巖

攜手樓頭共語時白蘋紅蓼對江湄衷腸訴盡無人  
委惟有清風明月知天童覺

赤土纔將畫簾箕烏鷄何事忽驚飛自從題入新詩  
後黃鶴樓前忘却歸月堂昌

百千諸佛但聞名國土何曾不現成自是不歸歸便  
得五湖烟景有誰爭寶峰明

塞鴈一聲喉舌冷淒淒蘆管月明中荒塘蹤跡無漁  
火徒有秋烟拂暗風語風信

貪程錯路夕陽斜極目長安不見家待到明朝天大  
曉題詩應罵老長沙梅谷悅

從容一曲楚天秋山自高兮水自流倒腹傾腸君不  
顧空餘江面數峰浮退巖泐

三千諸佛居何國歷歷分明黃鶴樓堪笑秀才無覓處白雲千載空悠悠三三圖

長沙與仰山翫月次山曰人人盡有者箇祇是用不得師曰恰是倩汝用曰汝作麼生用師劈曾一踢踢倒山曰因直下似箇大蟲

長慶稜云前彼此作家後彼此不作家乃別云邪法難扶保福展云好一箇月祇是用力太多被他踢破却成兩箇人人盡道岑大蟲奇特須知仰山有陷虎之機德山密云好更與一踢瑯琊覺云李陵雖好手爭免陷番身徑山杲云小釋迦有陷虎機老大蟲却無牙齒當時一踢豈造次驀然倒地非偶爾衆中還有緇素得二老出者麼良久云設有也是掉棒打月天寧琦云二老如斯吐露於建化門頭足可觀光若是者箇事料掉沒交涉寶慶法云小釋迦不會作客勞煩主人恰是倩汝用何不與本分艸料

浮雲散盡月當空  
兔子懷胎產大蟲  
跳出風前弄牙爪  
至今撼動廣寒宮  
曹源生

作者提持迥不同廣寒宮裏起清風一朝踢倒雖然活已落他家陷阱中掩室開

一拳打落天邊月  
瓦手輕拋陷虎機  
有意氣時添意氣  
得便宜是落便宜  
天岸昇

長沙因皓月供奉問古德曰了因業障本來空未了應須償夙債祇如師子尊者二祖大師爲甚却償債去師曰大德不識本來空曰如何是本來空師曰業障是

白巖符云玉解連環珠穿九曲須讓他長沙作手若以過量衲僧巴鼻論本分艸料猶欠也當時問如何是本來空便與劈頭一棒則千古稱尊又豈止大蟲而已

長沙因僧問本來人還成佛也無師曰汝見大唐天子還自割茅刈艸麼曰未審是何人成佛師曰是汝成佛僧無語師曰會麼曰不會師曰如人因地而倒因地而起地道甚麼

殿閣重重紫氣深  
星分辰位正乾坤  
金輪不御閻浮境  
豈並諸侯寶印尊  
投子青

簾幙春風曉尚寒歌樓聲咽夢驚殘金輿不御人間  
世休羨壺中日月寬雲巖因

人世未逢九五尊春明御仗曉崢嶸時人祇識朱衣  
貴錯認侯門作帝閭天岸昇

深宮雲鎖碧天高丹鳳棲梧路轉遙祇恐下方看不  
見也知無奈曲龍腰假亭擬

長沙因三聖令秀上座問南泉遷化向甚麼處去

師曰石頭作沙彌時參見六祖曰不問石頭見六

祖南泉遷化向甚麼處去師曰教伊尋思去曰和

尙雖有千尺寒松且無抽條石筍師默然曰謝和

尙答話師亦默然秀回舉似三聖聖曰若恁麼猶

勝臨濟七步然雖如是待我更驗看明日三聖去

問承聞和尙昨日答南泉遷化一則語可謂光前

絕後今古罕聞師亦默然

昭覺勤云也大奇也大奇長沙畫虎却成狸南泉一

去無消息空使行人說是非 理安問云長沙三處

默然諸人作麼生會若也會得各下一轉語乃頌

一則南泉遷化語光前絕後古今稀大蟲無齒果然

別不是親遭不易知

客見長沙路陌同令人依約探家風須彌萬仞磨今

古折箭量天枉費工佛印元

探花蝴蝶舞三台啄木掉頭鳴訝鼓處處相逢岑大

蟲元來便是長沙虎長靈卓

王老踪由孰可知那堪更問大蟲兒直饒石筍抽條

盡無處堪尋向上機投子舒

也大奇也大奇卷舒出沒看全機若非鑑物張華眼

未免隨人說是非石溪月

長沙因僧問如何轉得山河國土歸自己去師曰

如何轉得自己成山河國土去曰不會師曰湖南

城下好養民米賤柴多足四鄰僧無語師示偈曰

誰謂山河轉山河轉向誰圓通無兩畔法性本無

歸

昭覺勤云得人一牛還人一馬 天童覺云雖然主

賓互換要且泥水不分忽然捩轉鼻頭恁麼不恁麼

總不得又合作麼生如今王令稍嚴不許攬行奪市

瑞巖溫云者僧擔一擔憎懂換得一擔泥酒雖然

不因夜來雁怎見海門秋 磬山修云饒你轉得山  
河大地歸自己去却是埋沒已靈更饒你轉得自己  
成山河大地去猶是背覺合塵且道轉即是不轉即  
是法林音云磬山老祖蹉過長沙也

塵刹平常露此身疑生情動見疎親湖南城裏從來  
事米賤柴多足四隣保寧勇

誰問山河解轉身轉身方覺體全真清淨界中無一  
物一重山後一重人大圓智

者一轉那一轉尺非長寸非短幾多錯認自家身目  
前異路難排遣珊瑚激灩十洲春靚面無人識深淺  
君不見陶朱一葉駕扁舟五湖風月無人管天岸昇  
過得杭州到四明月華山樹徧鄉城馬因倦後鞭無  
力坐看秋塘鷺宿汀愚絕教

長沙因僧問南泉遷化後向甚麼處去師曰東家  
作驢西家作馬曰未審意旨如何師曰要騎便騎  
要下便下

徑山杲云今日有問雲門圓悟老人遷化後向甚麼  
去向道入阿鼻大地獄去未審意旨如何飲洋銅汁

吞熱鐵丸更問還救得也無救不得爲什麼救不得  
是者老漢家常茶飯 天寧琦云若欲報德酬恩須  
是長沙妙喜忤逆兒孫始得雖然珊瑚枕上兩行淚  
半是思君半恨君

脫得驢頭戴馬頭東家西家卒未休問君還有幾多  
愁恰似一江春水向東流懶菴樞

長沙因僧問如何是諸佛師師曰汝從無量劫來  
承甚麼人恩力

法林音云依師怎麼道猶是諸佛弟子在

混沌未分便有渠堂堂相貌絕名模長沙謾道承恩  
力試問還曾識也無疎山常

長沙因僧問諸佛師是誰師曰從無始劫來承誰  
覆蔭曰未有諸佛已前作麼生師曰魯祖開堂亦  
與師僧東道西話

水墨丹青畫不成混沌然竹木箇箇靈求恩乞福拋杯  
箸向道明明自不聽保寧勇

衢州子湖巖利踪禪師南泉頤嗣門下立禪曰子湖有  
一狗上取人頭中取人心下取人足擬議即喪身

失命有僧到師喝曰看狗僧纔回頭師便歸方丈  
有問如何是子湖狗師曰嗥嗥

翠峰顯云衆中總道者僧著一口著即著了怎奈者  
僧在敢問諸人子湖狗著者便死因甚麼者僧在若  
無通方眼救得者僧設使子湖出世斮殺百千萬箇  
有甚麼益我當時若見先斫下牌然後入院待伊喝  
云看狗與伊放出箇焦尾大蟲如今諸人要見麼日  
勢稍晚歸堂 神鼎誣云正當恁麼時下得甚麼語  
神鼎當時若在即喝云者畜生又云死又作退勢  
萬峰蔚云入門一喝頭正尾正擬議思量喪却性命  
且作麼生入得他門戶

子湖狗子最威凜來者投明莫暗行向道看時如不  
見當頭斮殺喪平生佛國白

錯過當頭一機昧却現成公案子湖指處太親直須  
急著眼看浙翁談

子湖一夜於僧堂叫曰有賊有賊衆皆驚起有僧  
自堂內出師把住曰維那捉得也捉得也僧曰不  
是是某甲師曰是即是祇是汝不肯承當

翠巖芝云子湖也是相頭買帽 瀉山果云子湖恁  
麼大似按牛頭喫艸 天界盛云大小子湖龍頭蛇  
尾若是崇先待道不是是某甲便即推開云你還要  
偷老僧那

子湖因劉鐵磨到乃問久響劉鐵磨莫便是否曰  
不敢師曰左轉右轉曰和尚莫顛倒師便打

昭覺勤云子湖棒頭有眼祇爲權柄在手鐵磨皮下  
有血還他竿木隨身雖然柔弱勝剛強且要語在

鄂州茱萸禪師南泉顯嗣上堂擎起一檟竹曰還有人

向虛空裏釘得檟麼時有靈虛上座出曰虛空是  
檟師便打靈曰莫錯打某甲師擲竹便歸方丈

雲門偈云矢上加尖有僧云和尚適纔與麼道那門

云槌鐘謝響得箇蝦蟆出來 翠峰顯云若要此話

大行直須打了趁出 雲居錫云此人具眼不具眼

因甚著打 法雲秀云茱萸祇知瞻前者僧不能顧

後檢點將來兩箇總須喫棒且道過在甚處 棲賢

謁云者僧出來與麼道具眼不具眼茱萸當時便打

打伊甚麼處 南堂欲云茱萸空中釘檟靈虛旱地

遭釘翠峰不管盡法無民祇要話行千古看來總是  
一隊掠虛漢

虛空是概幾人諳獨有靈虛最善參潦倒茱萸雖倚  
勢龍頭蛇尾更何堪本貌一

茱萸因趙州執杖上法堂從東晉西師曰作甚麼  
州曰探水師曰我者裏一滴也無探箇甚麼州以  
杖靠壁便下去

瑯琊覺云勢敗奴欺主時衰鬼弄人 馮山詰云趙  
州善能探水不犯波瀾茱萸一滴也無怎奈關防不  
得 天童華云茱萸一滴也無滔天白浪趙州以杖  
靠壁不犯清波雖然二老同死同生怎奈山僧未肯  
放過 理安洸云茱萸牆墮不牢趙州探竿短小檢  
點將來二俱不了 介毅洪云趙州探水生拔蒼龍  
頭上角茱萸無一滴活剎猛虎眼中珠雖然如是茱  
萸猶欠一籌在當時見他恁麼下去祇云三十年後  
難得與麼漢非圖光揚宗眼益顯南泉門下有人  
逐步移節探淺深果然滄海碧沉沉一雙足迹分明  
在將謂歸家不可尋保寧勇

深淺聊將拄杖探忽然平地起波瀾傾瀉倒岳驚天  
地到海方知徹底乾 徑山杲

一滴也無費盡工夫靠倒拄杖何處逢渠香爐上一  
堆牛糞氣熏熏上倒挂大葫蘆典牛游

平地鼓洪濤青天轟霹靂脚下爛如泥身上元不溼  
古往今來幾百年拄杖依然空靠壁無際派

費翁老慣羨風騷攫浪拏雲興轉家一棹蘆灣停泊  
穩半鉤銀月釣金鰲雪奇靜

茱萸問僧曰闍黎爲復是遊山甌水爲復是問道  
參禪曰和尚試道看師曰雕蛭鏤蛤不滲之泥勞

君達至曰渾身是鐵猶被一鎚師曰降將不斬

杖藜林下步蒼苔擾擾勞生眼未開好是花紅隨水  
綠一時流出洞中來地藏恩

遊山甌水事尋常早晚歸來鬢似霜蹋破艸鞋回首  
看數聲猿叫白雲鄉保寧勇

來時相伴來去時相伴去須知去與來同行不同步  
池邊鴨聽雷嶺上風吹樹九曲黃河徹底渾三千年  
清祇一度佛鑑勸



茱萸因僧參師以手一畫僧便出師曰者師僧來不通名去不通姓僧轉身亦以手一畫師曰者師僧名又不識姓又不識曰且道某甲姓箇什麼師曰苦哉波斯喫胡椒僧拂袖便出師曰作家師僧天然猶在

月舟載云撥艸尋雲路移松得茯苓蓋衲僧家尋常用事若是坐籌帷幄立驗死生又須是別有良謀祇如者僧恁麼又作麼生等閒躡足潭邊過消得龍王多少風

荆南白馬曇照禪師

南泉顯嗣

常曰快活快活及臨終

時乃叫曰苦苦又曰闍羅王來取我也院主問和尚當時被節度使拋向水中神色不動如今何得恁麼地師舉起枕头曰汝道當時是如今是主無對師乃擲下枕头

法眼益代院主當時但掩耳出去 清涼欽云當時好奪枕头劈面便擲 雲峰悅云苦苦當時是即今是奪枕头呈似云闍羅王祇在者裏 大溈智云徹底老婆心 天寶樞云白馬死却活院主活却死三

更過鐵圍日輪正當午 法林音云院主道如今何得恁麼地不妨休去管教疑殺天下人

一二三四五金木水火土鼓之以雷霆潤之以風雨誰道者漢生也顛顛顛預預死也莽莽鹵鹵咄地藏恩甜瓜徹蒂甜苦瓜連根苦拈起枕头時新羅夜打鼓

寶峰照

稟語長年卒未休登場每每不知羞被人一捏當心痛直得江陵水倒流夢菴律

靈章呪起九原魂惹得山魃晝上門霹靂一聲天欲碎隨吐舌云好怕人好怕人雪峯果

楚人楚聲越人越聲惟此人者非漢非秦若人識得其聲我遇斯人過於平生履朴文

風翻春水波波綠雨洗秋林葉葉紅午夜石牀攜枕睡山家樂境爲誰通野夫元

宗鑑法林卷十九

宗鑑法林卷二十

集雲堂 編

大鑒下四世

終南山雲際師祖禪師南泉顯嗣初參南泉問摩尼珠

人不識如來藏裏親收得如何是藏泉曰王老師與汝往來者是藏師曰直得不往來時如何泉曰亦是藏師又問如何是珠泉召師祖師應諾泉曰去汝不會我語師從此信入

翠峯顯於往來者是處云艸裏漢於不往來者亦是處云雪上加霜於如何是珠處別云險又云百尺竿頭作伎倆不是好手者裏著得隻眼賓主互換便能深入虎穴或不溜麼總饒師祖悟去也是龍頭蛇尾白雲端云雲際一顆摩尼珠幾乎落在萬丈深坑猶賴南泉老手親爲托起且道此珠現今在什麼處海神知貴不知價留與人問光照夜淨因成云南泉應機酬對縱奪可觀然終未能出他珠在直饒道汝不會我語正是藏畢竟珠在什麼處莫是海神知貴不知價麼此是近來新婦禪不勞拈出拍禪牀云

珠之與藏盡被老僧一拶粉碎諸人更來者裏討什麼又拍一下昭覺勤云南泉一期垂手收放擒縱則不無要且未見向上事在祇如盡大地是如來藏向什麼處著珠盡大地是摩尼珠向甚麼處著藏若明得有轉身處許你具一隻眼南堂欲云且道師祖悟去畢竟承誰恩力者裏著得箇眼便見頭正尾正古南門云南泉太煞繁詞待問如何是藏但云更莫別求如何是珠一鎚粉碎了也不妨好手理安洸云山僧則不然如何是藏綿包特石如何是珠鐵裹泥團

碧波深處釣魚翁拋餌牽絲力已窮一棹清風明月下不知身在水晶宮佛慧泉

別是非明得喪應之心指諸掌往來不往來祇者便是藏輪王賞之有功黃帝得之罔象轉樞機能伎倆明眼衲僧莫箇莽天童覺

蒼鷹逐兔驪龍玩珠透青眼不瞬照物手寧虛往來不往來艸裏謾塗糊百尺竿頭入虎穴分明月上長珊瑚圓悟勤

趙州云可憐兩箇漢不識轉身句  
仙巖智云放彌

得與不得天寬地窄坐臥經行無勞疑惑眞如語

南泉得得何似不得淑人君子其儀不忒黃龍

前得得後不得一貫誰知兩五百兩檜瀟瀟風松瑟瑟

愁隔山人聽鷓鴣詞錯認邊笳十八拍石菴珙

坐臥曾經幾度春半封苔蘚半籠雲無桮無縫難提

掇空把肝腸說向人閒極雲

兩手持來難蓋覆依前兩手還分付一枕清風睡正

濃鳥銜花落巖前路諸菴肇

楊柳溪邊垂綠線黃鶯枝上聲聲囀幾多貪耽不知

春空使落花千萬片高峯妙

陸互問南泉肇法師也甚奇怪解道天地同根

物一體泉指庭前牡丹曰大夫時人見此一枝花

如夢相似

保寧勇代拍手云阿誰得到者般田地黃龍心問

僧南泉恁麼道如何得見與我一體僧舉起坐具龍

云舉則易見還難毗盧頂上天風寒我我直下蒼龍

窟誰敢覷著昭覺勤云陸互手攀金鎖南泉八字

打開直得七珍八寶羅列目前乃豎拂子云天地一

指萬物一馬通身是口分疎不下徑山泉云若向

理上看非但南泉瞞他大夫一點不得亦未摸著他

脚跟下一莖毛在若向事上看非但大夫瞞他南泉

一點不得亦未夢見他汗臭氣在或有出來道大小

徑山說理說事祇向他道但向理事上會取天寧

琦云你若向同根一體上會落在肇公圈圓你若向

事理上會又落在妙喜葛藤中總無自由分祇如南

泉與麼道畢竟如何會平蕪盡處是青山行人更在

青山外愚菴孟舉雪竇頌畢云大夫夢中作夢南

泉夢中占夢雪竇善於原夢鏡裏山河影中聞見撲

碎鏡拂却影可惜一枝花拈向霜天月下更來澄潭

摸索可不道月落夜闌不知何處相見

見聞覺知非一一山河不在鏡中觀霜天月落夜將

半誰共澄潭照影寒翠峯顯

止潤石韞玉林秀淵藏珠見此一枝花似夢灼然根

本不同途王老師脫規模解向長安正鬧處喚起悠

悠陸大夫圓悟勸

照徹離微造化根紛紛出入見其門遊神劫外問何

有著眼聲前知妙存虎嘯蕭蕭吹作龍吟冉冉洞

雲昏南泉照破時人夢要識堂堂補處尊宏智覺

若知天地本同根不應重來更問人却得南泉親指  
示等閒花發夢中春鼓山珪

指點深紅與昔同更無天艷在芳蕤南泉笑裏移春  
去留得殘紅醉蜜蜂心閒賁

玉洞玄關道路長蟠桃豈是等閒芳遮藏不許人間  
見祇恐春風漏泄香正堂辨

天地同根元一體畫師難畫亦難描南泉轉步移身  
處引得黃鸝下柳條彌巖蔚

巢知風穴知雨磁石吸鍼潮漲醉寄語諸人莫莽鹵  
虎之缺兮馬之馵東西如何密相付千巖長

湖光湛湛映雲山公子遊花恣意觀鷺地一呼回首  
望始知勒馬到長安林阜豫

陸瓦問南泉弟子家字餅內養一鷺如今長大欲  
出此鷺且不得打破餅亦不得損其鷺未審有何  
方便泉召大夫夫應諾泉曰出也

高峰妙云南泉潦倒手眼不親縱饒出得也是死貨  
若是高峰祇向他道大夫還曾示人麼纔擬抵對便

與亂棒打出非特爲伊脫却鶻鼻布衫要使天下衲  
僧箇箇解黏去縛慶快平生 瀛山闇云大夫若不  
遇王老師未免餅破鷺損且道喚出後如何萬里鵬  
同遠千年鶴共飛

陸瓦問南泉大悲菩薩用許多手眼作什麼泉曰  
如國家用大夫作甚麼

翠峰顯別云不及大夫所問 保寧勇別云也未爲  
分外

大悲手眼問來親王老酬機列主賓倒轉槍頭來快  
便從茲六國絕烟塵野菴璇

陸瓦問南泉弟子從六合來彼中還更有身否曰  
分明記取舉似作家夫曰和尚不可思議到處世  
界成就曰適來總是大夫分上事

法林普云南泉老漢祇有殺人刀要且無活人劍以  
致陸瓦大夫一死更不再活何不待伊道和尚不可  
思議到處世界成就便喝云將謂大夫是箇人陸瓦  
向者裏掉回頭來千古之下誰敢以俗漢視之  
住人見物隔羅縠指問仙郎是何物仙子手攜出戶

看雲裳更把清風拂二隱

焦桐謾說是奇琴還有絲絃韻更沉句得知音能擊

賞相投何止芥投鍼虛舟省

陸瓦問南泉弟子亦薄會佛法泉便問大夫十二時中作麼生夫曰寸絲不挂曰猶是階下漢夫曰怎見得曰不見道有君王不納有智之臣

飛鳥盡良弓藏狡兔死走狗烹萬年牀上坐智士豈樓情塞外無兵革丹山有鳳鳴四海八荒王化裏垂拱平章享太平達變機

獨體喜立枯木龍吟謾言春到水尙成冰襟懷磊落兮不倚疎籬眼日曆瞤兮勿自成羈階下漢知不知雲舒海嶽鬼低雨鶯愛春花遠近歸天岸昇

陸瓦因南泉遷化來弔慰院主問大夫何不哭先師夫曰院主道得互即哭主無對

長慶稜云且道含哭不合哭 法林音代院主但作哭聲

池州甘贄行者見南泉願開接待有問曰行者接待不易甘曰如餒餒馬

瑯琊覺云快把飯來 五祖演云願行者常似今日

高峯妙云瑯琊美則美矣祇是做造倉忙不堪供養五祖不聽來風一鍋淡齋羹可惜著了許多鹽酢譬如餒餒馬祇向道殘羹餒飯不勞拈出且道與古人是同是別定當得出曰消萬兩黃金不然喫水也須防噎 濟水洗云若是有鼻孔底者飯管取喫不下要識甘贄麼慣從五鳳樓前過手握金鞭賀太平

甘贄入南泉設齋黃檗爲首座甘請施財檗曰財法二施等無差別甘曰恁麼道爭消得某甲颺便昇錢出須臾復入曰請施財檗曰財法二施等無差別甘乃行颺

翠巖真云甘贄行者點兒落節黃檗施財何曾夢見雲居元云大小黃檗被甘贄換却一隻眼 徑山杲云一等是隨邪逐惡雲居羅漢較些子 靈隱岳云總是掩耳偷鈴殊不知甘贄有收有放首座徹底惺惺雲收雨霽長空闊一對鴛鴦畫不成 明招補徵云行者兩度請行施是好心不是好心黃檗始終



答語一般爲甚肯一不肯一

拋來撒去互施呈地獄門前鬼眼睛覷破髑髏肝膽  
外摩薩頂上復重明虛堂愚

甘贊因化主至宅乃問是甚處曰藥山甘曰還將  
得藥來麼曰未審有什麼病甘忻然取銀一百兩  
施之復曰山中有人此物乃回主尋歸山納疏藥  
山問歸何速主卽敘前問答山曰急送還他子遭  
賊了也主乃送還甘曰山中有人更添一百兩施  
之

同安顯云早知行者與麼問終不道藥山來 雪峯  
空云藥山老漢亦自膽小若是雪峯卽便收下何故  
且教甘贊者漢疑三十年 天童恣云行者將蝦釣  
鰲化主貪餌忘鉤藥山亡羊而後補牢得失未免相  
半同安雖有入地之謀且無衝天之計山僧若作供  
養主當時一喝便行管取行者疑著半生 龍唐柱  
云我若作化主待他施銀兩錠復伸手云行者還要  
再服三兩劑始得管取傾囊以施命根依舊在我手  
裏

甘贊問一僧什麼處來曰瀉山來甘曰曾有僧問  
瀉山如何是西來意瀉山舉拂子上座作麼生會  
曰借事明心附物顯理甘曰且歸瀉山去好

保福聞乃仰手覆手 磬山鼎云甘贊瞎者僧眼卽  
不無祇如者僧從瀉山來不從瀉山來

西來祖意是如何溪上梅花開已多向上一機言外  
契風前遙憶老維摩弘法澤

甘贊一日入南泉設粥仍請南泉念誦泉乃白椎  
曰請大衆爲狸奴白牯念摩訶般若波羅蜜甘拂  
袖便出泉粥後問典座行者在甚麼處座曰當時  
便去也泉便打破鍋子

雲門信云南泉老漢未免隨人起倒直饒打破鍋子  
也是賊過後張弓 愚菴孟云兔子懷胎蚌含明月  
三十棒寄打雪竇六不收勘破雲門女媧氏煉石補  
天秦始皇驅山塞海雖然三十年後一回飲水一回  
噎 明昭補云不奈船何打破屎斗

異路相逢句已酬閒吹羌管向汀洲漁人貪顧沙頭  
驚不覺扁舟逐浪流雪峯預

高吟大笑性猖狂  
潘閣騎驢出故鄉  
驚起暮天沙上鴈  
海門斜去兩三行  
蓮堂準

鉞鋒相湊便干戈  
帶累南泉打粥鍋  
莫謂當年輕放過  
大都有罪不同科  
笑翁地

福州芙蓉山靈訓禪師歸宗常嗣 一日歸宗問甚

處去師曰歸閣中去日子在此多年裝束了却來

爲子說一上佛法師結束了上去宗曰近前來師

乃近前宗曰時寒途中苦爲師聽此言頓忘前解

八十婆婆學畫眉  
疑心欲比少年時  
一朝打破舊臺

鏡始信從前萬事空  
慈受深

芙蓉一日訪同參  
實性大師性陸堂  
以右手拈拄

杖倚左邊良久曰  
若不是芙蓉師兄  
大難委悉便

下座

黃龍南云實性用  
不得便休却將佛  
法以爲人情致

令千載之下與人  
作笑端且道利害  
在什麼處 青

龍斯云實性證則  
人情佛法一時周  
備大似向福建

人前賣荔枝未免  
旁觀者哂

陪盡老精神  
杯盤樣新誰知  
村店酒難勸  
御樓人

西巖惠

五臺山大禪佛智通禪師歸宗常嗣 初在歸宗會下忽

一夜連叫曰我大悟也衆駭之明日上堂衆集宗

曰昨夜大悟底僧出來師出曰某甲宗曰汝見箇

甚麼道理便言大悟試說看師曰師姑元是女人

作宗異之

五月炎威當酷熱  
浹背汗流無處說  
巾地清風劈面

來大禪眼裏重添  
屑卿堂清

童子手頓來赤處  
皆黑若將白紙來  
一點下不得

若下得諸成紙上  
塗烟墨黃龍震

鎮州普化禪師龍山積嗣 常入市振鐸曰明頭來明頭

打暗頭來暗頭打四方八面來旋風打虛空來連

架打一日臨濟令僧捉住曰總不恁麼來如何師

拓開曰來曰大悲院裏有齋僧回舉似濟濟曰我

從來疑著者漢

五祖演云山僧則不然總不恁麼來如何和聲便打

是他道五祖官枷搭棒我祇要你恁麼道何故一

任其語諸方 青獅信云普化恁麼作怪被臨濟將

鼻孔一捏酸去十分若無大悲院躲得過何處見有  
普化 福嚴容云普化恁麼帶累人上天無路入地  
無門且道端的在甚麼處臨濟道我從來疑著者漢  
也未必是好心

老倒分明兩路差箭鋒相拄勿昂斜龍蛇混雜人難  
辨白日長空下雪花汾陽昭

旱天忽震數聲雷遠近飛雲若往來甘雨未曾施一  
點返將風勢卷將回雲峰悅

斐羅慣要逞聰明金榜何曾挂得名捋下幞頭歸去  
好莫騎驢子傍人門鼓山珪

一撈銀山鐵壁摧大悲院裏趕村齋善財拄杖如無  
用乞與佯狂老萬回水菴一

水急魚行澀風高鳥不棲世情看冷暖人面逐高低  
松源嶽

普化暮入臨濟院喫生菜濟曰者漢大似一頭驢  
師便作驢鳴濟謂直歲曰細抹艸料著師曰少室  
人不識金陵又再來臨濟一隻眼到處爲人開

趙州云何不與他本分草料

草裏相逢兩赤眉交鋒一陣疾如飛東西旗號渾相  
似試問何人得勝歸上方益

臘鐘生菜似頭驢臨濟堂前捉敗渠聳耳長鳴隨踢  
踢不知業債倩誰除天目禮

普化因臨濟與河陽木塔同在僧堂內坐相與議  
曰普化者漢每日在街市掣瘋掣顛知它是凡是  
聖正議時師忽從外來濟便問汝是凡是聖師曰  
汝且道我是凡是聖濟便喝師以手指曰河陽新  
婦子木塔老婆禪臨濟小廝兒却具一隻眼濟曰  
者賊師曰賊賊便出去

首山念云者兩箇賊有箇正賊且道那箇是正賊復  
代云劉盆子

騏驎驚駘辨者稀淺深毛色混同之若無伯樂垂精  
鑒千里追風不易騎海印信

普化見馬部使出喝道師亦喝道作相撲勢馬部  
使令人打五棒師曰似卽似是則不是  
機境相投是妄眞入河漸漸見長人受屈遭他一頓  
棒元來不是好官人江陵柔

階頭放下劫初鈴相撲呼他馬使名五棒打來無雪處却言渠不是官行天目證

風流杰拉風流彥賦巷歌樓恣飲宴逗到樽空月亦消却將紈扇斜遮面白巖符

普化一日同臨濟赴施主家齋濟問毛吞巨海芥納須彌爲復是神通妙用法爾如然師遂踢倒飯牀濟曰太癩生師曰者裏什麼所在說癩說細濟休去次日又同赴齋濟曰今日供養何似昨日師又踢倒飯牀濟曰太癩生師曰瞎漢佛法說甚麼癩細濟乃吐舌

翠峯顯云兩箇老漢喫飯也不了好與三十棒棒雖行且那箇是正賊 南堂靜云二尊宿如二龍爭珠拏雲攫霧不動波瀾如二虎爭餐活捉生擒不傷物命者裏忽有問毛吞巨海芥納須彌爲復神通妙用法爾如然祇向道一拏拳倒黃鶴樓一踢踢翻鸚鵡洲有意氣時添意氣不風流處也風流 南華曷云臨濟覲面提撕普化全機酬酢直得南山鰲鼻吞却東海鯉魚陝府鐵牛觸倒嘉州大衆爲甚如此相逢

不下馬各自奔前程 昭覺勤云精金不百煉怎見光輝至寶不酬價怎見真假不是臨濟不能驗普化不是普化不能抗臨濟所謂如水入水如金博金雖然如是放過彼此作家檢點二俱失利 天童華云一出沒一往一來猛虎口裏奪餐毒蛇頭上揩癢要且未稱大丈夫事二老名諱宇宙價重當時山僧豈可謹密三寸二俱放過爲他弄假像真二俱不放過爲他搥搥太甚是汝諸人若作佛法商量達磨一宗掃土而盡 南堂欲云翠峯與麼道也好與二十棒不見道正賊走了邏賊人喫棒 磬山修云一箇且擒龍之手一箇得陷虎之機二俱作家且道誰是陷虎誰是擒龍 古南門云臨濟一條棒尋常橫打豎打到者裏因甚却吐舌一聲羌笛離亭晚君向瀟湘我向秦 要識真金須入火再三煅煉見精麤上行買賣不饒讓好物從來價自殊海印信 撥動千鈞弩發機穿雲透石電光飛若無舉鼎拔山力千里烏騅豈易騎玉笈乾

驪龍奮迅渤海汪洋氣蒸雲夢波撼岳陽迷雲陡黑

日月無光誰云普化是顛狂天水廣

糠粃鑄堯舜蝸鵲笑鯢鵬石壓筍斜出巖懸花倒生

屢屐炊伏鷄烹露靈一聲天地裂不許康衢歌太平

三疾甫

相逢特地展機絲出沒縱橫妙用全翦翠圓翻荷葉

雨鷺鷥衝破竹林烟浪山嶼

普化將入滅謂人曰乞與我一箇直後人與衣服

皆不受臨濟令人送一棺師笑曰臨濟斯兒饒舌

便受之乃辭衆曰明日東門去死也郡人相率送

出城師厲聲曰今日葬不合青鳥明日南門遷化

人亦隨之又曰明日出西門方吉人出漸稀第四

日自擎棺北門外振鐸入棺而逝郡人奔走出城

揭棺視之已不見惟聞空中鐸聲漸遠莫測其由

風顛用盡到無餘一箇棺材八箇昇昇出鎮州城外

去聽他木鐸自分疎北磻簡

撮得虛空作近隣便於北斗裏藏身者掠虛漢何多

事猶把空棺誑後人東山源

壽州良遂禪師麻谷參麻谷谷見來便將鋤頭去

鋤艸師到鋤艸處谷殊不顧便歸方丈閉却門師

次日復去谷又閉却門師乃敲門谷問阿誰師擬

稱名忽然契悟遽曰和尚莫瞞良遂良遂若來

禮拜和尚泊合被經論賺過一生及歸講肆乃謂

衆曰諸人知處良遂總知良遂知處諸人不知

雲門偈云便有逆水之波如今得入是順水之意亦

喚作無波時節又云作麼生是良遂知處東林顏云

作麼生是良遂知處鸛語鶴靈隱獄云爲人爲

微敲著生鐵通水之波虛空釘橛

平生心膽向人傾到此門中有幾人別後都城舊知

已暖烟斜日又黃昏龍門遠

尋言逐句設多端祇爲從前被眼瞞撒手便能歸故

國暗思岐路幾多般丹霞淳

親到桃源景物幽一壺明月湛如秋反思洞口春殘

日無數紅英逐水流成枯木

相逢渾似活冤讐惹得通身萬斛愁一自不從人處

覓者回羞見鏡中頭惟一澗

虔州處微禪師

西堂藏嗣

因僧問三乘十二分教體理

得妙與祖意是同是別師曰須向六句外鑒不得

隨它聲色轉曰如何是六句師曰語底默底不語

底不默底總是總不是汝合作麼生僧罔措

魯菴遠云者僧真可謂禍不入慎家之門末後一道

真言未免令旁觀者晒惟者僧罔措却較些子

天下紛紛欲帝秦魯連寧死不稱臣何如青嶂茅簷

底一覺高眠兩脚伸紫理矩

金州操禪師

章敬禪嗣

請米和尚齋不排坐位米到展

坐具禮拜師下禪牀米乃坐師位師却席地而坐

齋訖米便去侍者曰和尚受一切人欽仰今日坐

位被人奪却師曰三日後若來即受教在米三日

後果來曰前日遭賊

鏡清因僧問前日遭賊意旨如何清云祇見錐頭利

不見鑿頭方 愚菴孟云當時米和尚一到便席地

而坐且教金州上天無路入地無門直坐到樓至如

來出世我那時再來與渠相見以手斫額云貓 報

恩賢云金州失位米和遭賊秤鈎打釘剛是拽直可

惜侍者欠伶俐若是箇漢待米和尚道前日遭賊便

好問和尚失却甚麼當時若下得者語非但米師欽

服直使金州退身有分

河中府公畿禪師

章敬禪嗣

僧問如何是道如何是禪

師以偈示之曰有名非大道是非俱不禪欲識箇

中意黃葉止啼錢

資福王云道無禪不立禪無道不行如今杜蠻師家

不解通變不是一棒打到底便就脂粉出無限四六

文章未免公畿敵指有分山僧更資一路有名即大

道是非俱是禪會得箇中意徒勞化紙錢

五臺山秘魔巖禪師

馬祖一下

常持一木杈凡見

僧來纔禮拜即扞却頸曰那箇魔魅教汝出家那

箇魔魅教汝行脚道得也扞下死道不得也扞下

死速道道霍山通聞往見之未禮拜便攬入懷

中師乃拊通背三下通拍手曰師兄三千里外賺

我來三千里外賺我來

保福展云當斷不斷反招其亂 首山念云千聞不

如一見 法眼益於速道下代僧云乞命乞命 報



慈遜代僧云老兒家放下杈子得也 法燈欽代僧  
但引頸示之 五祖戒云當時若見奪取杈來薰面  
杈倒點把火照看伊面皮厚多少 明招謙云我當  
時見伊欲道未道之際先與一杈 瑯琊覺云雷聲  
甚大雨點全無

把斷重津過者難擎杈須信觸體乾霍山到後知端  
的同死同生未足觀翠峯顯

手把長杈坐要津乾坤誰是妄遊人當時若遇英雄  
漢往往反成脚下塵佛印元

自誇獨握誅龍劍及遇真龍不奈何也似將軍空索  
戰無功徒枉動干戈海印信

嶮崖之句無處插棠去却藥忌露當門齒杈下放身  
捨命箇裏如龍得水三千里外賺吾來捋虎鬚兮捉  
虎尾惠通且

威風凜凜不容攀跳入懷中便解顏不是酒腸寬似  
海爭知詩膽大如山雪菴瑾

急水灘頭把釣竿洪波洶湧暮江寒錦鱗也解隨鈎  
上一吸滄溟徹底乾率菴琮

芳樹吐花紅過雨入簾飛絮白驚風黃添晚色青舒  
柳粉落晴香雪覆松市溪森

湖南上林戒靈禪師永泰  
海嗣初參潞山潞問作什麼

來師曰介胄全具曰盡卸了來與大德相見師曰  
卸了也潞咄曰賊尚未打卸作甚麼師無對仰山  
代曰請和尚屏却左右潞以手指曰諾諾師後到  
永泰方諭其旨

三宜孟云且道上林悟潞山旨耶悟仰山旨耶若從  
潞山悟來介胄何在若從仰山處悟來試問仰山還  
曾屏却也未若總不恁麼從自己領得卸却箇甚麼  
僧便問和尚何得以已方人宜以手指云諾諾

湖南祇林禪師永泰  
海嗣每叱文殊普賢爲精魅手持

木劍自謂降魔每見僧來便曰魔來也魔來也以  
劍亂揮歸方丈如是十二年無有契其機者乃置  
劍不言僧問十二年前爲什麼降魔師曰賊不打  
貧兒家曰十二年後爲什麼不降魔師曰賊不打  
貧兒家

法林音云且道十二年前是十二年後是

劍有獨在鐵劍無魔自清祇願降魔全夫與不知身  
是老魔請下山家

一劍霜寒八百州沙場苦戰志難酬家園自有琴書  
在月白風清歸去休天岸昇

宗鑑法苑卷二十

宗鑑法苑卷二十一

卷二十一

大鑒下五世

漢州嘉興義立禪師黃檗師在黃檗已過三十年落  
一座雖令問話乃問如何是西來的的大意使  
痛打如是三問三打遂辭座曰某甲問話恁家  
棒所恨愚魯且往諸方行脚去座曰白槩曰義立雖  
後生却甚奇特來辭時願垂提誘來日師辭槩指  
往大愚師遂參大愚愚問甚處來師曰黃檗來曰  
有何言教師曰某問西來的的意三問三度被打  
不知過在甚處愚曰黃檗恁麼老婆心切爲汝得

鐵索猶寬過在師大悟曰原來黃檗佛法也無多  
子愚乃攔住曰者尿牀鬼子適來問過在甚處如  
今又道佛法無多子見箇甚麼道理速道速道師  
向愚肋下打三拳愚拓開曰汝師黃檗非干我事  
師返黃檗曰者漢來來去去有甚了期師曰祇  
爲老婆心切槩曰甚處去來師曰昨蒙和尚慈旨  
令參大愚去來槩曰大愚有何言句師舉前話槩  
曰大愚老漢饒舌待來痛與一頓師曰說甚待來  
即今便打隨後便掌槩曰者風顛漢來者裏捋虎  
鬚師便喝槩喚侍者曰引者風顛漢參堂去  
爲山問仰山臨濟當時待大愚力得黃檗力仰云非  
但騎虎頭亦解把虎尾 中峰本云汝師黃檗非干  
我事大愚肋下更合喫拳者風顛漢來者裏捋虎鬚  
黃檗面門猶欠一掌致使尿牀鬼子邪見勃興賺他  
後代兒孫一箇箇鼓粥飯氣 破山明云頑皮癩肉  
那知痛癢不是大愚刀刀見血焉解奪轉槍旗惡聲  
播世

睡眠三番打不開忽然狂蹶吼如雷君看馬帶紅鞭

鼓祇是去年曾秀才整軒遷

一拳拳倒黃鶴樓一趨趨翻鸚鵡洲有意氣時添意  
氣不風流處也風流白雲端

雷電誼轟海嶽昏一家愁閉雨中門狂風忽起烏雲  
散白日滿天星斗分保事勇

雷電風行便合休巨鰲頓使上灘頭翻身一吸滄溟  
竭鐘鼓山河四百州照覺總

便言佛法無多子大丈夫兒肯自乖肋下三拳明有  
信不從黃檗付將來真淨文

九包之鵬千里之駒真風所簫靈機發樞面來時  
飛電卷迷雲破處太陽孤捋虎鬚見也無箇是雄雄  
大丈夫天童覺

劈開華嶽連天秀放出黃河到海聲聽聽死後蒿枝  
折大地如今有幾人龍門遠

禍福無門口自招三遭瞎棒打驢腰可憐敗國亡家  
恨萬古春風吹不消天目禮

拔樹鳴條浩浩風雨雲反覆在其中千波萬浪驚天  
地到海方知信不通盧堂愚

透過禹門三級浪身在雲霄總不知忽被春風吹一  
縷飛騰萬里孰能羈福嚴容

臨濟出世後凡見僧入門便喝

龍控懸河海月秋烟霞風雨一時收波濤急急人難  
會截斷千江水不流克符道者

萬里青霄絕點塵一聲霹靂震乾坤茫茫宇宙人無  
數幾箇如今有腦門白雲端

一劍定烟塵憑何辨主賓梯山齊入貢誰識聖明君  
大洪遂

驀然一喝迅雷奔蟄戶雖開命少存若有轉身方便  
路休觀芳艸怨王孫道場如

入門便喝絕商量空奮雙拳立紀綱反轉殺人三角  
眼叢林千古受災殃佛照光

臨濟因赴普請鋤茶次槩後至師問訊了按鑊而  
立槩曰者漢困耶師曰鑊也未舉困箇甚麼槩便  
打師接杖推倒槩呼維那扶起我來那扶起日和  
尙爭容得者風顛漢槩却打維那師鑊地曰諸方  
火葬我者裏活埋

仰山云正賊走却還賊人喫棒 三交嵩云正狗不偷油雞銜燈盞走 石菴浮云黃檗大似無奈何打破屎斗

奪旂擊鼓著精神父子雖親法不親爲報四方禪客道等閒莫作守株人真淨文

黃檗倒地維那扶起火葬活埋清風未已渴山語

相將艸裏弄弓刀牛易羊灾禍且諸豈是老年來技

弱祇因家富小兒嬌位中符

等閒擺出龍蛇陣白雲驅人喪艸窠莫怪將軍重出

令嗣山無奈嶽夷何惠開卷

臨濟栽松次檠曰深山裏栽許多作麼師曰一與

山門作境致二與後人作標榜道了將鋤築地三

下檠曰雖然如是子已喫吾三十棒了也師又築

地三下噓兩聲檠曰吾宗到汝大興於世

渴山問仰山黃檗當時祇囑臨濟一人別更有在仰

云亦囑臨濟亦記向後渴云向後如何仰云一人指

南吳越令行遇大風卽上南塔主云獨坐巖底此口

方出 渴山詰云臨濟與麼大似平地喫交雖然如

是臨危不變方偈丈夫黃檗云吾宗到汝大興於世也是憐伊不覺醜 天童華云黃檗道子已喫吾三

十棒了也養子之緣固當如是臨濟正令雖行可惜

甘旨向饅頭邊活埋仰山見解未出常情豈止遇大

風則止何不道直待虛空界盡此話方始大行豈不

頭毛星正山僧今日拚下面皮要與諸人相見去也

驚拈拄杖卓一下云驚羣須是英靈漢敵勝還也獅

子兒

帶礪山河盡土疆漢高殿下有張良千言萬語無人

會又逐流鶯過短牆翠微真

風吹雨打節還枯千尺龍蛇插太虛堪笑兒孫無伎

倆一生從此被塗糊懶菴樞

臨濟示衆汝等諸人亦肉團上有一無位真人常

在諸人面前出入未證據者看看時有僧問如何

是無位真人師下繩牀搦住曰道道僧無語師拓

開口無位真人是什麼乾矢橛

雪峰存問云臨濟大似白拈賊 翠峰顯云夫善竊

者鬼神莫測既被雪峰覷破臨濟非是好手召衆云

翠峰今日換却人眼睛了也你若不信各歸寮舍裏自摸索看 瑯琊覺云臨濟可謂冰棱上度九隄劍刃上得全身 薦福行云臨濟一條脊梁硬似鐵拗不折可憐末後不奈船何打破屎斗 天寧琦云臨濟若無後泊被打蔡州雖然家無白澤之圖必無如是妖怪 龍翔新云老漢尋常氣宇如王却作小廝兒戲幾手法道遇大風而止龍翔今日作死馬醫無位真人藁著臨著據將來依然錯且道是臨濟錯龍翔錯從教天下人卜度 天寧樞云無位真人乾矢橛臨濟未是拈賊千古長如白練飛一條界破青山色 西堂云臨濟老漢尋常一條脊梁硬似鐵 手裏著裏大似日中迷路眼見空花直饒無位真人是乾矢橛正是靈龜拽尾其僧祇知季夏極熱不知仲冬嚴寒若據當時合著甚麼語塞斷天下人舌頭西堂祇恁麼休去又乃眼不見爲淨不免出一隻手狼藉去也臨濟一擔西堂一堆一擔一堆才付阿誰從教撒向諸方去笑殺當時老古

雖

萬一不用揀 如誰揀誰不揀即今生死本菩提三世如來同箇長沙岑 卞壁無瑕每日暉秦王愛不輪機可憐又入相如手一陣清風高路歸佛印元 無位真人亦肉團興來擺手出長安將軍自有嘉聲在不得封侯也是閒疎山長 迷悟相反妙傳而箇春坼百花兮一吹力回九牛兮一挽無奈泥沙撥不分明寒心甘泉眼忽然突出肆橫流復工險天童覺 面門出入每相見日月由來不識真海嶺慣遊知己少反身歸臥高頂上疎山如 腦後見頭付客 眼了作 雖然越得老鼠一棒打破油甕龜山杲 春雪滿手未觸處 花開不知園裏有那箇是真梅 謝堂思 颯颯秋風滿院涼芬芳籬菊半經霜可憐不遇攀花手狼藉枝頭多少高峰妙 團圞蘿撈水月華當時把住又歸家碧潭千尺夜空

冷落葉滿天誰撒沙三峰藏

黃河尚有澄清望無無位真人□日肆筵設席今朝  
鼓瑟吹笙漢關喻

臨濟問院主甚處來曰州中糴黃米來師曰糴得

盡麼曰糴得盡師以拄杖畫一畫曰還糴得者箇

麼主便喝師便打典座至師舉前話座曰院主不

會和尚意師曰你又作麼生座禮拜師亦打

黃龍南云寺主下喝不可放過典座禮拜放過不可

臨濟令行歸宗放過三十年後有人說破黃龍新

云典座禮拜有過無功寺主一喝有功無過既有

功爲甚麼却打棒頭有眼明如日要識眞金火裏看

天童華云二尊宿雖則力提綱要未免依艸附木

殊不知大小臨濟被者兩箇漢破家散宅還會麼殺

人刀活人劍西禪需云院主一喝電卷雷奔山摧

地裂典座禮拜雲收雨散月白風清雖然如是因甚

麼總喫痛棒不見道臥龍纔奮迅丹鳳便翔翔

報恩秀云院主被棒賞不避仇讎供養主蒙恩誅豈

擇骨肉廣教王云院主典座雖竭力擔荷怎奈臨

濟當時祇令行一半若據令而行何處更有今日你

諸人還曾夢見麼乃拈拄杖一齊打散

功德天黑暗女有智主人俱不取後代兒孫渾莽園

宏綱委地憑誰舉正覺逸

寺主下喝典座禮拜臨濟令行古今獨邁過山結

臨濟全機格調高棒頭有眼察秋毫掃除狐兔家風

峻變化魚龍電火燒活人劍殺人刀倚天照雪利吹

毛一等令行滋味別十分痛處是誰遭天童覺

寶劍持來刃似霜幾回臨陣斬蠻王有情有理俱三

段一道寒光射斗旁白雲端

一堆紅燄互晴空不問金銀鐵錫銅入裏盡教成水

去那容蚊蚋泊其中徑山泉

吹毛在握逞全威不許依門傍戶窺是聖是凡俱坐

斷直教千古轉光輝盡毒策

臨濟陞堂有僧出師便喝僧亦喝便禮拜師便打

又有僧來師舉起拂子僧禮拜師亦喝又有僧來

師舉起拂子僧曰謝和尚指示師亦打

雲門偈代云祇宜老漢大覺云得卽得猶未見臨





拜定纔作禮忽大悟

斷際全機繼後踪持來何必在從容巨靈擡手無多  
子分破華山千萬重翠峰巖

不墮前後獨超古今喚回千歲夢飛出九臯禽直下  
一鎚光迸散斬新彈子出爐金天童覺

案頭書敕令行時閭外全提殺活機回首華山孤頂  
望巨靈神亦豎降旗唐堂遠

臨濟上堂次兩堂首座相見同時下喝僧問師還  
有賓主也無師曰賓主歷然復召大眾曰要會臨  
濟賓主句問取堂中二首座

廣慧璉云兩堂首座同時下喝還有賓主也無若道  
有祇是箇瞎漢若道無亦是箇瞎漢不有不無萬里  
崖州若向者裏道得好與三十棒若道不得亦與三  
十棒汝等作麼生出得山僧圈圓良久云苦哉蝦蟆  
蚯蚓踴跳上三十三天撞著須彌山百雜碎拈拄杖  
云一隊無孔鐵錘速退速退承天宗云臨濟此語  
走殺天下衲僧我即不然當時見問還有賓主也無  
但云一對無孔鐵錘天童覺云殺人刀活人劍在

臨濟手裏雖然如是當時見道賓主歷然便與震威  
一喝直饒大逞神通也祇得同聲相應 昭覺勤云  
正敕既行諸侯避道 大溈智云作麼生是賓主歷  
然底道理若也會得一雙孤鴈撲地高飛其或不然  
兩箇鴛鴦池邊獨立

碎咏之機箭拄鋒警然賓主當時分宗師憫物垂緇  
素北地黃河徹底渾石霜圓

兩堂上座齊下喝眼裏瞳人帶金屑錐刀同用不能  
分黑漆崑崙迷夜月浮山遠

一喝須教水逆流歷然賓主未輕酬當人若解通消  
息半夜扶桑出日頭海印信

離婁則不到師曠聽亦譌箇中識賓主日午下星河  
黃龍震

以平報不平王法本無親臨濟雖明眼也是黃龍精  
徑山杲

一喝當機賓主分莫將知見強疎親翻身獅子威聲  
甚眼裏無筋一世貧尼無著總

靈符直奪納龍門箭拄曾誇好弟兄酒熟壺頭春色

龍王鞭碎鐵崑崙廣教王

苦雨酸風更擦沙要將宗印定龍蛇鐵關阻斷迴紋  
路多少蚪孫未到家潭吉忍二

玉簡深埋白帝城夜中光相益開明山魍引子爭來  
鑿剖到函封失却睛

臨濟上堂有一人輪劫在途中不離家舍有一人  
離家舍不在途中阿那箇合受人天供養

徑山杲云賊身已露 雲巖遊云識取鉤頭意莫認  
定盤星 徑山及云臨濟見處偏枯果然祇具一隻  
眼山僧昨抵昌國訪諸官寮從東過西從西過東波  
波挈挈竟日祇在途中且如何說箇不離家舍此日  
歸來山門頭合掌佛殿裏燒香穿僧堂入廚庫總是  
自家屋舍又如何說箇不離途中衲僧家祇要據實  
而論若不據實而論謂之脫空謾語漢怎受人天供  
養隆教與麼告報也是小脫空且平實一句作麼生  
道從來不唱脫空歌把火燒山拾田螺白榔樹梢魚  
扇子急水灘頭鳥作窠好大哥以拂子擊禪牀一下  
平陽恣云臨濟大師話墮了也還有檢點得出者

麼若也檢點得出許你與伊同參合受人天供養如  
或未然喝一喝云莫把是非來辨我浮生穿鑿不相  
干 理安問云一不作二不休 晦曇承云貪他一  
粒米失却半年糧

霹靂未收聲閃電不留影三更月到窗半夜驢觀井  
快騎駿馬驟高樓一塵不動須彌頂最惹甲

無端亦學寫焉烏誰要人天供養乎幸是風顛人不  
在飯牀推倒笑狂驢覺浪盛

不屬陰陽生造得那從地上論根苗無鬚鑽兩頭搖  
落魄風流格外標平陽恣

秦山楚水兩悠悠任意何如不繫舟還似無私空界  
月萬邦同秉一輪秋至善得

臨濟因僧問如何是三眼國土師曰我共汝入淨  
妙國土中著清淨衣說法身佛又入無差別國土  
中著無差別衣說報身佛又入解脫國土中著光  
明衣說化身佛

法身化身化身咄哉魍魎妖精三眼國中逢著笑教  
無位真人徑山杲

臨濟示衆我有時一喝如金剛王寶劍有時一喝如踞地獅子有時一喝如探竿影艸有時一喝不作一喝用作麼生會僧擬議師便喝

天寧琦喝一喝云且道者一喝落在甚麼處爲復是金剛王寶劍爲復是踞地獅子爲復是探竿影艸爲復是一喝不作一喝用試辨看若辨不出報恩與你註破金剛王劍目前可驗擬議不來墮坑落澗踞地獅子直下便是打破觸髅拈却牙齒探竿影艸好也不好左手扶起右手推倒有時一喝不作喝用大小臨濟祇管說夢便與麼會猶欠一喝在喝一喝 獅林則云臨濟一喝不作一喝用字經三寫爲焉成馬老僧一喝只作一喝用吳肉爛鮮賣與要者有過無過諸人試定當看喝一喝 開先金云者僧擬議臨濟便喝還是金剛王寶劍還是踞地獅子還是探竿影艸還是一喝不作一喝用者裏縈素得出權衡佛祖號令人天未爲難事其或未然更爲你指出喝一喝

一喝全剛劍用時寒光燦燦射坤維語言擬議傷鋒

刃徧界觸髅知不知智海融四

一喝金毛踞踞地檀林震震香風起雖然爪距不曾施萬里妖狐皆遠避

一喝將爲探竿艸南北東西無不到短長輕重定鎚銖平地茫茫須靠倒

一喝不作一喝用三世古今無別共落花三月睡初醒碧眼黃頭皆作夢

小斯兒偏愛弄端絲毫不挂赤條條劣獅筋斗更翻躑躅得蟾蜍下碧霄中峯本

金剛王劍倚天寒喝下分明邪正看擬議直教心膽喪鋒鎚纔犯觸髅乾磬山修四

金毛踞地露全威哮吼從他百獸危電卷風馳山嶽裂管教聲動震如雷

探竿影艸露鋒鎚眞僞何曾得掩蔽喝裏如同明鏡現自分妍醜見乖張

一喝全收萬喝宗幾人悟得到心空諸方錯有商量者莫待臨機落下風

同時照用不同裁變態風雲倏闔闢石火光中纔擬

議鐵輪早已齧頭來不陳悉

金剛王劍八面神光如大焰爐蚊蚋不藏佛魔同斬  
運之則昌擬犯其鋒遂喝云是什麼所在和聲便打  
潭吉忍四

踞地獅子有殺有活靜若淵泉動排山岳爪牙纔張  
飛潛魄落足下無私兮似危而安龍象蹴蹋兮非驢  
所堪豎拂子云見麼便喝

探竿影艸從上眼目海北天南鷹擊電燭三千里外  
不失正鵠懷瓊握玉底切忌將來宅破家亡底何妨  
搆得乃喚云闍黎僧回首遽云過

一喝不作一喝用佛眼窺之絕纖縫正使狼烟遶戶  
飛羽扇綸巾自絃誦且道憑箇什麼道理卓拄杖三  
下

臨濟一日拈胡餅示洛浦曰萬種千般不離者箇  
其理不二浦曰如何不二之理師再拈起胡餅示  
之浦曰恁麼則萬種千般也師曰屙屎見解浦曰  
羅公照鏡

瀉山詰云臨濟使風挂帆洛浦鼓棹揚波然雖如是

臨濟門下則得瀉山門則不得

臨濟示衆大凡演唱宗乘一句中須具三玄一玄  
門須具三要有權有實有照有用諸人作麼生會

瀉山修拈拄杖云諸人還識得者一句麼卓一下喝  
一喝要會三玄麼以拄杖點空作一喝一喝要會三  
要麼以拄杖於空中畫○●○喝一喝擲下拄杖

第一玄照用一時全七星光燦爛萬里絕人烟汾陽昭七

第二玄鉤錐利更尖擬議穿顙過裂面倚雙肩

第三玄妙用具方圓隨機明理事萬法體中全

第一要根境俱忘絕朕兆山崩海竭漚飄塵蕩盡乾  
坤始爲妙

第二要鉤錐察解呈巧妙縱去奪來掣電機透匣七  
星光晃耀

第三要不用鉤錐并下釣臨機一曲楚歌聲聞者悉  
皆忘返照

三玄三要事難分得意忘言道易親一句明明該萬  
象重陽九日菊花新

第一玄三世諸佛擬何宣垂慈夢裏生輕薄端坐還

成落斷邊慈明圖三

第二立靈利納僧眼未明石火電光猶是鈍揚眉瞋目涉關津

第三立萬象森羅宇宙寬雲散洞空山嶽靜落花流水滿長川

句中難透是三立一句該通空劫前臨濟命根元不斷一條紅線手中牽竹菴註

第一立一字不加畫分明是箇賊咄咄咄咄處且最毒磨山修六

第二立快手何曾先擦沙并擦土露露露露出孃生禪

第三立一曲江村岸風月隨時看收收收收去箇中流

第一要驀地忽一笑笑倒須菩提攪起迦葉老

第二要袖裏箇金圈拈出是莖艸瞋目牛吞了

第三要伸縮誰能照隻手握雙拳打得虛空叫

春曉黃鸝叫翠微遊人陌上蹋歌歸紙錢縷縷寒

食徧野青龍古墓碑語風信

大機大用絕商量信有白拈巧異常影艸形旂瞞佛

祖蟪蛄眼欲繡鴛鴦字成蒼頡天宜泣書出龍威國

豈昌一喝四溟曾倒決果然滅却瞎驢旁平陽恣

老儂不識書錯讀已已已去問太夫人答我渠似你

顯聖澄

第一立軒轅未舉辨□□□□□火裏關撞破青

天作兩邊天笠珍六

第二立百花影裏颺金鞭縱使驊騮能逐電玉跳紅

綫兩頭牽

第三立毗目仙人五眼圓拾得路旁斷貫索九十六

圈一串穿

第一要吸盡西江向汝道賺他雙耳至今鼯尾上雷

轟開頂竅

第二要明暗雙關輕落艸相逢未曾末後機祇得低

頭歸去好

第三要混沌死時多鑿竅糟團飯塊團吞背後白

拈撫掌笑

陷虎機中老大蟲眼光落盡聚呼風一毛湧出圖



月海上珊瑚樹樹紅潭吉忍

行船走馬命三分雨露風晴不可聞歸到故山驚刺  
眼泥新婦洗長裙漢關公

宗鑑法林卷二十一

宗鑑法林卷二十二

集雲堂 編

大鑒下五世

臨濟因半夏上黃檗山見檗看經次師曰我將謂  
它是箇人元來祇是箇按黑豆底老和尚住數日  
便辭去檗曰汝破夏來何不終夏去師曰義立暫  
來禮拜和尚檗便打趁令去師行數里疑此事却  
回終夏夏後辭黃檗檗問甚處去師曰不是河南  
便歸河北檗拈棒師約住遂與一掌檗呵呵大笑  
乃喚侍者將百丈先師禪版拂子來師召侍者將  
火來檗曰汝但將去已後坐斷天下人舌頭去在  
瀉山問仰山臨濟莫孤負他黃檗也無仰云不然瀉

云作麼生仰云知恩方解報恩 焦山體云賓主歷  
然師資道合輕來重答不墮常情分付禪板拂子貴  
圖坐却天下人舌頭正是憐兒不覺醜假饒索火燒  
却終不向別處托生會麼老婆心切呵呵笑一任旁  
人說短長

猶舉全憑好羽翎箕裘終不振家聲從他覆雨翻雲  
手偷得耕牛過一生理安閑

法戰重誇反躡才八門金鎖應時開交鋒棒下忘謙  
遜贏得嘉聲動地來具德禮

臨濟問座主業何經論曰百法論師曰有一人於  
三乘十二分教明得有一人於三乘十二分教明  
不得是同是別曰明得即同明不得即別侍者洛  
浦曰者裏是什麼所在說同說別師問浦曰汝作  
麼生浦便喝師送座主回遂問適來是汝喝老僧  
那曰是師便打

廣胤標云洛浦當時待問是汝喝老僧那但向道劍  
去久矣管教老漢刮目相待

臨濟因僧問捉象亦全其力捉兔亦全其力未審

全箇甚麼力師曰不欺之力

法眼益別云不會古人語

力在如今作用時情存毫忽便成欺誰知修水千峯  
碧盡入秋風一瘦藜虛堂愚

臨濟示衆你要與佛祖不別但莫外求你一念清  
淨心光是你屋裏法身佛一念無分別心光是你  
屋裏報身佛一念無差別心光是你屋裏化身佛  
此三種身是你即目前聽法底人祇爲不向外  
求有此功用

獅林則云大小臨濟元來是箇弄光影底我當時若  
見便與一喝喝住掀倒禪牀非惟坐斷渠儂舌頭亦  
免後代兒孫向光影裏作活計

臨濟示衆參學人大須仔細如賓主相見便有言  
論往來或賓看主或主看賓或主看主或賓看賓  
山僧所舉皆是辨魔揀異知其邪正

蹋斷千谿流水聲枯筇久倚化成精倒拈點破衝霄  
碧笑侮依巖傍嶺人天目秀四

獨踞孤峯看野火不留纖艸匿狐踪饒他有羽點空

碧觸著教伊徹體紅

日吐東溟月墜西照曜人間晝夜齊一般明月無高  
下任來任往復何岐

一條爛索兩人驚認作靈蛇仔細擒扯尾拈頭忻共  
獲阿誰知有自家珍

雲水重重踰故鄉擎頭戴角驗諸方垂綸不進竿頭  
步滿眼風波沒主張理安問四

獨坐灘頭烟水空一雙冷眼翫魚龍珊瑚枝上鉤新  
月任爾漫天鼓黑風

兩道眉毛八字開知音不用更重栽相逢識得分明  
句今古無私絕點埃

證龜成鳖亦何堪弄影迷頭病一般祇把祖師親的  
旨隔簾胡亂向人譚

古岸泊漁舟纜繩無心繫蓑衣和月披不怕多風雨  
理安問又四

遨遊湖海廣烟水欲迷人不戀溪山色風光越較新  
說食終不飽靠人難得老泥水自不分莫怨歸途杳  
眼底乾坤靜掌中日月明銅頭鐵額漢到此劃時擒

蹋斷雲根跨古基丈夫意氣恣施爲龍門躍過歸來

晚相看橫挖兩道眉天章玉四

纔把蓬門通一線白雲放出卷青山爛繩一串方來  
眼賺殺三千里往還

赫耀靈符肘後懸旂槍大布各爭先一回蹋倒毬門  
路忍氣吞聲不展拳

艸鞋幾處滯雲霞矯首千峰錯認家未契懷來呈懣  
袋斷藜根搭破袈裟

猛虎穴中頻奪子驪龍領下慣披鱗天生伎倆多奇  
怪斬將塞旂總出神雪谷永四

不施寸鐵據當陽賊馬騎來更奪槍任爾三頭并六  
臂望風誰不豎旂降

唐堯虞舜兩相逢千古同欽揖讓風三略六韜無用  
地何須款款羨英雄

拾將魚目作明珠祇爲從來眼力無猶向人前高索  
價旁觀誰不發軒渠

臨濟到鳳林林曰有事相借問得麼師曰何得剗  
肉作瘡林曰海月澄無影遊魚逐浪迷師曰海月

既無影遊魚何得迷林曰觀風知浪起翫水野帆

頭師曰孤蟾獨曜江山靜長嘯一聲天地秋林曰

任張三寸揮天地一句臨機試道看師曰路逢劍

客須呈劍不是詩人莫獻詩林便休師乃有頌曰

大道絕同任向西東石火莫及電光罔通

溪山問仰山臨濟道石火莫及電光罔通從上諸聖

以何爲人仰云和尚作麼生溪云但有言說都無實

義仰云不然溪云子作麼生仰云官不容鍼私通車

馬溪云如是如是

臨濟上堂僧出作禮師便喝僧曰老和尚莫探頭

好師曰你追落在甚麼處僧便喝又有問如何是

佛法大意師便喝僧作禮師曰你道好喝也無曰

艸賊大敗師曰過在甚麼處曰再犯不容師曰大

衆要會臨濟賓主句問取堂中二禪客

孔明諸葛隱蓬廬明主求賢三下車爲報將軍莫輕

躁先生謀策必無虞崇覺宏

臨濟因黃檗入廚問飯頭作什麼曰揀衆僧米喫

曰一日喫多少曰二石五檠曰莫太多麼曰猶恐

少在檠便打飯頭舉似師師曰與汝勘過者老漢  
乃往見檠檠舉前話師曰飯頭不會請和尚代轉  
一語檠曰汝但舉師曰莫太多麼檠曰來日更喫  
一頓師曰說甚來日即今便喫遂與檠一掌檠曰  
者風顛漢又來者裏持虎鬚師喝一喝便出去  
馮山祐云養子方知父慈 仰山寂云黃檠大似句  
賊破家

臨濟應機多用喝會下參徒亦皆學喝師曰汝等  
皆學我喝我今問汝有一人從東堂出有一人從  
西堂出兩人齊喝者裏還分賓主麼若分不得已  
後不得學老僧喝

頂額直下搗砢礮閃電光驅景不存却把紅絲牽黑  
月白拈千古許誰論平陽恣

學我拙似我死別開一徑克家之子舐犢情深老凍  
儂要人家計自家起淡水浴

臨濟小參我有時奪人不奪境有時奪境不奪人  
有時人境兩俱奪有時人境俱不奪

中峰本云有時奪人不奪境錯有時奪境不奪人錯

有時人境兩俱奪錯有時人境俱不奪錯臨濟大師  
到者裏鎖却咽喉了也莫有爲伊出氣者麼切忌將  
錯就錯 天目琇云今時學者大法不明開眼作夢  
一切依樣畫貓何異韓獪逐塊召衆云切莫見說奪  
人不奪境但向境上糞點兩句見說奪境不奪人但  
向人上糞點兩句要明濟上綱宗須識取有時二字  
始得有時奪人不奪境你作麼生領覽有時奪境不  
奪人你作麼生承當有時人境兩俱奪你作麼生抵  
當有時人境俱不奪你作麼生步趣

甕頭酒熟人皆醉林上烟濃花正紅夜半無燈香閣  
靜鞦韆垂在月明中佛鑑懃四

鶯逢春暖歌聲滑人遇時平笑臉開幾度落花隨水  
去一聲長笛出雲來

堂堂意氣走雷霆凜凜威風逐霜雪將軍令下斬荆  
蠻神劍一揮千里血

聖朝天子坐明堂四海生靈盡安枕風流年少倒金  
樽滿院桃花紅似錦

如王秉劍意由王橫按吹毛孰敢當伐臯甲民彰大

用山河不改舊封疆平陽恣四

會朝端欲見清明羽檄星馳下鳳城混一二三分有二  
土放牛歸馬樂昇平

那容駭息傍雲臺一展金輪萬國摧社稷已隨輿轍  
去秦宮無復子嬰回

端拱無爲化要荒車書玉帛共文章熙熙舜世乾坤  
大蕩蕩堯天日月長

滿栽花柳風醉遊人疎影橫斜通客獨醒天目瑋四

脫帽忘鋤羅敷有夫五馬踟躕使君何愚  
破楚鞭屍逆行倒施我必復之秦爲出師

桃花夾岸鷄黍延賓洞口徑窄人誰問津

劈開九鼎捧出神丹煒煌煌映日照函水伯潛啼

山魃夜譴雄劍再磨左揮右盤白雲隨意適谷明月

何必到山看看千古萬古絕追攀漳吉忍

臨濟曰一喝分賓主照用一時行

昭覺勤喝一喝云且道是賓是主是照是用還委悉  
麼千峰勢到嶽邊止萬派聲歸海上消 語風信云  
臨濟和尚提唱空王佛向上一著可謂搆郵迭店暗

裏書符忽遇無舌人他喝不得又作麼生賓主俱隱  
照用俱瞎佛法無靈驗復頌

桃李花開三月天滿園青白潑人寒枝頭春倦吹微  
雨砌地殘紅不奈看

臨濟會下有二同學相問一曰離却中下二機請

兄道一句子一曰擬問卽失一曰與麼則禮拜老  
兄去也一曰者賊師聞乃陞堂曰要會臨濟賓主  
句問取堂中二禪客

美人私語佇中庭轉盼金籠鸚鵡聽生怕禽言露心  
事手按香稻暗叮嚀微菴瑞

臨濟示衆有時先照後用有時先用後照有時照  
用同時有時照用不同時先照後用有人在先用  
後照有法在照用同時驅耕夫之牛奪饑人之食  
敲骨取髓痛下鍼雖照用不同時有問有答立賓  
立主合水和泥應機接物若是過量人向未學已  
前據起便行猶較些子

汾陽昭云先照後用且共汝商量先用後照汝也是  
箇人始得照用同時汝作麼生抵當照用不同時汝

作麼湊泊 瑯琊覺云先照後用露師子之爪牙先用後照縱象王之威猛照用同時如龍得水致雨騰雲照用不同時提獎嬰兒俛憐赤子此是古人建立法門爲合如是不合如是若合如是紀信乘九龍之輦不合如是項羽失千里之驢還有爲瑯琊出氣者麼如無山僧自道去也卓拄杖下座 徑山杲云若也先照後用則瞎一切人眼若也先用後照則開一切人眼若也照用同時則半開半瞎若也照用不同時則全開全瞎此四則語有一則有賓有主有一則有賓無主有一則賓主俱無有一則全具賓主卽今衆中或有箇不受人瞞底漢出來道者裏是甚所在說有說無說照說用說主說賓攔胸攔住拽下禪牀痛椎一頓也怪伊不得

電光影裏見猶難及至鍼錐轉不堪若得英靈師子子擲機用在照先前 磬山修四

白棒臨頭殺活機轉身吐氣見遲遲絲綸漫擲釣頭餌任爾風波柄已持

和聲便打絕商量明月清風豈覆藏若是祖師門下

客通身拶碎也承當

或時風雨或時晴果爾知因不用聽堪笑時人無理會錯將孤境向人吟

三玄戈甲倒顛披明暗雙雙孰得知擬犯鋒鏑雖奪却拔山有力若施爲平陽恣

先用而後照放出斷綫鷄兒童正擬看大風吹過了  
天目秀四

先照而後用使人癢處痛搔得他太忤腦後一椎重照與用同時雷奔并電馳風雨八面來無地與人棲照用不同時一任摸索去識得老婆心著著是活計

臨濟因僧問如何是吹毛劍師曰禍事禍事僧禮拜師便打

劍藏匣冷逼人寒擬問棲遲過嶺南更欲進前求退後威風千古繞溪潭投子青

臨濟到三峰平和尙處平問發足甚處師曰黃檗平曰黃檗近日有何言句師曰金牛昨夜遭塗炭直至如今不見蹤平曰秋風吹玉管那箇是知音師曰直透萬重關不住青霄外平曰此語太高生



師曰龍生金鳳子衝破碧瑠璃平日且坐喫茶

磬山鼎云白拈賊可謂大陣當前不妨難禦祇如三

峰茶是醍醐是毒藥弘法澤云臨濟毒龍頭上揩

癢猛虎口裏橫身則不無若論擊節扣關衝樓跨竈

還較三峰一籌

臨濟垂問一人在孤峰頂上無出身之路一人在

十字街頭亦無背面那箇在前那箇在後

無傳慧云更有一人不在孤峰頂上亦不在十字街

頭臨濟老漢因甚不知便下座

臨濟到襄州華嚴殿見來乃橫按拄杖作睡勢師

曰莫瞋睡嚴曰作家禪客宛爾不同師曰侍者點

茶來與和尚喫嚴召維那第三位安排

承天怡云華嚴東閣大啓臨濟乃彈鉢歌魚若要此

話大行直須喫棒了趁出

泥牛咂月沉潭冷水馬嘶風泰嶽新俯仰乾坤渾不

二頓教艸木和陽春磬山鼎

臨濟因僧參乃展兩手僧無語師曰會麼曰不會

師曰渾圖壁不破與你兩文錢

江天銓云放去較危收來更速恁麼謂之白拈只宜  
臨濟

風流斜倚朱欄畔半賣嬌羞冷醉人白面郎君猶未  
薦十分含淚自傾心磬山鼎

臨濟一日謂普化克符二上座曰我欲於此建立

黃檗宗旨汝二人可成視我二人便珍重下去三

日後普化却上來問和尚三日前說甚麼師便打

三日後克符上來問和尚前日打普化作甚麼師

亦打

長蘆仁云普化克符不可放過臨濟老人放過不可

若是且菴一生擔板無人或視然雖恁麼須知遠烟

浪別有好商量彌嵩燈云殺活在手與奪臨時不

無他臨濟若欲建立黃檗宗旨敢云未在山僧亦欲

於此建立曹洞宗旨清涼門對曉霞峰刻刻金鍼暗

度不問你成視不成視大盡三十小盡二十九時時

玉綫橫抽亦不教你上來下去正與麼時折旋俯仰

無非回互之機動轉施爲咸是綿密之旨無勞掘地

討天自是聲和響順雖然如是臣能退位乃可朝君

子解轉身方堪就父且轉身一句作麼生道來年更有新條在惱亂春風卒未休 平陽恣云可惜二人珍重下去臨濟不與當下勦絕致令後人向三日前三日後弄精魂山僧今日爲伊勦絕去也山僧亦欲於此建立天童宗旨作麼生成禪好爲復珍重下去耶爲復三日後上來耶爲復從東過西耶爲復良久默然耶爲復拂袖出堂耶爲復繞座三匝作女人拜耶爲復揚眉瞋目豎指擎拳耶爲復掀倒法座喝散大衆耶上來做處總是弄精魂畢竟作麼生出隻手眼共山僧建立宗旨還會麼鶴有九臯難翥翼馬無千里謾追風 古南門云河北正宗機如掣電而克符普化乃當場不戰陣後與兵要成禪臨濟未得在山僧今日欲於本山建立臨濟宗旨或有箇單刀直入上前云和尚道什麼劈脊便棒或有第二員上前云和尚適來爲甚打者僧也劈脊便棒驀拈拄杖云棒頭有眼明如日要識眞金火裏看

臨濟因麻谷問十二面觀音那箇是正面師下繩牀搗住曰十二面觀音向甚處去也谷轉身擬坐

師拈拄杖便打谷接住拄杖相捉入方丈

大悲觀音開正面官不容鍼通一線鼠拽葫蘆有底忙鬼爭漆桶無人見鼓山珙

昧却當陽第一著牽來拽去互施呈不知除却王維手更有何人畫得成徑山杲

慣跨驊騮競彩舟當機各自逞風流揚鞭舞棹人皆見妙處安知得自由南石秀

臨濟聞德山示衆道得也三十棒道不得也三十棒師謂洛浦曰汝去問它爲甚道得也三十棒待伊打汝接住棒送一送看它作麼生浦如教而問山便打浦接住送一送山便歸方丈浦回舉似師師曰我從來疑著者漢雖然你還識德山麼浦擬議師便打

巖頭禪云德山尋常祇據目前一箇拄杖子佛來也打祖來也打爭奈較些子 雲居齊云祇如臨濟道我從來疑著者漢是肯語不肯語爲當別有道理無見觀云千鈞之弩豈爲鼯鼠發機奔流度刃疾蹙過風則不無二老仔細檢點將來三十棒只合自喫

何故將頭不猛緊及三軍

單于自負藝過人小將致詔去似真到彼果然贏小捷回來未免陷全身海印僧

譬若金籠鸚鵡兒業如紅玉一青衣雖然學得人言語問著元來總不知佛鑑勸

臨濟問僧甚處來曰定州來師拈棒僧擬議師便打僧不肯師曰以後遇明眼人去在僧後參三聖纔舉前話聖便打僧擬議聖又打

天童華云臨濟三聖當時若有轉身句後代兒孫未至掃土墓拈拄杖云更有一箇甚處去乃卓一下

愚菴孟云竹上泉通竹下水澗東花發澗西紅廣教王云盡謂此僧少振作待濟拈棒直掀翻禪牀不惟坐斷臨濟舌頭亦可與三聖同參殊不知二老總被伊勘破

漢帝遙憐細柳營果然符到自無情堪嗟來往金吾客失却符兮更折兵柏林格

臨濟示衆夫爲法者不避喪身失命我於先師處三次問佛法大意三次被打如蒿枝拂相似如今

更思一頓誰與下手有僧出曰某甲下手師以棒與僧僧擬接師便打

翠峰顯云放去較危收來太速五祖戒云臨濟大似貧兒思舊債承天宗云且道臨濟今日用底棒與當時喫底棒是同是別若道同孤負黃檗若道別屈他臨濟苦也盡其機來且道在阿誰分上乃拈杖云退後退後天童華云臨濟三度喫棒底意旨諸人還覷得透也未直饒一敲便斷也未是大丈夫漢三世諸師口挂壁上天下老和尚將什麼喫飯靈隱嶽拈拄杖云臨濟據令而行不知孤負黃檗翠峰盡力擔板也祇見一邊薦福節文在甚處擲下拄杖徑山琇云臨濟固是貧兒思舊債者僧渾若餓狗喫牽纏翠峰道放去較危收來太速醉我落花天借他管絃裏南堂欲云當時待道再思一頓誰爲下手便與掀倒禪牀非惟塞斷者老漢咽喉抑且出身有路

知恩方覺報恩難徹底相思海樣寬不是拔山舉鼎力烏雞端的不輕攀理安問

貧屈含冤已十春可中有口屈難伸却因家破貧如洗特把愁腸說向人六選聚

臨濟問洛浦從上一人行棒一人行喝阿那箇親

曰總不親師曰親處作麼生浦便喝師便打

仰山欽云二大老雖則啐啄同時要且未會轉身句或有問如何是轉身句顯侍者云牢記取 晦臺承云話頭忘却了也

臨濟曰我者裏是活祖師西來意一切臨時要用便用

獅林則拈拂子搖拽云我者裏也是活底要用便用一切臨時與臨濟是同是別以拂子一擊便擲下云臨濟猶欠著在 車溪沖拈拄杖云我者裏一切臨時要用便用不論死活雖然以拄杖畫圓相云臨濟天如總出者箇不得

臨濟訪平田於路見一嫂使牛師問平田路向甚處去嫂打牛曰者畜生諸處走到者裏不知路師曰我問你平田路向甚處去嫂曰者畜生養來五載尙使不得師曰欲觀前人先觀所使便有抽釘

拔楔之意

有客平田問路頭高擡白棒打耕牛春光眼底無多子一對鴛鴦逐水流笑翁堪

烏藤倒拄向平田便把羸牛痛下鞭更說養來經五歲始終祇是老婆禪天目禮

白水田邊問路頭雪眉婆子打耕牛艸鞋泥滑青山遠不是愁人也著愁橫川珙

目前條路平如砥何不堂堂掉臂行揀撥老婆牛性發赤身挨棒可憐生竹屋簡

打著南邊動北邊播揚家醜向人前白拈手段無人會一箭雙鵰落遠天柏林格

臨濟曰第一句薦得堪與佛祖爲師第二句薦得堪與人天爲師第三句薦得自救不了

天寶樞喝一喝云是那一句若喚作第一句自救不了喚作第二句萬里崖州喚作第三句定光金地搖招手智者江陵暗點頭 石霜尊云石霜亦有三句第一句薦得紅爐飛片雪第二句薦得一劍定烟塵第三句薦得歸依佛法僧 法林音舉公案畢云世

事誰將公道斷

滄溟一口吞千江萬派腔老漁慣舞棹不出渠腹行

報恩秀三

親從海藏出把時如意珠百寶掌上雨博施無邊生  
住在普陀巖別買南海船隨著長年轉家山越杳然  
臨濟將示寂謂衆曰吾遷化後不得滅却吾正法  
眼藏三聖出曰怎敢滅却和尚正法眼藏師曰已  
後有人問你向它道甚麼聖便喝師曰誰知吾正  
法眼藏向者瞎驢邊滅却

馮山秀云古者忍死待來因何正法眼藏却向瞎驢  
邊滅却臨濟行計速速三聖又却忽忽因斯父子情  
忘遂使後人失望若不得流水還應過別山  
本云認他財爲己物將官路當人情濟之心亦盡矣  
三聖當時見他道不得滅却吾正法眼藏便與掩却  
鼻孔猶較些子乃云怎敢滅却噫以聖較濟又豈止  
濫而已哉 報恩倫徵云祇如三聖與麼喝正法眼  
藏可窺不可窺見徹不見徹 博山來云驢耕奪食  
須是溥沱播網張風還他三聖然要傳正法眼藏且

緩緩

正法眼藏誰傳得喝下滄溟徹底乾從此瞎驢無覓  
處鐵山歸路黑漫漫佛慧泉

劈破華山雷未猛照開滄海月非光瞎驢滅却正法  
眼直得哀聲振大唐白雲端

出門握手再丁寧往往事從丁屬生路遠夜長休把  
火大家吹滅暗中行保舉勇

忽雷纔震雨如傾九曲黃河漲四溟賴得陡門能下  
開滔滔萬里絕流聲普融平

信衣夜半付盧陂驚擾黃梅七百僧臨濟一隻正法  
眼瞎驢滅却得人悟心心相印祖祖傳燈夷平海岳  
變化鯢鰲祇箇名書難比擬大都手段解翻騰宏智

玉洞玄門道路長蟠桃不是等閒芳遮藏不許時人  
見祇恐春風漏泄香上方益

貽謀定鼎驗端由獨步寰中據上流堪笑隨波行路  
者聞雷鴨祇在泥洑金山海

寶鑑云林卷二十二

宗鑑法林卷二十三

集雲堂 編

大鑒下五世

睦州龍興道明禪師

黃檗  
運嗣

見僧來乃曰現成公案

放汝三十棒曰某甲如是師曰山門頭金剛爲甚

麼舉拳曰金剛尙乃如是師便打曰者掠虛漢

雲門偃云睦州正恁麼時天下人披枷帶鎖 雲峰

悅於放汝三十棒處云作賊人心虛 妙喜云又添

一箇道了問僧云你道我恁麼道還有過也無僧云

作賊人心虛喜云三箇也有又云雖然無孔笛撞著

鼗拍版直是五音調暢六律和諧檢點將來未免旁

觀者哂良久云不得動著動著打折你驢脚 東禪

岳云臨危不變真大丈夫當時若不是者僧幾被打

破蔡州還識睦州麼貧無達士將金贈病有閒人說

藥方 天寧琦云睦州與耆僧二俱作家二俱不作

家

呼蛇容易遣蛇難袖裏金錘不易看長安夜夜家家

月誰知愁樂有多般海印信

現成公案未除瑕放過方能脫鎖枷四海澄清人富  
庶更來石上種油麻覺海元

現成公案沒商量不動絲毫便斷當三十烏藤聊放

過可憐雪上更加霜無際派

現成底事沒商量別起眉毛未斷當日暮碧天鴻鴈

斷海門斜去兩三行本菴永

鼓之以雷霆潤之以風雨日月運行一寒一暑

雲濤  
改

睦州因僧問以字不成八字不是未審是何章句

師彈指一聲曰會麼曰不會師曰上來講讚無限

良因蝦蟇踣跳上天蚯蚓驀過東海

徑山杲云者僧祇問經頭一字睦州盡將善知衆藝

差別字輪以龍龕手鑑唐韻玉篇從頭註解擦在者

僧懷裏了也者僧不妨奇特直下便肯承當且道什

麼處是他承當處聽取箇註脚以字不成八字不是

彈指未終普天匝地壁開四十二般若波羅蜜門參

透華嚴會中善知衆藝教內教外一時收世出世間

皆周備無邊罪咎如火消冰無量勝義如恒沙聚更

有箇末後句堅牢庫藏永收藏總屬山前熊伯莊



天寧琦云經頭一字是什麼字睦州彈指一下將黃面老人四十九年說不盡底一時吐露了也女喜矢上加尖道更有末後一句還委悉麼良久云山斷疑休去峰高又起來

睦州一日喚僧曰大德僧回首師曰擔版漢

翠峰顯云睦州祇具一隻眼者僧喚即回頭因甚却成擔版黃龍新云翠峰亦祇具一隻眼者僧喚即回頭因甚却不成擔版鼓山珪云睦州被者僧勸破理安問舉翠峰黃龍拈畢云路見不平以楔出楔則不無檢點將來一總是擔版漢何故字經三寫烏焉成馬

電火光中休艸艸劍輪鋒上莫切切等閒放却全身入終不當頭犯一毫鼓山珪

睦州擔版那容眨眼闊狹短長不須增減徑山杲

腦後與一錐頭頭墮坑坎直饒喚不同也是虛擔版

透過睦州關乾坤一隻眼長靈卓

山之峨峨水之湯湯冷眼觀著無處慚惶別峰印

紅爐起浪拍天飛疾談過風孰敢窺任是三頭并六

臂到此休誇第一機木菴永

萬綠叢中一捻紅無邊春色自相通游蜂野蝶沒尋處徒自紛紛怨曉風法林音

睦州因天俗吳尚書至門首便問三門俱開從那門入師召尚書書應諾師曰從者門入

翠峰顯云客是主人相師承天怡云睦州當路設穿坑陷平人天使行年在坎被鬼擲掄永寧鼎云尚書不會作客勞煩主人

慵履杏壇入翠微門門舉步露全機也應三月忘無味一片冰心若個知聚庵鼎

睦州問武陵長老了即毛端吞巨海始知大地一微塵長老作麼生曰和尚問誰師曰問長老曰何不領話師曰你不領話我不領話

翠峰顯云墮也墮也復云者葛藤好與劃斷拈拄杖云什麼處去也天童覺云睦州武陵總道不領話其間有貪觀白浪失却手橈乃豎拂子云看開先金云翠峰道墮也墮也還是武陵墮睦州墮若斷不出與將閒學誰埋沒祖師心古南門云兩箇老漢

奪鼓攬旗仔細看來直是好笑且道笑箇甚麼若人辨得毛端吞巨海大地一微塵

老將臨場氣象開折衝樽俎笑談間龍韜豹略渾無用擺手高歌帶月還靈巖

閒駕扁舟浪裏遊江風江水共悠悠疎烟細柳斜陽外一曲滄浪天地秋

一句當風驗作家英雄有力謾矜誇就中不假唐虞教四海聲光益見賒

老漁邂逅盡村沽主醋蜜醺趣自多醉後不辭各歸去一川明月照寒蓑

睦州問僧近離甚處曰趙州師曰趙州有何言句示徒僧舉喫茶去話師乃呵呵大笑曰慙愧却問僧趙州意作麼生曰祇是一期方便師曰苦哉趙州被你將一杓屎潑了也便打師却問沙彌你作麼生會彌便設拜師亦打其僧往沙彌處問適來和尚打你作甚麼曰若不是我和尚不打某甲

翠峰顯云者僧克由耐耐將一杓屎潑他二員古佛諸上座若能辨得非惟與二老雪屈亦乃免雪竇與

天下老宿無過若道不得到處潑人卒未了在徑山杲云雪竇祇知一杓屎潑他趙睦二州殊不知者僧當時被趙州將一杓屎潑了却到睦州又遭一杓祇是不知氣息若知氣息什麼處有二員古佛天寧琦云者僧不會喫茶意旨不知潑屎氣息帶累好人墮屎窠中合喫多少拄杖雪竇妙喜一時放過也須替他入涅槃堂始得

睦州上堂問首座吟荅曰在寺主吟荅曰在維那吟荅曰在師曰三段不同今當第一向下文長付在來曰

昭覺勤云一等借路經過就中睦州奇特崇寧不然首座吟在寺主吟在維那吟在因行不妨掉臂打艸祇要驚蛇若能一撥便轉免致擦土擦沙

八字打開十分漏泄孤危不立道方高伎倆更無隨意說別別南斗七兮北斗八護國欽

睦州因僧問如何是展演之言師曰量才補職曰如何是不展演之言師曰伏惟尚饗

徑山杲云睦州怎麼答話祇得八成徑山則不然如

何是展演之言問一答百有何妨如何是不展演之言喝一喝云莫尿窖沸 報恩榜云妙喜土上加泥直饒道得十成也是五十步笑百步報恩則不然如何是展演之言不說一字如何是不展演之言其聲如雷 神鼎澤云二尊宿大似喫李子祇向赤邊敲菩提又不然如何是展演之言今日正月初十如何是不展演之言孟八郎漢又與麼去也復喝一喝拈松宮云寶華則不然如何是展演之言不露纖毫如何是不展演之言普天而地

睦州常示衆曰忽然忽然

大覺璉別云不然不然

忽然不然如鉗如鉗神仙秘訣父子不傳別峰印

忽然忽然頭上是天不然不然脚下是地直下來也

無處回避孤峰深

睦州因僧問一言道盡時如何師曰老僧在你鉢

裏裏

雲門偃別云裂破 雪竇顯別但彈指三下 徑山

杲別云者漆桶 天寧琦別云漏 白巖符別云今

歲六橋春事好環湖惟見是雕鞍 國清英別呵呵大笑

睦州示衆大事未明如喪考妣大事已明亦如喪考妣

青峰楚云大事已明因甚如喪考妣不得春風花不開及至花開又吹落 天目禮云大事未明如喪考妣則固是 大事既明因甚亦如喪考妣曾經巴峽猿啼處不待三聲已斷魂 漢星定良久云陣雲橫海上拔劍攪龍門復喝一喝云汾陽道底 青門林云睦州與麼發洩可謂剗腹剖胸傾心露膽是汝諸人不識好惡總恁麼忽略過去若遇有血氣底漢子自然別有一番態度還會麼猿啼碧嶺霜天月客路人聞魂半消 南澗格因僧問如何是大事未明如喪考妣礪云可憐生法林音別云春來物物事紛華堪笑何人是作家又問大事已明因甚亦如喪考妣礪云可憐生音別云安南塞北都收了時復挑燈把劍看 春去秋來古與今相逢休論幾時深饑餐渴飲無他

家山歸到莫因循竭力寅昏奉二親若是功忘恩義斷便成不孝聞提人丹霞導

長江無際渺風波一任輕帆帶雨過到岸回頭看白  
浪愁心轉比在船多煮山清

楊子江頭波浪深行人到此盡沉吟  
他時若到無波處還似有波時用心千峰苑

雨打芭蕉客路悲  
簪纓落魄誰知  
十年舊恨猶新  
恨贏得榮枯兩道眉  
廣教玉

貧子無依哭旅亭。豪家半夜暗驚心。山居破落身如葉。裙被蒙頭總不諗。玉笈乾

東風嫋嫋汎崇光香霧空濛月轉廊祇恐夜深花睡去  
高燒銀燭照紅粧拳石沃

一從投筆事邊關戰老煙臺始願還脫下鐵衣揩瘡  
骨祇堪惆悵不堪看鏡堂清

汗臭無湯問雨賒  
趨翻紙帳墜梅花  
起來擬折青藤

陸州囚僧問祖意教意是同是別師曰青山自青

山白雲自白雲曰知何是青山師曰還我一滴雨  
來曰道不得請師道師曰法華鋒前陣涅槃句後  
收

天童覺云若向者裏識得睦州釋迦出世達磨西來  
總是不守本分底漢還識得麼臂長衫袖短脚瘦草  
鞋寬報恩琇云睦州老漢尋常辯如懸河及乎者  
曾問著便乃分疎不下

睦州示衆裂開也在我掇聚也在我時有僧問如何是裂開師曰三九二十七菩提涅槃真如解脫卽心卽佛我且與麼道你又作麼生曰某甲不與麼道師曰蓋子撲落地碟子成七片曰如何是掇聚師乃斂手而坐

雲峰說云相罵饒你接柴相睡饒你潑水 天童覺云睦州用處直是長三短五七縱八橫擦在面前拋向背後不妨奇特然則門庭施設自是一家入理深談不啻百步 天童華云雲峰與麼道爲復是曾睦州意明睦州語歸宗因行不妨掉臂不是禪不是道不是玄不是妙久立珍重 靈隱岳云也好笑睦州

被者僧撈著恰似落湯蟬蠲七手八脚一時露 天  
井新云者僧贏得一擔輪却兩頭睦州眼光燦破四  
天下到者裏祇得斂手而坐 寶壽新云睦州雖則  
有衲有實有放有收仔細看來遭人怪笑何故祇如  
庭前金菊殿後芙蓉是裂開耶是捏聚耶  
溪邊嬾柳條條綠陌上桃花樹樹紅勿謂東君無管  
帶更加暖日與和風佛性泰

睦州因西峰長老至致茶果次問長老今夏在甚  
處安居曰蘭溪師曰有多少衆曰七十來人師曰  
時中將何示徒峰拈起柑子師曰著什麼死急  
承天怡云睦州只知他人著甚死急不知自己死急  
尤甚

丈二龜毛鎖石橋千尋兔角插青霄是誰收拾歸王  
化四海咸寧達聖朝粟庵鼎

睦州因秀才相訪師問蘊何事業曰會二十四家  
書師以杖空中點一點曰會麼曰不會師曰又道  
會二十四家書永字八法也不識

黃龍南云睦州一點直在威音王已前及乎八法論

書却被箇人勦破黃龍即不然孔門弟子無人識  
碧眼胡僧笑點頭 潯山喆云睦州雖然用得者一  
點妙大似倚勢欺人山僧則不然乃畫一圓相云會  
麼字義炳然文不加點 徑山印云睦州大似如風  
吹水自然成文惜乎逞俊太過翻覺焉成馬山僧  
今日有秀才來拂子拄杖束之高閣何故文不在茲  
平陽恣云睦州一點偶爾成文秀才罔措字義炳  
然祇爲少年時順硃頑了兼之舊本頗有錯簡山僧  
不免重爲改正二十四家書會盡空中一點便茫然  
從來小生八九子大人乙巳化三千  
禪師拄杖秀才筆伎倆從來手中出八法論書如未  
明面前一點黑如漆佛鑒勸  
一著機先用得親可憐窮子眼無筋須知八法論書  
處前箭猶輕後箭深水菴一

睦州示衆汝等諸人還得箇入頭處也未若未得  
箇入頭處須覓箇入頭既得入頭莫孤負老僧時  
有僧出禮拜曰某甲終不敢孤負和尚師曰早是  
孤負我了也又曰明明向你道尙自不會何況蓋

覆將來

雲峰悅云古人與麼道和身放倒了也還委悉麼若相委悉孤負睦州若不相委悉雲峰亦遭連累 白雲端云睦州老漢可謂經事多矣要坐便坐要行便行雖然如是天無全功 法雲秀云睦州便是陳蒲鞵若見可謂大施門開更無壅塞其或未然莫道不窒礙好參 承天宗舉拂子云我若恁麼穿却睦州鼻孔若不恁麼換却睦州眼睛又云今人明明向你道尙自不會聽年夢見麼 法清鑑云張僧見王伴王伴叫張僧昨夜放牛處嶺上及前村溪西水不飲溪東草不吞教覺苑如何卽得會麼不免與麼去遂以兩手按空 木菴標云造父之術非馭也奚仲之巧非剗削也睦州老漢眉毛扯得丈二長標上座當時若在但云侍者把火來看者老漢面皮厚多少良久云自從少室人歸後空餘霜月照前溪 法林音云我不似睦州逼死蛇化龍諸人不得箇入頭處切莫尋箇入頭處若得箇入頭處又不得致怨老僧學道先須入頭處既得入頭莫孤負明明向道尙猶

迷何況言中曾蓋覆木覺一

潦倒當年老睦州無端頭上更安頭孤蟾獨耀江山靜長嘯一聲天地秋 法林音

睦州因僧問以一重去一重卽不問不以一重去一重時如何師曰昨日栽茄子今日種冬瓜

重重去盡自平常春暖風和日漸長戶外鳥啼聲細碎巖花狼藉滿山房自得輝

登壇道士羽衣輕呪力雖窮法轉新拇指破開天地暗蛇頭顛落鬼神驚 陸堂遠

披蓑側立千峰上引水澆蔬五老前中有瓜田難納履睦州倒退在旁邊南巖勝

昨日栽茄子今日種冬瓜一聲河滿子和月落誰家笑菴悟

橫來直受彼立我走出理入事拏三道九迸斷脚跟紅線索隔窻走馬看相撲茄子冬瓜種又栽相逢把手上高臺 古南門

繪巾鶴氅獨彈琴倒退中原百萬兵自是不歸歸便得太平風月有誰爭 曉菴昱



睦州問僧甚處來曰那邊割師曰老僧屈日和尙  
知卽得師曰擔枷過狀劈脊便打

雲峰悅云睦州何用繁辭那邊割劈脊便打

睦州問一官人易中道百姓日用而不知不知箇  
什麼曰不知道師曰灼然不知

灼然不知無孔鐵錘當面一擲佛祖難窺肯堂克

睦州曰老僧在此住持不曾見箇無事人到來汝  
等何不近前時有一僧方近前師曰維那不在汝  
自領去三門外與二十棒曰某甲過在甚處師曰  
枷上更著扭

通玄奇云睦州早是自己昏昏焉能使人昭昭 獅  
峰機云大小睦州自語相違好與者僧一狀領過復  
顯左右云險

睦州因僧問如何是祖師西來意師曰一隊衲僧  
來一隊衲僧去

一隊衲僧來一隊衲僧去打破睦州關大地無寸土  
大川濟

一隊衲僧來一隊衲僧去打不得鐵蛇橫古路

雪裏胡

睦州一日見僧行胡餅次乃曰行箇甚麼曰胡餅  
師曰者俗漢

保福展云睦州也好低聲 天獄盡云欺敵者亡

睦州因僧問靈山還有蛇否師曰者蚯蚓

雲門代云白骨連天

水中鹽味色裏膠青若人辨得天下橫行草堂濟

睦州因雲門第三度扣門師開門偃乃拶入師擒  
住曰道道偃擬議師便推出曰秦時轆轤遂掩  
門損偃一足偃從此悟入

萬壽範云睦州忍心害理雲門雪屈無地天涯知己  
情原我鴻鴈來時滿地秋

睦州因僧問大衆臨筵合談何事師曰後園生菜  
熱水冷淘

脫落情塵老睦州虎頭虎尾一時收芳艸渡頭韓幹  
馬綠楊堤畔戴嵩牛正堂辯

睦州見僧來參便喝曰上座何得偷常住果子曰  
某甲方來因甚道偷常住果子師曰賊物現在

寶掌曰云誣人之罪以罪加之睦州老漢好與二十棒

傾盡寶山寶全身入荒艸若是鳳凰兒不向那邊討

松源嶽

睦州因僧問高揖釋迦不拜彌勒時如何師曰昨日有人恁麼問趁出了也曰和尚恐某甲不實那師曰拄杖不在筇帚柄聊與三十

翠峰顯云睦州祇有受璧之心且無割城之意南

堂靜云衲僧家高揖釋迦不拜彌勒不爲分外也須是本分鉗錘方能知其真僞何故出群須是英靈漢敵勝還他獅子兒選佛若無如是眼直饒千載亦奚爲西禪需云若要扶持大法舉唱宗乘者老漢却較些子諸人要見睦州麼劍爲不平離寶匣藥因救病出金瓶靈隱岳云以毒攻毒以楔出楔還他睦州老漢始得今日有人恁麼問虎丘也祇恁麼答何故盡法無民南堂欲云翠峰與麼批判深屈古人山僧道睦州和盤托出祇是罕遇知音古南門云翠峰祇見一邊殊不知睦州老漢量才補職得人一

牛還人一馬

凜凜將軍令已行八荒四海要澄清提來劍氣干牛

斗洗蕩氛埃見太平天童覺

鼓歌彈劍解重圍千羽兩街異類歸護道太平能坐致聖人經濟古來稀易菴應

睦州因僧參問近離甚處僧便喝師曰老僧被你一喝僧又喝師曰三喝四喝後作麼生僧無語師打曰者掠虛漢

泐潭清云者僧祇解瞻前不能顧後何不待他道三喝四喝後如何將坐具一搥拂袖便行非惟截斷睦州葛藤且與天下衲僧出氣靈隱岳云老睦州甚生氣槩却向者僧手裏呈款

兩喝與三喝作者知機變若謂騎虎頭二俱成瞎漢誰瞎漢拈來天下與人看翠峰顯

睦州擔板漢解使不解算人前贏得五百家中失了

一貫普菴王

橫抽寶劍踞當門一試風前海嶽昏是楚是秦俱入貢從來恩怨共誰論六震悟

睦州因僧問一氣還轉得一大藏教也無師曰有甚轉轉子快下將來

鈍鐺頭邊得意時閒花著子不愁伊幾人不善根株者祇見枝頭更長枝長靈卓

一氣轉一大藏教頓漸偏圓權與實無邊妙義炳然

彭元來一字也不識徑山泉

快人一言快馬一鞭停囚長智十萬八千木菴永

夏玉不離至言不文烟邨三月裏別是一家春息菴

睦州示衆我見百丈不識好惡大衆纔集以拄杖

一時打下復召大衆衆回首又曰是甚麼有甚共

語處黃檗和尚衆纔集以拄杖一時打下復召大

衆衆回首又曰月似彎弓少雨多風猶較些子

翠峰顯云說甚麼較些子直是未在據雪竇衆集一

時打下便休或有箇無孔鐵錘爲衆竭力善能擔荷

可以籠罩古今把斷乾坤乃薦拈拄杖云放過一著

石門聰舉黃檗語畢云前來甚是奇特後來龍頭

蛇尾天聖泰云殺人須見血瑯琊覺云若人洪

波裏須是弄潮人昭覺勤云百丈將棒喚狗未免

相顧睚眦黃檗香餌綴鉤吞者喪身失命睦州當衆

舉覺與賊過梯翠峰要人擔荷無風起浪崇寧今日

總不恁麼各請歸堂靈隱岳云轉見誦禪者幾箇

老漢出來張羅布網却向平地上捉蜋撈蝦用盡自

已心笑破他人口古南門云睦州借劍殺人翠峰

停囚長智雖然爲衆竭力要且鈍置百丈黃檗不少

會麼擲栗橫擔不顧人直入千峰萬峰去

山上久晴雲勃興山下久陰人祈雨忽被風吹四散

飛一天懨懨誰相許笑嚴實

睦州看華嚴經次有僧問看甚麼經師曰大光明

雲青色光明雲紫色光明雲以手指曰那邊是甚

麼雲僧曰南邊是黑雲師曰今日定有雨

法林音云睦州大似小兒喫李子偏向赤邊較待僧

云南邊是黑雲便云多謝蒼霖偏法界殷勤相助莫

辭頻

福州烏石靈觀禪師黃檗曹山行脚時問如何是

毗盧師法身主師曰我若向你道即別有也曹舉

似洞山洞曰好箇話頭祇欠進語何不更去問爲

什麼不道曹山却來進前語師曰若言我不道卽啞却我口若言我道卽謊却我舌曹龜舉似洞山洞肯之

磬山修云洞山雖識機宜似箇扶小兒入市曹山隨人脚跟姑置勿論若夫烏石老漢也是方便不少報恩琇云當時待問爲什麼不道打落渠叢非惟洞山不敢正視亦使曹山脫略見聞免見傳言透語

烏石老古錐門風能峭絕有問毗盧開口端的別齒有齒鏃機天無第二月軟語若金剛溫และเป็น滅南堂靜

探竿在手不開攜淺處還教深處追撥轉摩尼盤裏走呵呵大笑任旁窺雪關關

玄玄斷制遞難求丈室雲封古路幽最是青衣還解語洞巖深迴月輪秋恨亭挺

烏石因雪峰一日伺便扣門師開門峰驚問住曰是凡是聖師睡曰者野狐精便推出閉却門峰曰也祇要識老兄

一不作二不休主賓互換有來由魚鰓打著連底凍

赤眼撞著火柴頭松源岳

峻硬門庭古莫倚曾郎欲入竟無由爲渠八字打開著嬌絲覆田秧滿晴竹屋簷

烏石因雪峰扣門師問誰曰鳳凰兒師曰作麼生曰來啗老觀師開門揭住曰道道峰擬議師便拓開掩却門峰住後示衆曰我當時若入得老觀門你者一隊饒酒糟漢向甚處摸索

老宿云雪峰徒有此語當時入不得如今也入不得明招謙代雪峰纔見開門便云動卽喪又代老觀云俊哉俊哉翠峰顯云者孤恩負德漢有甚麼交涉當時入不得豈是教你入今既摸索不著累他雪峰俱在老觀門下寶壽方云見烏石則易見雪峰則難古南門云三尊宿可謂陞老觀堂入老觀室要且祇在門外何故話在資福侶云雪峰怎麼且入得老觀門入不得老觀門

養成羽翼鳳凰兒老觀門下偶差池冷地忽然思舊憤却來別處討便宜尼無著

曾經大海駕扁舟又向漁磯把釣鉤立冷一天霜夜

戲釣金鱗碧水遊蕭蕭紅蓼楚江秋歸來香餌和竿

閒抱瑤琴訪玉真  
臨風一曲洞天昏  
歸來重論傷心處

烏石引麪次有僧參師引麪示之僧便去至晚聞

問首座今日新到在什麼處曰當時便去了師曰

是卽是祇得一概

翠峰顯云老觀大似失錢遭罪 報慈遂云甚麼處

是少一槪 翠巖芝云老觀道他祇得一槪大似厭

良爲賤  
東禪觀云總似者個師僧靈山付囑有在

老觀爲什麼道祇得一槪若不酬價怎辨真僞

草舍柴門僻更幽何期過客也經由蕩湯館禮不知

媿猶對旁人賣口頭斷板倫

乍把碧眸輕一盼佳人惹亂笑盈顙高情固自十分

好欲得詩成須再來一初元

唐相國裴休見黃檗特到黃檗問僧看什麼經曰無

言童子經公曰有幾卷曰兩卷公曰既是無言因

甚却有兩卷僧無對

新羅龜山代云若論無言非惟兩卷

曾落石霜樓外笏又扶羸行到唐天祇將四海垂綸

手蝦蟇魚龍一串穿盧堂

裴公入大安寺問僧曰羅喉羅以何爲第一曰以

密行爲第一公不肯遂問此間有何禪師時龍牙

在後園種菜遂請來學前問牙曰不知公便拜曰

破布裏珍珠

密行第一精鑒還希具擇法眼眞箇不知黃龍新

以何爲第一不知最親切破布裹珍珠傾城換不得

月城明

輕輕點破降旗

□ □ □ □ □ □ □ □ □

宗鑑法林卷二十二

宗鑑法林卷二十四

集雲堂 編

大鑑下五世

益州大證法真禪師長慶安嗣僧問劫火洞然大千俱

壞未寧者箇壞不壞師曰壞曰恁麼則隨它去也

師曰隨它去僧後如前問修山主修曰不壞曰爲

甚不壞修曰爲同大千又曰壞也礙塞殺人不壞

也礙塞殺人

道吾真云一人道壞一人道不壞且道壞底是不壞

底是會麼壞與不壞俱非內外不隔絲毫尋常面對

黃龍清云二尊宿雖則應處無偏其奈影響之

別生二見今日忽有人恁麼問但向道壞與不壞即

且置還識者個麼忽地喚回秋夜夢舉頭惟見月當

空 博山來云大隨龍濟生死同條接物導機隨家

豐儉一句則穿花折柳野渡冰消一句則帶霧披雲

寒灰發焰畢竟者個壞不壞參 渠菴成云二尊宿

一人順水張帆一人逆風把舵雖是道路不同究竟

理無二致今日設有問但向道鯨吞海水盡露出珊

珊瑚

劫火光中立問端緒僧猶滯兩重關可憐一句隨他

語萬里區區獨往還翠峰顯

步步相隨是大隨左邊吹了右邊吹思量未免空篋

氣何不問將煖肚皮保寧勇

壞不壞隨他去也大千界包裹了無鉤鎖機脚頭多

破葛藤癡會不會分明底事丁寧曉知心拈出勿商

量輸我當行相買賣天童覺

隨他去隨他去千手大慈攔不住石火光中相往來

銅睛鐵眼無尋處正覺遜

六合傾翻劈面來暫披繖縷混塵埃因風吹火渾閒

事引得遊人不肯回壞不壞隨不隨徒將聞見強鍼

雖太湖三萬六千頃月在波心說向誰通照逢

大菴菴側有一龜僧問一切衆生皮裏骨者衆生

爲甚骨裏皮師以舁履覆龜背上僧無語

問處爭如答處親眼中難著透金塵長安一路無多

地過得潼關能幾人佛慧泉

學道須教正眼開莫將狂解意中猜脫鞵龜上人難



會遂使攜囊特地來天童覺

休將皮骨強分張得六藏時且六藏隻履盡情遮蓋  
了了無一事可商量此山應

大隨問僧甚處去曰峨嵋禮普賢去師豎拂子曰  
文殊普賢總在者裏僧畫一圓相拋向背後乃禮  
拜師喚侍者取一貼茶與者僧

保福展云大隨若無後語笑他衲僧 雲門偃別云

西天斬頭截臂者裏自領出去 五祖戒云大隨不

因一事不長一智 翠峰顯云殺人刀活人劍 滙

山秀云大隨茶非類趙州茶既不類趙州茶則得之

者少矣者僧得之且道有甚長處然不義之財於我

如浮雲 天童覺云識法者懼欺敵者亡水中擇乳

須是鵝王 天童悟云者僧將成九仞之山不進一

簣之士當時待喚侍者與茶何不道也不消得

柳栗杖頭光閃爍錫羅卷裏面鄒鋒肩擔背負出門

去好是無人敢駐留保寧勇

大隨山下路縱橫老竹蒼藤處處生四海五湖爲客

慣三更無月也須行慈受深

一輪明月照瀟湘更不逢人問故鄉自是天涯慣爲  
客任他猿叫斷愁腸上方盤

把火入牛欄翻身外面看梨花千點白春雨幾聲寒

月堂昌

大隨因僧問如何是和尙家風師曰赤土畫簸箕  
曰意旨如何師曰簸箕有唇米跳不出

赤土畫簸箕團團無縫罅佛眼覷不見海神不知價

簸土揚塵無處尋山高海闊白雲深南堂靜

簸箕有唇米跳不出天下衲僧亦斡體更須撥轉上

頭關十方世界黑如漆天童華

大隨因僧問如何是佛法的大意師曰山前麥

熟也未

大匠不巧大儒不學動輒中方圓舉皆成禮樂堪笑

鄉郵賣卜人徒勞鑽破烏龜殼無準範

自小離家住日邊去家祇道路三千從人問得來時

路回首元來在目前無文燦

大隨燒畚次忽見一蛇師以杖挑向火中曰咄者

箇形骸猶自不放捨你向者裏死如暗得鏡時有

僧問正恁麼時還有罪也無師曰石虎叫時山谷響木人哂處鐵牛驚

劫初劫末法弱魔強定光老子鐵作脊梁文經武緯把定封疆碧天雲散祖風涼佛日光暉舜曰長

南堂靜

韶州靈樹如敏禪師

長慶安嗣

僧問如何是和尚家風

師曰千年田八百主曰意旨如何師曰郎當屋舍

沒人修

來機深辨百舒有客移却案山重添鐵綫千年田八

百主直下承當還莽鹵郎當屋舍沒人修片瓦根椽

誰去豎君不見甜瓜徹蒂甜苦瓜連根苦月堂昌

靈樹因尼途盜盞孟主師遂拓起曰者箇出在甚

麼處曰出在定州師乃撲破尼無對

清涼欽別云不違此間保福展云欺敵者亡雲

門澄代云老老大大出處也不知

靈樹因僧問如何是祖師西來意師默然後遷化

欲立行狀碑雲門爲首座僧問先師默然處如何

上碑門代曰師

師師師知知三三兩兩過遼西一雙紅杏撲消梨

柳邱覺

盡謂當初密對揚不知文彩已全彰後人不見韶陽

老一字千般設度量佛印元

師之一字太巍巍獨向寰中定是非畢竟水須潮海

去到頭雲定覓山歸白雲端

師之一字太孤危文彩全無作者知不領韶陽提起

處且從默處認殘碑天目證

福州靈雲志勤禪師

長慶安嗣

初在大潯因見桃花悟

道有偈曰三十年來尋劍客幾回落葉又抽枝自

從一見桃花後直至如今更不疑潯山曰從緣悟

達承無退失善自護持有僧舉似立沙沙曰諦當

甚諦當敢保老兄未徹在沙問地藏我恁麼道汝

作麼生藏曰不是桂琛幾走殺天下人

長慶稜因僧問立沙意旨如何慶云將謂鬚鬚赤更

有赤鬚鬚翠巖芝云有一人如今問立沙意作麼

生且道此人還徹也未黃龍心徵云且道靈雲當

初見底是桃花不是桃花五祖演云說甚麼諦當

更參三十年法林音云演祖不妨作家昭覺勸云

千鈞之弩不爲鼯鼠而發機靈雲既獲轉天關玄沙  
乃掀翻地軸且道那裏是未徹處 徑山杲云一家  
有事百家忙 中峰本云靈雲白日青天向桃花樹  
下爲魅所著玄沙雖則除邪輔正激濁揚清不知又  
是鬼門上貼卦 天寧琦云人無遠慮必有近憂直  
饒百煉精金不免入爐再煅 天井新云不惟靈雲  
未徹敢保玄沙也未徹在何以見得雲在嶺頭閒不  
徹水流澗底太忙生 東明鑑云當時靈雲眼睛被  
桃花刺破直至今如今依然成瞎乃豎拂子云桃花開  
也還見麼良久云春色滿園關不住一枝紅杏出牆  
來

春暖桃花樹樹紅靈雲千古道還同玄沙留語叢林  
問南北東西路莫窮正覺遜

二月三月景和融遠近桃花樹樹紅宗匠悟來猶未  
徹至今依舊笑春風黃龍南二

龍象相逢世不羣一來一去顯疎親時人不悟其中  
旨摘葉尋枝長客塵

二月春庭雨霽時小桃紅綻兩三枝紅白爭妍人盡

見因甚靈雲獨不疑法雲秀

萬年松下忽相逢拔樹鳴條浩浩風堪笑晚來無覓  
處崔嵬和雨在雲中保寧勇

堪笑春風漏泄機桃花新發舊年枝螺江有個釣魚  
客笑殺靈雲道不疑佛國白

桃花尋刺客不語笑春風白頭歸未得家住海門東  
敢保老兄猶未徹玄沙之言何太切君看陌上桃花  
紅盡是離人眼裏血鼓山珙

一個烏梅似本形蜘蛛結網打蜻蜓蜻蜓落了兩片  
翼堪笑烏梅敲鐵釘天章淨

靈雲一笑見桃花三十餘年始到家從此春風春雨  
後亂隨名字落天涯慧航朴

彷彿掾天高索價依希著地下還錢及乎走出河頭  
看兩個兒童戲渡船雲漢蔭

一見不勞朱粉施玄沙掃帚畫蛾眉祇知掩得靈雲  
醜落盡眉毛自不知朴翁鉅

一見桃花便躲跟鐵團生陷出無門倚牆傍壁知多  
少一度春來一斷魂少室陸

落花臺上重鋪錦  
礪階前布赤砂  
仁義盡從貧處  
斷世情偏向有錢家高緯妙

浪尋楊柳情無賴  
蹋碎桃花眼獨紅  
吹倦園林春已暮  
那堪隔岸鼓東風法林書二

猛虎當途暗自驚  
相逢狹路若爲爭  
苦心片片無人訴  
嶺外偏聞負痛聲

靈雲因長生問混沌未分時如何師曰露柱懷胎  
曰分後如何師曰如片雲點太清曰祇如太清還  
受點也無師不答曰恁麼則合生不來也師亦不  
答曰直得純清絕點時如何師曰猶是眞常流注  
曰如何是眞常流注師曰如鏡常明日未審向上  
還有事也無師曰有曰如何是向上事師曰打破  
鏡來與汝相見

芭蕉徹云相見便休又打破鏡作什麼白兆圓云若  
不打破鏡怎得相見 太陽立云卽今破也又作麼  
生相見乃云照盡體無依通身難辨的 開福寧云  
盡十方世界是一面鏡作麼生說個打破底道理直  
饒眼親手便光鏡俱忘如鷄抱卵時啄同時正好喫

報慈挂杖何故弄影禪和如麻似粟 昭覺勤云一

人善問一人善答膠漆相投水乳相合則且置且道

打破鏡來如何相見良久撫掌云了 天童覺云分

與未分玉機夜動點與未點金梭暗拋直是一色純

清未得十成穩坐且道打破鏡來向甚麼處相見清

秋老兔吞光後湛水蒼龍脫骨時 黃龍忠云若據

牧菴見處說甚混沌分與未分打破鏡與不打破鏡

直饒向露柱懷胎處會得正是片雲點太清還委悉

麼待虛空落地卽向你道

金鷄啄玉卵飛出鳳凰兒入戶能長嘯歸家著錦衣

佛鑑懃

午夜霜凝星斗寒長空雲盡山月落青天喫棒人盡

知蒼龍脫骨誰能覺金鳳衝開玉鎖關麒麟掣斷黃

金索迢迢劫外孰能拘南北東西迴超卓承天宗

靈雲因僧問佛未出世時如何師豎起拂子曰出

世後如何師亦豎起拂子僧不肯到雪峰舉前話

峰曰你肯它麼曰不肯峰曰你問我與你道僧曰

佛未出世時如何峰豎起拂子曰出世後如何峰

放下拂子僧禮拜峰便打僧後到立沙舉前話沙  
曰你怎生會曰不會沙曰我與你作箇譬喻如人  
買一片園東西四至結契總了也中心有箇樹子  
猶屬我在

雲門偃於兩豎拂處云前頭卽是後頭打不著 溪  
山詰云者僧一張弓兩隻箭擬撥亂天下至立沙面  
前一個伎倆施展不得何故鶴有九臯難翥翼屬無  
千里謾追風

靈雲因僧問如何是端坐念實相師曰河裏失錢  
河裏攬

河裏失錢河裏攬拈來天下任縱橫和雲買得南山  
地淺種深鋤恣意耕佛心才

靈雲因僧問如何是歸根得旨師曰早時忘却不  
憶塵生

家破人亡何所依無心無緒話求歸十年忘却來時  
路暫憶此時總不知投子青

靈雲問僧甚處去曰雪峰去師曰我有一信寄雪  
峰得麼曰便請師脫隻履拋向面前僧便去至雪

峰峰問甚處來曰靈雲峰曰和尚安否曰有一信  
相寄峰曰在那裏僧脫隻履拋向峰前峰休去

溪山秀云雪峰既不能辨他來信端的者僧又祇知  
依模畫樣鈍置他靈雲忽若當時道我有一信寄他  
僧云請靈雲祇據座者僧又若爲通露不可大丈夫  
漢爲人馳達教他一言不措 白巖符云者僧與靈  
雲通信原封馳上不敢妄加一字怎奈雪峰書亦收  
了祇是不拆封看知他雪峰是何心行

靈雲因僧問如何是佛法大意師曰驢事未去馬  
事到來

驢事未了馬事來鐘聲纔斷鼓聲催祖師愛喫和羅  
飯北有文殊在五臺佛慧泉

東行不見西行利南頭賣賤北賣貴橫千豎百算河  
沙九九翻成八十二保寧勇

松陰行不盡疎雨下無時世事幾興廢山中人未知  
蒙菴聰

揚州光孝慧覺禪師趙州諡嗣至法眼處眼問近離甚  
處師曰趙州曰承聞趙州有柏樹子話是否師曰

無曰往來皆言有上座何得道無師曰先師實無

此語和尙莫謗先師好眼曰真獅子兒

徑山杲云若道有此語錯過覺鐵業若道無此語又錯過法眼若兩邊俱不涉又錯過趙州直饒總不恁麼別有透脫一路入地獄如箭射 鼓山珪云覺鐵業名不虛得祇是不曾夢見趙州 笑巖實云法眼當時失却一隻眼覺公與麼道也扶趙州不起 法林音云逃阮墮墮

趙州無語幾人知江北江南見者稀山寺桃花復何在相逢空愛白公詩大洪遂

日炙風吹瘦影孤趙州嘗指倚庭株昇元大小清涼老未會先師此語無正覺逸

誰道先師無此語焦尾大蟲元是虎胡蜂不戀舊時窠猛將豈在家中死急著眼却回顧若會截流那下去市地清風隨步舉慧通旦

天使何所貴貴在善對論不獨君無辱猶得社稷存印如成

一向瀟湘一向秦臨岐一句好愁人自從山水分疆

後作客誰能不問津采商榮

洪州新興嚴陽尊者趙州諡嗣參趙州問一物不將來

時如何州曰放下著師曰一物不將來放下箇甚麼州曰放不下擔取去師於言下大悟

勝果於初問下著語云抱賊叫屈於進語下著語云苦哉苦哉 ○○香云趙州就爐打鐵嚴陽惹禍上身雖然悟去也是好事不如無

一物不將來兩肩擔不起言下忽知非心中無限喜

毒惡既忘懷蛇虎爲知己光陰幾百年清風猶未已

黃龍南

移高就下縱威權解脫門開信可憐不得空王真妙

訣動隨聲色被勾牽真淨文

不妨行細輪无手自覺心羸塊撞頭局破腰間柯斧

爛洗清凡骨共仙遊天童覺

劈面呈機不等閒纖毫盡處重如山斷腸曲調如親

聽流水悲風不用彈塗毒策

驚就膏肓下一鍼當時無處著渾身呵呵笑入嚴陽

去蛇虎爲鄰不可尋密菴傑



地沒朱砂翻赤土廩無粒米倒囊赤窮自是活不得又被人來指賊賊中緣本

香飄桂子十分月雨滴芙蓉一半秋門外任他時節

換穩將裙被自蒙頭橫川瑞

餘光雖好日西流底事區區作馬牛向道心肝不帶

得來時高挂樹梢頭梅翁景

婺州新建禪師趙州一生不畜沙彌有座主曰和

尚年尊何不討箇沙彌侍奉師曰若有眼瞎耳聾

口啞底爲我討一箇來主無對

石菴浮云可惜座主有頭無尾不了人事致使新建

一生受屈德慶若作座主待伊怎麼道但云有一箇

眼不瞎耳不聾口不啞底上座還要麼待伊定動便

囉兩聲看他作麼合煞

杭州多福禪師趙州僧問如何是多福一叢竹師

曰一莖兩莖斜曰學人不曾師曰三莖四莖曲

一莖兩莖斜疎影動龍蛇心疑生暗鬼眼病見空華

三莖四莖曲還我一叢竹時引清風來落葉填山谷

無禪才

漳州浮石禪師子湖上堂山僧開卜舖能斷人貧

富定人生死時有僧出曰離却生死貧富不落五

行請師直道師曰金木水火土

達磨西來惟賣卜吉凶在汝不由人個中祇是依爻

斷豈有人情疎與親本覺一

金木水火土始終顛倒數五六下四三初爻傳白虎

苦苦卜得此卦一生貧遠信不來病人死賴菴需

金木水火土大蟲元是虎奸笑李將軍藍田空沒羽

無準範

曰容遠禪師子湖因菴上座參師撫掌三下曰猛

虎當軒誰是敵者菴曰俊鷄沖天阿誰捉得師曰

彼此難當菴曰且休未斷者公案師將拄杖舞歸

方丈菴無語師曰死却者漢也

昭靈勸云力敵勢均不妨好對頭眼親手便彼此沒

便宜下梢可惜放過待他舞歸方丈便好與撫掌三

下拂袖便行非惟頭尾完全亦免遭人指註雖然如

是菴公無語還可轉側也無謾言侵早起更有夜行

人大瀉智云強中更有強中手天下元無第一人

還知麼伎倆全無波旬失途到者裏誰你解會處

興化軍梯山石梯禪師宋黃一日見侍者拓鉢赴

堂乃問甚處去曰赴堂齋去師曰我豈不知汝赴

堂齋去曰除此外別道箇什麼師曰我祇問汝本

分事曰和尚若問本分事某甲實是赴堂齋去師

曰汝不謬爲吾侍者

天童覺云放過卽不可如今直與扭得鼻頭痛打得  
骨頭出始得免見瞎驢趁大隊所以道平地上死人  
無數透得荆棘林是好手且道適來者僧透得也未  
多虛不如少實 清化噯云入此門來直須田地穩  
密堪受鉗錘百煉千敲終始不變所謂要識真金火  
裏看石梯肯他也是羅公照鏡當時何不與他三十  
棒使渠縱遇百味珍饈也須吐却始得

父子相將草裏行星馳電卷迅雷轟驟他無限英靈

漢錯認鞍橋過一生辛菴

筠州末山尼了然禪師唐末常下因灌溪問如何

是末山師曰不露頂曰如何是末山主師曰非男

女相溪乃喝曰何不變去師曰不是神不是鬼

箇甚麼溪於是伏膺作園頭三年

昭覺勤云或有人問山僧如何是末山一望不見如  
何是末山主可與佛祖爲師何不變去上座自變擬  
議不來劈脊便棒且道末山是蔣山是當機無向背  
擬議隔千山法林音云灌溪若在也好伏膺三年

天童覺云非男女之相出有無之量透萬機之前超  
三界之上窮而通簡而富松含風而夜寒溪帶雨而  
春漲 靈隱禮云末山弄假像真尋常得此便灌溪  
酬本及末一飽忘百饑乃至溫麻句下倒轉成禪劈  
箭鋒前誰當齧鐵要識末山落處麼大鵬欲展摩霄  
翅誰顧奔騰六合雲

非男女相獨閒閒正體堂堂孰可攀一句不傳千聖  
眼九天風靜月彎彎自得聲

非男女相末山主今古堂堂常獨露常獨露兮見也  
麼清聲籍籍播寰宇月林觀

襄州關南道吾禪師唐末常下因趙州來乃先著

豹皮褸執吉獠棒於山門外翹一足候纔見州來  
便高聲唱喏而立州曰小心祇候著師又唱喏一

聲而去

鳳山啓云大小關南無端向人納敗關雖然還知趙州出不得他圈圓麼梁山泊裏稱豪傑看來都是不良人

一吹無孔笛一撫沒絃琴一曲兩曲無人會雨過後塘秋水深潛菴光

道吾作舞一曲無譜若將耳聞未敢相許野菴

關南或執木劍肩上作舞僧問手中劍甚處得來師遂擲於地僧却置師手中師曰甚處得來僧無對師曰容汝三日下午取一轉語僧亦無對師乃置劍肩上作舞曰恁麼始得

雲峰悅云邪法難扶 龍池傳云元來木劍也好殺人若僧曾遭道吾一劍豈止三日直至而今未見伊駐氣若是作家師僧纔見伊擲劍在地便拈起置肩上作舞一出待伊問你者劍從何處得來但擲於地擺手便行

關南因僧問如何是和尙家風師下禪牀作女人拜曰謝子遠來無可祇待

觀龍海臥瑞雲高四望歸宗萬派潮木人來問西窗事回惠東園一顆桃投子青

歲稔時清禮義多相逢陪酒又陪歌當筵不解開懷飲奈此一天風月何東夏

名園爛熳百花香杜宇聲催燕語狂萬斛韶光藏不住却憐罕遇賦春郎青門林

婺州金華俱胝禪師大梅常下天龍嗣初住菴時有尼頂

笠攜錫過師三市曰道得卽下笠子如是三問師皆無對尼便去師曰日勢稍晚何不且住尼曰道得卽住師又無對逾旬天龍至師陳前事龍豎一指示之師大悟凡有參扣惟豎一指示衆曰吾得天龍一指禪一生受用不盡

玄沙備云我當時若見拗折指頭 長慶稜代云美食不中飽人食 曹山章云俱胝承當處拈非祇認得一機一境一等是拍手無辜是他西園奇怪 報慈遂徵云且道俱胝還悟也未若悟爲甚麼承當處拈非若不悟又道用一指頭禪不盡且道曹山意作麼生 雲居錫云祇如玄沙與麼道是肯伊不肯伊

徑山泉舉瑯琊頌俱胝一指報君知朝生鷄子撲  
天飛若無舉鼎拔山力千里烏雞不易騎乃云俱胝  
不得瑯琊爲伊出氣幾手埋沒妙喜隨後也有個注  
脚俱胝一指頭喫飯飽方休腰纏十萬貫騎鶴上揚  
州 靈隱嶽云且道如何是一指禪乃豎拂子云見  
麼若也見得可與俱胝把手共行脫或未然不免重  
說偈言一著高一著一步闊一步坐斷佛祖關迷却  
來時路 平陽志云瑯琊妙喜祇願盤中喝彩不解  
馬上奪標諸人要知者一指落處分明麼更聽山翁  
念個真言補闕一指頭禪誰不有靈樞妙轉在天龍  
巨靈擡手無多子分破華山千萬重  
對揚深愛老俱胝宇宙空來更有誰曾向滄溟下浮  
木夜濤相共接盲龜翠峰顯  
頓悟天龍一指頭河沙佛祖便同儔饒他驚子懸河  
辯百億須彌一芥收晏古佛  
俱胝老子指頭禪二十年來用不殘信有道人方外  
術了無俗物眼前看所得甚簡施設彌寬大千利海  
飲毫端麟龍無限落誰手珍重任公把釣竿 天童覺

席簾蓬戶在門頭誰謂邱居院落幽雨散雲收山嶽  
露珊瑚枝上挂金鉤惠昭預

佳人睡起懶梳頭把得金釵插便休大抵還他肌骨  
好不搽紅粉也風流報恩演

八幅羅裙蘸地拖雙睛點就賽嫦娥時將紈扇人前  
掩一種風流消不多六愚哲

翠擁春旂夾畫闌烟籠曉霧不勝寒一株婀娜臨官  
道多少行人駐馬看 俱亭

飛霆擊火出南天鐵勒驕心馬上懸不有控絃三十  
萬龍門何處定天山 紫嶠潛

俱胝有一童子每見人問事亦豎指師一日潛袖  
刀問童曰聞你會佛法是否曰是師曰如何是佛

童豎指師以刀斷其指童叫喚走出師召童子童  
回首師曰如何是佛童舉手不見指忽然大悟

清波格云俱胝得天龍一指一生擔板不了及至童  
子豎指却又與伊截斷當時何不自截其指免致擔

板一生

俱胝一指頭一毛拔九牛華嶽連天碧黃河徹底流

截却指忽回眸青箬笠前無限事綠蓑衣底一時休

山堂淳

俱胝鈍置老天龍利刃單提勘小童巨靈擡手無多  
子分破華山千萬重無門開

宗鑑法林卷二十四

宗鑑法林卷二十五

集雲堂 編

大鑒下六世

魏府興化存獎禪師臨濟玄嗣在三聖爲首座常曰我

向南方行脚一遭拄杖頭不曾撥著一箇會佛法

底人大覺聞舉曰作麼生得風吹到大覺門裏師

後到大覺爲院主一日覺喚院主我聞你向南方

行脚一遭拄杖頭上未曾撥著一箇會佛法底你

惡箇甚麼道理師便喝覺便打師又喝覺又打師

來日從法堂過覺曰我直下疑你昨日者兩喝師

又喝覺又打師再喝覺又打師曰存獎於三聖師

兄處學箇賓主句總被師兄折倒了也願與存獎  
箇安樂法門覺曰者瞎漢來者裏納敗闕脫下裱  
衣痛與一頓師於言下薦得臨濟先師在黃檗喫  
棒底道理師後開堂曰拈香曰此一炷香本爲三  
聖師兄三聖於我太孤本爲大覺師兄大覺於我  
太賒不如供養臨濟先師

瑯琊覺云且道因甚承嗣臨濟良久云路逢劍客須  
呈劍不是詩人莫獻詩理安問云且道是承嗣臨濟  
不是承嗣臨濟 中峰本云二虎之下獸不容蹄兩  
刃之間人不容足常大覺興化棒喝交馳之際豈容  
心思思解於其間哉祇如大覺云脫下裱衣痛與一  
頓興化言下大悟又悟箇甚麼者裏見得許你作臨  
濟半箇兒孫 理安問云龍驤虎驟舉步猶迷一縱  
一擒翻成鈍置三聖大覺各具一隻眼若非興化老  
漢泊合勞而無功脫下裱衣痛與一頓則且置作麼  
生是臨濟在黃檗處喫痛棒底道理薦拈拄杖云太  
平本是將軍政不許將軍見太平  
太孤太賒日杲杲璞玉渾金惡種草無負平生雪此

宛不如一陣香風掃南巖

劍爲不平離寶匣藥因救世出金瓶南方自古清如鏡何必無端用甲兵仰山欽

虎口橫身雷電奔沙場日落便愁生崖州萬里風霜遠矢地盟天祇此心理安閒

慣拋三寸定浮沉但得逢魚豈在深一自龍潭吹燭後獨留殘月刺湖心

鶻得西隣半落花風風雨雨送殘霞春闥苦較愁多少昨日何孤今日賒

殷勤姊爲妹長欸掌上雖珍未是歸今日不虛爲母後相承羞著嫁時衣

興化因後唐莊宗幸河北回魏府行宮詔師問曰朕取中原獲得一寶未嘗有人酬價師曰請陛下寶看帝以兩手舒幘頭脚師曰君王之寶誰敢酬價

報慈遂云且道興化肯莊宗不肯莊宗若肯興化眼在什麼處若不肯莊宗過在什麼處 翠峰顯云至尊所得祇可傍觀若非興化作家往往高價酬却

雲峰悅云真不掩僞曲不藏直 翠巖芝云興化當時下一茗可謂酩酊如今作麼生斷 黃龍心云興

化一期見機而作怎奈埋沒伊一朝天子當時但向道蚌蛤之珠收得也無用處教伊向後別有生涯免得遞相鈍置如今若有人問又作麼生酬價 笑巖

寶云作家君王不妨作得出說得行興化明眼宗師亦善能相席別償然略且蒙昧當時未必光輝後世我若作興化待帝舒幘頭脚直云陛下何得說真方

賈假藥譬令喜識見盡寶愛情忘不獨致君王得大解脫亦免使天下承接響祇在光影門作活計

博山來云徑寸之璧照乘之珠望中原光影萬一不得爲此文殊寶冠隱晦不得淨名方丈說示不得興化畢竟酬價不得然雖如是誰道黃金如糞土 平

陽恣舉畢以拂子畫一畫云且道者寶作麼生酬價良久云可憐三尺龍鬚喚作尋常破布

君王之寶實難酬興化形言下一籌兩手展開幘頭脚敕書挂在鳳凰樓北塔前

北番王子彎弓射南國將軍仰面看沙上空餘斜影



在翻翻直自入雲端白雲端

中原之寶呈興化一段光明難定價帝業堪爲萬世師金輪景御四天下天童覺

中原一寶有來由拶得君王引幞頭到此若無青白眼當機誰敢謾輕酬笑翁堪

幞頭舒起君王寶司空見慣興化老千古君臣際會時落花滿地無人掃北海心

收得中原無價珍幞頭拈起露全身勞他興化重酬價八兩原來是半斤尼闍林英

興化示衆今日不用如何若何便請單刀直入興化與你證據時旻德長老出禮拜起便喝師亦喝

德又喝師亦喝德禮拜師曰若是別人三十棒一棒也較不得何故爲它旻德會一喝不作一喝用

首山念云看他興化與麼用爲什麼放得他過且道甚處是一喝不作一喝用前一喝後一喝那箇是賓

那箇是主雖然如是亦須仔細又云二俱有過二俱無過 瑯琊覺云那一喝不作一喝用興化若無後

句疑殺天下人雖然如是曉者還稀 昭覺勤云作

家相見須是怎麼機如掣電眼似流星原始要終扶頭接尾所以羽毛相似言氣相合祇如兩家互換相喝且作麼生辨得一喝不作一喝用要作臨濟兒孫切須明取且道二老宿意作麼生百尺竿頭須進步紫羅帳裏撒珍珠 伏龍笑云陣雲動地而來雪刃挨身而入鐵旗鐵鼓未爲好手全殺全活方見作家較他登九龍御輦而被烹失千里烏雕而自刎者蓋相萬萬劍戟盡爲農器用馬牛歸放華山陽何以見得王登寶殿野老謳歌 龜玄奇云雖則二俱好手旻德未免末後輸他一籌被他塗污面門至今羞慚無地 報恩琇云且道那裏是他一喝不作一喝用處直饒個儻分明要見旻德則易要見興化則難寶掌白云興化和尙鍼鋒尖上削鐵電光影裏驅雷送斷鴈於秋旻掃殘霞於臘水幟到威成毋容少滲者裏還著得佛法身心也無若教頻下淚滄海也須乾 佛曰誓云興化雖慣向鍼鋒尖上張弓架箭電光影裏辨敵施能也祇是擒降將底手段旻德雖則久經行陣不顧危亡爭奈鼻孔落在興化手裏果是

臨濟德山把手共行底漢待興化未開口已前踢翻  
香案拽下座爛捶一頓管取興化生受生受即今還  
有恁麼人麼新隆安性命在汝手裏喝一喝云金翅  
鳥王當宇宙箇中誰是出頭人

獐龍出水虎離山四起風旋萬頃烟若具阿那律正  
眼橫身三界背摩天雲漢

單刀直入不須論擬議之間賓主分不得放他晏德  
過須知興化棒頭親敲山珪

暗中攜手上高山及至天明各自行無限途中未歸  
客明開眼墮深坑徑山杲

晏德一喝如雷響興化一喝響如雷錦袍玉帶真瀟  
灑記得當年老萬回懶菴

握七星刀尋作者倒司農印對冤讎當陽一句分賓  
三九曲黃河水逆流南巖

同時照用不同時權實雙行作者知有得雖然亦有  
失還他龍虎自交馳仰山

決得高堤引急湍黑風翻却釣魚船漁人久立風濤  
慣水底擒魚謾上竿三峰

大開東閣接高賓下榻還他臥榻人不是侯門貴公  
子那能杯酒遞相對林野

電光影裏布龍蛇直入單刀看作家不犯鋒鋌全勝  
敵城樓惟聽動悲笳斯瑞

不將座榻拖重門明暗雙雙一喝分黃鳥喚回樵子  
夢斜陽影裏地天昏法林

興化因僧問四方八面來時如何師曰打中間底  
僧禮拜師曰昨日赴箇村齋中途遇一陣卒風暴

雨却向古廟裏躲避得過

天童華云衆中商量道向古廟裏避得過是空劫已  
前自己又道便是他安身立命處殊不知腰纏十萬  
貫騎鶴上揚州又云我見燈明佛本光瑞如此福  
嚴容云老僧雖解單刀直入怎奈興化有百匝千重  
所以將在謀而不在勇興化雖運籌帷幄決勝千里  
未免旁觀者哂若問山僧四方八面來時如何未是  
作家若擬議劈脊便棒蟠龍長云爲人須爲徹殺  
人須見血興化恁麼猶欠穩在當時就其旗鼓未動  
氣力未衰便能活捉生擒非但與者僧洗腸換骨亦

且免慕羶之流向卒風暴雨應躲跟

法林音云說

甚麼四方八面來略輕輕搗著便見屎臭氣

此間非常觸忤人如禽空啄噪荊榛須知與化奔馳

疾值雨何曾溼著身洞山隱

攪浪擎雲勢莫猜漁翁倚棹傍巖隈江邊依舊空歸

去帝里同風不到來海印信

一陣狂風暴雨來却於古廟且閒隈雖然打入鬼窟

裏吞炭藏身又一回鼓山珪

古廟裏頭迴避得紙錢堆裏暗嗟吁閒神野鬼皆驚

怕祇爲渠儂識梵書徑山泉

天生白額南山虎牙爪曾當八面風月落三更穿市

過癡人投曉覓行踪雪堂行

剜心剖腹繼傳燈鬼面神頭打葛藤傑出諸方無等

匹也知祇是赴齋僧南巖勝

四方八面沒邊疆暴雨狂風無處藏古廟裏頭休躲

避移舟別有好商量天目禮

饑火炎炎燒斷腸親逢王饍不能嘗可憐併逐溪流

去百億滄溟透底香高峰妙

二八仙娥巧畫眉漫將佳句向人題蓬萊不是桃源

渡莫把相思害作癡晦疊承

一言既出難追暴雨狂風趁不回古廟躲身誰敢

觀鬼頭風卷滿天灰南磳珍

鏡甲橫驅塞外秋功成曾不願封侯玉關得荷君王

力一劍還看月上鉤廣教玉

赤手撐開萬刃鋒不消一唾奏成功懂懂四海安如

砥閒看胭脂描日紅夫山諸

與化謂克賓維那曰汝不久爲唱導之師曰不入

者保社師曰會了不入不會不入曰總不與麼師

便打復曰克賓維那法戰不勝罰錢五貫設饋飯

一堂次日師自白椎曰克賓維那法戰不勝不得

喫飯即便趁出院

翠峰顯云克賓要承嗣與化罰錢出院且置却須索

取者一頓棒始得且問諸人棒既喫了作麼生索得

翠峰要斷不平之事今夜與克賓雪屈以拄杖一時

打散雲居舜云大冶精金應無變色其奈與化令

行太嚴不是克賓維那也大難承當若是如今汎汎

之流翻轉面皮多少時也 黃龍南云克賓失錢遭  
罪有理難伸與化以剛決柔未足觀也 雲峰悅云  
路遙知馬力歲久見人心 馮山喆云與化令雖行  
大似倚勢欺人克賓一期輪機爭奈千古聲光不墜  
且道利害在甚麼處若不沙場經久戰揭天樓鼓喪  
紅塵 白雲端云叢林自古至今盡道克賓知恩方  
解報恩恁麼說話可謂埋沒古人士上加泥且作麼  
生見得克賓維那要會麼雖爲與化燒香要自熏天  
炙地 徑山杲云雲居拗曲作直妙喜道要作臨濟  
烜赫兒孫直須翻轉面皮始得 天童華云大小翠  
峯與克賓維那雪屈要且無合煞 資壽尼妙總云  
重賞之下必有勇夫 天寧琦云克賓法戰不勝與  
化據令而行稱提臨濟宗風揭示正法眼藏棒頭出  
孝子佛法與人情當時將謂茅長短燒了方知地不  
平 中峰本云有令不行有事不斷天下之公患也  
與化既行矣又斷矣未免旁觀者哂 南堂欲云與  
化全師出征克賓堅壁不戰及手力盡伎窮未免率  
牛納壁翠峰要斷不平直爲克賓雪屈會麼雖得一

場榮別却一雙足 徑山信云賊是小人智過君子  
與化脚跟被克賓掀起半空過一小劫方得著地克  
賓古佛其心安如海會麼賣盡衣單終不赤膊好則  
好矣美則盡美生餓殍子不得飯喫 通玄奇云與  
化爲人可謂深入虎穴祇是不得虎子克賓雖則較  
牙喫棒大似夢還故鄉若是伶俐衲僧管教與化棒  
折 能仁鑑云與化令行維那有些不甘翠峰爲伊  
雪屈與化還甘麼不因楊得意怎見馬相如 廣教  
玉云盡道與化門牆千仞不是克賓赤身擔荷怎見  
汗馬功高殊不知龍門無宿客霹靂送飛騰卓拄杖  
一下  
克賓法戰挫英雄與化嚴行振祖風棒下直明無生  
忍莫教知解入塵籠照覺總  
克賓與化令雙行白髮通身透頂生穿過衲僧青白  
眼儘教天下競頭爭佛心才  
丹山生鸞鷟獅子產狻猊棒下摩醯眼徒誇第一機  
徑山杲  
克賓維那法戰不勝曾因國難披金甲後來出世法

體金麟衝破碧琉璃百愚斯

亭引得鯨鯢不較多磬山鼎

興化侍臨濟因洛浦來參濟問甚麼處來曰鸞城  
來濟曰有事相借問得麼曰新戒不會濟曰打破  
大唐國覓箇不會底人也無參堂去師隨後問適  
來新到是成禪他不成禪他濟曰我誰管你成禪  
不成禪師曰和尚祇解將死雀就地彈不解將一  
轉語蓋覆却濟曰你作麼生師曰請和尚作新到  
濟遂曰新戒不會師曰却是老僧罪過濟曰你語  
藏鋒師擬議濟便打至晚濟又曰我今日問新到  
是將死雀就地彈就窠子裏打及至你出得語又  
喝起了向青雲裏打師曰艸賊大敗濟便打

廣教玉云若論此事擊石火閃電光構得構不得俱  
未免喪身失命看他臨濟權衡在手縱奪隨宜興化  
雖云爲衆竭力未免禍出私門總似今日門風委地  
汝輩瞻前顧後有什麼氣息喝一喝云龍象蹴蹋是  
誰堪雪曲應希徒側耳

興化因僧問軍期急速時如何師曰日料半斤食  
離城別閣暗愁時月落星分信馬蹄風掃曉臆林木  
迴夜深汀岸火光微投子青

興化見同參僧來纔上法堂師便喝僧亦喝師又  
喝僧亦喝師近前拈棒僧又喝師曰你看者瞎漢  
猶作主在僧擬議師直打下法堂侍者請問適來  
那僧有甚觸忤和尚師曰它適來也有權也有實  
也有照也有用及乎我將手向伊面前橫兩橫到  
甚裏却去不得似者般漢不打更待何時侍者禮  
拜

昭覺勤云辨王庫刀震塗毒鼓掣電未足以擬其迅  
震霆未足以方其威可謂善驅耕夫之牛能奪饑人  
之食祇如賓主互換有照有用有權有實則且置甚  
處是興化將手向伊面前橫兩橫處者裏洞明得可  
以荷負臨濟正法眼藏如或泥水未分未免瞎驢趁  
大隊 天童華云興化門牆千仞家法森嚴者僧暗  
透重關要看洞中春色好則好未免二俱失利祇如  
興化道我將手向伊面前橫兩橫又作麼生天堂未  
就地獄先成 育王光云高提祖印獨耀寰中大啓  
洪爐烹凡煅聖非興化不能驗同參非同參不能見  
興化直得主賓互換照用雙行且道那裏是興化將



手向伊面前橫兩橫處者裏明得臨濟一宗不至掃  
土脫或未然育王爲你道破拈拄杖卓一卓云金鐵  
慣調曾百戰鐵鞭多力恨無雙 南堂欲云阿呵呵  
獅子兒返躑龍馬駒踴跳打破上頭關賓主俱失照  
有底便道當時再與一喝不然掀倒禪牀拂袖而去  
恁麼見解有甚共語處今日要使現前一衆與他古  
人兩得相見青山不鎖長飛勢滄海合知來處高  
霹靂驚天地那容掩耳聽須知興化老一半是人情  
鼓山珪

鎖鑰在握天魔膽落明眼衲僧休更卜度徑山杲

恰如劊子氣雄豪便向咽喉下一刀五臟肝心皆剖  
出方知王法不相饒退菴休

激激灑灑水光浮不見孤帆不見舟斜陽欲落未落

處盡是離人今古愁伊菴樓

須彌倒卓海水逆流同參相訪作盡冤讐休休明日

黃花蝶也愁雪菴瑾

驅耕夫牛照卽用奪饒人食用卽照不得同參把手  
行安知袖裏有穿窬南嶽勝

也機旗鼓解當頭洗淨晴空衆嶺秋一點不來雲萬  
里雁聲長嘯未曾休三峰藏

興化因雲居示衆老僧二十年前住三峰菴時魏  
府有興化長老來問曰權借一間以爲影艸時如  
何老僧當時機思遲鈍道不得爲伊置得箇問頭  
奇特不敢辜它伊曰想菴主答者話不得不如禮  
拜了退而今思量當時不消道箇何必後因化主  
到乃問山中和尙住三峰時老僧曾問伊話抵對  
不得而今道得也未化主遂舉前話師曰雲居二  
十年祇道得箇何必興化卽不然爭如道箇不必  
三聖然云雲居二十年道得底猶較他興化半月程  
徑山杲云何必不必綿綿密密覲面當機有續得  
末後句許伊親見二尊宿 平陽恣云雲居放憨興  
化斷賴誰則互相激揚怎奈祇作得賓中主作不得  
主中主今日若有恁麼問但云好纔擬議劈脊打出  
不惟使他差異禪和無開口處且顯宗師家有三玄  
戈甲照用同時底手眼  
何必不必一七二七龍樹馬鳴燄光透出道吾真

雲居何必興化不必眼若不開夢中叫屈月堂昌

何必不必方圓曲直眉目分明若爲辨的影神既隨身觀面常機疾一雙孤鴈忽高飛兩隻鴛鴦還獨立

最毒印

何必不必金刀玉尺甜者如蜜苦者如蜜二十年來無處雪屈頃別峯印

興化示衆我聞長廊下也喝後架裏也喝諸子汝莫盲喝亂喝直饒喝得興化向虛空裏撲下來一點氣也無待我甦息起來向汝道末在何故我未曾向紫羅帳裏擦珍珠與汝諸人去在胡喝亂喝作麼

天寧琦云我當時若見祇向他道何必待者老漢東西顧視却與一喝驚羣須是英靈漢敵勝還他獅子兒 報恩琇云識法者懼

紫羅帳裏擦珍珠密意師承會也無摸象衆盲徒亂說當臺古鏡見差殊海印信

興化老也大差三十三天上撲下紫羅帳裏擦珍珠古也今也誰酬價得一牛還一馬休說人間光照夜

不見錦繡銀香囊直至如今成話欄上方益

對衆全提摩竭令豈是閒閒兩片皮喝下瞎驢成隊走夢中推倒五須彌徑山果

紫羅帳裏擦珍珠禪客相逢總掠虛拍手呵呵開口笑釋迦彌勒是他奴鼓山珙

興化因僧問寶劍知師藏已久今日當陽試借看師曰不借曰爲甚不借師曰不遇張華眼徒窺射斗光曰用者何如師曰橫身當宇宙誰是出頭人僧便作引頸勢師曰噯曰諾便歸衆

神鼎揆云赤身臨白刃誰敢犯當頭者僧通身膽矣若非久戰沙塲不免積骨堆山屍橫遍野護謂有張華之眼而能劒刃上翻身若非興化擒縱自由殺活自在不免犯手傷鋒雖然輪機謀主存深意欺敵兵家無遠思

興化示衆若立一塵家國興盛野老顰蹙不立一塵家國喪亡野老安帖

翠峰顯舉若立一塵國家興盛不立一塵家國喪亡遂拈拄杖云還有同生同死底衲僧麼 昭覺動云

宗鑑法林卷二十六

集雲堂 編

當時若有箇漢出來道得一句互爲賓主免得翠峰者老漢後面自點胸 鼓山賢云立即是不立即是

若道有時立有時不立即與瘡病相似道雙照雙遮遮照同時猶不離教家極則畢竟作麼生拈拄杖卓一下

興化因僧問多子塔前共談何事師曰一人傳虛萬人傳實

於道無所證方通萬法路或明或暗行不慣亦不護月來松色寒雲去青山露今古天台橋幾人能得度投子青

紫玉紅芽舊事空兔葵燕麥領春風尊前有客彈清淚一曲湘君怨未終大善麟

空鑑法林卷二十五

大鑒下六世

鎮州寶壽延沼禪師臨濟玄嗣因西院來參問蹋破化

城來時如何師曰不斬死漢院曰斬師便打院連道斬斬師又隨聲打少頃乃謂侍者曰適來者僧將赤肉抵它乾棒著甚死急次有一僧來白曰某甲啓和尚者問話底僧在大覺處來兩人同參在者裏見解總與麼恐已後委悉和尚法道須是趁出二人若不趁出已後難得人承嗣師即將陳白僧趁出

風穴喜云西院蹋破化城要且脚跟未得點地寶壽不斬死漢早已血濺梵天則且置祇如趁出者僧意作麼生韜略雙全多意氣安南塞北一齊收

寶壽因僧問萬境來侵時如何師曰莫管它

老大梢工慣經歷看風使帆果端的任他海獸作波濤直過如飛沒踪跡海印信

萬境來侵莫管伊干戈元是太平基當時蹋著來時

路月下騰騰信脚歸掩室開

空中釘檣石上栽花種一籊粟收三斤麻柏林格

寶壽因趙州來師在牀背面而坐州展坐具禮拜

師起身入方丈州收坐具而出

保福展云寶壽忘頭失尾趙州平地喫撲

動絃別曲葉落知秋人平不語水平不流祇因脚底

無羈絆去住縱橫得自由遜菴演

一自投桃便有心瓊瑤相報尙嫌輕人情來去如知

的方解一輪兩處明童求昱

寶壽因僧問萬里無片雲時如何師曰青天也須

喫棒曰未審青天有甚過師便打

天奇瑞云大小寶壽可謂爲人爲徹殺人見血龍

池傳云寶壽只知盡法不管無民且如青天果有喫

棒分麼時有僧過池召闍黎僧應諾池云放汝三十

棒

寶壽問僧甚處來曰西山來師曰見獼猴麼曰見

師曰作甚麼伎倆曰見某甲一箇伎倆也做不得

師便打

舊人相見話衷心借問西山路徑深對衆直言呈伎  
倆紅爐煅煉要眞金汾陽昭

西山路上有獼猴嘯雨哀風動客愁忽遇北林獅子

子萬般伎倆一時休中際能

寶壽因僧問訊師曰百千諸佛盡不出此方丈內

曰祇如古人道大千沙界海中漚未審此方丈向

什麼處著師曰千聖現在曰阿誰證明師擲下拂

子僧從西過東立師便打僧曰若不久參焉知端

的師曰三十年後此話大行

昭覺勤云寶壽方丈裏布網張羅者僧鉤餌邊擎頭

戴角三度衝浪上來三度被他籠罩且道他得箇什

麼還會麼重賞之下必有勇夫

卷則囹圄無縫舒則八面生光百千諸佛同處一方

轉機輪於掌握奮大用於當陽非獨三十年後面前

馨香佛燈珣

寶壽因胡釘鉸來參師問莫是胡釘鉸麼曰不敢

師曰還釘得虚空麼曰請和尚打破師便打曰莫

錯打某甲師曰向後有多口阿師與你點破在胡

後到趙州舉前話州曰汝因甚麼被他打曰不知  
過在甚麼處州曰祇者一縫尙無奈何胡有省

翠峰顯云我要打者三箇漢一打趙州不合瞎却胡  
釘鉸眼二打寶壽不能塞斷趙州口三打胡釘鉸不  
合放過寶壽薦拈拄杖云更有一箇大衆一時退乃  
繫禪床一下 瀉山詰云者漢雖然省去可惜趙州  
放過當時待他道過在什麼處劈脊便棒非但承他  
寶壽威光亦乃與蔡林爲龜爲鑑 瀉山果云寶壽  
大似無風起浪平地生堆胡釘鉸貪程太速不覺墮  
坑落塹若不遇趙州點破爭得歸家穩坐且道那裏  
是趙州點破處良久云斬新日月特地乾坤 鼓山  
永云寶壽雖具打破虚空底鉗錘未免傷鋒犯手胡  
公末後悟去誰知眼尙瞎 天寧琦云胡釘鉸原  
不知者一縫當時趙州若不與賊過梯便是踢破百  
二十縛艸鞵也未譬地在雖然胡釘鉸明得也較寶  
壽三十里 資福廣云千鈞之弩不爲鼯鼠發機寶  
壽不得無過趙州雖善挽轉也是就地彈雀  
現出虚空眼便花更教打破事如麻直須指出當堂

縫分明鷄子過新羅治父川

一縫分明在當頭下手難饒君絞釘得終是不完全

鼓山班

直饒釘得者一縫檢點將來非好手可憐兩箇老禪

翁却向俗人呈家醜徑山果

寶壽問僧甚麼處來曰崔禪來師曰將得崔禪喝來  
麼曰不曾將得來師曰與麼則不從崔禪來僧便  
喝師拈棒僧擬議師便打

雲居舜云寶壽與麼也險者僧食到口邊被人奪却  
五湖禪客扣禪關恰似初行學上山騰身欲出青雲  
外力到峰頭一步難佛鑑勸

鎮州三聖慧然禪師臨濟玄嗣上堂曰我逢人則出出

則不爲人與化曰我逢人則不出出則便爲人

白雲端云此二尊宿各有一處打得著且道那箇在  
前那箇在後還有人向者裏定當得麼良久云妙舞  
莫誇回雪手三臺須是大家催 保寧勇云此二尊  
宿恁麼爲人猶在半途保寧今日路見不平拈拄杖  
下座大衆一時走散擲下歸方丈 寶峰文云者兩

箇老古錐竊得臨濟些子活計各自分疆列界氣衝  
宇宙使明眼衲僧祇得好笑且道笑箇甚麼若知得  
落處一任七顛八倒若不知且向二老葛藤裏較嚼

東山演云一人文章浩渺一人武藝全施若道興  
化是文亦不得若道三聖是武亦不得若於此辨得  
出許你通身是眼若辨不出你自相度 天童覺云  
墮也墮也今日不是滅古人聲光且要長後人節操  
若是本色漢提佛祖印轉鍊牛欄把拄杖一時穿却  
方見衲僧手段 昭覺勤云一人在孤峰頂上土面  
灰頭一人在十字街頭斬釘截鐵有頭有尾同死同  
生且道出卽不爲人底是出卽便爲人底是萬古碧  
潭空界月再三撈攪始應知 徑山杲云眞淨老人  
大似欺誣亡沒果上座卽不然豁開三要三玄路坐  
斷須彌第一峰且道三聖分上耶興化分上耶 天  
童傑舉白雲語了云白雲錯下名言殊不知二尊宿  
前不構村後不迭店直至於今反成話癮何故字經  
三寫焉成馬 靈隱巖云二老漢滅却臨濟正法  
眼却向長安路上把手共行直至於今遞相鈍置且

如何是共行一句掣開金殿鎖撞動玉樓鐘 仰山  
欽云二老可謂一條拄杖兩人昇今日被天寧拗作  
兩橛了也以拄杖倚左邊云且聽各自平分 天寧  
琦云三聖興化明眼宗師因甚麼活計本同生涯迥  
異但有路可上更高人也行 徑山琇云一人得體  
一人得用總未有作家手段萬壽旣已出了且道有  
爲人處無爲人處祝融峰頂上露滴萬年松 報恩  
秀云者兩箇漢大似才高語壯倚勢欺人拈拄杖云  
還見興化三聖麼復靠杖云直說具衲僧手段也且  
向者邊立 磬山修云一人逢人則出一人逢人則  
不出且道逢什麼人 五磊權云欽祖幸然拗折今  
日不肯遠孫未免更將鸞膠爲伊續起逢人卽出逢  
人不出兩彩一賽如箭中的金鳳銜花下彩樓眼裏  
瞳人吹簫策三臺須是大家催無限清風生八極  
愚菴孟云山僧今日出也還是爲人是不爲人若是  
爲人則落興化圈套裏若不爲人又落三聖圈套裏  
若總不恁麼又落山僧圈套裏畢竟如何喝一喝云  
一把柳絲收不得和烟搭在玉欄干 菩提珍舉眞



淨語了云真淨老人錯下名言累及後人循途守轍  
列界分疆殊不知二大老背手袖金鏃翻身控角弓  
激揚臨濟賓主卽不無若是活計何曾夢見今日新  
菩提落處也要諸人共知以拄杖畫一畫云自出洞  
來無敵手得饒人處且饒人擲下拄杖

騎驢戴笠迎南去躍馬搖鞭向北行兩箇大商俱突  
曉日高猶聽打三更保寧勇

城南指大騎驢子市北郎君跨馬兒各各四蹄俱踢  
地三春同到金明池佛鑑勸

陽燄何曾止得渴齋餅幾時充得饑勸君不用栽荆  
棘後代兒孫惹著衣徑山景

湖光潋灩晴偏好山色溟濛雨亦奇若把西湖比西  
子淡粧濃抹總相宜佛燈珣

兩箇孩兒抱花鼓左邊打了右邊舞一曲兩曲無人  
會歷歷清風動千古懶菴帶

乍雨乍晴山裏寺或來或去洞中雲滿天星斗明如  
晝此境此時誰欲分德山清

橫吹玉笛分春恨半卷珠簾并倚門迷却歸巢雙燕

子落紅飛絮攪前村龍池珍

黃昏打漿奔城快日午回舟入港遲夜半相逢兩相  
喝不知蹉過已多時在菴賢

張顥艸書李廣神箭一等精良千秋獨擅漢水治

古音無調和難齊迭奏壘饒望轉迷歌罷攜歸天大  
曉一簾風景六橋西法林音

三聖因僧問如何是祖師西來意師曰臭肉來蠅  
興化曰破驢脊上足蒼蠅

水母有骨靈龜無殼睹驢臭肉來於蠅佛意祖意如  
山嶽正覺逸二

靈龜有殼水母無骨破驢脊上足蒼蠅曹溪古路行  
人絕

破脊驢多臭肉蠅誰知興化不徒行慣從五鳳樓前  
過手握金鞭賀太平白雲端

青青掩映蒼龍窟修竹超然物外物若將修竹比喬  
松未及喬松老風骨佛鑑勸

三聖到德山纔展坐具山曰莫展炊巾者裏無殘  
羹飯師曰縱有也無著處山便打師接住棒推

向禪牀上山大笑師哭蒼天便下參堂堂中首座  
號踢天泰問行脚高士須得本道公驗作麼生是  
本道公驗師曰道甚麼座再問師打一坐具曰者  
漆桶前後觸忤多少賢良座擬人事師便過第二  
座人事

瑯琊覺云若無樂布作爭得見韓光 滄山行云三  
聖撥艸瞻風有舒有卷德山勘凡驗聖有放有收德  
山笑去卽且置三聖哭蒼天便出意作麼生不貪香  
餌味可謂碧潭龍 雲巖游云三聖便展坐具作賊  
人心虛山云不用展炊巾尾巴露也聖云設有向什  
麼處著口是禍門山便打裂破古今聖接住棒推山  
向繩床上老鼠入牛角更有一轉語待無舌人忌口  
却向汝道 清化燬云赤眼遇金剛伎倆恰相當好  
手逢好手何更哭蒼蒼洞中春色幾人知門外秋紅  
風落了

呼爲雲吸爲雨襲襲清風動寰宇笑哭不是等閒聲  
路見不平應有主要斬不平人不與平人語而今何  
處見踪由剔起眉毛看鷄子長靈卓

殘羹餒飯無處安著換手搥胸劈頭蓋却兩箇無孔  
鐵錘一樣無繩自縛佛燈珣

南北山相對東西有路分不經場陣裏爭見李將軍  
木菴永

瞎驢插翅驚雷外踢倒崔嵬華嶽峰堪笑禹門點額  
者爲貪香餌不成龍山夫正

三聖問僧近離甚處僧便喝師亦喝僧又喝師又  
喝僧曰行棒卽瞎便喝師拈棒僧轉身作受棒勢  
師曰下坡不走快便離逢便打僧曰者賊便出去  
師遂拋下棒次有僧問適來怎容得者僧師曰是  
伊曾見先師來

天井新云拈頭作尾則易看樓打樓則難何故白雲  
盡處是青山行人更在青山外 法忍謚云者僧具  
超方手眼三聖展格外威權雖然縱奪可觀未免旁  
觀者嘲 法林音云那裏是者僧見先師處  
是精識精是賊識賊惡人自有惡人魔新羅人遇普  
州客攬旂奪角饒機先打劫就窠歸勁敵珠走盤活  
鐵鑊吹毛橫按雪霜寒收下翅遶天俊鶻天岸昇

三聖到仰山山問汝名甚麼師曰慧寂山曰慧寂  
是我名師曰我名慧然山大笑

昭覺勤舉雪竇頌畢云者箇笑千古萬古清風凜凜  
地爲甚麼雪竇却道祇應千古動悲風也是死而不  
弔 徑山杲云兩箇藏身露影漢殊不顧旁觀者晒

愚菴孟云仰山向虛空裏乞縫三聖煉石補天陳  
希夷一覺睡千年至今不知直是好笑

雙收雙放若爲宗騎虎由來要絕功笑罷不知何處  
去祇應千古動悲風雪竇頌

神通遊戲不爲難互換機鋒始可觀雙放雙收底時  
節呵呵大笑幾何般本覺一

慧寂剛言是我名幸逢禪者更饒人若將利器比君  
子大笑欣然滿座春圓悟勸

黎鬼無端弄醉翁醉中鼻孔自遼空到家鬼魅同爲  
有滿樹桃花笑晚風緒菴續

魏府大覺禪師臨濟玄嗣因僧問如何是本來身師曰  
頭枕衡山脚踏北嶽

主山之後案山前下是地兮上是天身手太長衫袴

短醉狂贏得樂豐年保寧勇

潦倒年來任性情仙都踴遍又蓬瀛有名不載籍天  
府臘得聲傳四海清古林如

大覺參臨濟濟見豎起拂子師展坐具濟擲下拂  
子師收具參堂去時衆曰此僧莫是和尙親故不  
禮拜亦不喫棒濟聞令侍者喚師至曰大衆道汝  
來參長老又不禮拜又不喫棒莫是長老親故師  
乃珍重下去

如菴彰云風來樹動雨過山青二老可謂作家相見  
迥出常情雖然大覺猶欠一籌當時待侍者來喚便  
好掌云者一掌合是堂頭老漢喫非惟塞斷臨濟咽  
喉且使一衆狐疑泮然冰釋

電光石火驗來機家在深山著薛衣怎奈旁人看不  
厭相攜更步釣魚磯古南門

桃李花開三月天紅紅白白不相瞞可憐遊翫不知  
者空使風飄落滿川古鑑彰

灌溪志閑禪師臨濟玄嗣因僧問久嚮灌溪到來祇見  
漚麻池師曰汝祇見漚麻池且不見灌溪曰如何

是灌溪師曰劈箭急

玄沙備云更學三十年未會禪在天童悟云灌溪雖能拽轉鼻孔爭奈惹人情見何不待伊問如何是灌溪劈頭便打

一派曹溪接灌溪龍行風雨動雲霓峻機箭筈波瀾急撼得毗盧海嶽低克符道者

武牙山下虎狼多何事行人偏要過今日虎雖幸睡睡過來魂魄亦銷磨機之玉

灌溪參臨濟濟嘉言擲住師曰頤頤濟拓開曰且放你一頓

天童華云灌溪氣宇如王被臨濟活埋在鎮州城裏十字街頭當時若是光孝棒折也不放在何故家肥生孝子國霸有謀臣靈隱獄云爐韜之所多鈍鐵雖然如是不因夜來鴈爭見海門秋

雨散雲收後崔嵬數十峰倚闌頻顧望回首與誰同秀巖瑞

灌溪住後上堂我在臨濟爺爺處得半杓末山孃孃處得半杓共成一杓喫了直至如今飽不饑

天童覺云灌溪怎麼說且道是臨濟處得底末山處得底雖然一箭落雙鵬爭奈有時走殺有時坐殺且作麼生得恰好去捏聚放開全在我拈來拋去更由誰

莫謂成龍頭角易擎雲攫霧及時難今朝特地重拈出信始渠儂不自瞞圭峰法

灌溪上堂十方無壁落四面亦無門淨裸裸赤灑灑沒可把

崇覺空云灌溪老漢向十字街頭逞風流賣惺惺道我解穿珍珠解玉版過亂絲卷筒綰姪房酒肆瓦合與臺虎穴魔宮那吒忿怒遇文王與禮樂逢桀紂逞干戈今日被崇覺覷見一場懨懨

定州善崔禪師臨濟玄嗣州將王令公於衙署張座請

師說法師陞座拈拄杖曰出來也打不出來也打僧出曰崔禪師擲下杖曰久立令公伏惟珍重

歸宗一云作麼生道得一語救得崔禪清涼欽云和尚且自救好是肯他不肯他五祖戒別云便推倒禪牀瑯瑯覺云久經行陣者終不展旂槍雲

蓋智云身挨白刃不懼死生也須是者僧始得崔禪  
爲甚麼當機放過要會麼錦鱗已得休勞力收拾絲  
綸歸去休 薦福行云崔禪上堂美則美矣善則未  
善何故大似放過者僧山僧即不然待者僧出衆來  
向未開口已前與他痛棒若是皮下有血必然別有  
生涯 龜峰光云崔禪布長蛇偃月大陣欲統四大  
部洲爲一世界不是者僧攬旂奪鼓未免陷在虜庭  
且道坐籌帷幄鎮靜八方水乳和同風雲會合一句  
作麼生道若不藍田射石虎幾乎誤殺李將軍 理  
安問云雲蓋道者僧身挨白刃不懼死生可惜崔禪  
當機放過殊不知者僧喫了崔禪一頓棒至今轉身  
不得要識崔禪麼運籌帷幄決勝千里  
鎮鄒橫按寶光寒俠客嘍囉敢正看飛過青霄聲震  
吼乾坤直得黑漫漫保寧勇  
大展家風示衆人垂鈎入海釣金鱗遊魚弄水騰波  
浪船棹俱拋出大津延壽慧  
十三慣繡羅衣裳自憐紅袖聞馨香人言此是嫁時  
服含羞刺出雙鴛鴦空更印

大鵬展翅鼓蕩四溟直下惟求負命鯨彩雲坐斷春  
風闌杖化游龍歸意深休收虎頭戴角大驚人夾山

幽州譚空禪師臨濟玄嗣因鎮州牧有姑爲尼行脚回

欲開堂牧令師勘過師問曰聞汝欲開堂爲人是

否尼曰是師曰尼是五障之身你作麼生爲人尼

曰龍女八歲南方無垢世界成等正覺又作麼生

師曰龍女現十八變你試一變看尼曰不是野狐

精變箇什麼師便打牧聞舉乃曰和尚棒折那

翠巖芝云且道尼具眼麼祇擔得斷貫索且作麼生

會

襄州歷村禪師臨濟玄嗣師煎茶次僧問如何是祖師

西來意師舉起茶匙僧曰莫祇者便當得否師擲

匙向火中

煎茶未了人來問拈起茶匙呈似他當時若遇收蕪

手性命難存爭奈何投子青

鎮州萬壽禪師臨濟玄嗣一日過訪寶壽壽坐不起師

展坐具壽下禪牀師却坐壽驟步入方丈閉却門

師乃歸院翌日寶壽來謁師亦坐不起壽展坐具

師亦下禪牀壽却坐師遂歸方丈閉却門壽於侍者寮取灰團却方丈門便歸去師開門見曰我不恁麼它却恁麼

磬山修云二老一衝一撞如兩虎相見各露爪牙無有一毫虧損處不愧同參足爲模範雖然總未免旁觀者哂

虎溪禪師

臨濟玄嗣

因僧問菴主住者裏多少年也師

曰祇見冬凋夏長年代總不記得曰大好不記得

師曰汝道我在者裏得多少年也曰冬凋夏長吟

師曰鬧市裏虎

鬧市中心虎能歌不能舞命值木星君不遇羅睺主

瑯琊覺

虎溪老住菴年深都不記鬧市中心中虎四邊如鼎沸

舞堂清

覆盆禪師

臨濟玄嗣

有僧從山下哭上師閉却門僧於

門上畫一圓相門外立地師從菴後出亦從山下

哭上僧喝曰猶作者箇去就在師便換手搥背曰

可惜先師一場埋沒僧曰苦苦師曰菴主被瞞

自嚴符云南嶺漢鵲相逢如罷得水似虎逢山意氣威障則不無若到者裏各與二十拄杖爲什麼古佛堂前無如是事

桐峰禪師

臨濟玄嗣

因僧問和尚者裏忽遇大蟲作麼

生師便作大蟲呌僧作怕勢師大笑僧曰者老賊

師曰爭奈老僧何僧却大笑

翠峰云是卽是兩個惡賊祇解掩耳偷鈴復頭

見之不取思之千里好個斑斑牙爪未備君不見大

雄山下忽相逢落聲光皆振地大丈夫見也無敗

虎尾持虎鬚

山裏大蟲山裏呌你拳頭築你口丈夫氣字信如

王豈肯輸人甘落後賊賊喜底是風怨底是雪愚

庵五

怕虎原來同虎走不會咬人只會呌張牙露爪幾千

般到底翻成喋屎狗起綱宗

滄州米倉禪師

臨濟玄嗣

問僧近離甚處曰冀州太湖

師曰閣黎來時太湖向你道什麼曰知道米倉路

險師曰到者裏又作麼生曰不異發足時道路師



日聞黎已孤太湖去在日某甲亦不肯和尚慙麼  
道師曰來時路峻如今路平曰不妨和尚此路師  
曰漆桶裏漢有甚麼限

發足超方地頭親到遇著峻峻道途殺活杖子變豹  
米倉大路平如砥未免漆桶裏著倒不搽紅粉也風  
流大抵還他肌骨好佛燈珣

雲山禪師臨濟玄嗣問僧甚處來曰西京來師曰將得

西京主人書來麼曰不敢妄通消息師曰作家師  
僧天然猶在曰殘羹餒飯誰人肯喫師曰獨有闍  
黎不肯喫僧便作吐勢師喚侍者扶出者病僧

昭覺勤云一往觀來二俱作家節節勘證二俱落艸  
當時若有人截斷葛藤不妨光前絕後還委悉麼多  
虛不如少實

莫怪相逢無信息誰能長作置書郵直饒說盡千般  
事那箇心中得到頭懶菴

者僧掩耳偷鈴雲山將錯就錯若是碧眼波斯別有  
翻身一著木菴永

定上座臨濟玄嗣鎮府齋回到橋上坐次有三座主至

一座主問如何是禪河深處須窮到底師擒住擬  
拋向橋下其二座主遽前勸曰休休莫怪觸忤上  
座且望慈悲師曰若不是者兩箇座主直教它窮  
到底

理安問云定上座性命在二座主手裏

齋上座臨濟玄嗣因到百丈丈曰闍黎有事相借問得

麼師曰幸自非言何須諮議丈曰收得安南又憂  
塞北師撥開臂曰與麼不與麼丈曰要且難構要  
且難構師曰知即得知即得

仰山寂云若有人知此二人落處不妨奇特若辨不  
得大似日中迷路 蔣山勤云百丈獨坐大雄峰頂  
咳嗽風生四方禪客望崖而退因甚齋上座到來直  
得弓折箭盡

齋上座到德山山纔見便下禪牀作拙坐具勢師  
曰者箇且置忽遇心境一如底人來向伊道箇什  
麼不被諸方檢責山曰猶較昔日三步在別作箇  
主人公來師便喝山不語師曰塞却者老野狐咽  
喉

瀉山祐云：「公雖得便宜，爭奈掩耳偷鈴。」蔣山勸云：「公一喝賓主歷然，德山無語言遍天下。」瀉山老子雪上加霜，檢點將來，總不可放過。乃擲下拄杖。

睦州刺史陳操尚書

見睦州明

一日與僚屬登樓，次見

數僧行過，一官人曰：「來者總是行脚僧。」公曰：「不是。」曰：「焉知不是？」公曰：「待來勘過。」須臾僧到樓前，公薰喚上座。僧皆舉首，公謂衆官曰：「不信道。」

瀉山詰云：「尚書可謂手擎仲尼日月，腰佩毗盧金印，非惟儒士驚懾，亦乃衲僧罔措。不見道當機如電拂，方免病棲蘆。」天童覺云：「陳操尚書白拈賊瞞，長蘆一點不得。」鼓山永云：「者僧有理難伸死而不弔，尚書按劍當門，誰敢正眼覷著。」通玄奇云：「尚書可謂善識休咎，闊裏換人眼睛者，僧雖則舉首稱奇，可惜還同受屈。」

一語離窠窟，千生出蓋纏。夜來風雪惡，木折在巖前。

雪堂行

拈得須彌第一槌，銅頭鐵額豈容伊。鹽梅舟楫并霖雨，不是斯人更是誰？復庵封

季咸曾相龜丘子，竈變難分極自逃。輸與高樓凝望者，炯然可察秋毫塵堂愚。

尚書問僧有事相借，問得麼？僧曰：「合取狗口。」公乃自擲口曰：「某甲罪過，曰知過必改。」公曰：「就闍黎乞取口喫飯得麼？」

緣門底事都傾出，祇要相將艸裏行。把臂不須重可，獨脚跟點地自縱橫。果庵鼎

尚書齋次拈胡餅問僧曰：「江西湖南還有者箇麼？」曰：「尚書適來喫箇什麼？」公曰：「敲鐘謝響。」

瀉山問云：「者僧俊鶻沖霄到也，快便怎奈末上遭他網子，祇知道敲鐘謝響者裏，合作麼？」對他何？不道艸賊大敗。

尚書問睦州看什麼經？州曰：「金剛般若經。」公曰：「六朝翻譯師看底是第幾朝？」州拈起曰：「一切有爲法，如夢幻泡影。」

六朝翻譯傳來妙，到頭未悟當時竅。須信枝頭老鳳凰，春來反作黃鸝叫。正堂辨

宗鑑法林卷二十六

宗鑑法林卷二十七

集雲堂 編

大鑒下七世

汝州南院慧顒禪師

興化獎嗣

上堂諸方祇具啐啄同

時眼不具啐啄同時用僧便問如何是啐啄同時

用師曰作家不啐啄啐啄同時失曰此猶未是某

甲問處師曰汝問處又作麼生曰失師便打其僧

不肯

翠巖真云運籌帷幄決勝千里南院雖則全機受敵

其奈土曠人稀 瀉山喆云南院高提祖印縱奪臨

時者僧善能當鋒抗敵怎奈力竭計窮如今還有本

色衲僧麼出來與大瀉相見不圖鼓舞揚聲貴要宗

風不墜如無大瀉今日大似索戰無功 雲居悟云

作麼生是啐啄同時眼眼若得明其用自備又道作

家不啐啄啐啄同時失何故不啐啄所以道子若啐

亂其母即喪還明得麼 法林音云南院一期施設

不妨奇特其奈打者僧不著者僧爲衆竭力奮不顧

身未免墮坑落塹若待伊云祇具啐啄同時眼不具

啐啄同時用便云閉却因口直饒南院縱奪全機也較三千里

子若啐吼其母即喪全歸其子十方通暢大用現前

理自然何必起心作模樣若更不會雲居拄杖

雲居悟

不將佛法當人情驗盡諸方鬼眼睛縱使作家不啐

啄依然錯認定盤星笑翁堪

呼蛇容易遣蛇難一遣誰知又解翻已識此蛇能變

化故垂杖送下高灘無明經

其僧後於雲門會下聞二僧舉此話一僧曰當時

南院棒折那其僧忽契悟遂奔回省覲師已遷化

乃謁風穴穴問莫是當時問先師啐啄同時話底

僧麼曰是穴曰汝當時作麼生會曰某甲如在鏡

影裏行相似穴曰汝會也

瑯琊覺云者僧祇解豎降旂不解奪劍戟 翠巖真

出風穴語云當時待者僧擬抵對以坐具劈口撼

淨因成云全軍制勝草偃風行南院如獅子搏兔亦

全其力 瀉山喆云大小風穴却將惡水潑人大瀉

他不然某甲當時如在燈影裏行相似便好向道先

師肉猶煖在你作者般見解以拄杖打下法堂免見孤負他南院 東禪觀云扶南院門風還他風穴諸方往往道伊肯者僧殊不知者僧被伊推在萬丈坑裏 理安問云全機敵勝草偃風行提持向上綱宗須是南院老漢者僧後來悟去祇知納款投降不解拳旂斬將風穴當時待伊道是便好連棒打出者僧或可別立生涯免得後人向燈影裏摸索葛拈杖云今日有人爲者僧作主出來與拄杖子相見如無今日失利

同時啐啄不同時石火電光猶較遲燈影裏行今已會蹉跎非是落便宜仰山歎

亡身辭鳳闕報國取龍庭詎學書生輩窗閒老一經  
覺圓風

南院上堂赤肉團上壁立千仞僧問赤肉團上壁立千仞豈不是和尚道師曰是僧便掀倒禪牀師曰者瞎驢亂作僧擬議師便打

徑山杲云吾今爲汝保任此事終不虛也 天童華云也是勾賊破家若非者僧敢捋虎鬚爭見南院汗

馬功高雖然如是更資一路赤肉團上壁立千仞若有僧出劈脊便打何故殺人刀活人劍 靈隱獻云者僧一味小心大膽南院也是養子之緣 天寧琦云者僧敢向毒蛇頭上揩癢蒼龍領下披鱗誰不賞他大膽祇是末上少了一著自出洞來無敵手得饒人處且饒人 雲居莊云重賞之下必有勇夫 磬山修云者僧將成九仞之山欠進一簣之土 主峰峴云者僧如登百尺之樓祇差一級寶應雖則竭力提持未免竿頭弄險

掌中擎日月舌上覆金錢壁立爭千仞毫光徹梵天  
鼓山珪

赤肉團邊用得親主賓有理各難伸兩個駝子相逢著如今世上無直人徑山杲

電光影裏縑素區分纖毫不犯總教滅門木菴永日月無光殺氣浮揭天鼙鼓戰貔貅捷呼獲下眞番將那個兒郎不舉頭盧堂愚

一抽金鎖暗稱奇轉換更逢霹靂機楚項用奇走赤帝漢軍乘勢襲全齊出其不意攻無備失在東陽得

在西兩兩普州人伎倆從教對面影相欺天岸昇  
平沙落日大荒西隴上石頭高復低歎敵陸鄭忘失  
顧落他陣裏路頭迷韋 侯 森

南院因僧問祖意教意是同是別師曰王尙書李  
僕射曰意旨如何師曰牛頭南馬頭北

徑山杲云前頭答得著後頭答不著 明因懷云妙  
喜恁麼道恁南院意不恁南院意

南院因僧問日月交謝寒暑迭遷如何是不涉寒  
暑者師曰紫羅抹額繡腰裙曰向上之機今已曉  
中下之流如何解會師曰炭庫裏藏身

虎丘隆云問既有宗答亦驚羣雖然如是南院祇解  
觀根逗機應病與藥虎丘更資一路如何是不涉寒  
暑者前村深雪裏昨夜一枝開向上之機今已曉中  
下之流如何解會買帽相頭 空有生云南院雖則  
向上全提不涉玄微也是巧俏成迂多添脂粉今日  
有問日月交謝寒暑迭遷如何是不涉寒暑者三家  
村裏泥判官向上之機今已曉中下之流如何解會  
大事爲你不得小事各自支當

紫羅抹額繡腰裙傾國風流宛勝秦玉笛插藏人不  
見夜深吹起鳳樓春堂 行

南院因一僧參纔入方丈便以手指曰敗也師拈  
拄杖度與僧僧擬接師便打

雲峰悅云者僧頭上有光不知脚下似漆直饒你十  
字縱橫正好朝打三千暮打八百

南院因僧問古殿重興時如何師曰明堂瓦插簷  
曰與麼則莊嚴畢備也師曰斬艸蛇頭落

昭慶庭云貧思寶所曲指化城設忽遨遊亡家失業  
畢竟如何須知泣玉人特地成狼藉

縱奪之機安可測隨言生解實堪悲曉來一陣春風  
起吹落庭花三四枝海 印 信

重興古殿辨來風瓦插重簷氣象雄怪得人前多意  
氣他家無法在胸中西 禪 寂

南院因僧問從上諸聖向什麼處去師曰不上天  
堂則入地獄曰和尚又作麼生師曰還知寶應老  
落處麼僧擬議師以拂子薰口打曰你還知喫拂  
子底麼曰不會師曰令合是你行又打一拂子

翠峰顯云令既自行且拂子不知來處雪竇道個瞎  
且要雪上加霜 黃龍心云白珪之玷猶尚可磨病  
在膏肓最難治療者僧令既在手爲甚麼不能行過  
在甚麼處 徑山杲云權衡臨濟三玄三要須還他南  
院始得翠峰爲什麼道拂子不知來處妙喜道個瞎  
且要兩得相見 東禪觀云令合是者僧行爲什麼  
却自行懵懂底便道拂子在南院手裏若與麼非惟  
自抑威光亦乃不識南院性空道南院令雖自行要  
且打者僧不著 天寧琦云翠峰雖是明眼宗師要  
且不知寶應老落處既未知落處因什麼却道拂子  
不知來處祇具一隻眼妙喜道個瞎也是東家人死  
西家人助哀

南院問僧名什麼曰普參師曰忽遇屎橛時如何  
曰不審師便打

兩個屎橛合作一團熏天炙地誰能嗅千古森林作  
話端西山亮

守廓侍者與化獎嗣問德山從上諸聖向什麼處去山  
曰作麼作麼師曰敕點飛龍馬跛鼈出頭來山休

去明日浴出師過茶與山山撫師背一下曰昨日  
公案作麼生師曰者老漢今日方始瞥地山又休  
去

翠峰顯云然精金百煉須要本分鉗錘德山既以已  
方人者僧還同受屈以拄杖畫一畫云適來公案且  
置從上諸聖什麼處去大衆擬議一時趁出 黃龍  
南云德山持顰作啞雖然暗得便宜廓公掩耳偷鈴  
爭奈旁觀者哂 瀉山華云若不登龍門焉知滄海  
寬直饒浪激千尋爭奈龍王不顧 雲居元云大凡  
一賓一主須是知音同死同生方堪受敵廓侍者獨  
立於巖石上翻身倒捋虎鬚周金剛安坐於大海波  
心背手逆擒鱗角在檀特山前列陣向占波國裏爭  
鋒分明有輸有贏且道誰得誰失 靈隱獄云前面  
是懸巖萬仞後面是觸刃當鋒如何入得德山門  
報恩秀云豈止偷鈴如九重淵底驪龍領下挾珠正  
值龍睡若覺時必爲齏粉又云下媒求鱗著本圖利  
果然出他殼中不得忽有人問萬松從上諸聖甚麼  
去也攔腮掌云在者裏直教飛龍跛鼈縮項攢蹄侍



者德山亡鋒結舌還識德山老漢麼少年曾決龍蛇  
陣潦倒還聽禪子歌 博山來云德山一條棒尋常

血滴滴地到者裏因甚不用還會麼暗裏抽橫骨明  
中坐舌頭 古南門云猛虎口裏橫身毒蛇頭上搭

癢一出一入一挨一拶不妨好手翠峰恁麼舉從上  
諸聖且置者一隊漢向什麼處去可憐無限弄潮人

畢竟還落潮中死 普濟龍云盡道德山陷虎機深  
殊不知心肝五臟早被個孟八郎漢盡情搜出還有

向機前著得隻眼者麼

正士忠臣氣最英一言佐國死猶輕不同詔曲偷安  
者冒寵貪榮過一生佛印元

雲鵬展翅天無光井底蝦蟆剛咄咄太陽忽轉跳出  
來千峰萬峰空突兀白雲端

覲面來時作者知可中石火電光遲輪機謀主有深  
意欺敵兵家無遠思發必中更瞞誰腦後見顯兮人

難觸犯眉底有眼兮渠得便宜天童覺

頑皮老虎臥林丘一任旁人放滴油滿肚祇因飽

肉縱加呼喚懶擡頭無準範

慣戰深藏陷虎機窮追焉敢犯重圍縱然保得全身  
法折盡旂槍已喪威慈山清

月明照見路行人突兀高低一道平風卷亂雲歸嶽  
盡祇因留得華山青理安問

敕點飛龍展大功五花蹴蹋氣吞戎王圖已樹千年  
業跋扈揚揚徒肆雄夫山儲

守廓到鹿門一日見楚閭黎與僧道話次鹿門下

來問楚閭黎你終日披披搭搭作甚麼楚日和尙

見某甲披披搭搭那門便喝楚亦喝兩家總休去

師曰諸上座你看者兩箇瞎漢隨後便喝門歸方

丈却令侍者請師上來曰老僧適來與楚閭黎賓

主相見什麼處敗闕師曰轉見病深門曰老僧自

見興化來便會也師曰和尙到興化時某甲爲侍

者記得與麼時門曰請舉看師遂舉興化問和

尙甚處來和尙曰五臺來化曰還見文殊麼和尙

便喝化曰我問你還見文殊麼又惡發作麼和尙

又喝化不語和尙作禮化至明日教某甲喚和尙

和尙早去也化上堂曰你看者箇師僧擔條斷貫

索向方去已後也道見興化來師曰今日公案  
恰似與麼時底門曰當時興化爲甚無語師曰見  
和尚不會賓主句所以不語及欲喚和尚持論和  
尚已去也鹿門明日特爲煎茶晚參告衆曰夫參  
學龍象直須仔細入室決擇不得容易連得箇語  
便以爲極則道我伶俐祇如山僧當初見興化時  
認得箇動轉底見人一喝兩喝便休以爲佛法也  
今日被明眼人覷破却成一場笑具圖箇甚麼祇  
爲我慢無明不能回轉親近上流賴得明眼道人  
不惜身命對衆證據此恩難報何故興化曰饒你  
喝得興化老人上三十三天却撲下來一點氣也  
無款款地喘息起來向你道未在何故如此興化  
未曾向紫羅帳裏擦珍珠與你在胡喝亂喝作麼  
眞謂藥石之言道流難信如今直須明辨取豈不  
慶快平生參學事畢

一潮纔去一潮來兜底誰知更有雷二百青錢穿不  
得逢人空說寶山回豁堂品

自悔臨鋒失變通招人隔岸罵東風囊中幸有神仙

授得地擒王不在攻位中符

守廓行脚到華嚴和尚會下一日嚴上堂曰大衆  
今日若是臨濟德山高亭大愚烏窠船子兒孫不  
用如何若何便請單刀直入華嚴爲汝證據師出  
禮拜起便喝嚴亦喝師又喝嚴亦喝師禮拜起曰  
大衆看看老漢一場敗闕又喝一喝拍手歸衆嚴  
下座歸方丈時風穴作維那上去問訊嚴曰維那  
汝來也耐守廓適來把老僧扭捏一上待集衆  
打一頓趁出穴曰趁它遲了也自是和尙言過它  
是濟下兒孫本分恁麼嚴方息怒穴下來舉似師  
師曰你著甚來由勸者漢我未問前早要棒喫得  
我話行如今不打搭却我者話也穴曰雖然如是  
已徧天下也

天童悟別華嚴方息怒云老僧若作華嚴連棒打出  
則風穴不敢傳言送語矣 理安問云二虎之下獸  
不容蹄兩刃之閒人不容足華嚴一期施設可謂王  
令森嚴不知守廓是透脫牢籠底漢橫衝直撞收展  
自如遂致者老漢卸甲倒戈龍頭蛇尾千載之下寧

免遭人檢點敢問諸人那裏是華嚴敗闕處拈拄杖云匡扶須藉英靈手顯發還他過量人 廣教王云盡道華嚴能開關延敵亦能制敵守廓能輕騎掠陣亦能破陣殊不知二老機用雖同向上一著俱未夢見廣教有三十棒要與風穴相見不合掉身其閒將兩家羅紋結角處摟盡無餘卓拄杖云古佛過去久矣 紫琿炬云盡道華嚴龍頭蛇尾不能令廓公屈服被他貶剝一上何異矮子過深深殊不知華嚴是個虎擬之將不施寸鐵直取人頭縱饒守廓七事隨身未免遭他陷害風穴祇麼入趙投秦窮兵構怨衲僧門下總是喫棒底漢

龍門競蹋氣全豪偷得耕牛藝轉高帷幄有人饒毒手祇將蒿箭落雙鷗

天章王

坑降弑義已無名神器空勞以力爭垂死尙言非戰罪豈知學敵誤平生

豁堂

門前白額正威寧室內蒼鷹敢越羣爭似老熊同出入垂垂牙爪不傷人

似亭挺

鎮州寶壽第二世禪師寶壽開堂日方陞座三聖

便推出一僧師便打聖曰你怎麼爲人非但瞎却者僧眼瞎却鎮州一城人眼去在師擲下拄杖便下座歸方丈

翠峰顯云寶壽三聖雖發明臨濟正法眼藏要且祇解無佛處稱尊當時者僧若是個漢纔被推出便掀倒禪牀直饒寶壽全機也較三千里 法眼益云什麼處是瞎却人眼處 五祖戒別寶壽云千鈞之弩不爲鼯鼠而發機 瑯琊覺云不是三聖爭到今日雖然如是錯會者多 雲峰悅云臨濟一宗掃地而盡因什麼却到者裏驀拈拄杖云什麼處去也 滌山秀云寶壽爲將因何三聖却在中軍可惜鎮州一城人眼至今未辨東西然清議之排必有竊吹之處當時連三聖趁出必然救得鎮州一城人眼 滌山結云寶壽大似寰中天子敕正行三聖塞外將軍令正舉還有不惜性命者麼出來與老僧相見要斷不平之事良久云橫按鐵錘全正令太平寰宇斬癡頑雲居元云盡道此語奇特大似韓獪逐塊殊不知寶壽正賊不識誤罪平人者僧有理不伸至今受屈

承天欲斷不平之事拈拄杖云要爲天下宗師此棒別有分付 黃龍新云寶壽見機而作其奈三聖不甘直饒甘去未免瞎却鎮州一城人眼 泐潭準云三聖成視寶壽出世好則甚好要且祇得一概 昭覺勤云寶壽大似毒龍攪海雨似盆傾三聖雖然雷震青霄未助得威光一半在可中有個直下承當底非惟瞎鎮州一城人眼瞎却天下人眼去在 天童華云盡道寶壽三聖是作家爐鑪本分鉗錘殊不知二大老被者僧一拶直至如今扶不起莫有爲二老雪屈底麼薰拈拄杖擲下云龍蛇易辨衲子難瞞 天童傑云二尊宿美則美矣若要扶臨濟正宗每人合喫一頓棒在且道那裏是欠處 東禪觀云盡道三聖有奔流度刃之作向平地上湧波瀾寶壽用疾談過風之機向虛空裏轟霹靂二大老各出隻手扶豎臨濟正法眼藏與麼說話要作臨濟兒孫且緩緩性空道蚊子如何擊大柱藕絲焉可緊須彌若是臨濟正法眼藏端的向二人邊滅却 靈隱嶽云大凡扶豎宗乘須是頂門眼正肘後符靈二尊宿等閒一

挨一拶直下發明臨濟心髓祇是不知性命總在者僧手裏 龍翔新云斬釘截鐵發揮格外真機捏聚放開顯示當陽正眼直得龍吟霧起虎嘯風生一道神光貫通今古如斯舉唱猶涉途程且到家穩坐一句又作麼生道三事衲衣青嶂外一爐沉水白雲中 理安問云二老是臨濟嫡骨兒孫故能向人天衆前發明臨濟心髓惜乎當時無人承當致使二大老不能轉身吐氣 東塔烹云我要翻翠峰案縱使者僧推出便掀倒禪牀也祇是棺材裏瞠眼有甚用處者僧若果是個漢纔推出珍重便出不惟闔會觀光亦使二老疑殺

金鎚擲下如星疾好手接來不費力當時擲向洪波中千古萬古無消息白雲端

當鋒更不借全機勦敵須還作者知鐵馬放閒少塞靜瞎驢千古少人騎上方盤

豐城收寶劍宇宙識人稀不入張華手焉能別是非佛心才

驚刃開時飛鐵騎電光閃處擲金鎚一城瞎却渾閒

事直至如今成是非佛性毒

寶壽開堂推出僧棒頭有眼要分明滿城人瞎誰能  
曉今古清風匝地生巖山如

提起須彌第一錘電光石火太遲遲象王行處狐蹤  
絕獅子咆哮百獸危徑山泉

麟麟車甲馬蕭蕭路上行人弓在腰四顧寥寥雲影  
斷一輪紅日正昭昭市溪森

絲綸降號令行寰中天子塞外將軍平地雷驚出蟄  
半空閃爍騰雲當軒一擊兮青山聳翠別轉鈞綸兮

匝地風生寒松操

寶壽在先寶壽爲供養主壽問父母未生前還我  
本來面目來師立至夜深下語不契翌日辭去壽  
曰汝何往師曰南方學佛法去壽曰汝且在此作  
街坊若是佛法紅塵浩浩談說一日在市中見二  
人相打一人向前打一拳曰你得恁麼無面目師  
觀之忽然大悟歸告壽深可之

昭覺勤云築著磕著當頭彰本地風光應聲應色直  
下無絲毫滲漏還會他道得恁麼無面目麼龍袖拂

開全體現 磐山修云得恁麼無面目噫錦繡葉中  
撞著白雲堆裏活埋洞見本地風光面目依然長在  
噫

南北東西是處遊更深歸去月如鉤春風一陣花狼  
藉不覺思量暗點頭枯木成

一拳打就無面目碧眼胡僧戲不足秋來黃葉落紛  
紛六六反成三十六南華謁

春色依依柳色萋桃花猶夾杏花枝欲識本來無面  
目塵中方見丈夫兒佛鑑勸

一拳拳倒黃鶴樓一趨趨翻鸚鵡洲幸有旁人爲著  
力自家端坐看揚州佛性素

汝州西院思明禪師寶壽僧問如何是伽藍師曰  
荊棘叢林曰如何是伽藍中人師曰獾兒貉子

毫髮不留縱橫自由闔外乾坤廓落大方無外優游  
明明祖師意明明百草頭禪破狐疑網截斷愛河流  
縱有回天力爭如直下休四衢道中淨裸裸放出瀉  
山水牯牛圓悟勸

西院因僧問學人有一問在和尙處時如何師曰

設有也斬爲三段僧作禮師休去會下有一僧曰  
堂頭和尚道卽太煞道未了在問話僧乃曳其僧  
上方丈曰者僧不肯和尚語師曰是上座不肯老  
僧那僧曰不曾覺事亦不曾說師乃一時喝下僧  
到法堂又曰說甚太煞道直下未了在問話僧又  
曳其僧白方丈師曰上座果不肖老僧那僧曰莫  
信者僧今日三度見伊風發師乃一總趁下  
雲巖學云西院棒頭有眼者僧見機而作檢點將來  
總被者擔板漢使得七上八下

西院在許州聞汝州南院顯出世元與同參遂特  
去相訪纔人事了曰啓和尚某甲無可人事自從  
許州來收得江西鬻刀一柄獻上和尙顯曰汝從  
許州來爲什麼却收得江西鬻刀師於顯手上拈  
一指顯曰侍者收取師以袖拂一拂便行顯曰阿  
喇喇阿喇喇

瀉山喆云西院雖收得江西鬻刀無處施呈直遇同  
參方始拈出如今還有收得者麼試呈似山僧看如  
無尋常用個什麼

南院門前信莫窺登臨無不喪全威許州收得江西  
信鍼芥和投祇自知海印信

波斯出海方投市景入南天遇大商珍重不須重勘  
驗金盤聊撥有餘光二隱謚

觀面無人境自空春風無處不融融直教一見還如  
舊敢保生同死不同幻寄庭

鎮州大悲和尚三聖然詞因僧問除上去下請師便道

師曰我開口卽錯曰與麼則真是學人師也師曰  
今日向弟子手中死

承天怡云者僧若有殷後之策爭容他大悲一番漏  
逗

廬州澄心旻德禪師先大覺詞問興化學人有一問在

和尚處時如何化於繩牀右邊拍一拍師便喝化  
又左邊拍一拍師又喝便歸衆化曰旻德較却興  
化二十棒雖然如是旻德會若是小可衲僧一棒  
也較不得

鐵機信云興化氣宇如王被旻德一拶只得冰消瓦  
解



池州魯祖山教禪師灌溪因僧問如何是雙林樹

師曰有相身中無相身曰如何是無相身師曰金香爐下鐵崑崙

仰山欽云山僧則不然如何是雙林樹秋來葉落春

到花開如何是春到花開那邊一片雲今日定下雨

有相身中無相身金香爐下鐵崑崙雙林別後無消

息滿路風塵來往人方菴顯

際上座臨濟玄下克符嗣到洛京因朱行軍設齋入堂內

顧視上下曰直下是遂行香口不住道至師前師

曰直下是箇什麼軍便喝師曰行軍幸是會佛法

人惡發作麼軍曰喚作惡發即不得師便喝軍曰

鉤在不疑之地師又喝行軍齋了請師說話閒僧

錄曰啓行軍適來爭容得者僧喝太甚無禮軍曰

若是你諸人喝下官有劍在錄曰某等一隊紫布

袋不會須是它暉長老始得軍曰若是南禪長老

也未夢見在

天童華云行軍拈出倚天長劍者僧披襟敢衝白刃

雖然兩不相傷爭奈二俱弄險 教忠光云朱行軍

旁若無人者僧攬行奪市雖然鉤在不疑之地爭奈

二俱失利且道甚處是失利喝一喝 別峰遇云盡

道行軍作家爭奈俗氣不除者劍自行還須自領何

不待云須是暉長老始得更云鉤在不疑之地且教

際上座喫齋還須吐却 弘仁教云大小行軍食程

太速被一箇紫布袋換却眼睛當時若待道下官有

劍在便喝云直下是吟管教行軍有口祇堪挂壁

宗鑑法林卷二十七

宗鑑法林卷二十八

集雲堂編

大鑒下八世

汝州風穴延沼禪師南院參南院入門不拜院曰

入門須辨主師曰端的請師分院於左膝拍一拍

師便喝院於右膝拍一拍師又喝院曰左邊一拍

且置右邊一拍作麼生師曰瞎院便拈棒師曰莫

盲枷瞎棒奪打和尚莫言不道院擲下棒曰今日

被黃面浙子鈍置一上師曰和尚大似持鉢不得  
詐道不饑院曰闍黎曾到此間麼師曰是何言歟  
院曰老僧好好借問師曰也不得放過

靈隱獄云噫也甚奇怪一箇禿塌帚一箇破糞箕搥  
搥堆頭也用得著然未免鈍置門風若據令而行總  
欠一著 南堂欲云精金躍冶正要鉗錘赤驥追風  
豈資鞭影是他南院末上太煞傷慈直到下梢分疎  
不下本覺者裏設有人問入門須辨主端的請師分  
便與連棒趁出何故當門不用栽荆棘免得人來惹  
著衣

風穴因僧問如何是清淨法身師曰金沙灘頭馬  
郎婦

金沙灘裏馬郎婦宗匠臨機發一言自笑箭穿紅日  
影孰云斫水不成痕正覺逸  
相逢盡道歸山去林下何曾見一人回首面南看北  
斗金鷄早報五更春淨山遠  
何年嫁事馬家郎鳳枕同歡碧玉牀回首畫橋離別  
苦落花流水淚千行張無盡

十分美麗誰家女百倍聰明是馬郎堪笑金沙灘畔  
約始終姻婭不成雙或菴體

風穴因僧問九夏賞勞請師言薦師曰出袖拂開  
龍洞雨泛梧波湧鉢囊華

昭覺勤云風穴用得當陽事不妨風流儒雅要且祇  
道得途中句或有問道林九夏賞勞請師言薦向道  
四絕堂邊騰瑞氣三湘江畔奪高標

風穴因僧問如何是佛師曰如何不是佛曰學人  
未曉乞師再指師曰家住海門東扶桑最先照  
法林音云射穿楊箭風穴不無好手若是和光同塵  
猶較三步

眉間一道白毫光歷劫知將甚處藏永夜寥寥天未  
曉更須斫額望扶桑保寧勇

截鐵之言貴直當回頭何止隔扶桑最憐宣德門前  
過更去從人覓汴梁祖菴銳

風穴到黃龍龍曰石角穿雲路垂條意若何師曰  
紅霞籠玉像擁幃照川原曰恁麼則相隨去也師  
曰和尚低聲

無價明珠暗處懸夜深將把木人穿誰知却被泥牛  
見吞入紅霞碧浪淵投子青

風穴因真園頭同念法華問訊次師問真如何是  
世尊不說說迦葉不聞聞真曰鴉鵲樹上曉意在  
麻舍裏師曰你作許多癡福作麼何不體究言句  
乃問念法華你作麼生念曰動容揚古路不墮悄  
然機師却顧真曰你何不看念法華下語

高峰妙云山僧昔年侍立先師次亦嘗被問此話擬  
下語間遂遭一頓熱棒打出直得三日忍痛不已大  
衆端要見二老優劣但將妙上座喫棒處看

風穴因僧問如何是道師曰五鳳樓前曰如何是  
道中人師曰問取城隍使

投子青云然指道由人行之在已問窮決悟答以提  
宗不是當人徒勞進步何故蓋向上一路千聖不遊  
擬議之間長途萬里是以龍樓迎瑞紫殿籠烟苔砌  
深闌燭香人靜正當恁麼時許人喘氣麼若喘息之  
閒長途萬里復頌

深宮禁殿隔重圍簾靜檐楹紫氣垂苔地不通朝謁

近家人指路莫遲疑

風穴因僧問如何是學人自己師曰是汝自己僧  
禮拜師便打

天寶樞云是汝自己以水澆水劈脊便棒徹骨髓  
風穴因僧問聖鹿成羣如何射得麋中主師曰釣  
船載到瀟湘岸氣咽無聊問白鷗

禁殿重闌視聽危側思偏立絳綸垂漢鄉雲夢汀洲  
迴嶺暮猿曉孤月投子青

帝遠天高罵至尊偶逢國士降絲綸詔宣率土歸皇  
化羽族銜蘆過雁門爾密液

風穴因僧問古曲無音韻如何和得齊師曰木鷄  
曉子夜芻狗吠天明

徑山杲云恁麼答話做臨濟兒孫未得在今日或有  
問徑山古曲無音韻如何和得齊祇向它道木鷄曉  
子夜芻狗吠天明 南堂欲云先行不到末後太過  
要見條理始終須是金聲玉振 磬山脩云妙喜老  
人亦未做得風穴兒孫在有人問磬山古曲無音韻  
如何和得齊祇向它道天明芻犬吠子夜木鷄曉

古巖月色鎖重雲枯木迎芳晚帶春昨夜星河隔南  
斗金烏隨鳳過天輪投子青

明暗雙雙殺活機碧油風冷絕高低霜前古調千峰  
曉月裏嫦娥帶露迷不是知音徒側耳謾聽黃鳥落  
溪西伴我侶

梅花六月吐清香三九天中柳絮狂若解無中能唱  
出方知元不在宮商淡水浴

風穴因僧問如何是學人親切處師曰須彌南畔  
齊打鼓賀蘭山前築皮毬

親切曾伸問老翁東山歌唱北山吟弄潮須是吳江  
客別語還他漢地人投子青

風穴在郢州李使君衙內陞座乃曰祖師心印狀  
似鐵牛之機去即印住住即印破祇如不去不住  
印即是不印即是還有人道得麼時有盧陂長老  
出問學人有鐵牛之機請師不搭印師曰慣釣鯨  
鯢澱巨浸却嗟蛙步驢泥沙陂佇思師喝曰長老  
何不進語陂擬議師便打一拂子曰還記得話頭  
麼試舉看陂擬開口師又打一拂子牧主曰信知

佛法與王法一般師曰見甚麼道理牧曰當斷不  
斷反招其亂師便下座

昭覺勤云風穴撰三玄戈甲施四種賓主明立信旂  
密排陣敵及至盧陂纔跨鐵牛劃時擒下遂令牧主  
知歸所謂龍驤虎驟鳳翥鸞翔雖然如是崇寧待伊  
道有鐵牛之機劈脊便棒何故殺人刀活人劍 報  
恩秀云風穴道太守見箇什麼道理者裏便好與盧  
陂雪屈 天寧琦云擊石火閃電光構得構不得未  
免喪身失命風穴壁立千仞坐斷盧陂舌頭盧陂若  
是箇人未致牧主檢責纔見他道祖師心印狀似鐵  
牛之機呵呵大笑他若擬議拍一拍便行無端請師  
不搭印倚他門戶傍他牆剛被時人喚作郎如今有  
人與風穴作主我要問他心印在什麼處 磬山修  
云決戰者不顧其首盧陂也是一員猛將政來奪令  
攙旂怎奈風穴陣勢排定教你無門可入無路可出  
自非披三玄戈甲七事隨身者孰能如是雖然當時  
不得牧主爭生收煞 博山來云風穴泥印子在手  
印住也得印破也得盧陂不搭印正是鐵牛機可惜

乾爆爆地若帶些水頭管取他泥印子爛去 平陽

恣云風穴據令牧主知歸可謂龍驤虎驟鳳翥鸞翔

旦暮一時千秋或遇祇如盧陂落節過在什麼處

大覺昇云風穴正令全行盧陂退身賣陣總讓牧主

一籌何故伯牙縱有高山調不遇知音也是閒

擒得盧陂跨鎮牛三玄戈甲米輕酬楚王城畔朝宗

水喝下曾令却倒流翠峰顯

鋒頭壁立鎮牛機十字縱橫寶劍揮一陣賊軍俱粉

碎凱歌齊和太平歸保寧勇

列聖風規初不放過擬跨鎮牛薦頭印破盧陂當斷

却沉吟電轉星飛被活擒喝下機鋒如霹靂三玄戈

甲振叢林圓悟勤

鎮牛之機印住印破透出毗盧頂額行却來化佛舌

頭坐風穴當衡盧陂負墮棒頭喝下電光石火歷歷

分明珠在盤陀起眉毛還蹉過天童量

百天紅燄石爍金流近者遠者總教焦頭不禁天風

更作處傷殘耐見徧滄洲顯聖澄

風穴上堂若立一塵家國興盛野老顰蹙不立一

塵家國喪亡野老安恬於此明得闍黎無分全是

老僧於此不明老僧却是闍黎闍黎與老僧亦能

悟却天下人亦能瞎却天下人欲識闍黎麼右邊

一拍曰者裏是欲識老僧麼左邊一拍曰者裏是

雲門偃云者裏即易那裏即難 瑯琊覺云杓卜聽

虛聲 白雲端云立即是不立即是良久云心不負

人面無慚色拍禪牀一下 五祖演舉了云太平即

不然若立一塵法堂前艸深一丈不立一塵錦上鋪

花何也不見道九九八十一窮漢受罪畢纔擬展脚

眠蚊蟲獨蚤出 天童華云大小風穴不會轉身句

靈隱嶽云大小風穴醉氣猶在 報恩秀云雲門

矢上加尖瑯琊腦後拔楔此亦一塵廢立家國興亡

也其實中心樹子何曾少動 烏石道云風穴大似

箇賣卜漢未拋卦錢時吉凶禍福盡在自身擲下卦

錢禍福吉凶盡在他人分上且道他以手左邊拍一

拍右邊拍一拍意作麼生

野老從教不展眉且圖家國立雄基謀臣猛將今何

在萬里清風獨自知 翠峰顯

風穴參南院院問近離甚處師曰南方曰南方一棒一喝如何商量師曰作奇特商量曰我者裏不然師曰未審此間如何商量曰棒下無生忍臨機不見師師便省

翠峰顯云曾有人問我對他道劈腹剜心又且如何  
復云因風吹火別是一家傷驚怨重必應有主 瀉  
山秀云江南佳景誠合如之千載觀光添人性懌倘  
或不爾來年更有新條在惱亂春風卒未休 鼓山



珪云且道是犯不犯 南華曷云風穴入林不動脚  
入水不動波眼睛裏倒卓須彌眉毛裏橫安世界畢  
竟落在甚處祇許老胡知不許老胡會 雲居元云  
且喜天下太平 西禪需舉雪竇語了云一人如三  
春和煦一人如雪上加霜雖則來機不昧縱奪可觀  
其奈未出者僧所問曾有僧問祥雲向伊道泥牛吼  
處千峰秀木馬嘶時萬木秋復云獅子嘯呻象王回  
顧三十年後和泥合水莫道見祥雲來 東林願舉  
翠峰語了云懷中天子敕塞外將軍令 天童覺云  
露髀圓陀陀直是無梭縫且道風穴無梭縫翠峰  
無梭縫還會麼和光惹事刮篤成家 天童傑云風  
穴老祖將白麪和麤穀糴了引得後來人徒向百花  
深處作道理成羣作隊外邊打之遶徑山則不然有  
問語默涉離微如何通不犯即向他道置將一問來  
中峰本云者僧問處如大浸稽天無物不在波瀾  
之內風穴固是入水不溺怎奈全身在裏許  
鷓鴣啼處百花香撫掌呵呵笑一場因憶舊年遊歷  
處送人雲隔入斜陽海印信

鷓鴣啼處百花鮮江國從來路坦然爲報途中未歸  
客謝家人不在漁船寶峰明  
彩雲影裏神仙現手把紅羅扇遮面急須著眼看仙  
人莫看仙人手中扇佛鑒觀  
忽爾出門先見路纔方下脚便登船神仙祕訣真堪  
惜父子雖親不可傳妙喜果  
風穴因僧問從上古人印印相契如何是相契底  
眼師曰輕靈道者知機變拈却招魂拭淚巾  
至鑑當軒醜莫逃一機垂示膽魂消相逢若是超宗  
略便得風流蓋世饒漢雷見  
風穴因僧問如何是佛師曰杖林山下竹筋鞭  
道峰清云道山控千里馬發穿楊箭爭奈勞而無功  
杖林山下竹筋鞭枝節蕭疎古湖邊要會宗師開正  
眼滿輪午夜照秋天海印信  
杖林山下竹筋鞭水在深溪月在天良馬不知何處  
去阿難依舊世尊前眞淨文  
杖林山下竹筋鞭拈出寒巖倚帶烟扶過斷橋曾得  
力而今不直半文錢上方益

汝州穎橋鐵胡安禪師南院頭嗣向火次因鍾司徒問

三界焚燒如何出得師以香匙撥開火鍾擬議師

召曰司徒司徒鍾有省

高聲撥火召司徒火燄炎天薰面驅祇向此間能穩

坐任教門外雪盈衢治父川

三界焚燒要出離見春來了見春歸是他不見春來

去日出東方夜落西開極雲

郢州興陽歸靜禪師西院明嗣參西院便問擬問不問

時如何院便打師良久院曰若喚作棒眉鬚墮落

師言下大悟

保福展云雖然如是你眉毛有幾莖開福寧云興

陽却有陷虎之機西院不覺投他深窞若人辨得親

佩毗盧印當陽捋虎鬚其如見解未圓棒頭有眼明

如日要識眞金火裏看

### 大鑒下九世

汝州首山省念禪師風穴沼嗣因僧問如何是佛師曰

新婦騎驢阿家牽曰未審此語甚麼句中收師曰

三玄收不得四句豈能該曰此意如何師曰天長

地久日月齊明師又因僧問新婦騎驢阿家牽意

旨如何師曰百歲翁翁失却父曰百歲翁翁豈有

父耶師曰汝會也又曰此是獨坐無尊卑從上無

### 一法與人

愚菴孟云欽深淵默漆鷄頭大將軍除壁虱光相

得云應機接物不妨迅捷未免旁觀者哂

手提巴鼻脚踏尾仰面看天聽流水天明送出路旁

邊夜靜還歸茅屋裏道吾真

新婦騎驢阿家牽王老空中駕鐵船井底挂帆風勢

惡須爛頂上浪滔天海印信

新婦騎驢阿家牽面如滿月目如蓮更將羅袖相牽

挽一段風流遍大千慈受深

新婦騎驢阿家牽體段風流得自然堪笑效顰鄰舍

女向人添醜不成妍天童覺

新婦騎驢阿家牽萬里滄溟駕鐵船參差島嶼分諸

國彷彿星河共一天南華島

阿家新婦兩同條咫尺家鄉路不遙可笑騎驢覓驢

者一生錯認馬鞍橋鼓山珪

塞驢須是阿家牽媳婦嬌癡懶著鞭在舍祇知七十  
士出門方見化三千簡堂機

有響無聲沒奈何陽關三疊爲君歌男兒一去不回

顧冷落柔腸烟雨多三峰藏

紫羅抹額繡裙腰涉水登山語笑高未盡平生剛半

面擬將綢繆隔迢遙天章玉

天子刈荒艸林花發火藻江山舊主人覲面誰知道

緒希續

首山因僧問如何是佛法大意師曰楚王城畔汝

水東流

楚王城畔水東流逐浪隨波早晚休誰謂謝郎生計

在夜深明月上孤舟佛慧泉

楚王城畔水東流樹倒藤枯笑不休好是自從投子

去更無人解道油油眞淨文

千波萬浪曾無盡去槳來帆浩莫窮謝客睡醒孤月

白閒吹一笛渡頭風普融平

楚王城畔水東流獨脚山船踢氣毬貪著六么花十

八斷頭船子下揚州瞎堂遠

首山因僧問如何是祖師西來意師曰風吹日炙

日炙風吹不計年行人塵路辨應難撥心早已深三

尺更教誰問箇中立洞山聰

日炙風吹問祖來紅塵互野眼難擡忙忙役役知多

少二月春深動地雷翠巖真

日炙風吹也大奇根槍正馬將家兒皇圖自古元無

事撥動烟塵更是誰三祖宗

日炙風吹當路頭被僧見後莫遲留我今到此堪憫

悵葉落花紅經幾秋雲溪恭

首山拈竹筴示衆曰汝諸人若喚作竹筴則觸不

喚作竹筴則背且道畢竟喚作什麼速道速道時

葉縣省在會下乃近前掣得折作兩截拋向階前

却曰是什麼師曰瞎省於言下大悟

廣慧璉云省瞎驢悟則太煞悟要且未盡先師意旨

天寧琦云廣慧怎麼道先師實有意旨那將一把

火照看面皮厚多少下坡不走快便難逢若是向上

提持還我竹筴子師兄始得雲居莊云脫體風流

須是首山當機抗敵還他棄縣一向與麼去臨濟佛

法掃土而盡 甌峰承云我王庫內無如是刀 明

招補云我當時若在待道汝諸人喚作什麼但噓兩  
噓管取首山者漢瓦解冰消

竹筴舉起成生殺豈更容人亂扎錐劈脊一揮如薦  
得銀山鐵壁也光輝照堂一

背觸非遮護明明爲舉揚吹毛元不動偏地是刀槍  
徑山杲

罵他還自罵瞋他還自瞋戒之慎之出乎爾者返乎  
爾者也菴顏

辨龍蛇眼定乾坤粲粲一天星斗分拈起竹筴言背  
觸明明刺腦入膠盆笑翁堪

離中虛坎中滿兌上缺巽下斷是甚麼章句忠清里  
巷馬回子諸人還會麼休休三十六條花柳巷向來  
曾不禁人遊雪嶠信

觸背二途俱不得言前有路最條直馬無千里謾追  
風鶴有九臯難翥翼且翥翼好事也要大家識復把  
住云道道梅谷悅

可是鐵輪天子裏中旨又道帝釋宮中放赦書人言

端陽符一道呢喃滿口誦消除袪僧面前用不得尺

固可量丈難測爲我寄語當年念法華冤哉將謂撥  
龍蛇無可智

吹倦林風冷次園百年釣月斷香魂不因栗冽衣裳  
薄誰見微茫烟水痕雪僧嗣

首山示衆諸上座不得盲喝亂喝尋常向你道賓  
則始終賓主則始終主賓無二賓主無二主若有  
二賓二主兩箇卽成瞎漢所以道我若立你須坐  
我若坐你須立坐則同你坐立則共你立雖然如  
是急著眼始得

賓主有無俱遣外行藏須要出常情無棲泊處開門  
戶月到中霄不敢明盧堂愚

七里村王大嫂東話西話自起自倒說到傷心欲斷  
腸滿地殘紅還自掃融會理

失同得言若嘿歷歷一天星斗弋良主佳賓兩無私  
一賤一貴誰辨惑鐵容玄

首山因僧問如何是學人用心處師曰怪你一問  
遲也

未語難明迷悟情發言方表赤心人祇貪進步求名

玉爭信靈苗不受春投子青

首山因僧問如何是學人親切處師曰五九盡日

又逢春日畢竟如何師曰冬到寒食一百五

日暮陰雲郊野深重陽到後菊花新不因西嶠殘冰

盡爭得東山一帶春投子青

師曠雖聰失正音高山流水總無人穿雲白髮離巖

岫半夜烏鷄喪比鄰伴我侶

首山因僧問如何是菩提路師曰襄縣五里曰向

上事若何師曰來往不易

問路窮途擬進程綠楊鶯語送行人牌標五里向君

說莫道當年不指陳投子青

首山舉古第一句薦得堪與佛祖爲師第二句薦

得堪與人天爲師第三句薦得自救不了有僧問

和尚是第幾句薦得師曰月落三更穿市過

佛祖髑髏穿一串宮漏沉沉密傳箭人天機要發千

鈞雲陣輝輝急飛電箇中人看轉變遇賤則貴貴則

賤得珠罔象兮至道綿綿遊刃亡牛兮赤心片片天

童覺

雨過春山翠欲浮佳人乘輿上瓊樓無端三弄關情

笛鐵鑄心肝亦淚流山容波

首山示衆咄哉巧女兒揷梭不解織貪看鬪鷄人

水牛也不識又曰咄哉拙郎君巧妙無人識打破

鳳林關著靴水上立

此菴元云總有來處拈拄杖云上大人丘乙巳化三

千七十七士 月江印云二人同心其義斷金

汝州廣慧真禪師風穴風穴問會昌沙汰時護法

善神向什麼處去師曰常在閭闔中要且無人見

穴曰汝徹也

徑山杲云汝道風穴自徹也未

東街東巷風流子南陌南溪抱瓮郎日出同來花底

坐一般眉目有精光頻吉祥

長沙府靈泉院禪師風穴因僧問先師道金沙灘

頭馬郎婦意旨如何師曰上東門外人無數曰便

恁麼會時如何師曰天津橋上往來多

胡笳曲子樓頭唱白雪琵琶月下彈音律幾多人共

聽靜看花影在闌干顯吉祥

宗鑑法林卷二十八

宗鑑法林卷二十九

集雲堂 編

大鑒下十世

汾州太子院善昭禪師首山僧問如何是祖師西

來意師曰青絹扇子足風涼

中峰本云拈得便用道出平當山高水闊地久天長  
青絹扇子足風涼是拈得便用耶道出常情耶誰人  
知此意令我憶汾陽

祖意宗師先漏泄團團青扇足風涼禪人未曉重相  
問獨自淒淒過洛陽佛鑒勸

青絹扇子足風涼日用何曾有覆藏堪笑塵中無限  
客手遮西日汗如湯慈受深

親得搖來始息狂風動荷花滿座香自從一得真歸  
趣無意涼人人自涼楚方安

呷酢皺陳留波斯鼻孔長得些滋味子婆是阿爺孃  
肯堂充

汾陽示衆夫學般若菩薩當參活句莫參死句

平陽恣云有般漢商量道有趣味是死句無意味是  
活句似則固似爭奈波斯吒心肝不在樹頭上此去  
彌勒下生時尙隔五十六億七千萬歲在然則畢竟  
作麼生是活句靠拄杖云強中強吉中吉波羅會上  
有殊利當門不用栽荆棘急力敕明州城內近來少  
賊顧侍者云有人守方丈麼云有自云今秋防失脫

汾陽示衆識得拄杖子行脚事畢

雲峰悅拈拄杖云者個豈不是拄杖那個是你行脚  
事復云柳栗橫擔不顧人直入千峰萬峰去 瀉山  
詰拈拄杖云者個是拄杖那個是行脚事直饒向者  
裏薦得於衲僧門下祇是脫白沙彌若也不識且向  
三家村裏東卜西卜忽然卜著也不定 泐潭澄云  
識得拄杖子入地獄如箭射 靈隱岳云汾陽雖則  
開口見膽未免落在第二頭薦拈拄杖云者個不得  
喚作拄杖子漆桶參 妙峰善云識得拄杖子行脚



事畢錯識得拄杖子入地獄如箭錯老僧則不然識得拄杖子錯復云妙峰三個錯不是無病藥籠公賣筌箇清平道木杓徑山琇拈拄杖云者個喚作拄杖子早是頭上安頭那堪更云識得行脚事畢大小汾陽話作兩橛伏龍長云識得拄杖子更買艸鞵行脚三十年雲居莊云汾陽一條拄杖換却天下人眼晴

驀地平空立話端揭天聲撼怒濤寒直饒識得拄杖子也是封皮作信看笑翁堪

汗漫學屠龍人言枉費工自非親到者誰與論窮通  
虛堂愚

汾陽示衆拈拄杖曰三世諸佛在者裏爲汝諸人無孔竅遂走向山僧拄杖裏去強生節目

淨因成云汾陽老人大似擔雪填井旁若無人山僧今日爲汝諸人出氣拈拄杖云三世諸佛不敢強生節目却向山僧拄杖裏走出向諸人道我不敢輕於汝等汝等皆當作佛平陽恣云呼來遣去許他二老死蛇活弄雖然如是向上一竅未會動著山僧今

水面疑西

日爲諸人拈掇去也拈起拄杖云識得者個三世諸佛被諸人穿却鼻孔若也未識諸人鼻孔被三世諸佛穿却擲下拄杖云是什麼

汾陽示衆夫說法者須具十智同真若不具十智同真邪正不辨縑素不分不能與人天爲眼目決斷是非如鳥飛空而折翼如箭射的而斷弦弦斷故射的不中翼折故空不可飛弦壯翼牢空的俱徹作麼生是十智同真與諸上座點出一同一實二同大事三總同參四同真智五同徧普六同具足七同得失八同生殺九同音哢十同得入又曰與甚麼人同得入與阿誰同音哢作麼生是同生殺甚麼物同得失阿那箇同具足是甚麼同徧普何人同真智孰能總同參那箇同大事何物同一實有點得出者不吝慈悲點不出者未有參學眼在切須辨取要識是非面目現在

徑山杲云汾陽末後若無個面目現在一場敗闕雖然如是喪我兒孫喝一喝復頌

兎角龜毛眼裏栽鐵山當面勢崔嵬東面南北無門

入曠劫無明當下灰

十智同真面目全於中一智是根源若人要識汾陽

老劈破三玄作兩邊洪覺範

十年湖海覓冤讐不得冤讐未肯休芍藥花開菩薩

面搜欄葉長夜叉頭鼓山珪

畫得真如活花間試展開黃鶯偷眼覷不敢下枝來

正堂辨

陽春白雪人難和藻鑑冰壺豈易觀一把柳絲收不

得和烟搭在玉闌干或菴體

碧玉粧成一樹高條條垂下綠絲條不知細葉誰裁

出二月春風似箭刀平陽恣

汾陽因僧問如何是接初機句師曰汝是行脚僧

曰如何是辨衲僧句師曰西方日出卯曰如何是

正令行句師曰千里特來呈舊面曰如何是立乾

坤句師曰北俱盧洲長杭米食者無瞋亦無喜又

曰祇將此四轉語驗天下衲僧纔見汝出來驗得

了也

翠巖芝云先師將此四句語驗天下衲僧仔細思量

却被天下衲僧一時勘破

汾陽參首山問百丈卷席意旨如何山曰龍袖拂

開全體現師曰師意如何山曰象王行處絕狐踪

於言下大悟拜起曰萬古碧潭空界月再三撈攬

始應知

保寧茂云大小首山龍頭蛇尾有底便道真不掩偽

曲不藏直拍禪牀云毗婆尸佛早留心直至如今不

得妙

卷席機鋒問若何拂開龍袖象王過分明有月潭中

取放倒旂槍唱哩囉占南門

諸方踴躍氣吞牛萬仞龍門噉直鉤翻轉碧潭身命

放波濤平地起汾州晦山顯

多年蠱毒實難堪一語相投墮影寒梅萼相傳孤韻

遠夜和鐘韻出林端自餘弘

漢州葉縣廣教院歸省禪師首山問僧曰暮投林

朝離何處曰新戒不曾學禪師曰生身入地獄下

去

智門寬代僧云鑰匙在和尙手裏 洞山聰云者僧

言中有響許你是個作家怎奈有前無後當時若是個俊俏衲僧待道生身入地獄何不向道却煩和尚引導

葉縣因僧問諸餘郎不問如何是今日施設師曰  
有你者瞎驢在曰與麼則打鼓弄琵琶師曰捺胃放屁聲

雲峰悅云然則一期以勢欺人其奈事不孤起葉縣老人失却一隻眼檢點得出雲峰分半院與你檢點不出良久云橫按鑊鐙全正令太平寰宇斬癡頭

葉縣因僧問如何是學人密用心處師曰鬧市輓毬子曰意旨如何師曰普請衆人看

輓毬鬧市衆人看一陣清風吹面寒定亂不須雙刃劍活人何必九還丹即菴覺

葉縣上堂廣教有驗人關截人機活人句還有人道得麼若道不得孤負平生

呆菴莊云雲居也無驗人關也無截人幾也無活人句還有道得者麼若道不得孤負山僧且道古人底是老僧底是

葉縣因僧問柏樹子話師曰我不辭與汝說汝還信麼曰和尚重言爭敢不信師曰汝還聞簷頭雨滴聲麼僧失聲曰哪師曰汝見甚麼道理僧頌曰  
簷頭雨滴分明歷歷打破乾坤當下心息

庭前柏樹子簷頭雨滴聲風來荷折柄千古意分明

□□□

潭洲神鼎洪謐禪師首山念嗣因僧問撥塵見佛時如

何師曰佛亦是塵

元菴慈因已菴舉問慈隨聲便喝以手撥胸云佛亦是塵用彰俊云好語只是未徹當你道者僧三身中問那一身若是法身神鼎不應答佛亦是塵若是報化身者僧何必問撥塵見佛檢點將來直是好笑今日忽有問龍峰撥塵見佛時如何只對他道待汝撥得塵盡許汝見如斯剖判還徹當否久參上士試

辯看

撥塵見佛佛亦是塵問了答了直下翻身勸君更盡

一盃酒西出陽關無故人元菴慈

襄州谷隱山石門蘊聰禪師首山念嗣上堂十五日已

前諸佛生十五日已後諸佛滅十五日已前諸佛  
生你不得離我者裏若離我者裏我有鉤子鉤你  
十五日以後諸佛滅你不得住我者裏若住我者  
裏我有錐子錐你且道正當十五日用鉤即是用  
錐即是正當十五日鉤錐一時息更擬問如何回  
頭日又出

昭覺勤云放行處把住把住處放行雖是爲人鉗錘  
爭奈傷風犯手若是崇寧則不然十五日已前不得  
住我者裏若住我者裏我放火燒你十五日已後你  
不得離我者裏你若離我者裏我放火燒你正當十  
五日化爲萬斛明珠撒在大千沙界處處盡放光明  
各各急著眼看 徑山杲云恢張三玄三要扶豎臨  
濟正宗須是恁麼人始得雖然如是雲門即不然十  
五日已前諸佛本不曾生十五日已後諸佛本不曾  
滅十五日已前你若離我者裏我也不用鉤鉤你一  
任橫擔拄杖緊捎草屨十五日已後你若住我者裏  
我也不用錐錐你一任拗折拄杖高挂盂囊正當十  
五日合作麼生十五日前後鉤錐徒爾爲今朝十五

日正好用鉤錐作麼生用路逢死蛇莫打殺無底籃  
兒盛將歸 天寧琦云用盡自己心笑破他人口

報恩秀云妙喜向石門放行處把定把定處放行終  
是撞頭磕額賴有末後句與天童同參且道同參底  
事作麼生石女夜裁無縫錦死蛇多出放生籃 伏

龍長云二大老把手上高山怎奈旁觀者哂且道無  
明有甚長處十五日已前諸佛生以不生生爲生十  
五日已後諸佛滅以不滅滅爲滅十五日已前你若  
住我者裏我却用錐錐你直須屍橫萬里血濺梵天  
十五日已後你若離我者裏我却用鉤鉤你直須眉  
毛撕結鼻孔相拄十五日前後鉤錐常在手正當十  
五日大家要知有一任面南看北斗艸木叢林獅子  
吒

谷隱因僧問日往月來遷不覺年衰老還有不老  
者麼師曰有曰如何是不老者師曰虬龍筋力高  
聲叫晚後精靈轉更多

洞裏無雲別有天桃花如錦柳如烟仙家不會論冬  
夏石爛松枯是一年無量壽

谷隱入州看官路逢延慶長老問中路相逢一句作麼生道師曰某甲禮拜和尚有分明日到院茶話次慶曰昨日聞學士說新石門和尚和尚久在石門爲什麼却新去師曰腦後合掌

天寧琦云石門道某甲禮拜和尚有分延慶著賊也不知要識石門麼李靖三兄久經行陣雖然如是未免倚勢欺人

谷隱因僧問一陽纔起天地咸知依時及節事如何師曰午夜燈光連夕照日照後如何師曰茶烟香篆一時清

平陽恣云有問一陽纔起天地咸知依時及節事如何但向道長至來朝賀昏鐘此夜參參後如何大衆歸單打坐兩序寢堂茶湯 廣教玉云有問依時及節事如何便棒更問如何若何連棒趁出倘或是個衲僧必有轉身一路

谷隱因僧問如何是道師曰臘月三十日

臘月三十日開口便爲敕更擬問如何明朝正月一

無準範

臘月三十日真個好消息戴帽空山行穿靴水上立雲納慶

谷隱因僧問一處火發任從你救八方齊發時如何師曰快僧曰還求出也無師曰若求出即燒殺你僧禮拜師曰直饒你不求出也燒殺你

仁王教云我不似谷隱纏織八方火發時如何合掌云諸行無常是生滅法生滅滅已寂滅爲樂

谷隱因僧問如何是夜半正明天曉不露師曰牡

丹花下睡貓兒

廣胤標云花明無月夜聲急正秋天今人動輒以理事功位會他家裏事却似捧土培泰山掬水沃東海直是未在且畢竟如何卽是竿頭絲線從君弄不犯清波意自殊

照盡體無依功終位亦忘渾然理不昧卓卓事寧彰烟月那知人世改春風依舊上長楊平陽恣

牡丹花下睡貓兒石女淺花夜半窺絕國風流渾不艷倒拈禿帚畫蛾眉遠菴體

汝州廣慧元璉禪師首山念嗣參首山問學人親到寶

山空手回時如何山曰家家門前火把子師曰某甲從今不疑天下老和尚舌頭也山曰汝會處作麼與我說來看師曰祇是地上水礪砂山曰汝會也師便禮拜

徑山杲云你道首山還肯他廣慧也無若道肯他何故不與一棒若道不肯他何故不與一棒有人於此道得妙喜與他一棒

家家門前火把子今古分明須記取五更鐘後聽鷄鳴失曉朝官不戴帽石門聰

門前火把寶山回玄學之徒遍九垓南海岸頭波浪起西番氍帽樣時裁翠巖真

空手歸時誰肯信驢駝馬載入門來家家舉起火把子半夜天如白日開白雲端

寶山到日事如何空手回時所得多家家門前火把子明如日月照山河佛鑑觀

家家門前火把子散作天涯照夜燈耐耐連宵風雨急幾多吹滅暗中行越鑑微

廣慧初到首山山問近離甚處師曰漢上山豎拳

曰漢上還有者箇麼師曰者箇是甚麼盪鳴聲山曰瞎師曰恰是拍一拍便出

十里秋江駕葉舟蘆花深處得優遊絲綸舒卷乘風慣蝦蟇金鱗一釣收淵菴怡

天際無雲燕子飛臨池剪水自離披雖然翠羽無涓滴未免旁觀顰斷眉粟庵鼎

并州承天三交智嵩禪師首山念嗣示衆第一單槍甲

馬第二甲馬單槍第三捺星排陣第四衣錦還鄉僧問如何是單槍甲馬師曰不是金牙作怎能射尉遲曰如何是甲馬單槍師曰金鏃馬前落婁樊喪膽魂曰如何是捺星排陣師曰陣雲橫海上未辨聖明君曰如何是衣錦還鄉師曰四海無消息回奉聖明君

天寧琦云三交幸是太平時節何得干戈相待報恩今日也不用甲馬單槍也不用單槍甲馬也不用撮星排陣也不用衣錦還鄉寒來向火熱則乘涼撒手到家人不識了無一物獻尊堂大覺昇云三交雖有圖王定霸之謀不免爲太平奸賊大覺無者許多



般去就却能坐致太平乃豎拂子云會麼吾寧鬪智  
不鬪力一紙賢於十萬師

三交問僧你是迦葉門前客祇園會裏人僧曰今  
日特來禮拜和尚師曰泊合不問閣黎僧便喝師  
曰錯僧又喝師曰放你三十棒曰許和尚具一隻  
眼師曰喫棒了呈款

永寧鼎云若要約法三章二俱好與二十因甚如此  
重賞之下復頌

遶株利鏃難迴避就地橫眠喪膽魂瞪得眼時皮骨  
綻華冠撲落可憐生

三交與李駙馬楊內翰問答次李曰彌陀演化於  
西方達磨傳心於東土胡來漢現水到渠成五嶽  
鎮靜以崢嶸百谷朝宗而浩渺一靈之性託境現  
形三有之中憑誰立命師曰仙人無婦石女無夫  
楊曰尼鬢頭不復生子師曰陝府鐵牛能哮吒嘉  
州大象念摩訶李曰側跳上山巔師曰騎牛不著  
靴

元叟端云大小唐明牆壘不堅局鏑不固致令他俗

人有入室操戈之舉是你諸人且作麼生會擊拂子  
云白鷺下田千點雪黃鸝上樹一枝花

三交問僧甚處來曰潞府師曰潞府米作麼價曰  
和尚試道看師曰不解作客勞煩主人庫下喫茶  
去

承天怡云三交祇知者僧不解作客不知自己亦不  
會為主庫下喫茶雖則隨家豐儉爭奈恭而無禮

### 大鑒下十一世

潭州石霜慈明楚圓禪師汾陽昭嗣參汾陽經二年一

日訴曰自至法席不蒙指示但念歲月飄忽已事  
未明失出家利語未卒陽熟視罵曰是惡知識敢  
稱販我怒舉杖逐之師擬伸救陽掩師口師乃大  
悟曰是知臨濟道出尋常

曉菴昱云驅耕夫牛奪饑人食從上宗門爪牙還他  
汾陽好手然而鵠王擇乳素非鴨類不是其人大難  
承當薰擲拄杖云達磨大師無當門齒

尋常舟楫利旋回剗地颶風黑雨雷崖石浪奔船破  
盡惡龍領下得珠來漢月藏

萬鈞勁弩藏深毒，驟殺英雄暗地驚。捱到角尖機迅，  
發西河惡浪過崩崖。晦山顯

迅雷一發衆皆驚，且喜英靈拶入深掩口。勒回千里，  
驥方知有道出常情。密傳錄

慈明謁神鼎，鑿髮長不剪，敝衣楚音通。謁稱法姪，  
一衆大笑。鼎遣童子問長老誰之嗣。師仰視屋曰：  
親見汾陽來鼎杖而出，顧見頎然問曰：汾州有西  
河師子，是否？師指其後絕叫曰：屋倒矣。童子返走。  
鼎回顧相饗，鑿師地坐脫隻履而視之。鼎老忘所  
問，又失師所在。師徐起整衣且行且語曰：見面不  
如聞名，遂去。鼎歎曰：汾州乃有此兒耶！

屋倒陳轅未足奇，聞名見面有斯兒。縱然師子能翻，  
躑躅莫道文殊老不知。三峰藏

掣電之機更撒沙，回頭霧鎖眼迷曆。雖然得箇便宜，  
了未免遭它腦後叉。德菴心

慈明因僧問：如何是佛？師曰：水出高原，復自頌曰：  
水出高原也大奇，禪人不會眼曆。瞋若也未明，泥  
水勾鐙籠露柱笑嘻嘻。

衝斷雲根迸石來，冷冷千古下崔嵬。未明的的朝宗，  
意聽取春深動地雷。潯山秀

高原水出曉晴天，對答臨機豈偶然。衲子不知流落  
處，一尋寒木破溪烟。地藏恩

穿雲迸石不辭勞，大抵還他出處高。溪澗豈能留得  
住，終歸大海作波濤。雪巖欽

水出高原浪拍天，四維上下絕塵烟。分明好個真消  
息，未必時人到那邊。高峰妙

慈明室中插劍一口，以一繡艸鞵水一盆置劍邊。  
每見入室卽曰：看看僧擬議。師曰：喪身失命了也。  
便喝出。

天童華云：我當時若見便去，左耳邊低聲下一轉語，  
待他貪觀天上，却與一指擬議，拔劍便斬，驚拈拄杖，  
下座一時打散。高峰妙云：大小慈明勞而無功，西  
峰不動一槍一旗，從教覓短鶴，長何故？年年九月九，  
遍地菊花香。棲霞成云：慈明如漢高之歌，大風相  
似，若寢食不能一日去，諸懷也豈其終身以干戈待  
天下乎？何恐懼如此！

暑往寒來春復秋夕陽西去水東流將軍戰馬今何在  
野艸閒花滿地愁唐 韋

家山指出路非遙萬仞嵯峨插碧霄一片白雲橫谷

口幾多歸鳥盡迷巢水庵一

百花叢裏躍鞭過俊逸風流有許多未第儒生偷眼

覩滿懷無奈舊愁何斷橋倫

儘堪歌又不堪歌莖艸金身沒奈何博地凡夫誠薄

福徒勞四面與張羅聖可王

尋常說話懶開口祇使家童左右走不是藍田射虎

客相逢誰不遭毒手寒松操

彈指相逢已二三鋒銳纔露更何堪於今四海平如

砥不動鍼車爲指南御之龍

慈明到芝和尚寮中芝坐間開盒子取香在手欲

燒次師問曰作麼生燒芝便放爐中師曰斲郎當

漢又恁麼去也

千人萬人行一路幾個移身不移步對面拈香爐上

燒斲郎當漢又恁去白雲端

慈明問眞點曾如何是佛法大意眞曰無雲生嶺

上有月落波心師呵之曰頭白齒黃作者般見解  
眞却問如何是佛法大意師曰無雲生嶺上有月  
落波心眞大悟

中峰本云驅耕夫牛奪饑人食慈明老人未爲好手  
眞點胸雖則向者裏懸巖撒手絕後再甦若要知佛  
法大意更參三十年始得 翠巖詰云慈明用向上  
鉗錘敲出鳳凰五色髓眞老於言下吐氣撲碎驪龍  
明月珠雖則師資妙叶啐啄同時揀點將來未免喫  
翠巖手中棒何故無雲生嶺上有月落波心  
華陽春樹號新豐行入新都若舊宮柳色未饒秦地  
綠花光不減上陽紅鏡容玄

慈明因僧問如何是古德家風師曰銀蟾初出海  
何處不分明

銀蟾出海照無私處處分明是阿誰見面不須重問  
訊從教日炙與風吹高峰妙

古巖無路艸離離拾得寒山總不知竟日孤行行不  
到寒猿祇聽叫嶽巖古巖亮

慈明冬日榜僧堂作此字三三三三三三三三三三

注曰若人識得不離四威儀中首座見曰和尚今日放參師聞而笑

龍翔訢云衆中盡作奇特商量其奈傍觀者晒龍翔則不然慈明如蟲喫木首座偶爾或文墨寄來處無涓滴流出黃河九曲渾芙蓉覺云大小慈明向威音已前拈出個膠盆子首座隨邪逐惡便向他機境上點模畫樣山僧當日若在直向道州本不勞拈出神鼎體云一人肘後符靈一人頂門眼正檢點將來各有差池天童今晚不可空過拈拄杖空中打問相云若有人跳得出來朝與他一腰玉泉布襯選佛堂前光燄燄分明一柄道士劍果然堂頭放晚參首座之言有神見野雲南

我從南方來路逢一池水水內一條龍九頭十八尾不喫凡間食專喫瘧疾鬼三峰藏

梵語唐言一片成僧絲描選費精神人間翻譯何相似五色雲中捧玉麟天章玉

二八嬌娥巧畫眉茜分香翠試羅衣錦絲綰就同心結祇許檀郎獨自知芥隱現

萬家酒滑久絕障百凡舉止恰相應自從鑽破君平卦龜殼於今更不靈雪庵如

慈明因僧問如何是不動尊師曰提不起

不動尊提不起茫茫宇宙誰能委秋江清夜月澄鮮鸞鷺飛入蘆花裏高舉妙

慈明因僧問行脚不逢人時如何師曰釣絲絞水涼到慈明爲指迷釣絲絞水出羣機時人貪看蘆花白不見沙鷗隔岸飛石田熏

慈明因僧問關中取靜時如何師曰頭枕布袋

蝦恩秀云山僧若在管教先南源不祇恁麼休去何不進云和尚莫世諦流布且道先南源又且如何

枕袋安眠得自由任他人物鬧嗷嗷羶衣羶食猶無念誰管扶桑出日頭海印信

慈明問楊岐馬祖見讓師便悟去且道迷却在什麼處岐曰要悟卽易要迷卽難

神鼎揆云者個陷人坑子天下不奈何致使祖禪不了殃及兒孫楊岐雖善機宜未免爛泥有刺神鼎則不然迷却在甚麼處但云迷卽且置把將悟底來看

饒慈明具廣長舌祇好道一半

要悟卽易要迷卽難絲毫透不盡咫尺隔千山說食終不飽著衣方免寒憶昔五臺曾有語前三三與後

三三圖悟動

衲僧悟易要迷難無限漁翁失釣竿點鐵成金猶自

可點金成鐵大無端別峰甲

艸堂春暖日初紅堂上辛勤睡正濃夢裏一聲天地

老殘花又逐五更風夫山儲

悟却易迷却難眨上眉毛君自看迷悟兩頭俱坐斷

月移花影上欄杆神鼎揆

慈明因李駙馬問我聞西河有金毛獅子是否師

曰駙馬甚處得者消息來李喝一喝師曰野干鳴

李又喝師曰獅子哂

逆風吹又順風吹鐵眼銅睛孰敢窺萬古碧潭空界

月再三撈攬始應知高峰妙

慈明問顯英上座近離甚處曰金鸞師曰夏在甚

處曰金鸞師曰去夏在甚處曰金鸞師曰前夏在

甚處曰金鸞師曰先前夏在甚處曰何不領話

師曰我也不能勸得你教車下奴子勸你且點一

盞茶與你澄茶

愚庵孟云石霜不奈者擔板漢何祇得打個懸空筋

斗何不與渠本分料趕出山門免教渠一世向金

鸞坐著

焦贛打著連底凍赤眼撞著火柴頭將軍但有嘉聲

在何必榮封萬戶侯石田黑

問窮類應四金鑿誰會三玄見不堪須點一甌茶澄

口致無言處到平安幻有傳

硬似綿團軟猶鐵撇曲之不彎拗之不折虛玄不犯

龍得水而興波左右逢源虎插翼而出穴笑作悲巧

如拙話盡雲山無限情依然露出珊瑚月百愚斯

慈明頌黑黑黑道道道明明明得得得

八十翁翁著繡鞋踉蹌開幽洞笑呵呵旁人指點忘歸

路不覺腰間爛斧柯無庵全

慈明因僧問如何是佛法大意師曰一畝之地三

蛇九鼠

一畝之地三蛇九鼠物是定價錢是足數印空叟

慈明示衆一切聖賢皆以無爲法而有差別前是案山後是主山那箇是無爲法良久曰向下文長付在來日

天童華云天童也著一隻眼一切聖賢皆以無爲法而有差別東弗于逮西瞿耶尼南閻浮提北鬱單越到處去來不如此平陽恣云山僧也著一隻眼一切聖賢皆以無爲法而有差別翻身趨倒劍門關大地山河無寸地廣教玉云慈明應庵二大老若有轉身處佛法到今日不致掃地廣教別資一路一切聖賢皆以無爲法而有差別蓋子撲落地碟子成七片相罵饒你接業相唾饒你潑水還會麼擊拂子云大海若知足百川應倒流

慈明與永首座同辭汾陽後相從二十年終不脫漚一夕圍爐夜深師以火箸敲炭曰永首座永咄曰野狐精師以手指曰耐郎當漢又恁麼去也永言下頓悟

高峰妙云慈明無端坑陷平人合喫三十棒永首座不合隨風倒柁亦當代喫十棒或有抱不平底出來

道西峰吟祇向道心不負人面無慚色 龍池微云永公雖然悟去却被火爐勘破慈明雖有起死回生手段要且不出野狐見解好與一坑埋却

相呼相喚已多年此夜相呼出偶然肝膽平生傾盡處一天明月落前川衆如讚

慈明因僧問一得永得時如何師曰抱石投河

神鼎揆云者僧向太虛空裏覓得個繫驢橛向洪波浩渺中沒頭浸却殊不知金屑雖貴落眼成翳饒他出得頭來除非鐵船上浮 天寧弘云慈明雖有起生回死底手段大似棺材瞪眼復頭

把定函關過楚營將軍一鏃破重城而今四海清如洗萬里歌謠賀太平

宗鑑法林卷二十九



大鑒下十一世

涿州瑯琊山慧覺禪師

汾陽昭嗣

上堂拈拄杖曰盤山

道向上一路滑南院道壁立千仞險臨濟道石火

電光鍾瑯琊有定乾坤底句各各高著眼卓拄杖

下座

白巖符云三大老被瑯琊各與一杓惡水潑了也更

道我看定乾坤句祇如他卓拄杖下座是定乾坤句

不是定乾坤句良久云杓惡水却是瑯琊自潑了

也 元一融云瑯琊與麼拈提將謂出他三老一頭

地未免起模畫樣好與三老一狀領過屏山有定乾

坤句便下座

瑯琊上堂汝等諸人在我者裏過夏與你點出五

般病一不得向萬里無寸艸處去二不得孤峰獨

宿三不得張弓架箭四不得物外安身五不得滯

於生殺何故一處有滯自救難爲五處若通万名

導師汝等諸人若到諸方遇明眼作者與我通箇

消息責得盡且一隊人是前徒即便寢息何故裸

形圖裏誇服飾者太煞不知時

曲蟻頭頭撒唾子得夢自家笑笑到天明說向

誰爲鴛鴦作麒麟叫正堂解

瑯琊指出一般病舉世良醫發藥難直下爲君俱擊

碎延齡何必九還丹少室壁

瑯琊因長水法師問清淨本然云何忽生山河大

地師厲聲曰清淨本然云何忽生山河大地

薦福信云先行不到末後太過 五祖演云金屑雖

貴落眼成翳 靈隱巖云日長夜短諸人還猛省麼

理安問云瑯琊祇知轉身句不識出身句

混混玲瓏無背面拈起有時成兩片且從依舊欲相

當免被旁人來覬見白雲端

常聞下足體全彰進步剛然要論量妍醜祇因逢古

鏡回頭面負慚惶天洪遂

青天復青天打失髑髏前看看日又夜爭教人少年

靈想云

不設陷穿不揮雪刃一箭穿楊神目不瞬翻思昔日

李將軍射虎之機猶是鈍處堂愚

嬰兒爲食苦飄零陌路逢親喚一聲知得阿懷腸斷  
處從教鐵漢淚如傾紫柏可

瑯琊示衆與麼來者上闍安排不與麼來者下間  
挂搭向上人來獨自淒淒暗渡江

國清燈云買帽相頭看孔著楔瑯琊固是作家未免  
有分別在國清則不然今歲未留門外客上下何妨  
安分居

瑯琊示衆進前即死退後即亡不進不退落在無  
事之鄉何故如此長安雖樂不是久居

徑山杲云啼得血流無用處不如緘口過殘春

瑯琊因僧問拈椎豎拂即不問瞋目揚眉事若何  
師曰趙州曾見南泉來曰學人未曉師曰今冬多  
雨雪貧家怎奈何

寶壽方云瑯琊與麼答話可謂寶藏大開怎奈不遇  
高鑑功成浪施雖然不因夜來鴈爭見海門秋

瑯琊示衆記得僧問老宿如何是佛宿曰不封不  
樹大衆會麼若不會重下注脚去也不封不樹以

棘欒

不封不樹廁以棘欒乾天爲蓋厚地爲盤聚斂兮魂  
魄賢愚兮一棺曰炙風吹無障開千古萬古長漫漫

平陽志

瑞州大愚守芝禪師汾陽示衆三世諸佛不知有

狸奴白牯却知有乃拈起拂子曰狸奴白牯總在  
者裏放光動地何謂如此兩段不同

徑山杲云大愚若無後語泊合被狸奴白牯換却眼  
睛雖然如此也未免秤錘蘸酢 愚菴孟云大愚拈

箇狸奴白牯還曾夢見麼

大愚因僧問通身是眼口在什麼處師曰三跳曰  
不會師曰章底詞秋罷歌韻向春生

愚菴孟云大愚果有懸河之辯怎奈者僧無眼

大愚示衆大家相聚喫莖蓋若喚作一莖齋入地  
獄如箭射

應菴華云好語要且無來處有人辨得出與你一兩  
金 古鼎銘云宗師爲人如蠱毒之家置毒於飲食  
中未嘗不欲斷人命根雖然是冤者能有幾人能

仁鑑云若不喚作一莖齋亦入地獄如箭射畢竟如何但能飯向無心盤自有人提折脚鐺

殺活全機觀面提大家相聚契莖齋後人不省者箇意祇管茫茫打野捩松源岳

硬如綿軟如鐵諸人飲水須防噎堪笑灘頭老大愚至今弄巧反成拙枯禪鏡

觚棱金碧照山高萬國珪璋捧赭袍四海一家無一事將軍把鏡泣霜毫鐵容一

大愚示衆豎窮三際橫亙十方拈起也帝釋心驚放下也地神膽戰不拈不放喚作什麼自云蝦蟇

雲巖儲云祥符則不然豎窮三際橫亙十方拈起也至簡至易放下也同天同地不拈不放喚作什麼自

云阿嚏雪巢松云大愚老漢提唱箇事可謂竭盡

玄微祇得玉鳳金鸞分疎不下今日松上座敢將狗

尾續貂豎窮三際橫亙十方拈起也縱橫自在放下

也自在縱橫不拈不放喚作甚麼呵呵大笑云是甚

乾矢橛

大愚問侍者曰你問訊了一邊立地是什麼道理

曰不會師曰過者邊立者便過師曰無歸無歸

天寧琦云成人者少敗人者多廣胤標云侍者却難得何以見得不因夜來鴈怎見海門秋

大愚因僧問如何是佛師曰鋸解秤錘

鋸解秤錘無縫罅風吹日炙朝復夜雖然不許亂商量一任稱提四天下白雲端

手把金鞭擊鐵牛大千世界任遨遊恒沙岸上相逢著默識無言自點頭保寧勇

鋸解秤錘出老杜詩香稻啄殘鸚鵡粒碧梧棲老鳳凰枝懷玉宣

鋸解秤錘兩分明觸著猶能碎眼睛箇是紅爐親煉出古今能有幾人醒廣饒燈

舒州法華全舉禪師汾陽到瑯琊覺處瑯問近離甚處師曰兩浙曰船來陸來師曰船來曰船在甚

處師曰步下曰不涉程途一句作麼生道師以坐

具據一據曰杜撰長老如麻似栗拂袖而出瑯問

侍者此是甚麼人者曰舉上座卿曰莫是舉師叔

麼先師教我尋見伊遂下旦過堂問上座莫是舉

師叔麼莫怪適來相觸忤師喝復問長老何時到  
汾陽瑯曰某時到師曰我在浙江早聞你名元來  
見解祇如此何得名播寰宇瑯遂作禮曰某甲罪  
過

徑山杲云賓則始終賓主則始終主二大老鶩割相  
逢主賓互換直下發明臨濟心髓苟非徹證向上巴  
鼻具出常情正眼未免作得失論量 雲門信云拳  
來脚去本分鉗錘若將破籃盛水救火笑殺旁觀三  
十年後有人說破 東山渡云向二尊宿舌頭上打  
得箇鞦韆過來方得道出常情非特不被是非絆却  
抑且卽是非而作佛事不然君向西秦我之東魯  
雲巖學云舉上座可謂竿木隨身逢場作戲雖然若  
無瑯琊唱拍相隨那能陽春白雪

相罵無好言相打無好拳何似風恬并浪靜一江明  
月滿溪船大洪恩

奪得驪龍珠便回小根魔子盡疑猜拈來拋向洪波  
裏擦手大家歸去來徑山杲

漁翁瀟灑任東西蘆管橫吹韻不齊夜靜月明魚不

食扁舟臥入武陵溪夢菴信

水不洗水金不博金味毛色而得馬靡絲絃而樂琴  
結繩畫卦有許事喪盡眞淳盤古心心聞貴

揭天樓鼓噪紅塵徧地刀槍解出身結角羅紋隨處  
入銀山鐵壁是通津伊菴權

黑霧紛紛潑面來手持玉笏嘆悠哉電光影裏穿鍼  
眼線脚重重挑不開語風信

盡謂當關逢敵手更驚納款豎降旗明修棧道人皆  
見暗度陳倉却不知理安閑

雲從龍風從虎北山晴兮南山雨放行也皓魄騰空  
擒住也須彌倒拄明暗交參敲唱雙舉無限魚蝦努

眼睛扶搖贏得播寰宇百愚新

倒握靈符懸肘後橫抽寶劍挂眉端大家拋出當陽  
看佛口蛇心覷一團曉月明

後瑯琊舉似慈明明日舉公見處纔能自了而汝  
負墮何以爲人

紀功敘殿老譚兵却要將渠此話行一夜秋風動鄉  
思八千子弟共歸耕理安閑

法華示衆釋迦不出世達磨不西來佛法徧天下

譚玄口不開

徑山杲云做賊人心虛 愚菴孟云大小法華龍頭

蛇尾 一指海云既云譚玄爲什麼又道口不開乃

以如意擊案云若將耳聽終難會眼裏聞來方始親

法華因僧問生死事大請師相教師曰洞庭湖裏

失却船

洞庭湖裏失却船赤脚波斯水底眠盡大地人呼不

起春風吹入杏花村雪菴瑾

南嶽芭蕉大道谷泉禪師汾陽昭嗣同慈明山行遇一

毒龍湫師捉明同浴明掣肘去師解衣跳入霹靂

隨至腥風吹雨林木震搖明蹲艸中意師死矣須

臽晴霽師乃引頸出波間曰因

理安問云谷泉拌得一條窮性命要驗天下衲僧却

被慈明老漢勘破 道峰珍云一人死中得活一人

艸裏蹲身總被天下衲僧勘破 資福廣云谷泉賣

弄若無慈明證據不免徒勞

谷泉到慈明明問白雲橫谷口道人何處來師左

右顧視曰夜來何處火燒出古人墳明日未更

道師作虎聲明以坐具便滅師接住推明置禪牀

上明却作虎聲師大笑曰我見七十餘員善知識

今日始遇作家

天童華云二老漢當時若踢著臨濟向上底我等今

日飯也無喫還知薦福落處麼 龍翔訢云一人得

體不得用一人得用不得體如何敢稱臨濟兒孫你

若檢點得出非惟則他古人舊話亦免今日鈍置我

無傳和尚拈拄杖卓一卓云棒頭有眼明知日要識

眞金火裏看 天寧琦云錯下名言當時慈明怎容

得者風顛漢恁麼道更與一坐具看他作箇什麼伎

倆纔眼目定動便連棒趁出臨濟法道未致寂寥

兩陣交鋒出戰時旗槍倒卓鼓無槌絲毫不犯將軍

令獨脚機關各自提磨堂遠

一文一武偶相逢說盡英雄各不同俱往長安朝聖

主姓名終是達天聰虛堂愚

好看兩虎上高山頭角低昂不等閒奪去攬來多意

氣清風明月動人寰福嚴容

安吉州天聖皓泰禪師汾陽昭嗣僧問如何是佛師曰  
黑漆聖僧

聖僧黑漆實希奇莫把丹青點汚伊合掌燒香人不  
敬寒山拾得笑攢眉海印信

天聖到瑯琊瑯琊問埋兵挑鬪未是作家匹馬單槍  
便請相見師指瑯曰將頭不猛帶累三軍瑯打師  
一坐具師亦打瑯一坐具瑯接住曰適來一坐具  
是山僧令行上座一坐具落在甚麼處師曰伏惟  
留饗瑯拓開曰五更侵早起更有夜行人師曰賊  
過後張弓瑯曰且坐喫茶

白巖符云二老相見可謂遇故鄉人說故鄉話然本  
色固是本色未免俱帶些客氣

舒州浮山法遠圓鑑禪師葉縣省嗣僧問如何是祖師  
西來意師曰平地起骨堆

嫩艸疎斜徑山泉帶碧流文曾要渭水恥任列莊周  
授子青

平地起骨堆三春震地雷祇聞千里去不見一人回  
本覺一

平地起骨堆金毛獅子吼誰知無味譚塞斷衆人口  
地獄思

滯貨不入市行情何足論有期酬價者天遠自臨門  
元初說

浮山因僧問師唱誰家曲宗風嗣阿誰師曰八十  
翁翁輟繡毼曰與麼則一句迴然開祖胄三玄戈  
甲振叢林師曰李陵元是漢朝臣

投子青云水深魚隱葉落巢疎復頌

月裏無根艸山前枯木花鴈回沙塞後砧杵落誰家  
古殿莓苔滿天河斗柄垂金鷄纔報曉玉女下階遲  
天寧龜

舜目重瞳禪帝堯嘉聲千載奏蕭韶聞音忘味咸何  
事草莽無由帝力驕伴我侶

浮山示衆汾陽有三種師子句一超宗異目二齊  
眉共躡三影響音聞若超宗異目見過於師可爲  
種種方堪傳授若齊眉共躡見與師齊滅師半德  
若影響音聞野干倚勢異類何分所以先德付囑  
曰若當相見切須仔細窮勘不得離莽



豹略龍韜妙有權超師事復假師傳虎鬚倒持潭開  
事驚鼻生措恣便煨敵勝果然全勝槩輪機還却占  
機先天生遇種何人共獨許薄沱得一立平陽志

浮山因僧問如何是向上一路師曰正月孟春猶  
寒

正月孟春猶寒從頭萬種千般昨夜虛空落地和風  
搭在欄杆別峯印

潤州金山曇穎達觀禪師石門應圓曰七佛是性謙萬

法是心奴且道主人翁在甚麼處自喝曰七佛已  
下出頭又自諾曰各自祇候

斷橋倫云喚七佛爲性謙指萬法是心奴達觀自謂  
有出身之路及乎自喝自諾又是奴謙邊事主人翁  
何曾夢見大眾要見麼以拂子拂一拂云曉來一陣  
春風動開徧園林百樣花

金山因僧問如何是長法身師曰拄杖六尺曰如  
何是短法身師曰算子三寸曰恁麼則法身有二  
也師曰更有方圓在

理安問云古人一期施設可謂四機踴地檢點將來

也是隨語脉展演或有問山僧如何是長法身拄杖  
六尺如何是短法身劈脊便打恁麼則法身有二也  
擲拄杖云兵隨印轉將逐符行且道與古人是同是  
別復頌

萬疊長江浪裏遊月隨漁父上扁舟釣竿收放憑吾  
手不計工程得便休

都尉李遵島

見石門聰

因堅上座來辭次尉問曰近離

上黨得屈中部方接壘譚遠回虎錫指雲屏之翠  
嶠訪雪嶺之清流未審此處彼處的事作麼生  
堅曰利劍拂開天地淨霜刀纔舉斗牛寒尉曰恰  
值今日耳聵堅曰一箭落雙鷗尉曰上座爲什麼  
著艸屨睡堅以衣袖一拂尉低頭曰今日可謂降  
伏也堅曰普化出僧堂

芙蓉浴浪澄江淺紅蓼天風鴈影斜獨自晚來江上  
望無邊秋色屬誰家粟菴鼎

宋內翰楊文公億

見廣慧

公字大年問廣慧曰某曾

問雲巖諒監寺兩箇大蟲相較時如何寺曰一合  
相某曰我祇管看未審恁麼道還得麼慧曰者裏

卽不然公曰請和尚別一轉語慧以手作曳鼻勢  
曰者畜生更踣跳在公有省有偈曰八角磨盤空  
裏走金毛師子變作狗擬欲將身北斗藏應須合  
掌南辰後

梅翁杲云看者一道真言直得天左旋地右轉雖然  
是處池中有月誰家竈裏無烟任他大年說得悟得  
向太虛空裏之乎者也爭似你諸人識取一句子好  
且道是那一句喝一喝

內翰攀南斗倚北辰廣慧轉天關翻地軸寥寥千古  
許誰知斷絃須是鸞膠續石巖礎

白石鑿鑿韞爾美璞君子道晦君子斯樂處堂愚

文公問廣慧承和尚有言一切罪業因財寶所生  
勸人疎於財寶而沉閻浮提衆生以財爲命邦國  
以財聚人教中有財法二施何得勸人疎於財寶  
慧曰旛竿頭上鐵籠頭公曰海壇馬子似驢大慧  
曰楚鷄不是丹山鳳公曰佛滅二千年比丘少慚  
愧

夜叉頭菩薩面鬼擣穀佛跳牆同門共戶不相識遇

古超今無寸長燈心戳破石頭脚扁鵲盧醫爭主張  
或菴體

已知客夢烟霞裏肯厭猿鳴夜雨中謾謂衡湘音信  
斷年餘鴈陣過巴東鐵容元

文公問慈明如何是上座爲人一句慈曰切公曰  
長裙媳婦泥走曰誰得似學士公曰作家作家  
曰放你三十棒公以手拍膝曰者裏是甚麼所在  
慈拍手曰也不得放過公呵呵大笑

風和日暖正春濃柳色如金花影重入到桃源舊遊  
處一層峰鎖一層峰柏庭永

全身拶入蒼龍窟拔得珊瑚幾樹來打落尋常柴艸  
價換錢沽酒醉花街臘月朗

大鑒下十二世

袁州楊岐方會禪師慈明圓嗣因僧問如何是佛師曰  
三脚驢子弄蹠行曰莫祇者便是麼師曰湖南長  
老

天童華云大小楊岐話作兩橛且道薦福爲人眼在  
什麼處 徑山琇云大小楊岐被者僧一問未免手

脚俱露 雲門信云要會三脚驢子落處須向驢胎

馬腹裏走一通來見楊岐始不難

三脚驢子弄蹺行兩浙江南秋復熱西北風霜怯早

寒閉門愁見楊花落 菴顏

法出奸生垛生招箭三脚驢子是誰親見若覩見釋

迦老子那吒面佛照光

三脚驢子弄蹺行鼓動清風入骨寒踏破毗盧光影

斷不須平地起波瀾月菴果

一箭射落天邊鴈千人萬人著眼看不知此箭自何

來湖南長老何曾見 中菴空

東風花暖色依依在處牆頭蝴蝶飛 龜婦不聞天子

敕太平晝夜不關扉 語風信

強飲沽來酒羞看讀了書閒花更滿地惆悵復何如

鐵容玄

楊岐因慈 忌設齋衆集師於眞前以兩手挽拳

安頭上以坐具畫一畫打一圓相便燒香退身三

步作女人拜首座曰休覩怪師曰首座作麼生曰

和尚休覩怪師曰兔子喫牛糞第二座近前打一

圓相便燒香亦退身三步作女人拜師近前作聽  
勢座擬議師與一掌曰者漆桶也亂做

法林音云當面不離反招其亂

一棚傀儡木雕成半是神形半鬼形歌鼓歇時天未

曉尙餘寒月挂疎櫺 虛堂愚

楊岐聽勢印千差今古令人愛作家但握祖師三印

在不妨覩怪亂如麻 圭堂居士

楊岐上堂天得一以清地得一以寧君王得一以

治天下衲僧得一堪作甚麼良久云鉢孟口向天

妙喜果云楊岐老漢大似溺却一船麻却來屎斗裏

掃 伏龍長云大小楊岐熟處難忘衲僧得一且作

麼生以拄杖卓一卓喝一喝下座

鉢孟向天底時節十方世界一團鐵少林面壁謾多

年衲僧眼裏重添屑白雲端

衲僧一拶鉢孟口闊天下楊岐望梅止渴 源岳

楊岐因僧問少林面壁意旨如何師曰西天人不

會唐言

西天人不曾唐言端坐巍巍少室前剛被流支打齒

西天人不曾唐言旱地雷聲徹大千九年面壁無人  
會玉兔金烏火裏旋無菴全

楊岐因慈明上堂師出問幽鳥語喃喃辭雲入亂峰時如何明曰我行荒艸裏你又入深邨師曰官不容鍼更借一問明便喝師曰好喝明又喝師亦喝明連喝兩喝師禮拜明曰此事是箇人方能擔荷師拂袖便行

起綱宗云作家相見縱奪可觀檢點將來不無滲漏  
發明臨濟四喝彷彿依稀者多四喝之餘爲之亂喝  
且道慈明是亂喝不是亂喝

將出驪珠遇大商金盤撥動有餘光無煩一句論高  
價把手歸家笑幾場白雲端

試問人間有底忙。好將春事報春光。直饒日日花前

醉一季都來九十場正堂辨

貓全插血功虎備起屍德無奈阿勇何不傳上樹訣

南巖勝

馬轉牛回豈是誇爛泥中刺當行家霜刃一揮全意

氣坐令千載定龍蛇無菴全

璨若驪珠出匣輝鐵牛機印印全機桃花浪裏春雷疾連得風雲滿路歸理安間

電掣雷奔作者闌  
相將輾入角尖頭  
同心繡就鴛鴦譜  
把手高歌上玉樓  
捷菴敏

楊岐上堂楊岐乍住屋壁疎滿牀盡擦雪珍珠縮却頃暗嗟吁良久曰反憶古人樹下居

破菴先云楊岐鬪勝不鬪劣秀峰鬪劣不鬪勝秀峰  
乍住沒親疎箇箇盡懷滄海珠滿眼湖山看不足釋  
迦彌勒是他奴

枯柳殘楊雪片輕  
艸堂墜落兩三楹  
板門久不關風月  
趨老葫蘆挂不成

徑山信

楊岐因僧問撥雲見日時如何師曰東方來者東方坐

堯舜垂衣萬國賓撥雲見日意休陳東方來者東方  
坐艸木重霑雨露新白雲端

楊岐因白雲端參乃問受業師爲誰曰茶陵郁和尚師曰吾聞伊過橋遭跌有省作偈甚奇能記否

端誦曰我有明珠一顆久被塵勞關鎖今朝塵盡  
光生照破山河萬朵師笑而趨起端愕然通夕不  
寐黎明咨詢之適歲暮師曰汝見昨日打毆難者  
麼曰見師曰汝一籌不及渠端復駭曰意旨如何  
師曰渠愛人笑汝怕人笑端大悟

護國元云楊岐大笑眼觀東南意在西北白雲悟去  
聽事不真喚鐘作甕檢點將來和楊岐老漢都在架  
子上將錯就錯若是南明則不然我有明珠一顆切  
忌當頭蹉過雖然覲面相呈也須一槌打破舉拂子  
云還會麼棋逢敵手難藏興詩到重吟始見工

江上貪觀浪勢高被人奪却手中橈隨風飄蕩渾無  
主幸得漁翁借一舸紫柏可

殺活機籌格外操尋常那識笑中刀明珠晃晃形山  
上共鑑春風放碧桃古南門

鴆毒潛藏遊宴中殺人性命疾如風絲頭截斷聖凡  
路馬腹驢胎滅正宗默菴慧

楊岐入院陞座畢下座九峰勤把住曰今日喜得  
箇同參師曰作麼生是同參底事曰九峰牽犁楊

岐曳耙師曰正恁麼時楊岐在前九峰在前勤擬  
議師却開曰將謂同參元來不是

天寧琦於擬議處代峰便喝 龍翔訢云二老壩篋  
迭奏今古罕聞龍翔今日對衆舉揚貴要大家知有  
且道知有箇什麼祖翁田地無多子努力同心兩弟  
兄 南澗謙代云念兄今日新做長老

一曳耙二牽犁平田淺艸且相隨恰到饑時無艸料  
放開頭角便東西老楊岐老楊岐盡道從來解弄蹊  
上方益

金剛圈上生毛刺栗棘蓬拋熱燄騰百萬鐵騎衝不  
破風規從此擅縱橫山夫正

楊岐上堂薄福住楊岐年來氣力衰寒風凋敗葉  
猶喜故人歸囉囉哩拈却死柴頭且向無烟火

天目禮云淨慈亦有一頌自住南山寺年荒遇水災  
風淒蒲柳變不見故人來正恁麼時如何相思黃葉  
落白露點蒼苔

楊岐問僧栗棘蓬你作麼生吞金剛圈你作麼生  
跳

昨夜發新雷毒蛇離窟穴居常口不開踢著迸鮮血  
或菴體

肘後驚生閒落索風前忽布闊叉撐那吒八臂空惆  
悵夜半三更白晝行天童淨

楊岐金圈與栗蓬吞跳依前事不同大海都來一口  
吸更無南北與西東照堂一

巨海垂香餌漫天布網羅從他吞跳者我祇笑呵呵  
天童悟

東十八隔西十八隔南十八隔北十八隔無救無遮  
八寒八熱當墮畜生地獄罪畢漢關喴

楊岐問僧雲深路僻高駕何來曰天無四壁師曰  
蹋破多少艸鞋僧便喝師曰一喝兩喝又作麼生  
曰你看者老和尚師曰拄杖不在且坐喫茶

高駕何來釣象犀翻身全不帶纖泥驀然一喝高千  
丈劫外相看誰得知圭堂居士

宗鑑法林卷三十





宗鑑法林卷三十一

集雲堂 編

大鑒下十二世

隆興府黃龍慧南禪師

慈明圓嗣

室中常問僧曰人人

盡有生緣在上座生緣在何處正問答時却伸手

曰我手何似佛手又問諸方參請宗師所得復垂

脚曰我脚何似驢脚三十餘年示此三問罕有契

其旨者因目之爲黃龍三關

龍翔訢云黃龍三關如商君立法法雖行而先王之

道廢矣故當時出其門者甚多得其傳者益寡使其

恪守慈明家法子孫未致斷絕 瑞鹿信云我手何

似佛手上大人丘乙巳我脚何似驢脚化三千七十

士人人有箇生緣爾小生八九子上座生緣在什麼

處佳作仁可知禮也復云黃龍設三關撈攬四海英

靈大似布漫天網被山僧一時收下了也現前大眾

還委悉麼鴛鴦繡出從君看不把金鍼度與人 廬

山圓通旻古佛云昔見廣辯首座收南禪師親筆三

關頌諷誦無遺近見諸方傳寫不全又多譌舛故茲

錄出

我手佛手兼舉禪人直下薦取不動干戈道出當處

超佛越祖

我脚驢脚并行步步踏著無生會得雲收日卷方知

此道縱橫

生緣有語人皆識水母何曾離得蝦但見日頭東畔

上誰能更喫趙州茶

長江雲散水滔滔忽爾狂風浪便高不識漁家玄妙

意偏於浪裏颶風濤景福順三

南海波斯入大唐有人別寶便商量或時遇賤或時

貴日到西峰影漸長

黃龍老和尚有箇生緣語山僧承嗣伊今日爲君舉

爲君舉貓兒偏解捉老鼠

佛手纔開古鑑明森羅無得隱纖形朝朝日日東邊

出多少行人問丙丁照覺總三

驢脚伸時動地輪大洋海底播紅塵惟餘庭際青青

柏一度年來一度春

垂問生緣何處來到家禪客絕纖埃毗盧剎海周遊

也休說峨嵋與五臺

我手佛手十八十九雲散月圓癡人夜走 湛堂準三

我脚驢脚放過一著龐老策籬清平木杓

人人生緣北律南禪道吾舞筭華亭撐船

我手何似佛手天下衲僧無口縱然撩起便行也是

鬼窟裏走諱不得張無垢三

我脚何似驢脚又被綱膠黏著翻身直上兜率天已

自遭他老鼠藥吐不得

人人有箇生緣鐵圍山下幾千年三災燒到四禪天

者驢猶自在旁邊殺得工夫

佛手驢脚容易見最難道處是生緣黃梅不是周家

子七歲傳衣便會禪 橫川珙

黃龍參慈明於福嚴明曰書記參雲門禪必善其

旨如放洞山三頓棒是有喫棒分無喫棒分師曰

有喫棒分明色莊曰從朝至暮鴉鳴鵲噪皆應喫

棒師乃炷香作禮復問趙州道臺山婆子我與汝

勘破了也那裏是它勘破處師汗下不能答次日

又詣室昉詬罵不已師曰罵豈慈悲法施耶明曰

你作罵會那師大悟述頌曰傑出叢林是趙州老

婆勘破有來由如今四海清如鏡行人莫與路爲

難明始領之

錯錯戲海獐龍冲霄遼鶴老慈明無著摸笑裏重重

露拴索佛手一展日月昏大江從此風濤惡石林羣

死水如何養活龍終歸大海鼓腥風天教一霎風雲

變送出臺山烟雨中竹屋簷

黃龍因僧問不去不來時如何師曰華嶽三峰頭

倒卓曰却去却來時如何師曰風吹柳絮毛毬走

冰雪肌膚西舍女梳粧巧巧畫雙眉傍人筆力强傳

寫戶外如何見得伊 本寂觀

黃龍住黃檗時室中每舉鐘樓上念讚牀脚下種

菜衆皆下語不契一日勝首座曰猛虎當路坐師

退黃檗與勝住

道峰珍云鐘樓上念讚南斗七牀脚下種菜北斗八

直饒道箇猛虎當塗踞未免猶涉離微喝一喝去却

七拈却八無榮波斯吹鬘葉

鐘樓上念讚牀脚下種菜猛虎當路蹲時人俱不會

黃檗花開自有時明州有箇慈布袋照堂一

直出直入當面不識更擬如何著甚死急徑山果

黃龍因化主歸上堂世間有五種不易一化者不

易二施者不易三變生作熟者不易四端坐喫者

不易更有一種不易是甚麼人良久曰吟下座

翠巖真因藏主問和尚道第五種不易是甚麼人巖

云腦後見顚莫與往來 天童傑云一手不獨鳴兩

手鳴擱擱豁開三玄三要捏碎佛祖標格村歌社舞

得人憎勝似當年白拈賊 天寧琦云山僧則不然

第五種不易是甚麼人莫怪坐來頻勸酒自從別後

見君稀 五磊權云山僧則不然第五種不易是什

麼人無漏國中留不住浮幢王刹任分身

黃龍因僧問滴水滴凍時如何師曰未是納僧分

上事曰如何是納僧分上事師曰滴水滴凍

翻手雲湧手雨與奪更誰可相許丈夫行履合如斯

那管春寒并秋暑粟如餉

黃龍因僧問德山棒臨濟喝直至如今少人拈掇

請師拈掇師曰千鈞之弩不爲鼯鼠而發機曰作

家宗師今朝猶在師便喝僧禮拜師曰五湖衲子

一錫禪人未到同安不妨疑著

百丈泐云黃龍一向具毆豬狗底手脚今日被者僧

折倒既是千鈞之弩不發鼯鼠機爲甚破的

黃龍因禾山普參山善經論兩川號爲義虎問曰

阿難問迦葉世尊傳金襴外更傳何物因緣意旨

如何師曰上人出蜀曾到玉泉否曰曾到師曰曾

挂搭否曰一夕便發師曰智者道場關王打供結

緣住幾時何妨山良久再理前問師俛首山趨出

大驚曰兩川義虎不消此老一睡

黃龍一睡絕遲疑笑殺旁觀又可悲姪女已歸霄漢

去獸郎猶向火邊棲懸庵演

霧裏塔如夢樹中山欲行艸溪停泊處隱約見孤城

童求昱

黃龍示衆一人朝看華嚴暮觀般若晝夜精勤無

有暫暇有一人不參禪不論義把箇破席日裏睡

如是二人同到黃龍一人有爲一人無爲安下那

一箇卽是良久曰功德天黑暗女有智主人二俱

不受

平陽恣云山僧不比黃龍小家子禪如是二人同到  
能仁一齊安下何故海闊從魚躍天空任鳥飛

洪州翠巖可真禪師

慈明圓嗣

在金巖同善侍者度夏

師自負親見慈明天下無可意者時知其未徹一  
日同山行次拈一片瓦礫置磐石上謂師曰若向  
者裏下得一轉語許你親見慈明師左右視擬對  
之善叱曰佇思停機情識未透何曾夢見

洪濤怒吼渡頭生棹短舟橫截未能若解離鉤施返  
躑管教四海浪清平獨超方

翠巖因首座不安問曰色身病法身病座曰早來  
承侍者相問師曰泥裏洗土塊曰和尚慣用此機  
師曰夜來帝釋冠爲甚麼落地座無語師曰南山  
起雲北山下雨

一重烟水一重雲水沒橫塘路不分堪笑途中流浪  
客茫茫忘却故園春聖儀

梧桐一葉落霜燒化得琴來尾半焦爭怪沒弦聲斷  
曲惹添風雨奏江濤漢關樞

潭州道吾悟真禪師

慈明圓嗣

僧問凝然便會時如何

師曰老鼠尾上帶研槌

神鼎揆云凝然便會去澄潭不許蒼龍蟠言下覓端  
由早成不快漆桶直饒萬里無雲青天也須喫棒畢  
竟如何自是不歸歸使得五湖煙景有誰爭復頌  
道人去住總無家何累渠儂盡足蛇幸自一身輕似  
箭那堪扭上又添枷

作客曾經北地苦行人謾唱鷓鴣詞分明月在梅花  
上看到梅花早已遲元菴微

俊鷗高翔極盡空白雲深入縹無窮萬牛輓得清風  
轉猶涉鄉關路幾重緣止緣

越州姜山方禪師

瑯琊覺嗣

因僧問如何是不動尊師

曰單著布衫穿市過曰學人未曉師曰騎驢蹋破  
洞庭波曰透過三級浪專聽一聲雷師曰伸手不  
見掌曰還許學人進向也無師曰特地告虛空曰  
雷鳴之下布鼓難鳴師曰入花毯子上不用繡紅  
旗曰三十年後此話大行師便打

賓則始終賓主則始終主如何不動尊觸著無停處

明明鬧市頭深海底渡鐵錫無毛掠月昏俊鶴穿  
雲天正曙機踢機箭鋒挂何如天外展雙眸莫把是  
非來入耳天岸昇

不動尊活鑲鑲珠盤宛轉春回壑去留皓月印寒潭  
舒卷彩霞飄碧落雲垂萬里鵬翅展千年鶴錯錯清  
風八面何寥廓遠菴體

宣州興教院坦禪師

鄒卿  
覺嗣

上堂有雪寶化主省宗

出問諸佛未出世人人鼻孔掾天出世後爲甚麼  
杳無消息師曰鷄足峰前風悄然宗曰未在更道  
師曰大雪滿長安宗曰誰人知此意令我憶南泉  
拂袖歸衆更不禮拜師曰新興教今日失利便歸  
方丈令人請至師曰適來錯抵對一轉語人天衆  
前何不禮拜蓋覆却宗曰大丈夫膝下有黃金爭  
肯禮拜無眼長老師曰我別有語在宗乃理前語  
至未在更道處師曰我有三十棒寄你打雪寶宗  
乃禮拜

理安問云賓則始終賓主則始終主忽然賓主互換  
未免有得有失若道興教是主怎奈被省宗不肯若

道省宗是賓因甚却寄棒打雪寶還委悉麼不因夜  
來雁爭見海門秋 頤石圓云興教放去較危者僧  
收來太速祇如三十棒寄打雪寶意旨如何麀羊纔  
挂角獵犬覓無踪

當陽不斷奈伊何好語翻令落第多理得絲綸重下  
釣禹門三級起風波三峯藏

悄悄寒風深雪夜虎嘯猿哀聲不借東土西天齊乞  
命誰更人前誇重價使乎使乎知未知年年花落乳  
峰下夫山儲

龍門大啓納英流且喜他人踞虎頭放去太賒收太  
速邊看片月海門秋天章玉

雁來空布雲中字魚去徒翻水上花此夜月明人盡  
望不知明月落誰家鐵帆舟

南嶽雲峰文悅禪師

大愚  
芝嗣

上堂汝等諸人與麼上

來大似刺腦入膠盆與麼下去也是平地喫交直  
饒不來不去朝打三千暮打八百

寶壽方云雲峯老漢大似當臺鏡子祇會照人殊不  
知自已未出方丈時早已喫交了也



雲峰因僧問巖山巖崖還有佛法也無師曰有曰  
如何是巖山巖崖佛法師曰獼猴倒上樹

徑山杲云若人信受奉行一生參學事畢

雲峰因僧問如何是心地法門師曰不從人得曰  
不從人得時如何師曰此去衡陽不遠

徑山杲云雲門卽不然如何是心地法門不從人得  
不得人得時如何看脚下法林音云借人箸喫飯

金明進云金明卽不然如何是心地法門不從人得  
不從人得時如何劈脊便棒

安吉州西余師子淨端禪師谷隱聽下龍華嶽嗣因尼參師

曰待來日五更三點入來師侵早紅粉搽面而坐  
尼入見驚而遂悟

僧中女子滿面慚惶女中丈夫一笑承當從今醜態  
難回護不必臙脂紅粉粧朝宗忍

老覺情閒似太孤五更粧點接師姑雖然已中烽烟  
計粉面脂脣洗得無山茨際

### 大鑒下十三世

舒州白雲守端禪師楊岐會嗣示衆此事如萬仞崖頭

相似總知道放著手便撲到底祇是捨命不得法  
華今日不動一毫頭教諸人到底去也擲下拄杖  
擬從險處放身時那箇商量不皺眉不動毫芒親到  
底眼睛皮綻蓋須彌虛堂愚

說盡荔枝滋味好憐兒不覺傷華藻更將剝淨置人  
脣到口便宜誰解討六也雪

白雲上堂若端的得一回汗出便向一莖艸上現  
瓊樓玉殿若未端的得一回汗出雖有瓊樓玉殿  
却被一莖艸蓋却作麼生得汗出去自有一雙窮  
相手未曾容易舞三台

徑山杲云一莖艸上現瓊樓玉殿決定可信瓊樓玉  
殿被一莖艸蓋却莫被他熱瞞徑山恁麼道爲已得  
一回汗出者說未得一回汗出者切不得動著天  
寧琦云拈却一莖艸瓊樓玉殿在什麼處到江吳地  
盡隔岸越山多笑巖寶云白雲大慧俱善抑揚當  
時則不無怎奈撲鼻汗臭氣在佛日哲云隆安卽  
不然不須汝諸人汗出但祇饑來喫飯困來打眠  
金谷年年烟雨中一莖誰解舞春風庭花引起愁無

限泣殺江蘿兩岸紅天水廣

九變將成曲三終必盡儀國風由是正王化自雍熙

覺圓胤

白雲上堂古人留下一言半語未透時撞著鐵壁  
相似忽然一日覷破方知自己原是鐵壁如今作  
麼生透復曰鐵壁鐵壁

獅林則云白雲被鐵壁覷透打失一雙眼睛 伏龍  
長喝一喝云用鐵壁作麼 寶掌白彈指一聲云百  
雜碎

白雲謂東山演曰有數禪客從廬山來教伊說亦  
說得明亦明得頌古亦作得祇是未在演疑久之  
乃悟曰從此出一身白汗明得下載清風

佛眼遠云某甲侍先師舉此因緣謂某甲云參學須  
是一時放下方得安樂大眾還見得否乃頌

放得下好脫灑放不下牛拽耙堪笑諸方老古錐打  
鼓說禪無尾欄無尾欄不驚怕可嗟訝解蹋毗盧頂  
上行不言亦自傳天下好大哥

尋得桃源欲避秦無端又被賊來侵而今匹馬風前

過敗國亡家恨轉深素弘理

白雲因提刑郭公甫謁示衆夜來枕上作得箇山  
偈謝功甫大儒說與大眾請已後分明舉似諸方  
此偈非惟謝功甫大儒直要與天下有鼻孔衲僧  
脫却著肉汗衫乃曰上大人丘乙巳化三千七十  
士爾小生八九子佳作仁可知禮也

晦曇承云白雲老人要與天下衲僧脫却著肉汗衫  
殊不知更爲天下衲僧加上鷄臭布衫

白雲上堂舉一則公案布施大眾良久曰口祇堪  
喫飯

白雲舉古直是希奇口堪喫飯少有人知諸禪老莫  
遲疑二飽自然忘百饑遜菴演

白雲因僧問一喝分賓主照用一時行去此二途  
請師別道師便喝僧曰從來疑著和尚師便打僧  
曰作家宗師師曰也不消得僧禮拜

伏龍長云者僧道從來疑著和尚是肯語是不肯語  
白雲便打是賞伊是罰伊選佛若無如是眼直饒千  
載亦奚爲

白雲上堂乾坤之內宇宙之間中有一寶祕在形  
山大衆眼在鼻上脚在肚下且道□□□麼處良  
久曰人面不知何處去桃花依舊□□□

清溪流過碧山頭空水澄鮮一色秋□□□塵三十  
里白雲紅葉兩悠悠擎石沃

神仙初不住西東祇在空濛紫霧中靈跡深知不可  
覓擬相尋卽隔千峰林間遁

白雲上堂一句道得盡與佛祖爲師一句道不盡  
與人天爲師今日作麼生道乃曰有水皆含月無  
山不帶雲

南嶽際云山僧則不然一句道盡與人天爲師一句  
道不盡與佛祖爲師且卽今作麼生道乃云家家門  
前火把子晦曇承云若有一句孤負佛祖若無一  
句落賺人天道盡道不盡自救不了諸人又作麼生  
良久云掬水月在手弄花香滿衣

白雲上堂見衆集乃拈拄杖曰大衆會麼復卓一  
下曰珊瑚枕上兩行淚半是思君半恨君

幾回霑水又挖泥年老心孤不自知遊子不歸空悵

望一溪流水落花隨無卷全

從歛金蓮出畫堂懶搽脂粉豈塗香春風一曲無人  
會倦倚闌干欲斷腸仁趾喪

白雲住問通示衆難難難是遣情難情盡圓明一  
顆寒方便遣情猶不是更除方便太無端大衆情  
作麼生遣下座背包竟去

禮敬□云端祖可謂去國一身輕似葉高名千古重  
如山山僧雖做他脚下兒孫却又同途不同轍移步  
不移身何故他人住處我不住他人行處我不行不  
是與人難共住大都緇素要分明大衆且道端祖底  
是山僧底是喝一喝云放教冷來看

白雲因僧問舊歲已去新歲到來如何是不遷義  
師曰眉毛在眼上

罷釣歸來不繫船江村月落正堪眠縱饒一夜風吹  
去祇在蘆花淺水邊月庭忠二

落葉已隨流水去春風未放百花舒青山面目依然  
在盡日橫陳對落暉

條風布暖弄晴沙郊外烏衣點翠霞漠漠烟凝千嶂

寂高樓簫鼓有人家鍾錄話

白雲示衆金藥叢叢帶露新  
采來烹茗賞佳辰  
浮栢何必須宜酒  
但有清香自醉人

了菴欲云白雲老人  
大似巧媳婦做出無麪餠  
飪惜乎知味者少  
開福效顰亦有一  
喝重陽黃菊未成花  
落帽無勞憶孟嘉  
但得青山常在眼  
不妨流水去無涯  
愚菴及云白雲開福  
大似徐六擔板各見一邊  
徑山見處也要諸人共知  
時移節換是尋常  
過了重陽又一陽  
人事自生今日意  
黃花只作去年香

金陵保寧仁勇禪師

楊岐會嗣

示衆釋迦老子四十九

年說法不曾道著一字  
優婆塞多丈室盈籌不曾  
度得一人達磨不居少室  
六祖不住曹溪誰是後  
昆誰爲先覺既然如是  
彼自無瘡勿傷之也  
拍膝顧衆曰且喜天下太平

寶壽方云保寧道彼自無瘡  
勿傷之也不知早自剜  
肉了也又道天下太平  
不知早自作亂了也

烟暖土膏農事勤  
一犁新雨破春畊  
郊原渺渺青無際  
野草閒花次第生  
盧堂愚

保寧上堂風鳴條雨破塊  
曉來枕上鶯聲碎  
蝦蟇蚯蚓一時鳴  
妙德空生都不會  
都不會三箇成羣  
四箇作隊  
窈窕窈窕飄飄飄  
飄向前村後村折得  
梨花李花一佩兩佩

南堂欲云保寧大似二八少年  
風流才子一向賣俏  
於唱教門中足可觀光  
衲僧門下正好喫棒  
何故禾黍不陽  
談競栽桃李春翻  
命力耕者半作賣花人  
能仁鑑拈拄杖云  
者裏則不然白雲爲蓋  
流水作琴一曲兩曲  
無人會雨過夜塘春  
水深愚菴及云右  
軍筆畫人石三李杜  
文章光燄萬丈老保  
寧可謂盡善盡美  
檢點將來未免笑被  
衲僧鼻孔何故要且  
無佛法道理普慈又  
作麼生蒲團上端坐  
鍼眼裏穿綫西風一  
陣來落葉兩三片  
龍池微云保寧恁麼  
道雖則風流逸格事  
理變彰未免向百花  
爭艷處著脚若是秋  
空皎月木落飄金千  
山露骨萬水澄淨總  
未知消息在

保寧示衆大方無外  
大圓無內無內無外  
聖凡普會瓦礫生  
光須彌粉碎無量法  
門百千三昧拈拄

杖曰總在者裏還會麼蘇嚕蘇嚕悉哩悉哩

靈隱岳云老漢大似業識茫茫無奈船何打破屎斗

古林茂云靈隱搜出心肝要且未見先保寧在山

僧今日重爲拈出會盡萬法一如拈却金圈栗棘也

是泗州見大聖

保寧上堂若說佛法供養大衆未免眉鬚墮落若

說世法供養大衆入地獄如箭射去此二途且道

當說什麼三寸舌頭無用處一雙空手不成拳

石霜尊云大小保寧元來膽小山僧卽不然若說佛

法供養大衆如龍得水若說世法供養大衆似虎靠

山去此二途又作麼生從前汗馬無人識祇要重論

蓋代功

保寧上堂有僧禮拜起以手向懷中作取物呈似

勢師左顧僧又作獻勢師右顧僧復作接物勢師

以手直下指僧擬議師曰祇有者箇更無那箇僧

以手畫一畫師曰果然僧歸衆師呵呵大笑

玉得荊山價倍高逢人猶欲把光韜玳瑁徒自區區

獻終殞楚王笑裏刀 淵菴怡

保寧上堂以手指上以手指下曰者是釋迦拏拏

曰者箇是迦葉合掌曰者箇是阿難展手曰者箇

是甚麼羞慚殺人

雪菴嵩云保寧固乃如是未免汗馬徒勞若據盤山

則不然以手指上指下曰者箇不是釋迦拏拏曰者

箇不是迦葉合掌曰者箇不是阿難展手曰且道是

甚麼復搖手曰說話不投機盡是閒言語

保寧示衆三界惟心萬法惟識檻外雲生簷前雨

滴澗水湛如藍山花開似錦此時若不究根源直

待當來問彌勒

靈然不涉去來今三界都盧一點心檻外春風春蜨

舞門前楊柳曉鶯吟 丹霞淳

潭州茶陵郁山主

楊岐會嗣

因廬山有化士至教令看

僧問法鐙百尺竿頭如何進步鐙曰噫凡三年一

日乘驢過橋一踢橋板而墮忽然大悟遂有頌曰

我有明珠一顆久被塵勞關鎖今朝塵盡光生照

破山河萬朵因此更不遊方

薦福瑤云郁山主向驢前馬後連得些些便乃誇張

街耀以當平生參學拈拄杖卓一下云開先今日爲

伊一鎚擊碎了也顧左右云莫有不甘者麼靠拄杖

下座

失脚溪橋兩眼枯錯將魚目作明珠直饒塵盡光生

也照破山河夢見無無準範

斗笠騎驢過水西莓苔朝雨滑如泥不妨一踢溪橋

斷回首青山天際低大巍倫

一跌成狼藉茶陵路轉迂却將泥彈子認作夜明珠

葛蘆軍

比部孫居士見楊岐會一日楊岐來值視斷次公曰某

爲王事所牽何由免離岐指曰委悉得麼公曰望

師點破曰此是比部宏願深廣利濟羣生公曰未

審如何岐示以偈曰應現宰官身廣弘悲願深爲

人重指處棒下血淋淋公有省

棒下血淋淋眞鎗不博金鴛鴦親繡出休更覓金鍼

雪堂行

宗鑑法林卷三十一

宗鑑法林卷三十二

集雲堂 編

大鑒下十三世

隆興府黃龍晦堂祖心禪師黃龍南嗣因黃山谷乞指

徑截處師曰祇如仲尼道二三子以我爲隱乎吾

無隱乎爾如何理論公擬對師曰不是不是一日

山行次時巖桂盛放師曰聞木樨花香麼曰聞師

曰吾無隱乎爾公釋然卽拜之曰和尚得恁麼老

婆心師曰祇要公到家耳

渠儂家住白雲鄉南北東西路渺茫幾度欲歸歸未

得忽聞巖桂送幽香石溪月

學海波瀾卷未乾幾煩仙履上林巒天香吹落秋風

老不覺相攜到廣寒石林羣

水邊林下舊生涯夢裏還家未是家昨夜月明歸興

動西風一陣木樨花雪機綱

木樨花香吾無隱一堆火後幾曾藏夜深不用挑燈

火儘有牀前明月光三卷成

晦堂與夏倚公立談肇論至會萬物爲自己者及



情與無情共一體處時有狗子臥香桌下師拈壓尺擊狗又擊香桌曰狗有情卽去香桌無情自住情與無情如何得成一體公立不能對師曰纔涉思惟便成贖法何嘗會萬物爲自己

瑞巖愠云黃龍老漢傷慈不少公立如入寶山空手而回諸人要會萬法爲自己情與無情共一體麼撻殺有情狗子碎却無情香桌盡情收拾將來與他一團束縛拋向東洋大海自然灑灑落落雖然更須知有頂門一竅始得拈拄杖擊香桌云阿喇喇阿喇喇登山脚膝酸喫水舌頭滑十字街頭石敢當對月臨風吹尺八平陽恣云抽釘拔楔卽不無瑞巖怎奈傷鋒犯手何如有情狗子仍教他守夜無情香桌且留來使用諸人要會萬法爲自己情與無情共一體麼且聽拄杖子爲你著力擊香桌一下

晦堂室中豎拳示衆曰喚作拳頭則觸不喚作拳頭則背未審喚作什麼

赤體更無藏隱處黃龍本語先分付若將見解上門來他家自有通霄路道場林

背觸人難會憑君仔細看片雲纔出洞遮却面前山  
雪巢一

晦堂一日齋時聞版聲乃喚打版行者打五棒須臾鐘鳴又喚打鐘行者打十棒却呵呵大笑衆纔坐定師乃入堂白槌曰大衆齋畢便歸方丈永寧鼎云行者喫棒自是話行天下要問黃龍老漢還得飯喫也未

隆興府寶峰雲菴眞淨克文禪師

黃龍南嗣

參黃龍不

契見香城順城固甚處來師曰黃龍來曰黃龍近日有何言句師曰黃龍近日州府委請黃檗長老龍垂語曰鐘樓上念讚牀脚下種菜有人下得語契便請住持勝首座曰猛虎當路坐龍遂令去住城曰勝首座祇下得一轉語便住黃檗佛法未夢見在師大悟方知黃龍用處

十字街頭石敢當離家日久却忘鄉鱸魚畢竟江南美蓴菜浮波橋正黃三宜孟

寶峰因黃龍南曰適令侍者卷簾問渠卷起時如何渠日照見天下放下簾時如何渠曰水洩不通

不卷不放時如何渠無語汝作麼生師曰和尚替侍者下涅槃堂始得龍喝曰關西人果無頭腦乃顧視旁僧師却指之曰祇者師僧也未夢見龍大笑

白巖符云黃龍道渠無語汝作麼生若是今時學者十個五雙便向他不卷不放時著倒是他寶峰却不恁麼寶峰道和尚替侍者下涅槃堂始得若是如今師家不是蠻罵便是瞎棒是他黃龍却不恁麼且道他父子節文在甚麼處覲面當機雷電疾還他家富產兒嬌雖然總不禁旁僧冷笑

寶峰示衆今朝九月一夜來霜氣寒當知門外路一一透長安喝一喝

瑞巖愠云老實淨向淨潔地上撒屎撒溺當時一衆甚處去也山僧敢將狗尾要續其貂今朝九月一山風吹面寒知音千里外白鴈報平安是則是未見作家不見道纔有是非紛然失心

寶峰自香城歸見黃龍龍問甚處來師曰特來禮拜和尚曰恰值老僧不在師曰向甚處去曰天台

普請南嶽遊山師曰恁麼則學人得自在去也曰脚下屨甚處得來師曰廬山七百五十文唱得曰何嘗得自在師指屨曰何嘗不自在龍頷之

資福廣云黃龍攻其所不守寶峰守其所不攻衝車臨埤火箭飄空敵手相逢勝負難決餘糧驚喚隨聲應奪得荆蠻一箇船且道賓家分上主家分上

寶峰上堂衲僧門下無非過量境界自在禪定喝一喝曰豈不是過量境界又警欬一聲豈不是自在禪定呵呵呵將此深心奉塵刹是則名爲報佛恩

雲居莊云徑山則不然拈拄杖云得之於心事事無礙應之於手法法圓成靠拄杖云它家自有通霄路不向如來行處行

寶峰因諸山聚會佛印元禪師後至問曰雲居何來遲印曰爲著艸屨從歸宗肚裏過所以遲師曰却被歸宗吞却了也印曰爭奈吐不出師曰吐不出即屨出

永寧鼎云我若作寶峰待云從歸宗肚裏過遂搗住

云且道蓋膽毛有幾莖直饒佛印盡其伎倆也作手  
脚不及

寶峰華嚴六頌事事無礙頌曰事事無礙如意自  
在手把豬頭口誦淨戒趁出淫房未還酒債十字  
街頭解開布袋

一指海云者裏即不然事事無礙如意自在食不論  
頓睡懶解帶見惡不瞋見好亦愛一生從來不會捏  
怪且道山僧底是寶峰底是

寶峰示衆頭陀石被莓苔裹擲筆峰遭羅薛纏羅  
漢院裏一年度三箇行者歸宗寺裏參退喫茶

天童華因僧問此理如何童云他是關西子愛說川  
僧話

寶峰上堂洞山門下要行便行要坐便坐盃盃裏  
扇矢淨餅中吐唾執法修行如驢曳磨

鏡堂清云聞說關西子沒頭腦原來祇在者裏無端  
將世尊三大阿僧祇劫所立禁戒一一滅裂殆盡乃  
喝一喝當時若有人下得者一喝不惟表參學眼正  
且使洞山向去做個本色宗師不敢向淨白地上胡

扇亂唾罵拈拄杖莫有爲洞山抱不平者麼靠拄杖  
比擬張驢兔亦不遇

隆興泐潭洪英禪師黃龍南嗣僧參拜起便垂下袈裟

角曰脫衣卸甲時如何師曰喜得狼烟息弓弣壁

上懸僧却攬上袈裟曰重整衣甲時如何師曰不

到烏江畔知君不肯休僧便喝師曰驚殺我僧拍

一拍師曰也是死中得活僧禮拜師曰將謂是收

燕破趙之才元來是販私鹽漢

瀛山閻云將軍節制屈殺偏裨當時者僧何不道賊

賊便出如菴彰云者僧衝鋒抗敵不覺腦後著戈

泐潭雖能布長蛇大陣怎奈無生擒活捉之機顧左

右云者裏還有不顧危亡單刀直入者麼如無看山

僧向餓虎口中奪食去也拈拄杖一齊趁出

破趙收燕主閻才輪機奪轉勝籌來通身是膽衝鋒

便戰出重圍又被圍雪關問

吉安龍慶慶閒禪師黃龍南嗣因問訊次龍曰據汝知

見祇得上梢不得下梢師曰某甲上梢亦得下梢

亦得龍曰如何是上梢師曰風過樹頭搖龍曰如

何是下梢師曰刀斫斧鑿龍曰老僧即不然師曰如何是上梢龍曰頭鬚鬚耳卓朔師曰如何是下梢龍曰緊捎艸鞦師曰謝師答話龍便喝

時人祇見蘆花白不見蓼花開又紅若問樹頭的意西風昨夜到梧桐鐵機信

龍慶因黃龍問得座披衣向後如何施設師曰遇方即方遇圓即圓龍曰你與麼說話猶帶唇齒在師曰某甲祇如是和尚又作麼生龍曰近前來與汝仔細說師撫掌曰三十年用底今日捉敗龍呵呵大笑曰一等是箇精靈

三味真云龍慶只知捉敗黃龍不知被黃龍捉敗三味恁麼也帶唇齒此便是三十年代施設也請勘之

福州玄沙合文明慧禪師黃龍南嗣僧問如何是道師

曰私通車馬僧進一步師曰官不容鍼

酬機也祇看來機善打團圜脫得團擬騁驄千里

步金鞭被我掣將歸六雪問

黃檗積翠永菴主黃龍南嗣問僧審奇汝久不見何所

爲曰近見偉藏主有箇安樂處師曰試舉似看奇

乃敘所得師曰汝是偉未是奇莫測歸以告偉偉曰汝非永不非奇愈疑走積翠質之南公公大笑之師聞作偈曰明暗相參殺活機大人境界普賢知同條生不同條死笑倒菴中老古錘

陽山頂云三個老漢綿裏有鍼泥中有刺明賞暗罰則不無若是衲僧巴鼻天地懸隔何故不合說是說非

福州長慶惠暹文慧禪師浮山遠下南嗣僧問離上座之寶刹登延慶之道場如何是不動尊師曰孤舟載月明日忽遇檣棹俱停又作麼生師曰漁人偏愛宿蘆花

灤山閭別云或有問山僧如何是不動尊祇向道燒香禮拜著

大鑑下十四世

蘄州東山法演禪師白雲端嗣參白雲遂舉僧問南泉摩尼珠話請問雲叱之師領悟獻投機偈曰山前一片閒田地叉手丁寧問祖翁幾度賣來還自買爲憐松竹引清風雲印可之

妙喜杲云山前一片閒田地元來記得在叉手丁寧  
問祖翁祇爲契券不分明幾度賣來還自買難爲牙  
保人爲憐松竹引清風喝一喝云乞兒見小利 文  
峰玉徵云賣來還自買卽不問諸人且道畢竟喚什  
麼作一片閒田地直饒你道得分明我更要問你討  
契券在

山前田地賣還買松竹清風痛自憐堪笑夢中誇富  
貴覺來那值半文錢蓮菴演

忍死丁寧見白雲一杯鴆酒十分斟若教不飲空歸  
去田地無由被陸沉竹屋簡

人情得富便稱強松竹清風不掩藏何似羲皇北牕  
下解衣高臥納餘涼理安問

愛他風雪耐他寒獨自淒淒把釣竿夜靜雲開孤月  
露不堪看處也堪看清風下載月色將闌拋綸假寐  
倚闌干天水廣

東山曰老僧遊方十餘年參數十員善知識將謂  
了當及到浮山圓鑑會下更開口不得後又到白  
雲因敲破一箇鐵酸餡真是百味具足且道餡子

一句作麼生道花發雞冠媚早秋何人能染紫絲  
頭有時風動頻相倚似向階前鬪不休  
靈隱嶽云東山恁麼說話猶欠悟在

白雲鐵酸餡衲僧難下口忽然較得破大作獅子吼  
月菴果

東山出隊歸示衆出隊半箇月眼不見鼻孔失却  
祖師禪拾得箇骨董且道向甚處著一分奉釋迦  
牟尼佛一分奉多寶佛塔

峰頂郭云山僧出隊五個月眼睛鼻孔無差別有人  
問我祖師禪劈頭拄杖要見血祇如遇釋迦牟尼佛  
多寶佛塔又作麼生乃和南云恭惟合山頭首久別  
衆慈萬福萬福 徑山杲云徑山出隊八十餘日鼻  
孔常與眼睛相見亦無祖師禪可失亦不曾拾得骨  
董則無以奉釋迦牟尼佛亦無以奉多寶佛塔畢竟  
得箇甚麼夜靜水寒魚不食滿船空載月明歸

東山因僧問如何是佛師曰口是禍門  
的的當陽句明明箭後路著靴人喫肉赤脚人趁兔  
徑山杲

口是禍門電掣雷奔從竭出海震動乾坤鼓山理

東山因僧問一大藏教是箇切脚未審切阿那箇  
字師曰鉢囉孃曰學人祇問一字爲什麼却答許  
多師曰七字八字

昭覺勤云迅雷不及掩耳 仰山欽舉畢卓拄杖云  
十卜千千 甄峰承云利似倚天長劍鈍如無孔鐵

錘 天目律云者僧問個切脚東山乃恁麼答且道  
是什麼義紅塵堆中花街柳巷僻谷窮山白雲澹蕩  
脣上必并班豹剝舌頭當的帝都丁自古上賢猶不  
識造次凡流豈可明石菴招

一大藏教是切脚東山切得鉢囉孃胸中憤氣盤不  
得忽作虹霓萬丈長即菴覺

誰家畫閣露嬌娘滿額梅花別樣粧著眼且須觀看  
破莫聞聲外喚檀郎夾山像

子晉廟前山月明人聞往往夜吹笙鸞吟鳳唱聽無  
拍多少霓裳散序聲鐵容元

東山示衆四五百擔麥二三千擔稻好箇休糧方  
著婆不得妙

靈隱獄云東山老人好語祇是探頭太過香山有個  
方便也要諸人共知透得金剛圈細嚼鐵酸餡一飽  
忘百饑始信不相賺 伏龍長云管取有錢常住不  
無演祖若是將無作有拔貧助富還他無明老漢始  
得米不蓄一粒菜不栽一莖任渠往來者喫得飽膨  
臍

東山因僧問如何是佛師曰肥從口入

老去眉鬚似雪霜元來習氣尙難忘少年無限傷心  
事一度思量一斷腸佛鑑勸

牙根爛嚼真彌勒腹裏橫吞老釋迦大地虛空皆得  
飽者回不到負檀家心聞責

東山示衆釋迦彌勒猶是它奴且道它是阿誰便  
下座

開聖覺因東山舉問答云胡張三黑李四山然之時  
圓悟爲首座乃云好則好恐未實次日入室山仍舉  
前話覺云昨日向和尚道了也山云道什麼云胡張  
三黑李四山云不是不是云和尚爲甚昨日道是山  
云昨日是今日不是覺大悟 萬峰蔚云你還識他



麼不離者個卽者個我是阿誰誰是我不審不審  
過蹉過 平陽恣云大小東山將常住果子私自受  
用天童則不然釋迦彌勒猶是他奴且道他是阿誰  
高聲召云大衆今晚小盡二十九普請大衆喫茶去  
拈拄杖驟步下應供堂 鐵佛原云諸人要知東山  
端的麼問取古廟裏中央第一尊泥塑土地位下黑  
將軍 隱明綸云大小祖師原來膽小道不得何不  
問我炭塹子復云炭塹子莫潑水擬擡頭千萬里  
老年經節臘樂事甚悠悠不及兒童日都來不解愁  
南堂靜

釋迦彌勒是他奴古今禪流知也無好酒不須懸望  
子醉酸何必挂葫蘆野牛平

孤峰高臥且忘身那管親王與重臣自有一雙青白  
眼未曾輕眎等閒人翠霞寧

寂寂簾垂無影象六街月鎖不逢人怪來九五尊嚴  
甚祇爲從來不對賓眉淚滄

東山因僧問如何是臨濟下事師曰忤逆聞雷  
從前忤逆怕聞雷不似大蟲看水磨孤峰頂上要同

行十字街頭還共坐鼓山珪  
者僧苦下打斧拳霹靂聲中宇宙昏驚起無明金燄  
鳥劈開滄海取龍吞東山空

東山示衆我有一物不屬凡不屬聖不屬邪不屬  
正萬事臨時自然號令

瑞嚴愠云大小五祖何異宋人以死鼠爲璞山僧則  
不然世有一物在凡屬凡在聖屬聖在邪屬邪在正  
屬正萬事紛紛何須號令拈拄杖卓一下 拙菴朴  
云清溜溜白滴滴描不成畫不出觀著則眼睛瞎  
著則腦門裂且道與演和尚道底是同是別

東山問僧曰倩女離魂那箇是真底

二女合爲一媳婦機輪截斷難回互從來往返絕踪  
由行人莫問來時路普融藏主

祇是舊時行履處等閒舉著便諸譌夜來一陣狂風  
起吹落桃花知幾多慈受深

縱使百千劫所作業不忘因緣會遇時果報還自受  
或菴體

良宵愛月上危樓幾處笙歌幾處愁歌管未闌愁未

歇忽然天曉一時休且菴仁

憶昔春風上苑行爛窺紅紫厭平生如今再到曾行處寂寂無人艸自青萬菴柔

南枝向暖北枝寒何事春風作兩般憑仗高樓莫吹笛大家留取倚闌看雪菴

數聲羌笛最關情去路迢迢恨不勝彷彿暮雲歸未合遠山無限碧崢嶸惟菴然

慣攜書劍走江湖白手成家事豈孤曾憶當年作客處也聽人前唱鷓鴣清水洗

初三初四月朦朧不似金鈎不似弓誰把玉環敲雨段半沉滄海半懸空大咸咸

無端鑿壁暗偷光春氣紛紛意渺茫蝴蝶空餘魂夢冷枝頭狼藉不成香菴

翻翻黃鳥叫闌闌洞口雲深艸木寒一陣和風吹曉嶂滿庭花露泣闌干菴

斗柄初回日漸長羅浮春色十分香一枝橫亞清波上引得遊蜂上下忙菴

與郎分袂侍郎行一對鴛鴦畫不成枕上夢回春漏

寂透簾斜月照孤衾侶嚴荷

東山示衆前回底今日使不著今日底後回使不著使不著重遭撲自古至於今誰錯誰不錯忽有箇漢出來道白雲不是今日錯自曰錯

保寧茂云扶豎臨濟正宗揭示楊岐奧旨還他東山始得雖然也是泥裏洗土塊山僧卽不然去年底今年用得著今日底後日用得著用得著重拈却一步闊一步一著高一著或有個漢出來道長老與麼說話也是無孔鐵錘祇向他道若是無孔鐵錘正用得著

東山垂語路逢達道人不將語默對且將什麼對來說是非者便是是非人誠哉是言也弄物不知名月林觀

路逢達道人不將語默對攔腰劈面拳直下會便會無門開

東山示衆譬如水牯牛過牕櫺頭角四蹄都過了因甚尾巴過不得

天童華云者樣說話多年在肚皮裏信知天下無人

理會所以密之三寸今日拈出敢問諸仁者既是大  
底俱過了爲甚尾巴過不得 鍾林則云者個是東  
山演祖不了事處老漢參方三十年也有兩件不了  
底事是那兩件事饑來要喫飯困來要打眠 虎丘  
森云今爲諸人說個譬喻如蟻螟蟲能向火燄上作  
窠因甚閭浮大地無他棲泊處良久云一曲兩曲無  
人會雨過夜塘秋水深 天花悅云諸人還會也無  
若也會得未免白日見鬼若也不會亦未免白日見  
鬼 大梅幟云過得過不得則且置畢竟喚什麼作  
牛尾巴良久云遍界不藏全體露絲毫有見事還差  
喝一喝

龜本真靈物都緣不自知一朝親脫殼直透九天飛  
如菴用

浪靜風恬意轉殊滿天星斗月輪孤時人休戀一湖  
水來上扁舟泛五湖鉞關樞  
功齊功化何曾了已到家鄉未徹頭直須翻轉乾坤  
也楊子江心水倒流瑞白雪  
髑髏謾說遇知音天上人間亦浪尋敲到第三雙眼

直誰知枯木有龍吟 豁堂品

玉人夢暖不知春轉棹蘆洲雪月傾耕破扶桑雲萬  
里等閒換步喪通身通身喪絕伎倆尾巴不在腮欄  
上南山雲起北山雨平地滔天翻白浪 寧遠地

神龍脫骨躍天飛尙憶寒潭春水湄霹靂一聲魂膽  
落九霄從此去無依 隱含數

塊雨條風三月天暖風何處不陶然途中多少尋芳  
客誤聽黃鸝作杜鵑 敏學聖

賊賊何故腮欄過不得曾遭毒手墮深坑尾巴尖上  
酬恩德報君知重擊節鷄子不在新羅國 卓靈常

風敲月戶展同冷雨打茅堂暑亦寒高臥懶尋人事  
俗詩腸僅比酒腸寬自聞宣

陳年心事總消磨老去光陰白髮多高閣淩煙名不  
挂風前慵聽太平歌 章外

風雨無端妒落梅紙牕竹榻亂聲來一場好夢都驚  
散蓬戶無人門自開 綠雨蕉

東山因僧問牛頭未見四祖時如何師曰頭上戴  
曇珠曰見後如何師曰青布遮前曰未見時因甚

百鳥銜花獻師曰富與貴是人之所欲曰見後爲什麼不銜花師曰貧與賤是人之所惡

徑山杲云師翁雖則善起來機怎奈語驚時聽徑山今日有兩語要與師翁相見牛頭未見四祖因甚百鳥銜花獻茅屋上安鷗吻見後因甚不銜花獻佛殿裏掘東司 靈巖儲云徑山固是別展旗槍未免分作兩處國清亦有一語要與徑山相見牛頭未見四祖因甚百鳥銜花獻不快漆桶見後因甚不銜花獻不快漆桶且道東山底是徑山底是國清底是一僧纔出清云不快漆桶

玉花金草滿籬東翠竹蒼松趣更濃杜宇一聲清夢斷月明寂寂萬山空大善講

宗鑑法林卷三十二

宗鑑法林卷三十三

集雲堂編

大鑑下十四世

東山一日持錫遶廊曰莫有屬牛人問命麼衆無語自曰孫臏今日開鋪更無一人垂顧可憐三尺龍鬚喚作尋常破布

無端平地起干戈爭似屬牛人更多滿面慚惶無著處低頭依舊入烟蘿高峰妙

忽然平地掘深坑埋沒良家多少人大似颶灰空裏去歸來不覺一身塵徑庭宗

蘆花深處靜垂綸雨夕烟朝春復春放扁舟幾寒水竟難逢個獨醒人鎮谷元

東山示衆今夏無可管顧諸人近作得一家講遂擡手曰囉囉招囉囉搖囉囉送莫怪空疎伏惟珍重

薦福瑤云老東山龍肝鳳髓百味具足怎奈美食不中飽人餐 伏龍長云一個鐵酸餡百味具足知他祭了多少閒神野鬼直饒一畝百雜碎到者裏急須

吐却

東山謝監收上堂人之性命第一須是○欲得成此○先須防於○若是真○人○○

理安問云大小五祖弄巧成拙 寶掌白云會麼山

僧今日不惜舌頭與諸人略爲道破良久云摩斯吒

心肝要且不在樹頭上 寶峰弁云賊不打貧家

法林音云人之性命第一離却○若要離却○先須

識得○若是真○人搖手云斷不○○

一二三四五六圈心肝粉碎觸體穿若將方木投圓

絮醜姥爭教得少年高峰妙

鬼爭漆桶顛顛擲去拋來細自看匝地一聲籊爆

折六花迸裂不成團 古帆機

弟兄五六像孃生聲氣相同總一門黑漆崑崙須著

眼莫將名字錯評論 劍關範

上山下山入山谷溪中落日留我宿本意逃名入市

塵那知名落今人目鳥喃喃花簇簇幾片閒雲挂松

竹咄君子哉若人慎幽獨雲壑弁

蒲蘆銜青蟲終朝呪類我青蟲皮膚脫飛出盡蒲蘆

止谷聲

東山示衆白雲不會說禪山門開向兩邊有人動  
著關板兩片東扇西扇

月江印云五祖老人蓋爲慈悲之故有落艸之談育  
王不會說禪破屋覩見青天等閒從頭蓋覆寧免紙  
裏麻纏但願有錢留客醉也勝騎馬傍人門

東山上堂山僧昨日入城見一棚傀儡不免近前  
看或見端嚴奇特或見醜陋不堪動轉行坐青黃  
赤白一一見了仔細看來元來青布幔裏有人山  
僧忍俊不禁乃問長史高姓它道老和尚看便了  
問甚麼姓大衆山僧被它一問直得無言可對無  
理可伸還有人爲山僧道得麼昨日那裏落節今  
日者裏拔本

天寧琦云誰家別館池塘裏一對鴛鴦畫不成 白  
嚴符云五祖是從那邊過來底人胸次間要禪道佛  
法氣息一點也無故能向虛空中建城雉海面上架  
樓臺雖然尙有一人呵呵大笑若識得此人許你具  
透關眼

東山畢昔有秀才著無鬼論一日鬼現身曰你道無我吟秀才無語師曰當時祇以手作鶉鳩棠曰谷谷孤

說有道無徒費力現身無語強分疎祇消一個鶉鳩棠百怪千妖盡掃除此山應

東山示衆祖師說不著佛眼看不見四面老婆心爲君通一綫便下座

徑山及云若教頻下淚滄海也須乾 全室渤云者老漢大似靈龜拽尾拂迹成痕天界卽不與麼卓拄杖下座

東山因僧問如何是爲人一句師曰門前石塔子門前石塔子八白與九紫方道旣分明免被巡官使雪堂行

東山因僧問如何是佛師曰露胷跣足曰如何是法師曰大赦不原曰如何是僧師曰釣魚船上謝

### 三鄭

徑山杲云此三語中一語具三三三要四料揀四賓主洞山五位雲門三句百千法門無量妙義若檢得

出許你具一隻眼 天寧琦云三三三要四料揀四賓主洞山五位雲門三句百千法門無量妙義大似頭上安頭天寧今日爲諸人抽却釘拔却楔做一個灑灑落落大丈夫兒豈不好何故喫他殘羹餽飯隨他脚後跟轉被他喚作無地頭漢慚惶殺人 起綱宗云語不離窠臼焉能出蓋纏有問山僧如何是佛向道泥豬癩狗如何是法激濁揚清如何是僧驢顯馬面且道與演祖是同是別

東山每遇僧來請益祇曰無者閒工夫彼此且無相負累行人莫不失鈎錐雖然不睹衆生眼也好拳頭劈口椎龍門遠

東山因諸寺長老入山上堂臨濟入門便喝是什麼熱盃鳴聲德山入門便棒拗曲作直雲門三句洞山五位大開眼了作夢何故如此國清才子貴家富小兒嬌

雲居莊云五祖老人太似將常住物作自己人情徑山見處也要諸人共知乃豎起拂子云德山臨濟洞山雲門祇今在拂子頭上各說不二法門了一時走



入淨瓶裏澡浴去也何故如此水流原在海月落不離天

東山凡見僧來便曰屈屈僧曰屈作甚麼師曰如今不屈更待何時

盡力不奈何按牛頭喫艸若無錦繡文難以論嘉藻  
龍門遠

東山上堂將四大海爲硯須彌山爲筆有人向空中寫得祖師西來意五字老僧大展坐具拜它

長翁淨云當時天童若見祇對他道款出囚口今則莫有同款者麼既無依倚斜去雁驚破海天秋梅源蔭以拂子空中畫一畫云祖師西來意寫了塞天地敢問老太平何處展坐具衆中可有爲太平轉身吐氣者麼若無莫怪梅源鐵筆無情便擲拂子歸方丈

東山上堂太平不會禪一向外邊走臘月三十日贏得一張口且道那箇是太平口自曰兩片皮也不識

雪竇雲云山僧則不然雪竇不會禪一向家裏坐臘

月三十日分明成話墮扯索底扯索擡木底擡木谷應山鳴聲光轆轤阿呵呵夜深山寺煖烘烘個個寮房一爐火

東山問僧離却四大五蘊那箇是你清淨法身

堂堂白日上刀梯任是崑崙眼亦迷多謝門前案山子春來秋去泄天機雪堂行

東山示衆如何是禪閣浮樹在海南邊近則不離方寸遠則十萬八千畢竟如何禪禪

臥龍先云穹窿也有個道處如何是禪閣浮樹在海南邊撐天拄地拄地撐天巧說不得祇要心傳畢竟如何禪禪 祖燈紹云二大老同坑無異土虎丘則不然禪禪月落不離天輝今鑑古無黨無偏擬心湊泊地隔天懸畢竟如何卓拄杖云參

東山展手問僧曰因何喚作手

先祖滔滔無固必後人俳俳有雌雄巨靈擡手無多子打破華山千萬重南巖勝

東山示衆夫爲禪客如出塞將軍你將得雲門半片胡餅來我便與半箇須彌山若不如是焉敢稱

禪客

善權賢云五祖怎麼說話大似倚富欺貧壓良爲賤

東山因三佛侍坐亭上夜話及歸鐙已滅令各下

一語懃曰彩鳳舞丹霄遠曰鐵蛇橫古路勤曰看

脚下師乃曰滅吾宗者克勤耳

懷壁藏珠夜光輝家私總被賊偷窺都來籍沒和官

送萬戶千門一窺埋理安問

暗裏相將各自猜是神是鬼得人哀最憐夜半窺門

賊却被狗兒斷送回福嚴容

摸象盲人說異端呼牛喚馬各般般枕翻打斷華胥

夢莫怪門前倒剎竿哀翁盛

三春方賞太平時杜宇聲聲喚落暉沒興一時難就

賦蹋殘明月浩歌歸天資粹

東山一日陞座顧衆曰八十翁翁輓繡毬便下座

宗泰欣然出衆曰和尚試觀看師作打杖鼓勢操

蜀音唱綿州歌曰豆子山打瓦鼓楊平山擲白雨

白雨下取龍女織得絹二丈五一半屬羅江一半

屬玄武泰聞大悟掩師口曰祇消唱到老裏師大

笑

慈環聰云可笑演祖三十年不改舊鄉談操蜀音打

蜀鼓知他是佛意是祖意宗泰好聽曲調不覺渾身

墮在聲色裏以當平生直至而今轉身不得諸人還

肯錦山怎麼道麼喝一喝 法林音云山自崑崙發

來其勢必險水從孟門源出其流必峻東山一番施

設直使千百年後聞者無不當下消然可惜末後猶

欠勸絕以致宗泰坐在淨白地上無由轉身何不待

伊云祇消唱到老裏便與一掌云又被風吹別調

東山示衆如何是祖師西來意庭前柏樹子怎麼

會則不是如何是祖師西來意庭前柏樹子怎麼

會方始是

白巖符云怎麼會則不是滴淚斬丁公怎麼會方始

是缺牙封雍齒顧左右云大小東山爲諸人一捏粉

碎了也還會麼 中洲岳云龍逢比干吾取其心不

取其術蘇秦張儀吾取其術不取其心 法林音云

諸人還見東山老人立地處麼良久云朝三與暮四

喜怒任狙公

良工何必更輔大治未嘗易林同是多年滯貨看他  
點鐵成金遠峰素

奇謀六出陷英雄曾被英雄陷圓中不是一身兼兩  
藝那來下載有清風思懶融

阿孃年少鬢如霜剔起雙眉丈二長歸到畫堂沉醉  
後撻臂換手哭穹蒼獨超方

東山示衆狗子無佛性也勝貓兒十萬倍

愚菴孟云撲破南泉窠窟掀翻趙老家私再看東山  
爲什麼平白地上分個勝負爲復抑揚之語耶爲復  
故意扭捏耶爲復一期方便耶若作恁般見解不惟  
不識東山要見南泉趙州遠之遠矣何故不見道當  
時摩竭令幾喪目前機 梅逢忍云演和尚前凶後  
不吉

撥動靈機禍滅門千鈞爭肯射蜻蜓閻浮自惜知恩  
少墻壘深埋沒路行雪邊照

擊珠絲斷夢魂消風卷銀蟾入海嶠堪笑夜明簾外  
客轉身無地避招搖冰露融

東山示衆有則奇特因緣舉似諸人欲說又被說

礙不說又被不說礙

大巍倫云大小演祖大似靈龜曳尾一言既落入耳  
如何諱得老僧也有一則奇特因緣索性舉似大方  
令他倚門傍戶者一個個壁立千仞

提刑郭正祥居士字功甫見白雲端到雲居請佛印元

陞座公拈香曰覺地相逢亦何早鶴臬布衫今脫  
了要識雲居一句玄珍重後園驢喫艸大衆此一  
瓣香薰天炙地去也印曰今日不著便被者漢當  
面塗糊便打乃曰謝公千里來相訪共話東山竹  
徑深借與一龍騎出洞若逢天旱便爲霖擲拄杖  
下座公拜起印曰收得龍麼公曰已在者裏印曰  
作麼生騎公擺手作舞便行印撫掌曰祇有者漢  
猶較些子

白巖符云功甫龍即騎矣祇是不能爲雨爲霖當時  
待道收得龍麼便好與他掀倒法座

郭公一日謁白雲雲問牛醇乎公曰醇矣雲厲聲  
叱之公拱而立雲曰醇乎醇乎於是爲公陞堂曰  
牛來山中水足艸足牛出山去東觸西觸

因僧問承師有

靈巖儲喝一喝云者老漢何異緣木求魚天寧今夏

拋却絲綸冷坐巾幘山前看他鳶飛魚躍鳳走麟奔  
總不暇顧著數盡落霞對明月撥開松影露青天偶  
爾有個螭螟撞倒面前並不與他京三十四一任越  
水吳山何故若將有意爲有意往往事從有意生  
百愚斯云可惜黃龍勞而無功能仁今夏亦向八百  
里鑑湖上撒個漫天網子祥麟瑞鳳無所不有豈但  
錦鱗紅尾諸昆仲且這用鉤是用網是向者裏個儘  
分明不惟自己有出身之路亦乃坐斷天下人舌頭

死心示衆羸言及細語皆歸第一義你者一隊尿  
牀鬼子三生六十劫也未夢見第一義在

平陽恣云死心怎麼說話爲是眼蓋諸人氣吞一切  
耶爲復第一義諦不可圖度耶爲復慣啓悱發激厲  
將來耶

死心上堂行脚高人解開布袋放下鉢囊去却藥  
忌一人所在須到半人所在須到無人所在也須  
親到

天童傑云死心有年有德語不妄發如大冶精金千  
煅萬煉始成繞指然後裁截并無虛棄雖然畢竟意  
歸何處三邊一箭收功後四海何愁不太平 古林  
茂云者般說話如黑石蜜中邊皆甜雖然不因夜來  
雁爭見海門秋 白巖符因僧問如何是半人所在  
巖云未聞梅破臘云如何是一人所在巖云尚有菊  
擎霜云無人所在還用到也無巖便喝云者瞎漢亂  
撞作麼

死心因太史黃庭堅參師問死心死學士死彼此  
燒作一堆灰向甚處相見堅無語師曰晦堂處參  
得底用未著在堅後左遷黔南忽有省乃曰尋常  
被天下老和尚瞞却多少惟死心道人不肯可謂  
眞實相爲

瀛山闇云鐵面去皮晦堂析骨死心又敲骨出髓矣  
山谷始得疑情盡命根斷若到山僧者裏且立一邊  
著爲什麼鐵壁從渠透銀山更要通 石霜尊云死  
心捨命從人太史一死更不再活

泥沙瓦礫總成金九轉還伊丹性靈鷄犬亦隨仙子  
去迢迢佳氣入宸庭玉巖

痛飲酩酊倒臥泥翻身雨過萬峰曦春歸漫作刀頭  
夢柳色烟籠十里堤御之龍

澧州夾山曉純禪師黃龍心嗣以木刻作一獸獅子頭

牛足馬身每持出示衆曰喚作獅子又是馬身喚  
作馬身又是牛足畢竟喚作什麼令僧下語皆不  
契師示頌曰軒昂獅子首牛足馬身材三道如能  
入玄門疊疊開

狡計奸謀度劍門虎符塞外息烟墩五丁不鑿通牛  
道秦惠何由得并吞衆龜鼎

隆興府兜率從悅禪師眞淨文嗣室中設語以驗學者

一曰撥艸瞻風祇圖見性即今上人性在什麼處  
瑞安川云餓狗喫絳綬

陰森夏木杜鵑鳴日破浮雲宇宙清莫對曾參問曾  
皙從來孝子諱爺名張無盡

赤脚波斯叩海門黑風吹浪暗昏昏三更掣斷青霞  
鎖笑看驪龍戲子孫中峰本

二曰識得自性方脫生死眼光落地時作麼生脫  
瑞安川云鷄寒上樹鴨寒下水

人間鬼使符來取天上花冠色正萎好個轉身時節  
子莫教閻老等閒知張無盡

空奮雙拳窮滴滴橫擔片板赤條條夜來得個揚州  
夢騎鶴腰錢跨九霄中峰本

三曰脫得生死便知去處四大分離向甚麼處去  
瑞安川云合取兩片皮復云古人一期垂示可謂老  
婆心切血滴滴底豎拂子云會麼冬不寒臘後看

鼓合東郵李大妻西風曠野淚霑衣碧蘆紅蓼江南岸却作張三坐釣磯張無盡

鐵狗銅蛇正奮瞋風刀火鋸肉成塵茫茫長夜幾經劫舉眼無親怕殺人中緣本

兜率因僧問提兵統將須憑帝王虎符領衆匡徒密佩祖師心印如何是祖師心印師曰滿口道不得曰祇者箇更別有師曰莫將支遁鶴喚作右軍鵝

驅霆走電降絲綸塞北安南悉已遵何物癡頑逃法化亂將鼠伎攪烟塵元祚裕

東京法雲佛照杲禪師真淨文嗣師以力參深到語不

入時每示衆老僧熙寧八年文帳在鳳翔府供申當年崩了華山四十里壓倒八十村人家汝等後生茄子瓠子那裏知得或問曰寶華王座上因甚麼一向世諦師曰癡人佛性豈有二種耶

白巖符云者漢大似爲魅所著白日見鬼不知惑亂多少人山僧今日直貶向鐵圍裏永不許伊出頭何故太平天下那許妖言 法林音云法雲老人用盡

自己心笑破他人口吹餘向天台石梁橋下斫得根短拄杖上至非非想天下至金剛水際卓一卓帝釋心驚舉一舉二乘膽喪阿修羅王在藕絲孔中揚聲大叫云孔明先生邵康節先生劉伯溫先生遂喚侍者可曾將得龜殼來

隔水何人歌竹枝動人情思極幽微夜深轉入單于調月朗風高聽者稀盧堂愚

法雲因一座主曰禪家流多愛脫空師乃問承聞座主講得百法論是否曰不敢師曰昨日晴今日雨是什麼法中收主無對師曰莫道禪家流多愛脫空好主抗聲曰和尚且道是什麼法中收師曰二十四時分不相應法中收主乃禮謝

天寧琦云雲自帝鄉去水歸江漢流

昨日晴今日雨時分不相應二日後看取徑山杲

福州九峰希廣禪師寶峰文嗣遊方日謁雲蓋智乃問

興化打克賓意旨如何蓋下禪牀展兩手吐舌示之師打一坐具蓋曰此是風力所轉又問石霜琳霜曰你意作麼生師亦打一坐具霜曰好一坐具



祇是不知落處又問真淨淨曰你意作麼生師復

打一坐具淨曰它打你也打師於言下大悟

理安問云三大老中有一人堪爲佛祖之師有一人堪爲人天之師有一人自救不了且那個堪爲佛祖之師那個堪爲人天之師那個自救不了檢點得出三十棒一棒也不較若檢點不出三大老爲你證明雖然如是廣道者悟去又悟個甚麼

臨江慧力可昌禪師

黃龍南下東林總嗣

因僧問佛法力

卽不問如何是慧力師曰踢倒人我山扶起菩提樹曰菩提無樹向甚處下手師曰無下手處正好

著力曰今日得聞於未聞師曰莫把真金喚作鎗

報恩琇云如何是慧力向他道喫官酒臥官街當處死當處埋平陽恣云高高山頂立還他慧力深深海底行須是報恩始得然從長檢點一人入佛不能入魔一人入魔不能入佛平陽又不然有問如何是慧力但云山月如銀牽老與閒行不覺過峰西

慧力示衆良久曰十語九中不如一默

古航舟云好與維摩大士結個同參若據我衲僧分

上猶在半途

西江開先行瑛禪師

東林總嗣

因僧問如何是道師曰

良田萬頃曰學人不會師曰春不耕秋無望曰如

何是祖師西來意師曰君山點破洞庭湖

永寧鼎云一腔熱血不向淨地上嘔吐雖然負痛男兒能幾人

雨過前邨四月天一重桑柘一重烟子規啼處斜陽

冷楚水吳山一目連子雍如

眉山蘇軾居士

見東林總

參東林論無情說法話有省

乃獻投機頌曰溪聲盡是廣長舌山色無非清淨

身夜來八萬四千偈它日如何舉似人

上竺智謁護國元舉前頌且云也不易到此田地國

云尙未見路徑何言到耶智云上二句若不到此田

地如何有者個消息國云是門外漢耳智致疑通夕

不寐及曉鐘鳴去其秘書乃別前頌云東坡居士太

饒舌聲色關中欲透身溪若是聲山是色無山無水

好愁人持以告國國云向汝道是門外漢

幻寄懷

云東坡門外漢上竺猶未及門此菴云向汝道是門

外漢且道是贊伊罰伊

洪州勸潭景祥禪師

翠巖真下大渴詰嗣

問僧曰唯一堅密

身一切塵中現如何是塵中現底身僧指香爐曰

者箇是香爐師曰帶累二世諸佛生陷地獄僧罔

措師便打

佛杲洵云看僧全身靠倒景祥滿口含霜末後一箇

罔措一箇令行都謂曲不藏直且道還契古人意麼

潭州嶽麓智海仁仙禪師

大渴詰嗣

因僧問進前三步

時如何師曰撞頭磕額曰退後三步時如何師曰

墮坑落塹曰不進不退時如何師曰立地死漢

白巖符云海和尚祇知嚴霜酷暑不解暖曰春風者

裏則不然進前三步時如何金花滿酌退後三步時

如何紫誥榮歸不進不退時如何仙翁顧問慵回首

天子呼來不上船

宗鑑法林卷三十三

宗鑑法林卷三十四

集雲堂 編

大鑒下十五世

成都府昭覺圓悟克勤禪師

東山演嗣

一日因部使問

道東山山曰提刑曾讀小豔詩否有兩句頗相近

頻呼小玉元無事祇要檀郎認得聲提刑應諾諾

山曰且仔細師適外歸侍立次乃問承聞和尚舉

小豔詩提刑會否山曰它祇認得聲師曰祇要檀

郎認得聲它既認得聲爲什麼却不是山曰如何

是祖師西來意庭前柏樹子吟師有省遽出見鷄

飛上闌干鼓翅而鳴復自謂曰此豈不是聲遂袖

香入室通所得呈偈曰金鴨香消錦繡幃笙歌叢

裏醉扶歸少年一段風流事祇許佳人獨自知山

徧謂山中耆宿曰勤侍者參得禪也

翠眉銀海窺簾影玉尺金釵隔壁音坐對落花明月

上幾人知此斷腸聲

漢月藏

戲水鴛鴦畫不成池邊獨立始分明風流徹底難教

露笑卷羅衣一色新理

安問

半卷珠簾半挂鉤翠眉顰蹙爲誰憂春風舞罷凭闌  
睡花鳥一聲破夢幽頂目微

一段傷心未敢言春深鶯囀落花前玉容一見殘紅  
面半掩紗窻半欲眠閑石乘

奇花激灩吐香清丹鳳徒將野鳥爭不信梧桐棲鴉  
隱朝陽曾聽幾回鳴黎博菴

認著聲豈豈是真鷄鳴薦得更非親堪憐掩耳偷鈴  
客巴鼻渾無誑後人素菴仁

蕭指提刑小艷篇金鷄啼破杏花天知機不在聲前  
得別有靈犀躍海淵對月經

一聲喚醒千秋夢無限風光更屬誰舉目了然非外  
物月明依舊照花枝孤雲鑒

托情北戲離花鋒觸著柝檀寶樹風轉向庭前春色  
裏錦鷄啼破太虛空李總徵

玉容人醉畫樓春語笑含嬌絕比隣箇中一段傷心  
處傾盡黃河洗不清晦岳旭

錦纜牙檣次第開海鴻低度認蓬萊乾坤終日浮孤  
棹風雨千年怨楚才化賦美

昭覺示衆古德道結夏已十一日寒山子作麼生  
又有道結夏已十一日水牯牛作麼生山僧即不  
然結夏已十一日鐙籠露柱作麼生若識得鐙籠  
露柱即識得水牯牛若識得水牯牛即識得寒山  
子

徑山琇云碎金鸞頭出五色髓固是三大老之手若  
是靈巖總無許多事何故家家門前赫日月太平不  
用將軍威

昭覺舉僧問雲門如何是諸佛出身處門曰東山  
水上行師曰天寧則不然如何是諸佛出身處但  
曰薰風自南來殿閣生微涼

竹底生風暑漸消綠翻輕影有芭蕉果然會得古人  
意獨角泥牛被火燒雪竈信

玉殿初傳左掖開靜鞭擊處駕頭回承恩博得龍觀  
喜親捧金莖露一杯理安問

拂拂薰風生夜闌百千諸佛骨毛寒歸去罷無處安  
長空今古月團圓山茨際

昭覺上堂迴無依倚超宗越格非佛非心萬仞壁

立桑樹上著箭柳樹上出汁

天井新云直饒恁麼也祇道得一半且道那一半吟  
聽事不真喚鐘作甕

昭覺凡垂同學者擬議便與一拳

盡力當胸一拳幾個眉鬚墮落更欲如何若何普化  
空中木鐸踏堂遠

昭覺示衆通身是眼見不到通身是耳聞不及通  
身是口說不著通身是心鑑不出通身即且置或  
若無眼作麼生見無耳作麼生聞無口作麼生說  
無心作麼生鑑若向者裏撥得一綫路便與古佛  
同參且道參什麼人

徑山杲云徑山當時若在點一把火照看者老漢面  
皮厚多少即今莫有旁不甘底出來道和尚也是普  
州人即向他道西天斬頭截臂者裏自領出去

昭覺因僧問西天以蠟人爲驗此土以何爲驗師  
曰生鐵鑄就崑崙兒

生鐵鑄就崑崙兒眼耳鼻舌如泥塊西天此土謾紛  
紜鐵眼銅睛看不破別解印

舒州太平佛鑑慧懃禪師東山演嗣上堂桃花紅李花  
白誰道融融祇一色紫燕語黃鶯鳴誰道關關祇  
一聲

天王海云大小太平強生節目今日地藏收歸一處  
勿令檢擇桃花紅李花白枝頭消息都漏泄紫燕語  
黃鶯鳴就裏生涯覷面呈但見皇風成一片不知何  
處是都城

太平因僧問如何是佛師曰喫飯較著砂

喫飯較著砂隱落第三牙春風纔過後拄杖亦開花  
慈受深

舒州龍門佛眼清遠禪師五祖演嗣常請益五祖凡有

所問即曰我不如你你自會得好師愈疑咨決於  
元禮首座禮以手引師耳繞圍爐數行且語曰  
你自會得好師曰有翼開發乃爾相戲耶禮曰你  
它後悟去方知今日曲折耳

我不會兮不如你達磨當門缺兩齒滿堂無限白蘋  
風明明不自秋江起雪堂行

我不會兮不如你桺檀林裏香風起漁歌一曲過瀟

湘攪動滄溟聲未已默堂定

龍門一日不安僧問生死到來時如何師曰皖公  
山曰爲復祇者箇別有在師曰桐城縣有僧舉似  
禮首座座曰遠兄不相見三十年者回徹也

薦福行云禮首座與先師同參可憐死在句下

龍門示衆千說萬說不若親見一面縱不說亦自  
分明王子寶刀喻衆盲摸象喻禪學中隔江招手  
事望州亭相見事深山巖崖處事此皆親面而見  
之不在說也

寧辨人間是與非生死泥湮眼如眉不因說著當年  
事萬古千秋那得知虛堂愚

龍門示衆天得一以清地得一以寧聖人得一以  
天下治衲僧得一福患臨身

石菴浮云龍門老人得卽得未免膽小德慶卽不然  
天得一以清地得一以寧聖人得一以治天下衲僧  
得一水到渠成

嘉州九頂清素禪師五祖演嗣因太守呂公來瞻大像  
問既是大像爲什麼肩負兩楹師曰船上無散工

守乃作禮

昭覺勤云疑殺天下人 薦福行云將謂無人又云  
本有餘力 大瀉果云全身擔荷

文光燦爛照嘉城未覩幽奇更問人不是九頂能辨  
析幾乎錯認定盤星璿鑑衡

九頂因勤老宿至師問曰舞劍當咽時如何勤曰  
伏惟尙饗師詬曰老賊死去也你問我勤理前問  
師叉手揖曰曳破

資福玉云勤老宿固不足以勘驗九頂老人還可勘  
驗也無資福也爲它道箇伏惟尙饗

元禮首座五祖演嗣因僧問經曰修一切善法如何是  
善法師遽起曰上是天下是地中間坐底坐立底  
立喚什麼作善法僧無對師便掌

薦福行云大衆道無橫徑理當卽行敢道禮首座鼻  
孔落在者僧手裏若人檢點得出天下橫行

法闕上座五祖演嗣到東林度座下見其得平實旨一  
日拈一枝花繞林禪牀一帀背手插香爐中曰和  
尙且道意作麼生林屢下語皆不契逾兩月林遂

問師曰你試爲我說看師曰某甲祇將花插香爐  
中和尙自疑有什麼事

笑嚴寶云閣上座將花插香爐中雖本沒甚事奈度  
既開堂聚衆寧免無利害乎且道什麼處是利害處  
理安問於意作麼生處代云者野狐精我當時若  
作東林便與劈脊打趁出免得遞相鈍置於有什麼  
事處乃噓兩噓云古今盡道閣上座驅畊夫牛奪饑  
人食有縱有奪能殺能活檢點將來似者般底也是  
個龍頭蛇尾漢 石菴瑀云賺殺人

出廐良駒俊莫羈逆風嘶又順風嘶好來伯樂重增  
價宜有奇名滿帝畿素嚴啟

金陵俞道婆白雲端下見瑯琊起市油資爲業一日聞丐者

唱曰不因柳毅傳書信何緣得到洞庭湖忽大悟  
以餐盤投地夫傍睂曰你顛耶婆掌曰非汝境界  
往見瑯琊瑯望之知其造詣問那箇是無位真人  
婆應聲曰有一無位真人六臂三頭努力瞋一壁  
華山分兩路萬年流水不知春由是聲名藹著  
歌聲傳自洞庭春愁人聞得暗消魂啼又笑喜還瞋

倒騎跛蟹趁麒麟梅逢忍

凌空明月絕疎親動地清風到骨貧破袖自迷龍洞  
雨江湖忍見刻舟人童求昱

道婆凡有僧到則曰兒兒僧擬議卽掩却門佛鐙  
珣往勘之婆見如前問鐙曰爺在甚麼處婆轉身  
拜露柱鐙卽踞倒曰將謂有多少奇特使出婆蹉  
起曰兒兒來惜你則箇鐙竟不顧

白巖符云靈龜負圖自取喪身之兆婆子固爲可惜  
何山雖鐵符在握善掃狼烟然祇解明擊不解暗攻  
具眼者爲何山別出一隻手看

柳毅傳書祇自知得便宜是落便宜親夫愛子都拋  
却痛惜深憐乞養兒笑翁堪

薰撈相逢鐵面皮渾家喪盡喚孩兒翻身獅子施牙  
爪猶落渠儂第二機且道渠是何誰塗毒策

潭州上封佛心本才禪師晦堂心下黃龍清嗣因觀鄰案僧

讀曹洞廣錄至藥山採薪歸有僧問甚處來山曰  
討柴來僧指腰下刀曰鳴剝剝是箇甚麼山拔刀  
作斫勢師忽欣然擲鄰案僧一掌便揭簾趨出



浪山嶼云者僧只知貪觀好景不知身在帝鄉若上封可謂良馬見鞭追風千里雖然怎麼要與藥山相見猶未在復頌

一聞直下便驚羣信脚踏翻大地春從此不消三寸鐵毗盧界內鼓烟塵

福州雪峰東山慧空禪師

潯潭清嗣

因僧問和尚未見

艸堂時如何師曰江南有曰見後如何師曰江北無

江南有江北無太虛空盡老君符剝除百怪真靈驗嚇殺街頭李四鬚雪礪拳

江州間通道旻圓機禪師

東林總下潯潭乾嗣

因左丞范冲

字致虛守豫章時過謁茶罷曰冲行將老矣墮在金紫行中去此事稍遠師呼內翰公應諾師曰何遠之有公躍然曰乞師再垂指誨師曰此去洪都有四程公佇思師曰見即便見擬思即差公豁然有省

瀛山闇云圓通老人囊中有妙藥能起死回生在頃刻左丞雖於此省入去此事不遠怎奈鄉音猶易識

家國尚茫然

大鑒下十六世

平江虎丘紹隆禪師

圓悟勤嗣

參圓悟悟曰見見之時

見非是見見猶離見見不能及舉拳曰還見麼師曰見悟曰頭上安頭師脫然契證便禮拜悟叱曰見箇什麼師曰竹密不妨流水過悟頷之

雲漢滿云見非是見頭上安頭竹密流水雲飛電舞

雖然如是滿上座猶未肯在 覺王丘云佛果拈一

束欄葛藤將謂無人識得爭奈瞌睡虎手親眼快當陽截斷雖然何不待未舉已前便與一喝管教老漢

緘口結舌

頭上安頭著底忙誇經買紀走諸方脫然莫道渠無

用睡虎張牙誰敢當牧雲門

殺人還用殺人刀鐵壁銀山當下消好手不須重按

劍全軍蚤已渡臨洮曉菴

一拳築碎虛空脊虎嘯龍吟滿大唐白日驚翻獅子

窟千妖百怪盡潛藏默菴

虎丘因僧問九旬禁足此意如何師曰理長則就

日祇如六根不具底還禁得也無師曰穿過鼻孔  
日學人今日小出大遇也師曰降將不斬日恁麼  
則和尚放某甲逐便去也師曰停囚長智

嚴霜苦雪去還來片片飛花點石臺分付庵童忙掃  
却莫教詩客又囊回聖可玉

虎丘到死心處心問甚麼僧師曰行脚僧曰甚麼  
村僧行什麼驢脚馬脚師曰廣南蠻道什麼何不  
高聲道心曰却有些子衲僧氣息

南嶽際云可惜黃龍末後不與本分艸料若與本分  
艸料臨濟法道不致寂寥矣

客裏謾牢落天涯多故人好懷無處寫舊話得重論  
殘雪未消石梅英先破春徘徊殊有約來此續芳塵  
虛堂愚

邂逅何期笑語新秋風松館客邊身凭闌不語平生  
事到老相逢是別人實業源

臨安府徑山宗杲大慧普覺禪師

圓悟  
勤嗣

在雲居首

衆小參昭覺元出問眉端挂劍時如何師曰血濺  
梵天悟於座下以手約曰住住問得極好答得更

奇元乃歸衆師由此名著

龍翔訴云奇哉奇哉一千七百人善知識生氣凜然  
誰知二百年後金陵城中再逢作者如獅子筋琴一  
奏而衆絃皆絕如塗毒鼓一擊則聞者皆喪我此一  
衆親近承事勿生疲厭各隨根行成就法器雖然有  
際天之雲濤可容吞舟之魚有九萬里之風可負垂  
天之翼

大慧在天寧日聞圓悟上堂舉僧問雲門如何是  
諸佛出身處門曰東山水上行若是天寧卽不然  
如何是諸佛出身處祇向它道薰風自南來殿閣  
生微涼師於言下前後際斷

徑山琇云昭覺怎麼提持鄭州出曹門妙喜悟去眞  
州望長蘆徑山見處也要諸人共知諸佛出身處渾  
不用思惟早晨喫白粥如今肚又饑

萬德不自有十身何處藏薰風生殿閣化日正舒長

石林叢

諸佛東山水上行閒中無事日偏長薰風拂拂來無  
已無意涼人人自涼葛盧罩

芍藥香中風綽約  
梨花影裏月團圓  
主人醉臥羲皇枕  
直把珠簾倒影看千仞岡

大慧開堂日下座次少卿馮公楫問和尚常言不作者般蟲豸因甚今日敗闕師曰盡大地是箇果上座你作麼生見馮擬議師便掌

平陽恣云馮濟川可謂運斤有法其奈斲聖無功若是山僧盡大地是個果上座你作麼生見但云恁麼則世界總被和尚占却待他動靜隨後便喝豈不增色案僚雖然也須扶起大慧正當今日有問山僧又當對他個什麼雲綻家家月春來處處花

大慧問僧道不用修但莫染汚如何是不染汚底道曰某甲不敢道師曰爲甚不敢道曰怕染汚師高聲叫曰行者將糞箕筴帚來僧茫然師便打白巖符云者僧將成九仞之山欠進一簣之士則且置祇如大慧與麼道還免得無過也未我若作者僧待他道如何是不染汚底道但捧水一盆置妙喜前便出

大慧因僧問心法俱忘時如何師曰賣扇老婆手

遮日

賣扇老婆手遮日一種風流出當家說與途中未歸客何須向外喫波楂月坡明

大慧問妙總曰古人不出方丈爲甚莊上喫油糞曰和尚放某甲過方敢通消息師曰我放你過你試道看曰某甲亦放和尚過師曰其奈油糞何總喝一喝便出

天樹植云大慧老漢也是當斷不斷若是山僧問伊古德不出方丈爲甚莊上喫油糞待云和尚放某甲過方敢通消息便與劈脊一棒何故放過即不可

大慧上堂毗藍園裏不曾生雙林樹下何曾滅不生不滅見瞿曇眼中又是重添屑

寶華忍云徑山老人雖然把斷要津大似祇見錐頭利曹溪則不然毗藍園裏不生雙林樹下不滅滅生生滅滅見瞿曇分明惡水當頭潑眼既無屑又用水潑作麼若是接物利生打頭也少者一杓不得乃顧左右喝一喝云你諸人因甚一箇箇水灑灑地大慧問僧不是心不是佛不是物作麼生會僧曰

領師曰領你屋裏七代先靈僧便喝師曰適來領如今喝干它不是心不是佛不是物什麼事僧擬議師便打

瑞巖愠云大慧老人提持個一著子縱以太虎空爲口須彌盧爲舌亦難擬其用處檢點將來未免有得有失當時者僧若是個人見他與麼問祇向他道三更過鐵圍豈不光前絕後擊拂子云拄杖化龍去癡人辱夜塘

大慧謂子韶曰你祇知格物不知物格韶便問如何是物格師曰不見小說載唐人有與安祿山謀叛者是人先爲閬守有畫像在焉明皇幸蜀見之怒令侍臣以劍擊其像首閬守居陝西首忽墮地公聞頓領深旨乃曰子韶格物妙喜物格欲識一貫兩箇五百師可之

寶壽方云妙喜子韶雖則議論風生千古希遷然祇解依樣畫葫蘆者裏則不然有問如何是物格向道者枚如意是陶宗伯送底還會麼紅日一輪天外曉癡人盡向霧中看喝一喝

格物物格燈籠著跌露柱皮穿徧地流血披龍鱗兮透龍門擒虎子兮入虎穴重闢一鑊逞全威笑殺雲門倒一說萬仞壁

雨歇雲消霽色幽遊春公子醉春樓風流無限向誰語啼鳥一聲天地秋天愚寶

大慧問僧香巖上樹話你作麼生會曰好對春風唱鷓鴣師曰虎頭上座道樹上卽不問樹下道將一句來又作麼生曰適來向和尚道了也師曰好對春風唱鷓鴣是樹上語樹下語僧擬議師便打大珠○云惜乎者僧龍頭蛇尾好對春風唱鷓鴣是樹上語樹下語祇消道個疑則別參敢保徑山冰消瓦解

大慧每舉竹筴子問學者喚作竹筴子則觸不喚作竹筴子則背不得下語不得無語速道速道從之得法者十有三人

雲門舉起竹筴凡聖潛踪匿跡金剛門外生瞋木馬廐中面赤尼無著

三尺筠蛇口帶腥曾吞英特十三人塵蒙四壁燈籠

黑老尾焦黃眼正瞋竹屋簷

徑山竹筴驗來參擬議知君落二三石火電光猶是

鈍休將鼠伎放癡憨石菴理

大慧問僧五祖演道趙州狗子無佛性也勝貓兒

十萬倍意旨如何曰風行艸偃師曰你也不亂道

却作麼生會僧無語師曰學語之流便打出

狗子勝貓十萬倍金毛獅子艸裏搗艸偃風行不亂

說妙喜大似白拈賊學語之流正好打蘇嚕悉喇吽

泮吒三宜孟

大慧以有句無句如藤倚樹話不明嘗問昭覺曰

和尚當時在五祖曾問此話不知五祖道什麼覺

笑而不答師再三請問覺曰我問五祖祖曰描也

描不成畫也畫不就又問樹倒藤枯時如何祖曰

相隨來也師當下釋然

竹上生花荊棘起絮飛成蠹篆文深禪生死後空餘

恨鸚鵡洲荒艸色陰三峰藏

爲詢祖上傳來事潦倒樽前費語長克紹堂中雖頗

喜不堪相共話羲皇清遠達

杭州靈隱瞎堂慧遠禪師昭覺勤嗣因孝宗問前日睡

夢中忽聞鐘遂覺未知夢覺是如何師曰陛下問

夢中底覺來底若問覺來底如今正是寐語若問

夢中底夢覺無殊教誰分別夢卽是幻知幻卽離

離幻卽覺覺心不動所以道若能轉物卽同如來

帝曰夢幻既非且鐘聲向甚處起師曰從陛下問

處起帝大悅

南嶽際云瞎堂若無後語幾乎被孝宗勘破 法林

音云大小瞎堂說得道理好

瞎堂問僧一大藏教是惡口如何是本身盧舍那

僧曰天台普請南嶽遊山師別曰阿耨達池深四

十由旬闊四十由旬

陳年曆日拈來用輸勝多從掌上推陽伏陰昇殊有

象先天立法更由誰果菴鼎

瞎堂一日擊鼓陞堂却潛坐帳中侍僧尋不見僧

曰無師撥開帳曰祇在者裏因什麼不見僧無對

師曰大斧斫三門

赤潭珠云帳中潛坐却許瞎堂祇在者裏喚作入艸

得麼只如大斧斫三門三十年後再爲理論

金陵華藏安民禪師

圖經  
勳嗣

謁佛鑑勳問曰佛果有

不妄爲人說底句曾與汝說麼師曰合取狗口鑑

厲聲曰不是者箇道理師曰無人奪你鹽茶袋亂

叫喚作麼鑑曰佛果若不爲汝說我爲汝說師曰

和尚疑則別參鑑乃呵呵大笑

漁翁愛趁浪如雷鐵網漫天撒下來戲餌金鱗鱖

刺千重百巾盡衝開潮菴怡

慶元府育王佛智端裕禪師

昭覺  
勳嗣

上堂易填巨壑

難滿漏卮若有操持了無難易拈却大地寬綽有

餘放出纖塵礙塞無路勿若不拈不放向甚麼處

履踐同誠共休戚飲水須知肥

得處孤危用處寬渾身琢就紫金團欄峰想到明年

窟莫向飛塵舊處鑽

類吉祥

台州護國此菴景元禪師

昭覺  
勳嗣

上堂威音王已前

者一隊漢錯七錯八威音王已後者一隊漢落二

落三而今者一隊漢坐立儼然且道是錯七錯八

是落二落三還定當得出麼舉拂子曰咩咩

小原叢竹綠陰陰溪溜清湍響似琴偶到斷橋明月

裏淒涼夜半老猿吟類吉祥

杭州府中天竺伽堂中仁禪師

昭覺  
勳嗣

上堂九十春

光已過半釀花天氣正融和海棠枝上鶯聲好道

與時流見得麼雖然如是且透聲透色一句作麼

生道金勒馬嘶芳艸地玉樓人醉杏花天

紅顏欲較三春富還掩青氍不見人佯取金釵擘飛

鬢隔簾影出畫堂身類吉祥

安吉州何山佛鏡守珣禪師

太平  
勳嗣

問悟因與遊山

偶到一水潭悟乃推師入水遽問曰牛頭未見四

祖時如何師曰潭深魚聚曰見後如何師曰樹高

招風曰見與未見時如何師曰伸脚祇在縮脚裏

悟乃稱賞之

南堂欲云何山得卽得未免帶水挖泥圓悟高則高

怎奈使心用行雖然不入驚人浪難逢稱意魚

佛燈因僧問如何是向上事師曰大海若知足百

川應倒流僧禮拜師曰珣上座三十年學得底

不曾肯綮事鋒銳瀟散形踪省佩裝短褐甕簍踞



坐當風傾盡綺囊香頻吉祥

安吉州道場正堂明辯禪師龍門遠嗣室中問學者蚯蚓爲甚麼化爲百合

客舍并州已十霜歸心日夜憶咸陽無端更渡桑乾水却憶并州是故鄉圓極岑

土龍百合化當時試問渠儂初不知大抵相逢多見妒人間無怪少蛾眉天徽畫

潭州大瀉善果月菴禪師東山演下開福寧嗣上堂奚仲造車一百輻拈却兩頭除却軸以拄杖打圓相曰且

莫錯認定盤星卓一卓下座

海神知貴不知價留與人間光照夜碧眼胡僧笑點頭誰知用處無縫罅月林觀

洪州分寧尙書莫將居士東山演下見大隨靜官西蜀謁南

堂咨決心要堂使其向好處提撕久無所入適入廁忽穢氣甚惡以手掩鼻遂有省徹見南堂相爲處乃呈偈曰從來姿韻愛風流幾笑時人向外求萬別千差無覓處得來元在鼻尖頭堂可之

瀛山闇云尙書雖是苦心造到檢點將來猶帶些穢

氣在何故爲伊向廁坑頭著倒

樞密吳居厚居士見圓通是擁節歸鐘陵謁圓通曰某

頃赴省試過此透趙州關嘗問前住訥老透關底事如何訥曰且去做官今不覺五十餘年通曰曾明得透關底事麼公曰八次徑過常存此念然未甚到灑脫處通度扇與之曰請使扇公卽揮扇通曰有甚不灑脫處公忽有省曰更請末後句通却揮扇兩下公曰親切親切通曰吉獠舌頭三千里瀛山闇云圓通若無後語未免鈍置吳公直向揮扇處弄精魂有甚了期祇知道吉獠舌頭三千里是何意旨

大鑒下十七世

天童應菴曇華禪師虎丘隆嗣於虎丘忌日拈香曰平

生沒興撞著者無意智老和尚做盡伎倆湊泊不得從此卸却干戈隨分著衣喫飯二十年來坐曲杓木懸羊賣狗知它有甚憑據雖然一年一度燒香曰千古令人恨轉深

覺王立云從來多意氣末後絕商量應庵老人被虎

狗肉羊頭喚祖師  
著衣喫飯且隨時  
沙場血戰今忘

話來不入逞仙陀已是從前借路過狗肉羊頭隨處

應菴上堂九年面壁壞却東土兒孫隻履西歸鉢

置黃面老子以拄杖畫一畫曰石牛攔古路一馬

生二寅

雲漢滿云石牛古路斷乾坤一馬三寅踴翻魔佛  
還知者老漢落處麼劍爲不平離寶匣藥因救病出  
金瓶

應庵示衆如世良馬見鞭影而行時佛照光出曰  
見鞭影者非良師休去

疾燄過風第二頭不堪惆悵祇堪愁一聲振鬣長鳴  
後萬馬皆瘡一戰收北碣

眞是良駒豈受鞭騰空躍出絕人前名標海宇人稱

應庵曰十五日巳前提水放火十五日巳後鵲噪

鴉鳴正當十五日風恬浪靜國泰民安有一旬到

你啞却我口無一句到你瞎却你眼十字街頭潘

四郎頭不梳面不洗知它是凡是聖

天真則云應庵老漢大似倚富欺貧賣弄不少海門

卽不然十五日已前明不離暗十五日已後暗不離

明正憲十五日明暗顧忘古今絕待你諸人向甚麼

處體究擊拂子云閒中不契林泉樂坐久但聞風雨

聲

應庵示衆盡力道不得底句不在天台定在南嶽  
相罵饒你接策相唾饒你潑水驀然摸著蛇頭拍手  
囉囉哩哩肯堂充

耆婆去後無消息病者憧憧日扣門百艸自知無識

者叢叢垂泣在籬根虛堂愚

雁菴示衆禪禪更不相煎坐底自坐眠底自眠大  
家安樂無法可傳禪禪洞山五位臨濟三玄大年  
三十夜脚踏地頭頂天禪禪不直半文錢海枯終

見底人死脚皮穿

全室泐云應菴老漢口似懸河也只說得一半者一半山僧今日對衆舉揚更不囊藏被蓋且要與此老把手共行禪禪火著油煎饑來喫飯困則打眠神仙秘訣父子不傳禪禪妙中之妙玄中之玄達磨不來東土二祖不往西天禪黃菊綻金錢大蟲裹紙帽寶八布衫穿 癡舟元云華祖恁麼提持可謂倒腹傾腸爭奈知恩者少山僧既作脚下兒孫不免覲面相見禪禪茶熟香煎清風月下石枕雲眠從無巴鼻有甚堪傳禪禪現成一句劈破三玄水流到海月不離天禪禪關中使鐵錢若不同床睡焉知被底穿

明州育王佛照德光禪師

大慧杲嗣

宋孝宗召對師舉

靈雲頌直至如今更不疑奏曰那裏是它不疑處

帝曰空手牽鐵牛

萬機之暇探禪宗中路寧堪憩六龍空手牽牛過天

闕紫宸深在妙高峰

圭堂居士

佛照因孝宗宣問釋迦佛入山六年所成何事師曰將謂陛下忘却

六年勤苦竟何如爲問君王記得無直下雖知難抵諱到頭終不受塗糊北磬箇

大根大器大薰修譬轉機輪向上頭萬億斯年惟一

佛雪山元不隔龍樓石巖礎

九江東林已菴顏禪師

大慧杲嗣

示衆坐佛牀斫佛脚

不敬東家孔夫子却向西鄉習禮樂

肯堂充云入泥入水卽不無先師爭奈寒蟬抱枯木

泣盡不回頭卓拄杖云灼然有不回頭底淨慈向升

子裏禮汝三拜

杭州淨慈水庵師一禪師

佛智裕嗣

室中垂問西天胡

子因甚無髮

牧童失却破蓑衣流落年深見者稀拈來搭在籬頭

上引得烏鴉遶樹飛

默堂定

台州國清簡堂行機禪師

護國元嗣

上堂圓通不開生

藥舖單單祇賣死貓頭不知那箇無思算喫著通

身冷汗流

盤山嵩云盤山者裏既不開生藥舖也不賣死貓頭

祇把一枝無孔笛臨風吹斷楚江秋

京口焦山普濟或菴師體禪師護國元嗣因葛信齋問

夫妻二人相通兒子作證證父卽是證母卽是

師曰小出大遇仍頌八臂那吒三隻眼雙槌播鼓

轉船頭巨鰲一吸滄溟竭宇宙風清四百州

生死自憐同室穴因何中路隔關山一朝忽得親兒

證趨踴方知蓋覆難雪堂行

### 宗鑑法林卷三十四

### 宗鑑法林卷三十五

集雲堂 編

### 大鑒下十八世

慶元府天童密庵咸傑禪師應菴華嗣一日侍菴菴問

如何是正法眼師曰破沙盆

覺王立別云脫繡桶子

五陵公子少年時得意春風躍馬蹄不惜黃金爲彈

子海棠花下打黃鸝雙杉元

白玉琢成泥彈子黃金鑄就鐵崑崙千年滯貨無人

買未免如今累子孫大歇謙

千金蕩盡一無存衣食終朝取別人不是五陵眞俠

骨回頭猶戀舊頭巾月涵潛

正法眼曾無此語破砂盆豈有斯言一生耽酒難消

恨踴月穿花過遠村燕菴範

愁來一字不堪羹醉後千盃未惜多翻轉砂盆滅却

眼半窗霜月在烟蘿理安問

毛頭星現在當門百怪千妖盡轉恩細嚼爛紅鋼一

塊翻成沒底破砂盆南嶽際

大千沙界黑漫漫法眼年來不中看撥出破盆敲不

破從教今古競頭鑽牧雲門

密庵因僧問如何是正法眼師曰艸屨無絛曰祇

如和尚道破砂盆又作麼生師曰老僧不曾動舌

頭曰此語已遍天下師曰杓卜聽虛聲

南嶽際云一轉語安邦定國一轉語失業亡家若人

檢點得出山僧許伊穩坐家堂

密菴示衆一年三百六十日今宵正是結交頭參

身換步無多子六合清風來未休

祖燈紹云虎丘黍爲脚下兒孫聊亦效顰百年三萬  
六千朝逆順數來無尾頭聚首今宵明歲近一聲爆  
竹幾知休還有與祖師把臂者麼若有一隻孤鷺撲  
地高飛若無一對鴛鴦池中獨立

常州華藏伊庵有權禪師無庵全嗣嘗夜坐達旦行粥

者至忘展鉢鄰僧以手觸之師感悟爲偈曰黑漆  
崑崙把釣竿古帆高挂下驚湍蘆花影裏弄明月  
引得盲龜上釣船

雲深江絕引帆孤可惜隣僧拽轉渠方信圓明彈指  
事元來此語不傳虛圭堂居士

杭州淨慈肯堂彥充禪師萬庵顏嗣示衆觀方知彼去

去者不至方艸屨跟忽斷全身在帝鄉

孰謂觀方不在方纔開鼻口便乖張行人要覓長安  
路不覺全身在帝鄉掩室開

### 大鑑下十九世

夔州臥龍祖先禪師天童傑嗣分座靈隱有道者請益

曰獼猴子捉不住願垂開示師曰用捉作麼如風  
吹水自然成紋

覺王立云破庵答話不費些力道者請益自納敗關  
且問諸人卽今獼猴子在甚處 江天海云且道風  
未起時教在甚麼處咄泊合停囚長智

至仁天子調玉燭宇宙風清八百州寸刃不施王化  
徧一人端拱坐龍樓平陽志

人居大國方知貴水到瀟湘一漾清驚地江湖風浩  
蕩一時吹徹渙春冰理安問

把住咽喉據要津奔流度刃在當人道來祇是平常  
語伎倆渾消父子親牧雲門

劍樹刀山羅刹域鑊湯爐炭鬼門關闔王終不受斯  
考識破其中總是閒資福觀

臥龍上堂不是心不是佛不是物忍俊不禁爲諸  
人作箇撇脫拈拄杖卓一下曰流水暗消溪畔石

勸人除却是非難

雲漢滿云忍俊不禁逐塊韓獪作箇撇脫霜上加雪  
且道不是心不是佛不是物畢竟是箇什麼卓拄杖  
云莫把是非來辨我浮生穿鑿不相干

杭州靈隱松源崇嶽禪師密庵傑嗣垂語曰大力量人

因甚擡脚不起

擡脚踴翻香水海低頭俯視四禪天一箇渾身無處

著請續一句 無門開

力難擡起爲君宣神駿何勞更著鞭一躍洞天三十六到時凡骨便成仙虛堂愚

松源示衆古人道拈起也天回地轉放下也艸偃風行治父則不然拈起也乾坤黯黑放下也瓦礫生光忽有一箇半箇驀然敲瞎頂門眼達磨一宗未致寂寥在

了庵欲云者老漢祇見錐頭利不見鑿頭方壽山卽不然拈起也南山起雲放下也北山下雨不拈不放時如何三汲浪高魚化龍癡人猶辱夜塘水

松源垂語曰開口不在舌頭

開口不在舌頭上敲斷牙關供死狀莫教吞了大還丹命根難斷空惆悵朴翁話

含糊一世無分曉開口何嘗在舌頭萬古業風吹不盡又隨月色過羅浮虛堂愚

松源垂語明眼衲僧因甚脚下紅絲綫不斷

脚跟不斷紅絲綫掉臂乾坤自在行塞壑填溝無處著歸來依舊兩眉橫虛堂愚

松源示衆明眼衲僧因甚打失鼻孔有賊無賊○殺人一萬損三千獨弄單提機不全萬頃滄波明月夜一聲短笛釣魚船菴肇

松源臨終示衆久在正路行者有祇不能用黑豆法難以荷負正宗臨濟佛法到此平沉痛哉痛哉雲居莊云松源老祖歷良爲賤若是黑豈法用得有甚奇特直須將斷貫索穿過從上佛祖鼻孔方有自由分時有僧問斷貫索莫在和尙手中麼居云者瞎漢拈拄杖便打

杭州靈隱徑山如珏禪師焦山體下因癡鉤問如

何是佛師曰爛冬瓜仍頌如何是佛爛冬瓜敲著

冰霜透齒牙根蒂雖然無窮子一年一度一開花

如何是佛爛冬瓜鐵額銅頭沒奈何萬里鴻溝歸漢

後八千人恨一聲歌獨木林

大鑒下二十世

杭州徑山無準師範禪師臥龍初謁育王佛照



問何處人師曰劍州曰□得劍來麼師隨聲便喝  
照笑曰者烏頭子也亂作後至靈隱第一座同遊  
石筍菴有道者請益糊孫子話師於侍傍忽然大  
悟

覺王立云桑樹上著箭柳樹上出汁幸而無準知恩  
有地若撞著箇無面目漢睡罵未有了日在因甚如  
此一任疑著

氣飲長虹已食牛血漫漫地照人愁因風吹火無多  
力春滿皇都四百州理安問

城門失火臭烟熏殃及池魚尾盡焚無處更求三尺  
水直看振鬣上青雲古南門

匕刃深藏氣自昂逢人觸著露鋒鈍誤因吳起論戈  
甲襲蘊從前一笑忘卓菴元

密用臨機與喪至禍胎從此出蕭牆一聲腸斷風前  
笛徧地干戈孰抵當默菴慧

慶元府天童天目文禮禪師松源因智虎維那參  
師問汝名什麼曰智虎師退身作怕勢智擬議師  
便歸方丈

白浪堆中下一鉤錦鱗紅尾尚悠悠漁翁不計竿頭  
事笑入蘆花萬頃秋石林壑

杭州徑山元叟行端禪師育三光下三上堂冬至  
月頭賣被買牛冬至月尾賣牛買被不覺日又夜  
爭教人少年

祖燈紹云拆離補壁則不無端師可惜儉生黃墨又  
不然冬至月頭敲冰覓火冬至月尾鐵樹攢花正當  
月中時如何疊足爐頭煨槽榼從他霜上加霜

杭州中竺空巖有禪師徑山室中垂語曰黃金鑄  
就鐵真人

錦衣公子醉田家熟睡柴牀日未斜熱渴呼漿無所  
得便將玉帶換甌茶東海湧

大鑒下二十一世

袁州仰山祖欽禪師無準參天目禮令看臨濟三

頓痛棒話一日上蒲團豁然如地陷相似後在無  
準會下每遇入室舉主人公便能踣跳舉衲僧巴  
鼻佛祖爪牙更無下口處經十年後過天目偶佛  
殿前行擡眸見一株古柏觸著向來所得境界和

底一時颺下方始見徑山老人立地處

覺王立云掀翻從前實惜徹見本地風光閒茶飯喫  
了多少始見徑山立地可悲可笑檢點得出許你具  
透關眼 雲漢滿云豁然地陷死水不藏龍古柏觸  
翻脫盡孃生袴便見徑山立地處更須三十烏藤卽  
今還有具如是作者麼良久云蒼天蒼天

大蟲無齒爪牙危未透玄關祇暗疑不是脚跟親點  
地此心能有幾人知理安問

徑山牙爪苦難捫古柏相逢斲命根立地與他三十

棒山青水綠別乾坤

牧雲門

脚下踪由路可行目前未透總非真豁然觸發渾無

礙任運騰騰廓古今資福觀

仰山示衆心是根法是塵兩種猶如鏡上痕鏡已

破法不存疎影橫斜水清淺暗香浮動月黃昏

南嶽際云雪巖好與三十棒何故不合竊常住物入

方丈用

仰山上堂道在日用日用不知饑祇喫飯寒祇添  
衣晴天愛日挂枯藜檢點溪頭梅樹向陽偷放南

枝

磬山修云還灼然會得麼若會許你識得臨濟大師  
人境俱不奪之句雖然直須親到若不親到也是釘  
椿搖櫓有甚麼用處

仰山上堂解語非干舌能言不是聲畢般班碧剝  
當滴帝都丁譌聞誤聽認爲作焉則且置一眞未  
具已前如何辨明鼠齧鐵釘

慈舟念云解語全憑舌能言卽是聲二三元四五一  
像枚丁隨聞卽見合水和泥則且置一眞已具之  
後如何辨明伐木丁丁鳥鳴嚶嚶 語浪謂云提持  
衲僧巴鼻發明向上宗猷錦心繡口無出其右檢點  
將來未免徐六之見謂上座今日出一隻手推倒擔  
板不惟使二大老眉毛撕結鼻孔相挂須要現前一  
衆人人知有薦豎拂子云兒麼擊拂子云聞麼卽此  
見聞非見聞無餘聲色可呈君箇中若了全無事體  
用何妨分不分復擊拂子

杭州淨慈斷橋妙倫禪師徑山範嗣參無準準以狗子  
因何有業識令下語凡三十轉皆不契師曰可無

方便乎準乃舉眞淨頌曰言有業識在誰云意不  
深海枯終見底人死不知心示之師悚然良久忽  
聞版聲大悟

金明進云徑山養子之緣不顧脚跟泥水倫祖白汗  
通身要難恩酬罔極有問金明狗子因何有業識向  
道伏惟和尚珍重萬福如更眼目定動便與掀倒禪  
牀 龍淵法云無準老漢慣將死語開人活眼可謂  
婆心太切倫祖雖然瞥地收回劫外風光要且尤欠  
一籌

漏屋恰逢連夜雨更多愁霧鎖柴門忽然雲靜紅輪  
擁疊疊青山插遠村介菴進

頂門一擊汗如油捉敗當年老趙州自是黃河連底  
濁一番驟雨一番愁一初元

斷橋上堂德山低頭夾山點頭俱胝豎起一指頭  
玄沙築破脚指頭拈拄杖曰都來不出山僧拄杖  
頭何以見得卓一下曰一葉落天下秋

餅山謙云開疆闢土革故鼎新固是淨慈老漢爲人  
底赤心片片餅山今日也要平分風月拈如意云德

山玄沙夾山俱胝總在餅山如意頭上各各顯揚無  
量妙義還委悉麼不因夜來雁怎見海門秋

千奇與百怪祇在一毫端拈却毫端看霜花六月寒  
牧公錄

幾座畫閣瓊樓數條花街柳巷從頭說與遊人總在  
長安市上潛夫變

明州育王橫川如珙禪師禮天目晚參少室無門戶  
如何便得通夜深寧耐立聽我話西東

保寧茂舉畢召大眾云也有權也有實也有照也有  
用祇是不得恁麼會珍重

橫川示衆福源今日結制不得不爲諸人議定第  
一從朝至暮舉足下足不得踏著常住地若踏著  
常住地定犯波羅夷罪第二十二時中不得向鼻  
孔裏出氣若向鼻孔裏出氣定犯波羅夷罪第三  
件事且莫說留在七月十五日也未遲瓮裏何曾  
走却鼈

南嶽際云當時山僧若在但出衆行兩步打箇噴嚏  
且看福源怎生合煞

臨安府徑山虎堂智愚禪師靈隱下垂語曰已

眼未明底因甚麼將虛空作布袴著畫地爲牢底  
因甚透者箇不過入海算沙底因甚向鍼鋒頭上  
翹足

縫却虛空算盡沙鍼頭畫地是生涯改頭換面無人

見幾度春風吹落花開極雲

解把虛空作袴單地牢畫出透還難鍼鋒頭上翹雙

足猶對春風話歲寒萬歲單

臨安府徑山石溪心月佛海禪師靈隱下因僧

問如何是佛師曰矮子看戲

巍巍丈六紫金容百戲場中有變通矮子看來眉卓

豎鐵鎚無孔舞春風萬歲單

海鹽天寧寺楚石梵琦禪師元更因僧問如何是

山裏禪師曰糊獮上樹尾連顛曰如何是城裏禪

師曰十字街頭一片靛曰如何是村裏禪師曰扶

桑人種陝西田曰謝師答話師曰蒼天蒼天

天目律云大小楚石若不得後語大似光影未忘寶

壽則不然山裏禪虎巖午夜鎖輕烟城裏禪肉案頭

邊唱哩哩村裏禪牯牛踴跳出豬圈謝師答話潑油

救燃祇者末後一句一任天下衲子鑽研 起綱宗

云隨機應變卽不無未免乾曝曝多香火氣今日忽

有人問如何是山裏禪奇怪石頭形似虎火燒松樹

勢如龍如何是城裏禪四五百條花柳巷二三千所

管絃樓如何是村裏禪漠漠水田飛白鷺陰陰夏木

鷓鴣黃鸝若云謝師答話問道許你領會用在驢年

天寧一日索麪次有僧來參師引麪示之僧珍重

便去師召大德僧應諾回首師曰有口不得喫麪

者多

南嶽際云盡道者僧祇合便去不合回首回首處是

天寧看破處且喜沒交涉殊不知他二人各有把斷

之機各有出身之路雖然山僧與麼批判也是普州

人送賊

天寧上堂通身是眼爲什麼看不見通身是耳爲

什麼聽不聞通身是口爲什麼說不到通身是心

爲什麼鑒不出報恩有一道聰明神呪布施諸人

去也便下座

大覺昇云山僧即不然通身是眼有什麼看不見通身是耳有什麼聽不聞通身是口有什麼說不到通身是心有什麼鑒不出也無聰明神呪布施諸人珍重歸堂喫茶去

大鑒下二十二世

臨安天目高峰原妙禪師

即山欽嗣

在徑山隨衆詣三

塔諷經次擡頭忽覩五祖真贊曰百年三萬六千朝反覆元來是者漢有省後參雪巖一日巖問日間浩浩時作得主麼師曰作得主曰睡夢中作得主麼師曰作得主曰正睡著時無夢無想無見無聞主人公在什麼處師無對遂奮志入龍鬚越五年因友人同宿觸枕头墜地始大悟曰元來祇是舊時人不改舊時行履處

南北無門路不通分毫有主賊來攻直饒主客都星

散大似楊花逐曉風雪嶠信

沙裏淘金金裏沙至親翻作惡冤家枕头打破冤家

窟鼻孔遼天是甚麼聞谷印

滄溟一竭見鯢鰲陸地波濤萬丈高鐵壁銀山齊破

了賊身無處可潛翰山扶際

晝寢曾驚起夜深不敢眠慈母一聲喚猶豫五更天

鷄鳴知漏盡含笑到牀前報恩瑒

月落霜天夜正寒錦鱗透網撥天瀾枕头落地何曾

悟返覺從前被悟瞞朝宗忍

踢翻大地露陽春誤聽鶯啼入柳陰沒興夜闌逢酒

醒笑渠依舊宿深村理安問

無夢無想主何處兩刃交鋒都不既堂堂密密沒周

遮焯焯焯焯絕覆微衲僧不奈念生何愛向無生尋

活計念無起重遭繫全身落在深坑裏山鳴瑒

無夢無想主在麼相隨來也沒如何誰家門首無明

月頗奈夜行人更多宗寶獨

半生活計一漁舟幾度風前爲下鉤行向桃花源盡

處歸言獨自訪仙遊武陵守親垂叩興敗無聊方自

咎休自咎一溪水綠仍如舊石雨方

夢想見聞俱坐斷主人面目甚分明不因枕头敲殘

月爭得殊方定太平古雪結

一椎擊碎摩尼藏相逢何處不逍遙枕头有甚閒巴

鼻翻笑從前立處高雲外澤

已向人間說好媒冤家活活哄將來一聲長笛宮中  
起自悔從前百不該五祖蕉

撒手懸巖拌命馳翻空一跌瞎雙眉三更踏過鐵門  
限下載清風說向誰湘翁云

洞庭無盡水雲斜白浪滔空誰見涯一擊驪龍頭角  
碎山河無處不飛花雪遶照

高峰示衆海底泥牛銜月走巖前石虎抱兒眠鐵  
蛇鑽入金剛眼崑崙騎象鸞鸞牽此四句內有一  
句能縱能奪能殺能活若人檢點得出一生參學

### 事畢

天童悟云高峰四句不妨奇特祇是不經檢點古南  
門云檢點不妨檢點祇是無甚奇特復云山僧亦有  
四句五更撞鐘腳落地三通接板狗子吠二時粥飯  
溼匙箸半夜放參霜點被四句中有一句全用有一  
句全體有一句全體即用全用即體有一句體用雙  
忘騰騰任運任運騰騰若人檢點得出便請歸家穩  
坐理安問云高峰老祖坐斷獅子殿直是天下人

沒奈何何因甚到者裏却又忍俊不禁一場敗露山  
僧既作他不肖兒孫敢將老祖陳年骨董一時傾搽  
諸人面前還有向個裏著箇眼者麼靠拄杖云得行  
便行得坐便坐大小高峰一狀領過雲中巒云藏  
春色於壺天栽兔角於馬首固是高峰作略若論擒  
飛龍捉猛虎猶未可在

最苦參禪未徹頭無聞無見勘來羞髑髏正睡驚開  
眼定國安邦一念休牧雲門

尋得桃源好避秦桃紅又見一年春花飛莫遣隨流  
水怕有漁郎來問津具足有

冰肌玉骨巧喚呻蘭珮香飄萬點春雨過巫山雲勢  
從陽臺白日夢迷人御之龍

錯箭磨弓露賊身低言細語強惺惺分明圖却世人  
眼更問世人乞眼睛湘翁云

世有南威貌似花來乘駿馬去登車風流若使時人  
見定惹閒非到自家紫理炬

高峰示衆豎拂子曰大衆到者裏進一步也不得  
退一步也不得總不恁麼也不得畢竟如何不得



不得

佛川宗云野山則不然乃豎拂子云大衆到者裏進一步也得退一步也得怎麼不怎麼也得畢竟如何得得 慧慶證云二老與麼提持直截不妨直截義學看來不免被得失進退瞞過者裏則不然乃豎拂子云切忌頭上安頭便擲下

高峰上堂門外有一人用盡機謀要入入不得門裏有一人做盡伎倆要出出不得出不得入不得即且置且道門外人與門裏人相見時如何愁人莫向愁人說說向愁人愁殺人

理安問云是何言歟門外有一人用盡機謀要入入不得不消咳嗽一聲門裏有一人做盡伎倆要出出不得亦不消彈指一下門外人與門裏人相見時如何東西十萬南北八千 騰煥家云高峰也是觀機逗教應病與藥西山則不然門外有一人不用機謀要入便入門裏有一人不做伎倆要出便出出得入得且置且道門外人與門裏人相見時如何以拂子擊案云各逞風流歸別浦從教鷗鷺自疑猜

高峰垂問大徹底人本脫生死因甚命根不斷

理安問云疑則別參復頌

從來迷悟不相干力盡何曾出蓋纏泥裏若教重洗土累他長劫守羶鞭

自從拽斷蓬根索一任虛舟海上帆數點野萍栽不得不勞根下更加芟三峰藏

將謂別有暗裏亂走走到天明依然空手梅谷悅

高峰曰佛祖公案祇是一箇道理因甚有明有不

明

理安問云奴兒婢子愛殷勤復頌

明投暗合苦難醫誓作羣盲走使兒認影迷頭如不薦甘心活活墮泥犁

山深通塞路逶迤一夜風雷雨斷溪識得水邊苔徑

險自甘崖側結茅棲三峰藏

墮坑落壑鬼得其便粉碎髑髏離宮失殿梅谷悅

高峰曰大修行人當遵佛行因甚不守毗尼

理安問云誰甘受屈復頌

佛魔齊入是同流口誦真言上酒樓三世如來羞客

作讓伊赤手把豬頭

聖凡忘盡眼模糊摸得張郎喚大家醉後不知天是

笠路傍潦倒倩人扶三峰藏

樂則同歡大海波乾珊瑚枝上明月團團梅谷悅

高峰曰杲日當空無所不照因甚被片雲遮却

理安問云波斯脚板闊復頌

青天喫棒有來由杲日當空據令酬昨日正晴今忽

雨半生脚下逞風流

當空赤日頂門高赫奕翻令目自勞夜半閉關深睡

熟者回能數背間毛三峰藏

相隨來也勘過了打石火電光那容汝把梅谷悅

高峰曰人人有箇影子寸步不離因甚踏不著

理安問云逢人但怎麼舉復頌

泥牛吼月却臨風石火難追電影踪切忌定盤星錯

認出門徒惜草茸茸

隨身自影不相離不上平橋反過溪剩有脚心開隻

眼等閒踏過頂額西三峰藏

罪不重科還甘也無問取趙州東壁葫蘆梅谷悅

高峰曰盡大地是箇火坑得何三昧不被燒却

理安問云渾身在裏許復頌

避火偏愁火近身眞鍮不更博眞金茫茫大地誰能

救自愛貪杯惜醉人

目前萬事燄爐紅開眼眉毛燎已空誰把虛空翻作

海爲雲爲雨夢魂中三峰藏

擔枷過狀貪觀天上失却手橈問人覓樣梅谷悅

大鑒下二十三世

杭州天目中峰明本禪師高峰妙嗣因觀流泉有省白

峰峰打趁既而民間傳有司選童男女甚急師問

忽有人問和尚討童男女時如何峰曰我但度竹

篋子與它師於言下洞然徹法源底峰乃自題眞

讚付之曰我相不思議佛祖莫能窺獨許不肖兒

得見半邊鼻

徑山信云高峰剝肉作瘡賊陷平人中峰脚跟未穩

一狀領過若依語風判斷兩人犯彌天之罪各罰饌

飯一堂借此供狸奴白牯何故與他流水什麼相干

雖然不許夜行投明須到

鵲言日出古風沉一問當前意自深却笑作家無眼

力真鎗換去好黃金古南門

龍門千仞許誰親借箇端由問有因一割盡情總吐

露竹筵三尺屬兒孫理安閣

險巖偏僻妙高峰路絕機籌句下通黑漆竹筵無背

面拈來殺活好玲瓏晦山顯

話墮橫身劍刃鋒懸崖壁立路頭窮一回把手高山

上日出扶桑夜半紅素菴仁

水自冰心流出冷雲從嶺上發來高張公夜半生青

女不待天明嫁與曹旭雲瑞

忽討童男是與非拈來竹筵露真機懸巖撒手誰窺

得竿木隨身祇自依拳石沃

同名同號又同音千里同風萬里欽隨句渾無男女

相和身共氣是知心真高峰

竹筵拈出藥真靈男女何曾到眼侵堪笑後來參學

者妄傳消息到如今妙圓學

杭州西天目山斷崖了義禪師高峰妙嗣頌曰大地山

河一片雪太陽一照便無踪從此不疑諸佛祖有

何南北與西東

徑山信喝一喝云好卽好矣美則美何妨不可是歸  
期祇爲路窮山更杳可憐墮落作奴兒

台州華頂無見先觀禪師淨慈倫下瑞巖寶嗣因白雲度問

西來密意未審如何師曰待娑羅峰點頭卽向汝  
道

無事攜琴過翠蘿佳人遙見喚鸚哥金釵斜插渾忘  
處別有心情動客多野堂倪

此夜天孫竟渡河鵲橋南望最情多成都隔支機  
石宛轉臨筵發浩歌文玉璣

大鑒下二十四世

婺州伏龍無明千巖元長禪師本峰中峰參中峰峰授

以狗子無佛性話三年因往望亭聞雀聲有省峰

復斥之師憤然夜半忽鼠翻貓食器墮地有聲恍

然開悟復往質峰峰問趙州何故曰無師曰鼠食

貓飯峰曰未在師曰飯器破矣峰曰破後如何師

曰築碎方巒峰乃微笑

覺王立云福無雙至禍不單行千巖到者裏眼睛突

出撒手歸家一場漏逗頓絕安排諸仁者既成漏逗  
又絕安排且道明得什麼邊事良久云鴛鴦繡出自  
金鍼

禍事臨頭骨也蘇鼠偷貓飯太無辜供招一一難翻  
款養子之緣一笑符收雲門

半途烟雨溼眉端未獲風吹那得閒歸到畫堂山色  
暮一聲玉笛喚開顏靈機觀

從門入者非家珍別有壺公天地春錯聽兩番聲色  
事耳中添却幾多塵與蒼鷺

夜半星輝天未曉靈禽語語啼南斗乾坤一色玉通  
津不染些塵無一有無一有大地山河發真高竅

鼠翻貓盤作聲來千里鳥雖忽喚回不道千巖親撞  
著却如醒夢眼初開素菴仁

幾番入海探珊瑚每被逆風打落湖昨夜船頭鼠喫  
板天明上岸見王都秋山賁

千巖示衆無明者裏祇使無明且無佛法與你一  
棒太煞慈悲與你一喝十分直截你若作棒喝商  
量便千里萬里也

磬山修云不作棒喝商量亦千里萬里也且道作無  
明是佛法是喝一喝 浮峰承云既不得作佛法商  
量又不得作棒喝商量亦不得作無明商量諸人作  
麼生商量

千巖因僧來參乃問甚處人曰浙西師曰此間無  
飯喫來作什麼曰來求和尚佛法師喚近前僧近  
前師卽打一拳曰會麼曰不會師曰癡子拳頭也  
不識

報恩琇云巖翁何用叨叨來求佛法打破渠腦袋倘  
知慚愧免見糴村

千巖示衆老僧如獼猴種樹種了便拔看大衆生  
根也未衆無語自代曰根生也

善權賢云根生則不無未免自起自倒山僧也不種  
也不拔祇問大衆如何是無根樹子衆無語乃曰無  
根樹子也不識

千巖示衆昨日兩軍出陣兩刃交鋒未見輸贏難  
分勝負老僧祇管看忍俊不禁未免借鄧隱峰底  
錫杖子出來搖一搖祇要諸人息戰息戰後如何

薰風自南來殿閣生微涼

磬山修云千巖老祖也是無風起浪平地生波自起  
自倒了也雖然如是也爲諸人切須照管自家鼻孔  
莫把眉毛擲結何故成佛作祖易空人忘我難

千巖上堂轉山河國土歸自己則易轉自己歸山  
河國土則難拈了也父母未生前道將一句來

理安問云千巖老祖高提祖印向伏龍山中坐斷天  
下人舌頭拋一句語直是難爲吞吐山僧今日不惜  
眉毛要與老祖相見卓拄杖云殺人須是活人刀活  
人須是殺人劍野狐成隊覷無門瞎驢滅却正法眼  
復卓一下

千巖因宋景濂學士來謁師問聞公閱盡一大藏  
有諸士曰然師曰耳聞乎目觀也曰亦目觀爾師  
曰使目之能觀者公謂誰耶士揚眉向之師相視  
一笑

林下尋師扣板扉揚眉相向頗依稀作家手眼天然  
別笑裏全豁殺活機山茨際

宗鑑法林卷三十五

宗鑑法林卷三十六

集雲堂 編

大鑒下二十五世

蘇州鄧尉萬峰時蔚禪師千巖長嗣參千巖巖問將什

麼與老僧相見師豎拳曰者裏與和尚相見巖曰  
死了燒了向何處安身立命師曰漚生漚滅水還  
在風息波平月映潭

風高月冷碧天橫皎爾銀河瀉玉津陡地都來成一  
色一湖水漾一湖春慧門開

陽春唱出待知音白雪相呈意轉深謾說困魚偏止  
樂自來幽鳥悅喬林雲菴

霜風凜凜難回互未入羅裳骨已寒不得陽春些子  
力爭能長嘯獨憑闌全鑑祖

把箇拳頭相見伊轉身那覺在深泥縱然躍出蓮華  
藕不及金剛寶劍隨秋山寶

萬峰因巖問不是心不是佛不是物是什麼師  
以坐具打圓相叉手而立一日普請斫松師拈圓  
石作獻珠狀曰請師酬價巖曰不值半文錢師曰

瞎巖曰我也瞎你也瞎師曰瞎瞎

卓立孤峰徧九州呈珠獻石瞎雙眸無風白浪掀天地一喝西江水道流浮山珠

萬峰因巖上堂舉無風荷葉動必定有魚行師一

喝拂袖便行巖示偈曰鬱鬱黃花滿目秋白雲端

坐碧峰頭無賓主句輕拈出一喝千江水逆流

松下千年有茯苓如何得似寶珠明快聞猛虎山中

嘯不礙游魚海底行牧雲門

廓徹師資盡滅門擎頭戴角氣雄奔崑崙踢轉無回

互布地風雷海嶽昏資福觀

### 大鑒下二十六世

蘇州鄧尉寶藏普持禪師萬峰詩嗣萬峰付偈曰大愚

肋下痛還拳三要三玄絕正偏臨濟窟中師子子

鐙鐙續燄古今傳峰臨入滅有人問曰和尚會中

幾箇得法弟子峰示偈曰慈悲無念花開果熟因

地分明慧寶致囑

尿牀鬼子眼睛開肋下三拳實俊哉要使爺錢非好

子生機一路道將來牧雲門

正法眼藏都滅却撐撐拄拄是何宗誰知無事生多

事鼓弄人家罪莫窮資福觀

年老垂綸釣赤鱗閒將一偈作香珍尿牀佛法無多

子杓卜由來賺後人南山端

將門自古產英豪克紹家聲展六韜直得虎符懸肘

後崢嶸頭角奪高標可達衍

張公喫酒李公顛肋下還拳絕正偏獅子窟中無異

獸聯芳續燄古今傳浮山珠

一偈傳來異世人燈燈續燄萬峰身獅兒代代根荄

脉日月同明耀古春溪高峰

臨濟一隻正法眼拈來付囑與當人一輪明月輝今

古萬戶千燈共一真南宗傳

鳳穴丹雘窺一斑全機肯諾較靈山翻飛雲外金光

現無盡心燈照夜闌喝崖悟

### 大鑒下二十七世

杭州東明虛白慧岳禪師寶藏詩嗣因觀松有省白藏

藏斥之一曰藏問心不是佛智不是道汝如何會

師近前問訊叉手而立藏呵曰汝在此許多時還



作者箇見解師乃憤憤主第二日豁然徹法源底  
遂是偈曰一拳打破大虛空百億須彌不露踪借  
問箇中誰是主扶桑湧出一輪紅

金粟乘云大小寶藏雖用惡辣鉗錘直是臭氣深重  
若是金粟待他眉毛定動劈脊便棒直使赤漣漣地  
快活平生

佛法眞真似海深擬將蠶測枉勞心尖尖牛角翻身  
出解把虛空定一鍼收雲門

曳翻自己閒巴鼻一擲天輪透頂關峭峭巍巍孤卓  
卓當堂奪出爪牙斑資福觀

打破虛空活卓卓全身湧出絕承當廓然獨露無私  
旨天上人間沒處藏孤雲鑒

緊把三關豈放鬆驚然拶破太虛空頭頭示現孃生  
面始信從前費盡工夫高峯

萬里長風展六韜破關擊節在英豪虛空拳倒家聲  
振一喝還同日月高與菴歸

徹底驗人非艸艸那許外邊打之遶一機迅發觸骸  
乾撲落虛空日杲杲素菴仁

豁然扭著孃生鼻始信今朝力用全築碎虛空掀海  
嶽孤光烟燭出重淵靈常齋

大鑒下二十八世

金陵東山翼善海舟永慈禪師

東明品嗣

首謁太初原

初問父母未生前那箇是汝本來面目師從東過

西叉手而立初曰不是不是師曰兩眼對兩眼初

領之復請東明曰問無初福田衣何人合得披明

便掌師曰作麼明又掌師曰一掌不作一掌用又

如何明復掌師曰老和尚名不虛傳展具作禮三

拜未幾開法翼善明專僧送衣拂至有偈曰分付

慈海舟訪我我無醺明年之明日西風笑點頭明

年東明如期示寂

何處歸來宿艸菴老君錯認古瞿曇一番驟雨花容

褪縹緲峰高滴翠嵐牧雲門

見得乾坤大似斗如何撥著便模糊眼光廓落超方

外始信從前不丈夫資福觀

大鑒下二十九世

金陵高峰寺寶峰智瑄禪師

海舟慈嗣

依海舟於翼善

親炙多年見理精徹履踐穩實舟授以偈曰迷悟  
猶如空裏雲碧天明淨了無痕歷然世界其中露  
殺活拈來總現成

天自蒼蒼水自清銀鈎薦釣渡江人反流棹轉村邊  
岸得路歸來滿面春資福觀

寶峰因天奇瑞參師問甚處來曰北京師曰別有  
去處麼曰隨方瀟灑師曰曾到四川否曰到師曰  
四川境界與此間如何曰江山雖異風月一般師  
豎拳曰還有者箇麼曰無師曰因甚却無曰非我  
境界師曰如何是汝境界曰諸佛不能識誰敢強  
定名師曰汝豈不是著空曰終不向鬼窟裏作活  
計師曰西天九十六種外道汝是第一端拂袖便  
行

金粟乘云寶峰應機綿密觀面活埋不是天奇和尚  
泊合失却一隻眼雖然如是且如何是九十六種外  
道底第一良久云諸佛不能識誰敢強安名  
何故繁詞掃不開一拳高鑑自能裁西天外道雖蒙  
記透網之鱗喚不來牧雲門

放開一線鍼來往掣斷玄津鱗鼓願吸盡太湖千萬  
頃滔天浪湧響如雷資福觀

隨方瀟灑大方家拶著當頭便返躑箇中境界阿誰  
知諸佛從來不能識孤雲鑑

一般風月境界幽深諸佛不識誰是知音桃花爛熳  
春風遠千里相思動客心全鑑旭

臨機棒喝當時分鶻眼龍睛手自親觸著通身寒徹  
骨不驚人處也驚人拳石沃

### 大鑒下三十世

竟陵荊門天奇本瑞禪師寶峯瑄嗣示衆世間無法出  
世間無法若透得者箇無法歸家穩坐

磬山修云奇祖祇要盡法不顧無民不肖子孫却不  
恁麼世間無法出世間無法透得者箇無法正好行  
脚 晦曇承云二大老一人善收不善放一人善放  
不善收不肖土上加泥去也世間無法出世間無法  
透得者箇無法好與三十棒何故殺人刀活人劍  
天奇上堂僧問如何是高峰宗旨師曰石馬嘶風  
居物外金雞高唱御樓前曰有何奇特師曰不遇

知音者徒勞話歲寒曰祖祖相傳傳箇甚麼師曰  
海底泥牛翻白浪林中石女播清風曰大地全彰  
是甚麼人受用師曰東村李二哥

承天怡云入理深談則不無天奇老祖若要提持高  
峰宗旨猶欠一著在

天奇一日爲普照太初二上座舉曰不論向上三  
玄要了末後一著太曰如何是末後一著師曰風  
吹牆畔柳日曬澗邊榆照曰青山低處見天闊紅  
藕開時聞水香太作噦聲曰正是弄業師曰你作  
麼生太曰如人上牆百無所計師作噦聲遂起身  
歸位

石車乘云一噦聲百無所計一噦聲起身歸位具眼  
底辯看

秀州天寧法舟道濟禪師華頂觀下七世古菴祥嗣因陸五臺

問畫前元有易否師曰若無將什麼畫曰畫後如  
何師曰元無一畫曰現有六十四卦何得言無師  
曰居士莫著文字好曰請師離文字發一爻看師  
召五臺應諾師曰者一爻從何處起

普明用云畫前畫後論有論無總與大易無交涉直  
饒一喚一諾爻象分明也未是禪僧極則畫前元有  
易否何不便喚五臺待他應諾却好云元有易否陸  
公者裏必然別有所入且免後來許多周遮

倒垣破屋住幽林徹後通前不掩門轉北面南接影  
響可憐咫尺隔千尋玉林秀

義皇殿上話庖氏夫子庭前毀仲尼共住都因不相  
識却教腦後擊金鎚一初元

### 大鑒下三十一世

龍州關子嶺龍泉無聞絕學正聰禪師天奇瑞嗣參天

奇執侍久之一日奇問在世忘世時如何師曰了  
物非物曰在念念忘時如何師曰於心無心曰心  
物俱忘時如何師曰華山高突兀太行峰嵯峨奇  
乃付偈曰破情情破破還情絕迹無私精內精知  
是箇中今不惜盡羶分付與仁行

雲漢滿云了物非物好肉剜瘡於心無心眼中著楔  
若非末後一句幾乎喚作義學沙門

相逢已是暗投機盡把家私說向伊心物俱忘天地

外華山豈逐四時移攀石沃

無聞因僧問如何是本來面目師曰石香亭曰便  
恁麼去時如何師曰喪却了也

笑巖寶云放去較危收來太速復頌

古雲峰頂人難覩偶被風吹映夕霞百鳥未歸天已  
晚夜深依舊宿蘆花

無聞因天奇問苦樂皆心因何外取師曰祇爲不  
了曰是非皆事因何妄承師曰錯認定盤星曰迷  
悟皆人因何不董師曰早知錯是火豈向四方求  
鐘聲披起鬱多羅大地何人眼不摩領得分明燈火  
意翻雲覆雨奈渠何牧雲門

春園爛熳花浪潑弄蝶爭妍撲鼻香日落茅簷天色  
晚一輪霜月照池塘資福觀

有水皆含天上月無山不帶嶺頭雲緣何世逐癡男  
女誤認張郎作李君旭雲端

織女夜來機繞拙無端弄巧雀河邊饒將薄霧遮羅  
袖未舞春風肘已穿金鑑旭

大鑒下三十二世

北京笑巖月心德寶禪師龍泉聽嗣參絕學於關子嶺

因洗菜次忽一菜葉逐水園轉捉不著有省攜籃  
歸遇學學問是什麼師曰一籃菜曰何不別道一  
句師曰請別問來學休去一日辭學學學拂子曰  
向者裏道得一句出格可去師無語嗣後再參學  
學問人人有箇父母子之父母今在何處師曰一  
火焚之曰恁麼則子無父母耶師曰有則有佛眼  
覷不見日子見麼師曰某亦不見日子何不見師  
曰若見則非真父母學曰善哉遂印可

水裏拾來火裏燒出頭天外自逍遙翻思未會機前  
著有一毫兮是一毫平陽恣

一莖菜葉忽隨流喜躍歸來盡底醺父母偏身紅爛  
也瞎驢端許振宗猷理安問

一莖園轉一尖新攜籃歸去意休呈雲收雨散江天  
暮紅爐一點片雪輕彌菴本

伸手不及處見得一莖菜一火焚之處通達絕無礙  
本來真父母一口百襍碎雖然七縱八橫要且渾無  
縫罅孤雲鑑

一毫圓轉一須彌就手擎來笑眼歸莫謂家親無覓  
處冰花燄裏正春肥雪輪潔

笑巖因僧問如何是和尙昔年獲益事師以拂子  
倒懸視僧曰會麼曰某甲已識得和尙做處也師  
曰你道荊州黃四孃禮佛求箇甚麼僧無對師打  
出

金粟乘云一同一答彼此分明誰知末後一拶如墮  
萬仞深坑至今起不得召大衆云還救得麼莫道賊  
過張弓好

笑巖到熊耳山禮祖塔寺僧叱曰空塔汝憑拜何  
爲師以手指塔問此是空塔耶曰是師曰祖師吟  
曰攜履西歸去了師曰蒼天蒼天

東明際云者僧且置祇如笑巖老人見祖師禮拜不  
見祖師禮拜若道見笑巖又恁麼道若道不見笑巖  
又恁麼道畢竟如何良久云簷頭不斷前旬雨電影  
還連後夜雷

熊耳峰高鴈影寒悲風直得艸蔓蔓三千里外無相  
識血濺啼鵲淚未乾理安問

鉤頭著餌放絲綸嚮波心魚不吞歸去自歌山自  
綠回看堪笑水雲深梅谷悅

笑巖上堂拈拄杖曰有麼有麼時有僧出作禮師  
劈脊打曰多口作麼曰某甲一言也未措何爲多  
口師復打曰再犯不容

三峰藏云俊則太煞俊未免忙在 藝則忍云機峻  
利令嚴寒恁麼爲人果是直截可惜遇著箇孟八郎  
莫說未開口已前承當何曾夢見棒頭落處當時若  
是山僧待他劈脊便打曰多口作麼便與掀倒禪牀  
直教耆老漢一生開口不得

不須賓主會來親占得神機絕法人雪夜梅花領春  
早滿園香艸不知新三峯藏

萬仞峰頭險峻關絲毫不盡隔千山行人不解開門  
計滿目風光別世間寒松操

笑巖因一沙門執錫卓立朗聲問仁者可識從上  
相承密論義否師曰密則非論論則非義彼退後  
以錫橫肩上翹足獨立曰是甚麼義師於地上書  
一更字彼以錫畫地一畫闊兩脛立上復以錫橫

按腹上亞身而視曰是甚麼義師於地上書一嘉  
字彼即卓錫地上以兩手叉腰懸翹一足切齒怒  
目作降魔勢曰是甚麼義師於地上書一之字彼  
分身指天地周旋二帀曰是甚麼義師於地上書  
一尤字彼進前作女人拜分手指兩衲子師於地  
上書一蠶字彼方遶三帀作禮立於師右師於地  
上書蠶字彼方進語師曰設到此更須有甚麼者箇  
時節始得彼嘆曰嘆真摩訶衍薩婆若上士耶作  
禮而去師顧衆曰此是應真聖賢所呈金剛變相  
三昧三昧王三昧用來勘吾然彼亦將有新證

湘翁云云二人與麼酬酢大似生鐵錘上刻出鋪敲  
華龍也有權也有實也有殺也有活若檢點得到可  
謂東土衲僧笑殺西天外道其或未然拈拄杖畫一  
畫云彩雲仙子扇紅羅

千山歷盡艸鞋穿任運騰騰度好年平實商量田地  
穩靈山慧命一絲懸牧雲門

笑巖因僧問一言道盡更不容其言時如何師曰  
武陵谿畔杜鵑語十里桃花血染紅

武陵谿畔杜鵑鳴萬語千言無別聲回首若知歸去  
好天涯遊子盡回程遠卷體

誰家桃李鬪芳妍杜宇聲聲喚客還曾蹋武陵谿畔  
路洞中春色異人間旅卷月

辭窮理盡舌頭乾海底珊瑚撐著月杜鵑聲裏落花  
紅多少阿師全漏泄天岸昇

笑巖因二客入門吟曰茂松修竹忽見師便問如  
何是道人家風師曰茂松修竹曰有何旨趣師曰  
自家觀不足留與客來看

茂松修竹有何旨勁節非惟傲歲寒直引遠風清六  
合莫將聲色等閒看梅源德

杭州徑山無幻性冲禪師華頂觀下九世教畏空嗣因編無趣

錄歸趣曰子一向做得箇什麼師曰性冲買得一  
段田收得原本契書請和尚簽押遂將錄呈上趣  
接得曰者箇是我底你底吟師曰和尚莫攙行奪  
市趣擲下錄師便出

古林如云我若作徑山待道者箇是我底你底吟便  
與作禮云今日念和尚老大



相逢各自逞家風祖業兒孫用不窮大海無涯恣躍  
鯉長空萬里縱飛鴻天峯性

無幻因僧問如何是提婆宗師曰一字不著畫曰  
不問者箇師曰圓相不著圈

天癡善云圓相不圈一字不畫魔佛難名衲僧眼瞎  
富塞虛空無人酬價驀地相逢七上八下

無幻燒火次僧問如何是自性天真佛師曰與我  
般取一束柴來僧般柴了又問師曰者奴子好惡  
也不識便打

桃源洞口尋春色野老頻呼在此中遊徧園林猶借  
問不知身在萬花叢潛夫陵

大富須還長者家天然隨處有生涯可憐不識囊中  
寶錯過真金在赤沙介菴進

脚下魚行總不知因憐鸚鵡亦何癡幾多負義忘恩  
者徒有雙雙兩道眉牧公諷

### 大鑒下三十三世

荊谿龍池禹門幻有正傳禪師笑巖寶嗣因聞鐙花燁

爆聲有省遂抵京求證笑巖嚴曰你把從前悟底

一一說來師敘語至半嚴踢出一隻鞦曰向者裏  
道取一句看師不能對歸堂通夕不寐明旦猶佇  
立簷下嚴見乃喚師師回顧嚴翹一足作修羅障  
日月勢師不覺脫然

夜靜鐙花吼一聲琉璃殿上露全身巨靈分破華山  
色赤脚波斯絕路行理安問

兩片脣皮正合開死蛇忽地觸人來天明毒氣方甦  
醒翹足修羅也怪哉古南門

閃電爲人機自別晴空霹靂太孤危回頭揭瞎頂門  
眼金鎖玄關當下灰嶗山顛

趨出鞦來齊截斷修羅障處活全機通身發露自難  
掩一笠千山力荷歸孤雲鑑

忽把咽喉塞斷看其如吐氣轉身難回頭霹靂重相  
迭撲破虛空玉一團素菴仁

泥牛縱步上天台蹋碎重巒烟雨開若不清風生兩  
腋那能親到赤城來妙雲雄

龍池因僧問如何是西來意師曰屋北鹿獨宿曰  
不會師曰谿西鷄齊啼

夾山豫云師翁答話雖則一椎兩當未免令者僧分  
東著北不肖孫則不然如何是西來意但云面臨江  
水闊早晚看行舟更云不會向道兩岸蘆花裏清風  
引白鷗 妙偉俊云古人拈出陷虎之機不妨奇特  
怎奈者僧幽州猶自可最苦是新羅明眼人前只是  
好笑且道笑甚麼三十年後驗取 萍寄普云若道  
此二句是西來意喫鐵棒有分 藝則忍云幻祖眼  
觀東南意在西北有問資福如何是西來意祇向道  
簾卷山雲白庭深巖葉黃待云不會一瓢寒澗水對  
月坐松崗

龍池微

舌底冰霜冷逼人閒言謔語却多情曉風殘月同誰  
翫散入長楊作雨聲梅谷悅

龍池一日因事著褊衫舉椅子作女人拜向磬山  
曰修上座待我拜你爲師修失笑呈偈曰木人提  
唱笑呵呵更著衣裳誰識它昨日覩來是男子今  
朝還作老婆婆師曰此偈甚愜老僧意

法林音云磬山老祖偈雖善美實未盡幻祖之意不  
可更說點把火照看面皮厚多少幻祖當年果有意  
那

臨機影艸主全賓照用同收禮木人掀倒本非男女  
相青天閃電芥投鍼道峯珍

觀面相逢不用呵原非我兮亦非他平生一件傷心  
事錯把張公喚李婆法林音

龍池因僧問如何是佛祖奇特事師曰蝦蟇捕大  
蟲曰恁麼則不奇特也師曰貓兒捉老鼠僧禮拜  
師便喝僧曰和尚爲什麼放某甲不過師曰老僧  
有事你且去

東明際云鷲王擇乳素非鴨類

上他機境太孤危劈面遭他下一鎚劒戟誤身空自  
老幾人曾過玉關來理安問

風前一語定綱宗漢語胡言信亦通末後重提千古  
令孤燈日下帶朦朧山茨際

萬仞龍門透者難金鱗擬躍點波瀾電雷相送重燒  
尾腥血空流石上斑南磬珍

奇特蝦蟇捕大蟲全提玄要振家風電光石火難存  
迹一喝頓教宇宙空祖菴鏡

龍池因僧問如何是如來禪師豎起拳僧曰如何  
是祖師禪師亦豎起拳僧曰如來禪與祖師禪是  
同是別師復豎曰不是拳頭便是巴掌

報恩琇云今日設有問報恩如何是如來禪前是山  
門如何是祖師禪中間是佛殿如來禪與祖師禪是  
同是別但向道明眼人難瞞

龍池上堂一切法不有一切法不無若能如是會  
水上按胡盧

湖光潋灩晴偏好山色冥濛雨亦奇若把西湖比西  
子淡妝濃抹總相宜梅源德

秀州興善南明廣慧禪師

徑山冲嗣

示衆五峰頭卓朔

雙徑尾顛先喝石巖一任踈跳明月池覆地傾天

此四句中有一句有殺人刀無活人劍有一句有  
活人劍無殺人刀有一句殺人刀活人劍俱有有  
一句殺人刀活人劍俱無檢點得個儻分明許你  
參學事畢

龍淵注云興善雖然殺活縱奪通身手眼檢點將來  
不無鈍置殺人 空諸性云四句外尙有一句子百

味具足不獨殺活也雖然南明終未能舉出在且道  
是那一句良久云觀著則瞎

太平無事刀開鞘煩惱之時劒入匣忽聽秋風嘯一  
聲忙轉深宮著鎧甲慧超先

興善因問谷問了卽業障本來空爲甚獅子尊者  
被罽賓國王斬却師曰本來空曰爭奈頭何師曰

本來空曰因甚罽賓國王一手墮地師曰本來空  
柳汀斜對野人腮零落衰條伴曉江正是霜風飄斷  
處寒鷗驚起一雙雙印宗奇

興善因看雪次僧曰滿山都是雪師曰隨聲逐色  
漢曰請師離聲色道一句師却曰滿山都是雪

普明用云者僧身挨白刃活得命來不妨好手南老  
人費盡鹽醬究竟不獲稱心者裏還有向聲色外別  
道一句者麼良久云切忌道滿山都是雪 藕菴衍  
云興善老漢慣將官物欺壓平人此間有爲者僧雪  
屈者麼出來與藕菴拄杖子相見

卷三十六

宗鑑法林卷三十七

集雲堂編

大鑒下三十四世

明州天童密雲圓悟禪師龍池傳嗣因挑柴過山觸路

傳龍  
嗣池

因挑柴過山觸路

旁積薪有省遂依池出家時中看得心境兩立請

益池池曰汝若到者田地便好放身倒臥師益惑

一日城歸過桐棺山頂忽覺情與無情煥然等現

時池遷北京師特往省覲池問汝近日有新會處

麼師曰一人有慶萬民賴之池曰汝又作麼生師

曰圓悟特來省覲和尚池曰念子遠來放汝三十

棒

迸破桐棺險出頭  
煥然等現萬機休  
劈空獨握掀天

棒塗毒聲騰四百州晦山顯

忽覩餘薪夢乍清  
家私破盡體難輕  
一回蹋碎桐峰

月一統山河見太平祖菴銳

天童自外歸省龍池池上堂舉拂子問諸方還有

者箇麼師震威一喝池曰好一喝師連喝兩喝歸

位池顧曰更喝一喝看師出法堂池便下座

一番風雪一番寒  
寒盡春來暖氣寬  
祇者何勞重舉  
出驛亭西去是長安  
古南門

梅花叶唱一腔新清和寥寥世罕人意氣還他同調

者始終敲拍總陽春眉伯奕

天童因龍池曰汝等爲我扶持佛法去師呈偈曰

若據某甲扶持佛法任宅○○○○都來總與

三十棒莫道分明爲賞罰

巢頂鐵船獨駕時閻浮界闊縱橫機分明顯煥無私

也一道眞風掌握歸資福觀

天童因僧問學人遠來要問和尙討箇佛做師曰

佛也是你分外事

翠巖詰云斬釘截鐵本分宗師直下知歸罕逢達者

還委悉麼渾身已在含元殿何事嘮嘮問帝都白

嚴符云者老漢生平一條白棒不順人情不管是佛

是魔黨頭便與一搭在者裏爲什麼不用少年曾決

龍蛇陣潦倒還同稚子歌

天童因僧問如何是不動尊師曰此去徑山五百

里

翠巖詰云天童老漢慣用金剛王寶劍觀面全提可惜者僧不知落處若知落處便好向百舛頭上卸却干戈雖然者裏則不然如何是不動尊但向道露柱騎牛登五老燈籠蹋雪返西峰

天童上堂彌陀明日是生日老僧今日是生日我此彌陀先一日三世諸佛從此出

古南門云大衆者老子結識古佛也是好事今日山僧未免撥轉機輪倒行此令將者老子鼻孔扭捏一上彌陀明日是生日塗糊他作麼老僧今日是生日真箇那我此彌陀先一日鐵作面皮三世諸佛從此出賺殺一船人所以從上一言半句如風行太虛鼓動萬有求其起處了不可得如擊石火閃電光構得構不得未免喪身失命山僧恁麼道祇如今日眞堂設供意在於何還是仁義道中麼還是世諦流布麼還是淨法界本無出沒大悲願力示現受生麼恁麼論量笑破衲僧口要且總沒交涉畢竟如何擊拂子云泊合停囚長智

天童挂牌入室有僧纔跨門卽曰不用拈提請師

便棒師曰爲甚麼僧無語師便打

平陽恣云者僧將或九仞之山尙虧一簣之士當時待道爲甚麼但向道橫趨金殿過定惹御爐香管保先師拄杖子兩手分付 塔鑑衡云祇道天童與者僧入室却是者僧與天童入室復頌

孟八郎漢要恁麼爲自怪撩蜂得眼腫休嫌倚勢把人欺

法童因僧問猛虎以肉爲命因甚不食其子師曰自肉食不盡

野猿抱子歸青嶂幽鳥銜花過碧岑滿目風光皆自得得了無遺法累兒孫侶巖荷

天童因一秀士自撰禪門口訣詣師請正師展卷指一實字問曰此字如何解說士擬議曰却解說不出師曰恁麼則虛言了也士無語

平陽恣代云待老和尚脚跟點地卽道

天童因僧問昨日喫師三棒今朝拈却拄杖師曰今日不打你

法音深云紅葉不題流水去春山多少好人家要會

天童示衆太白山中儘有柴一株不許衆人般老  
僧不是多護惜爲要諸人徹骨寒

八十婆婆不識羞  
湧身畫閣賣風流  
深深揖下無人  
采祇得懽懽歸去休  
二隱謚

宜興磬山天隱圓脩禪師龍池傳嗣因閱楞嚴經佛叱

阿難此非汝心處有省後閱傳鐙錄見僧問乾峰  
一路涅槃門公案遂去不得參兩載偶聞驢鳴頓  
釋前疑述偈曰忽聞驢子叫驚起當人笑萬別與

棱棱鐵幹磨霄月  
雪苦霜侵愈見神  
忽爾夜廊開笑口  
曉來大地盡含春  
粟菴鼎

驢鳴冷地笑顏新  
葢色騎聲絕晦明  
一喝倒流千丈水  
笑他空費老婆心  
安問

江臯翻轉浪千層殺活從教用得親朕迹一毫留不住白拈手段是重興山茨際

多情石女嫁春風  
髻巫雲映日紅  
倒著霓裳花下舞  
香塵撲撲撼蟾宮

南 礪 珍

非色非聲露本容睹驢步步不留踪家私籍沒能聞  
托一喝從教大地翼截流策

磬山因僧問如何是出格句師曰獨脚魚

江天海云修祖獨荷濟上綱宗揭示人天正眼等閒  
露一機出一語坐斷古佛舌頭橫抽衲僧腦蓋且道  
利害在什麼處祇許老胡知不許老胡會



清波不犯老師翁烈焰堆中釣活龍未展全機伸獨  
脚橫行海上不留踪南 礪 珍

磬山因僧問忽然打破砂鍋露出家常茶飯時如  
何師曰吞又吞不得吐又吐不得

昨夜霜風到艸簷老來雙鬢白新添杖頭且喜存知  
已引我隔溪望酒帘法 林 音

磬山因僧問一句當天八萬門永絕生死者一句  
得恁麼有力師曰壁立千仞

一句當天生死絕刀頭猶帶戰餘血不知何事鼓聲  
頻無限愁人恨未泄法 林 音

磬山因僧問生滅滅已寂滅爲樂如何是寂滅師  
曰今朝雨落階前溼

從容登眺幾凭欄滿望溪山入畫看仙苑春風絃管  
沸笙歌裏雨聲繁湘 湖 仁

磬山因僧問世尊觀明星意旨如何師曰黑裏白  
法林音云艸鞋筋不斷脚跟皮如何得穿伎倆未盡

糊孫子又爭得死直饒死盡伎倆踰穿脚跟不向威  
音前會取就任意誠裏卜度要窮磬山老人敗闕處

猶隔三程半

磬山因僧問虎以肉爲命因甚不食其子師曰是  
親必顧又曰有愛在

干戈定後羨英雄聖主偏知不伐功若似漢家多妒  
忌誰將金劍學從戎定 生 純

磬山因僧問虛空無向背云何有東西南北師曰  
切忌回頭轉腦

團圓一片天邊月海角天涯長照臨不奈寒雲生谷  
口時人換却眼中睛弘 鼎 教

磬山因僧問飲乳如四大海水積骨如毗富羅山  
那箇是最初父母師曰養子方知

殺活臨時祇自由三軍鎧甲一時收從今四海咸寧  
靜不動干戈定九州鐵 機 信

磬山因僧問山嶽傾頽爲甚烟霞不散師曰捨大  
戀小曰獨臨玉鏡云何眉目不覩師曰打破鏡來

相見

資福玉云功夫不能進步須參老人之前語工夫不  
能脫灑須參老人之後語雖然三十年後

磬山因僧問盡大地是一箇眼睛爲甚麼隔窗不

見師曰獨瞎眼睛相見

爍破乾坤烏聿聿隔牕何事便迷麻誰知獨瞎孃生

眼相見依然隔海涯海慧惺

一身還有一身愁那得毗盧頂上遊大地若能無寸

土騎驢何處不揚州捷庵敏

磬山因僧參曰學人未到磬山先喫棒了也師曰

空頭禪和曰再求和尚賜棒師曰老僧無者閒氣

力

未到磬山先喫棒再求一頓喪渾家謾言老子無筋

力笪帚留將掃落花海慧惺

磬山因僧問如何是明頭合暗頭合師曰一字不

加點曰如何不加點師曰明頭也合暗頭也合曰

離却明暗外請和尚道一句師曰老僧到者裏氣

急殺人

點畫未形字已成無文古篆實難明當人不識求指

註賺脫眉毛墜下生湘湖仁

磬山因僧問如何是句到意不到師曰言言見諦

步步迷踪曰如何是意到句不到師曰祇在舌頭

尖盡力吐不出曰如何是意句俱到師曰有時獨

倚庭欄上閒看梅花三五枝曰如何是意句俱不

到師曰落花流水去空負浪遊人

移花最愛廉纖雨插柳宜逢黯淡天試看上林春色

早花含珠露柳含烟海慧惺

磬山因僧問如何是臨濟宗旨師曰千雷並聒

妙偉俊云修祖荅臨濟宗旨極是禮周樂備檢點將

來未免太費鹽醬若問柏林應聲便喝云遲八刻

磬山因僧問如何是法身邊事師曰黑漆桶曰如

何是法身師曰爛冬瓜曰如何是法身上事師

曰三家村裏酒帘子

妙偉俊云潭州紙貴一狀領過

磬山因僧參曰久慕道風今日得見和尚師高聲

曰諾曰三乘十二分教卽不問當陽一句請師直

指師豎起拂子僧禮拜師曰你那裏來曰今日得

到磬山師曰猶是者邊事那邊事作麼生僧無語

德菴心云者僧將成九仞功虧一簣當時何不叉手

進前云請和尚那邊問將來待擬拈棒但云不合起動和尚拂袖便行豈不頭正尾正

杭州徑山雪嶠圓信禪師龍池傳因僧問如何是佛

師曰大珠和尚道底曰不會師曰三脚蝦蟇

魯菴遠云得平實之三昧具解脫之總持宋元以來一人而已

徑山因僧問如何是雙髻家風師曰一堆土竈萬箇峰頭

紹隆仰云大小語風向境上著倒山僧又且不然一堂風冷淡千古意分明

徑山因僧問如何是函蓋乾坤句師曰撲不開

衆角固多一響則足呼之無門聲聲在谷不在谷斷鼇立極徒勞鹿若此溪西鷄齊號何負屋北鹿獨宿  
雲林格

湖州淨名菴抱璞大璉禪師龍池傳示疾衆請末後

句師曰我有日用相應頌在跌坐而逝頌曰○竝行黑白却同年○芳艸茸茸到處眠○一時秋空雲翳盡●夜深何處是家園

培風澤云抱璞會下設有一人待開口道我有日用相應頌在劈面吐云恁麼早已不相應了也令抱璞老人祇好棺材裏瞪眼

明暗雙雙始末原烏鷄號向碧雲邊曾經身入蘆花岸返照無踪逼大千弘鼎教

建寧普明駕湖妙用禪師興善廣嗣同雪嶠信上弦夜

翫月次嶠指月問那半箇在那裏去了也師良久曰會麼嶠曰也祇得半箇師却問那半箇在那裏去了嶠亦良久師曰也祇得半箇嶠乃呵呵大笑

金明進云二老舉揚箇事如善舞太阿終不傷鋒犯手雖然檢點將來太殺艸窠裏覓金明若在見他恁麼便好拂袖而出何故不見道此夜一輪滿清光何處無 永正元云塤篪迭奏互換可觀還他二老作家然祇好明者一半事若是那一半事敢云未在且作麼生是那一半事待月落後與你道 龍淵法云二老道即太殺祇道得一半金明雖則善爲折衷以小子看來太似湊成三箇擔板 退菴智云二老爲那半箇費却許多腕頭力作麼者裏若有問那半箇

在那裏去了但舉拳云鑑他更如何劈面便掌 瓶  
山謙云向上一著卽三世諸佛直得口挂壁上二大  
老合水和泥直是笑破人口到瓶山者裏好各與三  
十筭帚

眉端挂劍寒光如電互換臨時穿楊之箭咄何似秦  
時轆轤鑽介菴進

夜夜蟾蜍挂碧天清光何處不周圓都來弄巧反成  
拙彼此顛頂見一邊主峰法

普明上堂因僧問如何是古佛心師便打僧曰如  
何是學人心師曰欲攪遊龍蜿蜒競上曰畢竟如  
何師連棒打出

桃花流水杳然去別有天地非人聞堪笑漁人成鈍  
置扁舟何處探仙源提正令觸體穿吹毛凜凜逼人  
寒空諸性

### 大鑒下三十五世

潭州大潯五峰如學禪師天童悟嗣因僧問釋迦出世  
端爲何事師曰貧兒思舊債僧拂坐具便出師曰  
癡漢又恁麼去

法林音云釋迦老子落節處五峰不妨料檢今日有  
三十棒且自寄庫何故仁義道中

八千往返問單傳拋出琳琅聽莫全賺得遊郎空作  
賦虛承野老掣風顛雪輪潔

養成傲骨不堪憂碧水長天一色秋隨分生涯隨分  
足何須特地更馳求可達衍

蘆花月上影團圓珍重漁翁把釣竿就手絲綸舒卷  
處白漫漫又黑漫漫南宗傳

徹骨赤窮入市寰萬千離緒鎖慙顛幾回話到衷腸  
處心事徒將夢裏刪法林音

五峰在關中因居士問在關中作甚麼師曰竹牀  
高臥待雲來曰豈不開殺人也師曰五枚白鳥五  
更鳴

法林音云五峰貪程居士錯路俱是關外語若要進  
關麼雪竇道底復云

霜花飄處夜初寒挑盡殘缸與未關三箇兒童相對  
坐閒來無事弄雙丸

五峰因僧問文殊起佛見法見覺未絕師曰闍黎

當受山僧頂禮僧擬開口師以手掩却

法林音云五峰一期施設縱奪可觀未免一番特地復頌

蓬蒿枝上欲棲鴉一陣西風滾白砂開眼不知何處去邊關昨夜動胡笳

常熟三峰漢月法藏禪師天童悟嗣上堂年年冬寒夏

熱朝朝夜暗晝明使得十二時辰看看能有幾人喝一喝曰太平本是將軍致不許將軍見太平

法林音云老老大錯下名言喝一喝云泊合錯下注脚復頌

杖頭無鈔典袈裟那有閒情弄死蛇聞道東臯春信早又隨風雨種桑麻

三峰上堂諸人盡是祖師門下客也不用作麼生喝一喝云家醜不可外揚

家醜無端向外揚擔擔鴨酒走成行祖師門下覓頭角笑殺東村李二孃法林音

三峰上堂繞四天下行脚底人有口堪喫飯擡脚不起底人也有張口喫箇甚麼良久曰問取諸方

九十春光一枕寒東風移月上朱闌分明白髮還少不盡傷懷淚未乾阿蓋

夔州梁山雙桂破山海明禪師天童悟嗣僧問如何是

一六開天師曰竹密山齋冷僧曰如何是二五成性師曰荷開水殿香

信手拈來答問端蕪纏紙裏倩誰看輕輕躡足龍門過惹得風雷徹骨寒憑菴

雙桂上堂酸醃瓮裏多蚊蚋破驢脊上足蒼蠅我者裏沒啼啖沒棲泊有扇打有烟熏貪生怕死漢不用上吾門

蜻蜓點碎波中月盪散清光上下圓吞吐魚龍全性命隨其風雲浪滔天栗菴

雙桂上堂天上明星突出釋迦打失一目回觀六道四生箇箇如蟲禦木

法林音云雙桂祇見釋迦要見六道四生猶隔十萬八千在永寧鼎云雙桂不是爲人創盡光彩大似以已万人

雙桂因僧問終日喫飯不曾較著一粒米時如何

師曰一箇斑鳩九隻尾

門開大廈從棲泊飄蕩伶仃苦更尋待到家園重問

信鶯遷喬木聽唬音粟菴鼎

徑山費隱通容禪師天童悟嗣上堂良久曰聲前一句

子欲要大家知

勝法榮云徑山大似癩兒牽伴 法林音云徑山老

漢誘人犯法

桃顯曰映紅靨靨柳眉風動絲絲迴文詩緘淚千

點聊寄相思夫壻知勝法榮

全因淮地月得照鄧陽春一箭重關透功高不樹勳

德慶奇

春到桃花溢水源風光別有一乾坤漁翁怕向他人

說恐惹閒愁到子孫法林音

徑山上堂箇事人人自現成無勞肯緊動修因波

吒路上多差互觀體承當是本人

德慶奇云我要問徑山老人既是本來成現因甚又

要人觀體承當擬議不來劈面好掌 法林音云我

爲你說箇譬喻如一箇好人面上鐫一行字云某甲

你道此人還具眼也無

郊外良田多稼穡室中笥篋總瓊琚叮嚀窮子莫驚

訝兩手而今付與渠德慶奇

一抹胭脂透臉紅羅裳繡襦笑春風愁腸總是相思

結緘寄吳山楚水東法林音

徑山因僧問者樣沒頭沒腦事如何得明師曰汝

未到沒頭沒腦田地在僧作禮師曰頭腦生也

勝法榮云者僧背著牛頭不肯認賊徑山重門擊柝

當面著賊

入暮抱琴高士興經宵坐月隱君家謾言冷淡無滋

味一盞清湯便當茶德慶奇

徑山因靈機問世尊未陞座文殊不白椎且道還

有佛法也無聲未卒師急拈拄杖曰且道卽今是

陞座不是陞座機擬答師直打退

萬仞橫身弄嶮巖一毫倒卓五須彌縱饒佛祖猶難

覷徧界淒涼盡屬伊日東涌月沉西何妨隨處顯真

機藝則忍

徑山因僧問如何是和尙家風師曰米少食無鹽



曰忽遇客來將何接待師曰忍饑無暇

巢菴定云先師雖則君子固窮爭奈寒酸太甚設有問山僧如何是福嚴家風但道布衣一片飽食三餐忽遇客來如何接待鐵釘飯木札羹倘有旁不甘底出來道和尙與麼答話大似乞兒暴富不見道知安則榮知足則富爭怪得老僧

金粟石車通乘禪師

天童悟嗣

因僧問如何是塵中能

作主師曰擦手見青天曰如何是化外自來賓師曰一棒一條痕

鬚鬆白髮離巖谷趁晚歸家不涉程玉兔一輪東嶺上枉聽猿叫斷腸聲栗菴鼎

灝州寶華朝宗通忍禪師

天童悟嗣

僧問如何是古佛

家風師曰寶華寺是千年來底曰如何是斬新條令師曰山僧是今日住底曰前佛後佛還有優劣也無師豎拂曰中間薦取

千年古寺出唐朝井井風規豈寂寥直下若知今古意靈然一展便猓霄樹豐興

伽黎畔畔千年寺接物還他今古同滿室芝蘭垂手

得寒梅香散白雲中如弦直

寶華因僧問透網金鱗因甚還滯水師曰是它家常茶飯曰取飽便是師曰怎奈沒頭浸却何

三昧真云當時寶華何不助它一箇霹靂免它沒頭浸却雖然只者家常茶飯方見老人立地處

寶華因居士問月缺一條還補得麼師曰補得曰將甚麼補師曰但將缺底補

擔雪填井功不浪身心不禁歷寒溫漫漫靜夜含虛碧宇宙清光一口吞栗菴鼎

宗鑑法林卷三十七

宗鑑法林卷三十八

大鑒下三十五世

集雲堂編

龍池萬如通微禪師天童悟嗣上堂開口成雙橛無言喪本宗須知此段事誰敢絕形容豎拂曰個中識得文殊老管取無煩過別峰

庭外梅花開滿樹堤邊楊柳綠千莖要知個事真消息忽聽枝頭鳥一聲鐵機信

龍池因僧問樹凋葉落時如何師曰過蟻難尋穴歸禽易見巢

西風乍起冷颼颼兩岸蘆花覆小舟解纜便能歸故國一輪明月湛如秋培風澤

龍池因僧問日落西山去林中事若何師曰虎行

樵子徑鳥宿故枝頭

獨坐幽篁霜月寒何來琴客喜盤桓高山流水知音少鴈落平沙孰解彈松若昭

越州平陽弘覺道忞禪師天童悟嗣僧問雪山夜半觀

明星正覺今朝道始成如何是正覺山前事師曰

秋壘此時驅健犢曰如何是出世因緣事師曰道

山何日跨歸鸞曰卽今事作麼生師曰看脚下

撲滅無盡燈倒拈臨濟藤四海郵亭上玲瓏雙劍痕

山前事後日因江南江北走兒孫最癡根

詞林不禁玉堂通敕下綸音滴漏中紫氣凌空霄漢

外底今脚下起高風紫凝曉

五嶺爭雄蜿蜒挺出產斯偉人與世罕匹咳唾落九天隨風生珠玉正覺道初成秋田驅健犢豈不聞常山有寶兮存之傳國空馳諸子兮獨賢母恤對山青悠悠仙子五雲謠能跨金龍四海寥脚下才郎咸白雪松花滿地勝漁樵溪高蜂

平陽上堂百丈得大機黃檗得大用更有一人得箇甚麼喝一喝曰迴超今古格不共汝同盤卓拄杖

承天怡云平陽要與百丈黃檗平分風月割裂疆土莫道不得直饒得去也是以五十步笑百步法林

音云我不似平陽百丈得大機黃檗得大用更有一人得箇甚麼賊入空室復頌

風前一曲遏雲行海水騰波樹作聲浩蕩乾坤無閒歇知音端的問誰人

平陽示衆今夜總教諸人徹底悟去還肯與麼承當麼良久曰且莫壓良爲賤

嵩又啓云弘覺老人如金翅摩海直取龍吞不肖兒孫今夜也總教諸人徹底悟去還肯與麼承當麼良

久云一翳在眼空花亂墜復頌

冰輪皎皎挂天心大地山河荷照臨打破乾坤親覲面光輝萬里溢清明

平陽垂問有一人朝參暮誦不離禪教忽遭雷擊時如何自代曰擊碎蟠桃核露出舊時仁

南北不分猶墮見聖凡路絕尙存塵一槌腦後齊翻轉脫體無依自絕倫古菴溟

平陽一日牽驢巡堂一市命衆下語不契自作驢鳴而出

若翁臻云大小平陽善向異類中行要且無大人相山僧若在將把艸塞向驢口於驢背上拍兩拍它若更作驢鳴但打版三下引繩出堂教他潑天伎倆也無容身之處復頌

千年古木久成精特地相將異類行信步蹋歌音弄巧無人自和作驢鳴

平陽一夜入堂大叫曰適來欄中不見了牛普請大衆把火上山尋牛去一僧纔出師便低頭歸方丈

古雪詰云平陽欄裏牛雖不見要且頭角全彰翠巖一頭水牯牛常在欄中祇是無踪跡可尋敢問大衆既是常在欄中爲甚却無踪跡

平陽晚參松直棘曲鷓鴣白鳥立大盡三十小盡廿九是人知有祇如背後有人喚你你便回首且道明甚麼邊事布袋肚皮寬金剛手版闕

薪傳瀾云耆老漢箇不關風自言自語當時若向明甚麼邊事處便休去不妨令人疑著却道布袋肚皮寬金剛手版闕何異教人上樹與賊過梯豈不誘壞人家男女乃拈拄杖云還有不甘者麼出來我正要問汝回頭轉腦是明甚麼邊事

雪竇石奇通雲禪師天童悟嗣上堂長安甚闊我國晏

然拈拄杖曰不可道拄杖子不晏然也遂點曰低聲低聲

長安市裏人烟靜我國晏然事轉多若是金毛獅子子三千里外見諸論培風澤

雪竇上堂月朔月望月圓月缺一句全提萬機寢削卓拄杖曰看看擲下來也咄

江天銓云靈山指出曹溪畫出總不如雪竇老漢一番掀露爭奈盡大地人皆在拄杖上會却

潤州鶴林牧雲通門禪師

天童悟嗣

僧問世尊未拈花

迦葉不微笑意旨如何師曰討甚麼盤僧曰迦葉

笑後又如何師曰一場敗闕

十八嬰孩出講堂公公不識與麼揚逢人謾謂詢知

友一片冰心付野塘

溪高峰

眼中不著沙耳裏不著水八兩共半斤一倒還一起

擬思是隔萬里落花風雨多香溼流鶯紫對山青

一片渾圖太古心是誰巧鑿喪真淳任有補天煉石

力無奈東君逗早春

妙雲雄

古南上堂拋拄杖曰撲落非他物復擎起作舞曰

縱橫不是塵還見山河及大地全露法王身麼復

擊香几曰一片榆楠木敲來響殺人

鸞鏡臺前巧畫眉自塗脂粉自稱奇穿簾透戶風流

勝蘇合茶香滿面吹栗菴鼎

古南上堂大海不宿死屍虛空不著五色大火聚

中不藏蚊蚋無住法中不立迷悟諸人圖參禪悟

### 道三生六十劫

永寧鼎云古南若不立四禁門爭顯得自己脚跟浮  
逼逼地

無端平地起波瀾巨海一漚納百川若問中流的  
意萬溪千壑盡從淵德實信

吳江報恩浮石通賢禪師

天童悟嗣

上天堂省觀童仍

命侍者一日值雪童問好雪因甚不落別處師曰

祇爲大地無寸土童曰既無寸土畢竟落在甚處

師曰前山與後山

爲窠頂上夜徘徊目擊尸塗便解開殿閣微涼親看

破新雞鷄子笑盈顚靈常齋

寂寞空庭一笛吹風聲欹枕謾相宜孤燈夢斷分香

淚暗寫愁腸寄與誰自休滿

纔涉清關兩眼醒玲瓏巖下沒疎親風生殿角涼如

洗臉六飛花遍界新擎石沃

報恩因僧問明不犯之令還許他悟也無師曰猶

落第二曰易開終始口難保歲寒心師曰自領出

去

虜騎無端入禁城進前退後強支掌中庭主將能行  
令不動干戈建太平護國徽

報恩上堂烏飛兔走急如梭明暗何曾昧得他個  
裏本來無可說謂言無說已成多豎拂曰是有說  
是無說擲拂子

纔開臭口事如麻東魯西秦不住家說甚有無重卜  
度自塗脂粉向人誇粟菴鼎

報恩因僧問破沙盆意旨如何師曰七零八落填  
溝壑僧於此有省

七零八落填溝壑老大爲人添注脚不肖當年若在  
傍一坑兩箇都埋却弄寄普

通玄林野通奇禪師天童倍嗣上堂吾有一句普天匝  
地舉似諸人切莫擬議是甚麼句

資福玉云者藏頭露尾漢既已舉出又道是甚麼句  
忽有人掀倒禪牀如何迴避

通玄上堂法身報身化身一串穿却雖然太煞省  
要免得諸人摸索大家好快樂卓拄杖曰祥馨祇  
有一隻角

清曉佳人出洞房迎風釵釧別宮商霓裳綰就冰心  
結月裏嫦娥莫并雙粟菴鼎

通玄因僧問如何是一念不生師曰百雜碎曰如  
何得命根斷處去師曰休著力

魯菴遠云命根斷處自然休著力只如一念不生果  
能百雜碎也未

京口竹林林臯本豫禪師修山示衆石裏壓油水

中取火不是動轉勞人祇貴當陽吐露趙州老子  
太惺惺切忌道青州布衫重七斤

竹林高枕渾無事門外不知何處風簫地喚回秋夜  
夢窗前明月上孤峰鎮機信

竹林因僧問明月堂前花開枯木是賓家句主家  
句師曰石女哭蒼天

勝法榮云林臯老人雖則不負來機若是斬釘截鐵  
起死回生猶欠一著在

竹林因僧問天不蓋地不載甚處安身立命師打  
出方丈次日又問某甲昨日喫棒今日和尚痛否  
師復打出

承天怡云夾山作略不愧爲一代龍門檢點將來未免瞎却閩州一城人眼去在

杭州西天目玉林通秀禪師修山僧問昔日高祖

道海底泥牛銜月走巖前石虎抱兒眠鐵蛇鑽入

金剛眼崑崙騎象驚驚牽意旨如何師曰好兒終

不使爺錢

截流香象河水成珠虎生三子終有豹菟海底翻波

兮湧出龍圖鷺鷥立雪兮明月何殊高峰自古清如

許漫說東家富有餘最爛根

獨翹家財萬頃非圖祖父田莊五車豈借些兒個裏

現用大方一句標題千古案好兒郎燈燈續燄溶埋

堂真高峰

萬斛明珠傾不盡五車書卷用何窮東西兩目同春

令千載弘傳誦有風師慈鏡

縱奪俱歸掌握權神兒爭受止啼錢嘉聲吳越高風

遠撼動江山五嶽天紫凝曉

高踞追蹤肖古風西峰拔地更玲瓏拈來瓦礫黃金

重豈肯逢人問石崇與薨歸

河目海口通身劍刃作略滔天全體奮迅滿盤托出好兒郎寶藏打開誰識驢南宗傳

鐵牛隨處吼雲濤萬里江山紫氣高就裏乾坤藏世

界千秋不道是兒曹朴仁義

出格男兒富自強豈誇祖父廣田莊胸藏萬卷無窮

盡諸子從他四海揚宗麟翔

天目因秋色大盛示衆山僧說得一篇好佛法懸

在雨花橋上大衆各自看取良久曰伯樂曾三顧

千金孰解增贈君君不納完壁倚枯藤

晦石琦云琦孫當初若在只向道老和尚自領一上

罰因甚如此不合將常住物作自己人情

天目示衆老窻敗屋紙帳青鐙此中有人得些子

意味否夜來風色峭釀雪已三分

永寧鼎云盡謂天目乃一國之師看來乞兒拾得開

元寶那堪字畫不完全

天目因僧問如何是本分事師曰管人家烟沖大

小

勝法榮云天目祇知者僧管人家烟沖大小不知自



已忘却杓柄短長

傾國傾城自不知斜簪玉鳳出羅帷時開金鏡照顏色猶整新妝倩畫眉

薈怡

天目一日問戴庭承雲從何生曰從和尚問處生師曰山僧罪過

永寧鼎云天目老人也是垛生招箭 培風澤云鐵丸薦口塞誰是解吞人

天目因僧問搥鼓鳴鐘所爲何事師曰換人眼睛晦石琦云我若作者僧便與禮拜歸衆看者老漢如何合煞

杭州理安箸菴通問禪師

修山

因僧問大悲千手

眼那隻是正眼師曰急水灘頭下釣絲

急水垂絲千眼迷隨波東去又拋西金翅掣斷滄溟竭雷雨轟轟過九溪天笠珍

千尺絲綸釣碧波遊魚一見急如梭無窮底意隨流水正眼分明奈若何

雲端

嚴陵不受漢家封急水灘頭開正眼忽見錦鱗破浪來釣絲牽得乾坤轉北溟湛

懶向街頭輓繡毬却來斷岸擲金鈎游鱗逐浪烟波杳漁父徒蓁載月舟

崑山偉

古岸風清坐釣磯灘高水急浪如飛大悲千眼由來瞎空載滿船明月歸可達衍

葉公縱有點睛手難點大悲腦後瞳急水灘頭纔下釣十方震動看飛龍妙偉俊

理安因送雪嶠大師至山門見狗子吠雪曰者無佛性東西師曰却搔著大師癢處雪大笑師亦大笑而別

三昧真云既無佛性因甚搔著癢處須知二大老之笑各有一種白拈在

理安因僧問對面不識時如何師曰刀斧斫不開

法林音云老僧自老僧闍黎自闍黎假借一點得麼若是闍黎無分全歸老僧十個有五雙盡道太煞穿

鑿今日有七棒權且封好寄庫以待三十年後

金鍾腦後用來應武帝曾輸碧眼胡大戰燕山銘再勒斬新收復宮皇都

海慧惺

孫吳當日起艱難吮疽分醪隊伍間數萬雄兵如父

子同生同死在邊關勝法榮

理安因僧問如何是法身三種病師曰灸瘡癰曰如何是二種光師曰覷著則瞎

法林音云不向威音那畔又那畔打幾個踉蹌跳未免觸途成滯三種病二種光拈却了也且喚甚麼作法身吹餘雖是他嫡骨兒孫實不曾嗅著他些汗臭氣待我推倒大人峰吸乾法雨泉那時再緩緩向你道國手從來無正方祇將雞屎攪麻糖虛空一服病全愈猶勝透瓶九轉香勝法榮

理安因僧問如何是佛師曰低聲低聲

要透重關也不難含元休更問長安堪悲錯路貪程客依舊千山與萬山梅谷悅

理安因無隱再參師問一向在甚麼處住隱曰與化師便打隱曰者老漢猶作者箇見解師又打隱曰恁麼爲人瞎却人眼去在師復打曰今日瞎却一箇隱曰自納敗關師便囑隱曰蒼天蒼天師復囑隱便出

德菴心云賓中有主主中有賓互換投機一場納敗

雖然當時更與三十豈不光前裕後

理安因僧問一切衆生皆孝道因甚土梟食母師曰冤家路狹

豪舟元云師翁向鑊湯內拋出冰團虎口裏奪得活雀非但換却諸方眼目瞎却天下人眼去在

理安因僧問大徹底人本脫生死因甚命根不斷

師曰螺螄吞却鴨

螺螄吞却鴨照用全賓主一語定綱宗千鈞機發弩

瑯琊真

理安因僧問一貧赤骨時如何師曰有件破襖頭要便與你僧擬議師曰穿不著

妙偉俊云者僧家貧遭劫徹體無依師翁看風使帆縱奪可觀檢點將來猶欠一著在具眼者辨取

未必心頭似口頭到來知已反爲讐逢人但說三分話客作成羣落二籌

南嶽緣蘿山茨通際禪師

壽山修嗣

僧問如何是超佛

越祖句師豎拄杖曰向者裏薦取僧便喝師便打僧擬進語師連棒趁出

杖頭指出中天月池內風飄蕩香若問西來超祖  
句徒勞獨自費評章友石戲

一句全提迴超佛祖再偏生蛇素非敏手遊人端不  
解回途空使東君頻折柳寒松操

相詢越祖句拋出鐵饅頭沾著些兒味令人飽不休  
此念正

淡蕩烟霞遶綠蘿懸巖倒挂影瓊娑掀翻佛祖閒窠  
窟乞與遊人價倍多雪輪源

南嶽因僧問如何是學人安身立命處師曰待山  
僧有安身立命處即向汝道

勝法榮云南嶽雖然途中得力爭奈終日區區若要  
歸家坐享太平三生六十劫

南嶽因僧問手握利刃劍因甚稠獼子不死師曰  
全承渠力

鐵機信代云元來和尚也祇在此間作活計

江天詮云承利劍之力稠獼子死矣承稠獼之力用  
利劍何爲具眼者分別看

南嶽因僧問較破鐵酸餛因甚路上有饑人師曰

同途不同轍

資福王云者樣也敢稱禪客何不更云恁麼則與師  
隔生也管教南嶽分半院有分

陽山松際通授禪師修山上堂門對千峰碧沿溪  
一徑幽更求玄妙旨撥火覓浮瀛

承天怡云陽山恁麼提唱雖則老婆心切未免辜負  
他先聖喪我兒孫

陽山因僧問二十五聖本無優劣爲甚獨選耳根  
圓通師曰翠爲毛死

一等共行官馬路須持虎節令權衡雖然奪得高標  
轉未免擔枷帶杻行提老敏

建寧府紫雲峰普明衡石悟鈞禪師普明參普明  
明問化人問幻事谷響答泉聲欲識吾宗旨泥牛

水上行意旨如何師曰夢眼見空花明日臨濟有  
一句子你又作麼生師便喝明便打師又喝明直

打出曰元來是瞎驢師拂袖便出

頂門眼打教徹迢迢官路透雲穴蕩蕩不存佛魔則  
孤危危高突突祥驛一掣金鎖開正眼還從瞎驢滅

杏花風送暮雲沉萬里光含一片月牧公謫

確紫忽生耳虛空自放花象龍騰踴處縱奪有生涯  
者瞎驢足堪誇任有補天鍊石手畫符必定用碌砂

晦顯旭

嘉興金明介菴悟進禪師普明用嗣參駕湖纔跨門駕

曰是甚麼師擬對駕震聲一喝師豁然契悟便掩

耳而出駕一日上堂舉拂子曰世尊拈一枝花老

僧舉一枝拂且道是同是別師出禮三拜歸位駕

深肯

惡辣鉗錘老古錐入門擬對喝如雷豁然掩耳翻身

出惹得洪音匝地來素弘理

陝路相逢薦一拶根源徹底不知窮迅雷斷送黃昏

雨四海漫漫鼓黑風夢堂倪

當軒過毒鼓聞者喪膽魂獅子兒返躑晴空日月昏

世高則

敲出金鸞五色髓撲碎驪龍明月珠天上人間俱結

舌一段風流出鏡湖山舞在

嘉興府永正一初悟元禪師普明用嗣金明來訪日前

日地動師曰我者裏不動明顧左右曰動底是不  
動底是師休去

一動一不動行人無處躲甜瓜徹蒂甜苦瓠連根苦  
空諸性

前日地動海水岌岌者裏不動須彌飄拂動靜兩忘  
阿誰辨別別別拋出大家看畢竟是何物咄牧公謫

宗鑑法林卷三十八

宗鑑法林卷三十九

集雲堂編

大鑒下四世

潭州瀾山靈祐禪師百丈海嗣初在百丈充典座因司

馬頭陀尋得一山丈欲師住時華林爲首座爭之

丈告衆曰若能對衆下得一語當與住持因指淨

餅曰不得喚作淨餅汝喚作什麼林曰不可喚作

木楔也丈問師師踢倒淨餅便出丈曰第一座輪

却山子了也

百丈堂前定大瀉金毛獅子振全威淨瓶踢倒還元  
化千里淳風動地歸

不顧山前有信旂單刀一直入籌帷長戈短戟都無  
用奪得將軍金印歸上方登

大用還須作者知當場一著絕無疑堪嗟不紹家園  
者祇向人前去灼龜通

盤中喝彩馬上奪標當仁不讓見義而驍一箭天山  
從此定瀉山千古鬱昭曉

古梅例

寶符不在常山上諸子空教自惆悵取代因徵母郵  
賢趙家大業堪憑仗白巖符

瀉山與仰山摘茶次師曰終日摘茶祇聞子聲不  
見子形仰撼茶樹師曰子祇得其用不得其體曰  
未審和尚如何師良久仰曰和尚祇得其體不得  
其用師曰放子三十棒曰和尚棒某甲喫某甲棒  
教誰喫師曰放子三十棒

報慈遂云且道過在什麼處 首山念云當時不是  
瀉山便見扶籬摸壁 瑯琊覺云五更侵早起更有  
夜行人又云若不是瀉山泊合打破蔡州 白雲端

云父子相投意氣相合機鋒互換啐啄同時雖然如  
是畢竟如何道得體用雙全去瀉山放子三十棒也  
是養子之緣 天童覺云瀉仰父子叢林盡道各得  
一脈殊不知天共白雲曉水和明月秋 玉泉璉云  
直饒體用兩全怎奈當頭錯過錯過則且置祇如放  
子三十棒又作麼生三盞酒離公子面一枝花插美  
人頭 廣教玉云巵拍板六律諧聽無孔笛五音協  
暢互換投機風流不墜還他父子作家若在臨濟門  
下棒折也未放在雖然且道前後放六十棒又作麼  
生擊案云好雨千峰迎翠色太平野老盡謳歌 懶  
菴銛云善用千鈞之弩須是瀉嶠慣射百步之箭還  
他仰山雖父慈子孝即不無若論得體得用猶未敢  
相許 法林音云前後放六十棒且道是賞伊是罰  
伊

體用全彰用不難當時瀉仰自相瞞禪流若具金剛  
眼互換機鋒仔細看佛甲元  
龍生龍子闔全威霹靂聲中掣電機雨過雲收何處  
去瀉山千古獨巍巍 荅軒還

春暖相呼出翠微時行時坐幾忘歸黃昏一陣東風  
雨未免渾身透溼衣保舉勇

張翁乍與李公友待罰李公一杯酒倒被李公罰一  
杯好手手中呈好手佛鑑勲

瀉山得體仰山得用體用俱全夢中說夢喝一喝誰  
卷演

兩兩於菟落荒艸無事相將弄牙爪奪去攪來各擅  
奇末梢一哂山欲倒白巖符

錦衣公子醉晴暉金玉相宣接拍奇宛轉高歌誰解  
聽和雲并作雪花飛遠鑿鏡

瀉山問仰山曰大地衆生業識茫茫無本可據子  
作麼生知它有之與無仰曰慧寂有箇驗處時有  
一僧從面前過仰召闍黎僧回首仰曰和尚者箇  
便是業識茫茫無本可據師曰此是獅子一滴乳  
迸散六斛驢乳

開先金云瀉仰父子被者僧一狀領過 法林音云  
仰山驗處雖真祇好驗自己究竟驗它人不出何不  
喚闍黎待僧回首便以目視瀉山看老漢作何伎倆

無端又下箇註脚瀉山末後雖是養子之緣也是借  
蓑衣當被蓋

父子有時揚密意神通變化不相知喚回業識茫茫  
者笑倒瀉山老古錐真淨文

一喚回頭識我不依徇羅月又成鉤千金之子纔流  
落漠漠窮途有許愁天童覺

瀉山在法堂坐庫頭擊木魚火頭擲却火叉撫掌  
大笑師曰衆中也有恁麼人遂喚來問你作麼生  
火頭曰某甲不喫粥肚飢所以歡喜師乃點頭

磬山修云百姓日用而不知故君子之道鮮矣 愚  
菴孟云者僧在千百衆中奪錦而歸及乎詢其所以  
却又將扇子掩面以避會麼分明只在秋江上明月  
蘆花無處尋

瀉山問仰山從何處歸曰田中歸師曰禾好刈也  
未曰好刈師曰作青見作黃見作不青不黃見曰  
和尚背後是甚麼師曰子還見麼仰拈起禾穗曰  
和尚何曾問者箇師曰此是驚王擇乳  
不作青黃見其如稻穗何驚王能擇乳鶴子過新羅



天目證

二八嬌娥巧畫眉  
茜香分翠試羅衣  
錦絲綰就同心結  
只許檀郎知此機  
天真則

瀉山問僧汝會作什麼  
曰會卜師拈起拂子曰  
者箇六十四卦那一卦收僧無對師曰  
適來大壯今是明夷

寶壽新云禍福無門惟人自召  
白巖符云老漢今年須防失脫  
法林音云和尚大似不解卜

瀉山問仰山天寒人寒仰曰  
大家在者裏師曰何不直說曰  
適來也不曲和尚如何師曰  
直須隨流瑞巖愠云珠明川媚  
玉潤山輝瀉山父子是則固是  
當時若知有轉身一路子孫也  
未至斷絕還會麼人天渾莫測  
珍重赤鬚胡

吹盡風流太古調  
唱出富貴黃鐘宮  
舞腰催拍月當曉  
更進葡萄酒一鍾  
正堂辨

大家在者裏兩手扶不起  
放下近前看是什麼面  
業無際派

大家在者裏初不礙  
隨流兩口無一舌  
葛藤殊未休

茫茫大地人無數  
幾箇男兒解點頭  
寂巖中

瀉山因泥壁次李軍容來具公裳  
直至師背後端簡而立師回首見  
便側泥盤作接泥勢軍容便轉笏  
作進泥勢師便拋下泥盤與軍容  
歸方丈

巖頭竄聞云噫佛法澹泊也  
大小瀉山泥壁也不了明招謙云  
當時合作麼生免被巖頭檢點代  
却轉泥盤作泥壁勢待伊動靜便  
歸方丈黃龍新云巖頭錯下名言  
殊不知瀉山軍容弄巧成拙

瀉山睡次仰山問訊師便面向壁  
仰曰和尚何得如此師起曰我適  
來得一夢汝試爲我原看仰取一  
盆水與師洗面少頃香巖亦問訊  
師曰我適來得一夢寂子原了汝  
更與我原看巖乃點一盃茶來師  
曰二千見解過於鶩子

蔣山勤云夢中說夢深許瀉山  
妙用神通須還二子傳茶度水  
耀古騰今年老心孤憐兒惜子  
向衲僧門下一人在門外一人在  
門裏更有一人遍界不曾藏佛眼  
覷不見

撥艸瞻風孤峰獨宿鼓無絃  
琴唱無生曲瀉仰香巖

鼎之三足臨機不費纖毫力任運分身百千億

南堂靜

取水烹茶不失機當時原夢善知時如斯始謂仙陀客驚子神通豈及伊本覺一

一杯晴雪早茶香午睡初醒春晝長撈著通身俱是眼半窗疎影轉斜陽雪巖欽

迭奏填饒侍曉堂還他家有兒郎遏雲度玉渾閒事惹亂天邊鸞鳳翔應予還

瀉山令侍者喚第一座座至師曰我喚第一座汝來作甚麼座無對

曹山代云若令侍者喚恐不來 法眼益別云適來侍者喚

瀉山因仰山侍行次指前頭枯樹問前面是什麼曰祇是枯樹子師却問耘田翁翁曰枯樹子師曰者耘田翁它後亦有五百衆

神鼎譚云爲復意在耘田處爲復意在仰山分上爲復總不恁麼諸上座一切諸法縱然更不用生事他是父子說法同道方知 瀉山詰云山僧則不然耘田翁吾不如汝且道大圓是山僧是若人辨得許汝

具擇法眼若也不辨佛法熾然生滅

瀉山示衆老僧百年後向山下作一頭水牯牛左脇書五字曰瀉山僧某甲正恁麼時若喚作瀉山僧又是水牯牛若喚作水牯牛又是瀉山僧且道喚作什麼即得仰山出禮拜而退

雲居膺代云師無異號 資福寶云當時但作此○相拓呈之 芭蕉清代作此④相呈之又云同道者方知 南塔涌云一千五百人善知識只得一半芭蕉徹云當時作此相呈之又云說也說了註也註了悟取好 保寧勇云和尚一等是入泥入水中峰本云道是瀉山僧却是水牯牛好道是水牯牛却是瀉山僧好當時有人下得者兩箇好字教他百劫千生要脫水牯牛也未得在 通玄奇云瀉山一身充兩役到底功不成名不就仰山雖解扶豎終是家業喪亡 神鼎澤云要識瀉山麼以左手拍禪牀云者裏是要識水牯牛麼以右手拍禪牀云者裏是復以兩手拍一拍云六月十三熱不相瞞 雪竇正云大小瀉山好似嚼飯餞嬰孩不堪檢點芭蕉雖然

和盤拓出若要絕人情見則未可會麼良久云貪觀  
天上月失却手中撓

不是瀉山不是牛一身兩號實難酬離却兩頭應須  
道如何道得出長流芭蕉徹

水牯瀉山峭峻機分明人類顯幽奇兩途語出分明  
處夜鳥投林曉復飛道吾真

山下爲牛山上僧河沙異號未爲能常愛暮雲歸未  
合遠山無限碧層層海印信

改却形容換却頭當陽難隱箇蹤由驢名馬字誰呼  
喚多少傍觀掩面羞保寧勇

反手書空事已成忙忙人問兩頭明屈原不是逢漁  
父千古誰人論獨醒佛心才

楚徑歸客賺殺人早曾畊遍大田春有時落艸無尋  
處顯現瀉山老漢身張無盡

瀉山水牯牛禪人聚頭較可憐負春人喚作嶺南獐  
天童覺

春寒料峭凍殺年少切忌參商別無玄妙龍門遠  
百年猶恐沒人知名字仍將左脇題入水入泥難放

牧仰山祇得半邊騎塵堂愚

綠樹陰濃夏日長樓臺倒影入池塘水晶簾動微風  
起滿架薔薇一院香高峰妙

山當盡處疑無路轉過溪來景愈幽石屋老僧情更  
好慇懃花釀兩三甌白巖符

學梳鬆鬢試裙新消息佳期在此春爲要好多心轉  
惑偏將宜稱問傍人綠雨蕉

轉身九五就塵埃劍閣重重豁達開陋巷不騎金色  
馬回途却著破衫來箭峰真

瀉山一日見香巖仰山作餅次師曰當時百丈先  
師親得者箇道理仰與嚴祖顧視曰甚麼人答得

此話師曰有一人答得仰曰是阿誰師指水牯牛  
曰道道仰取一束艸來嚴取一桶水來放牛前牛

纔喫師曰與麼與麼不與麼不與麼二人俱作禮  
師曰或時明或時暗

愁休乾云動弦別曲葉落知秋還宅瀉山父子若是  
衲僧門下猶欠悟在何也不是僧繇手徒勞畫丹青

復頌

饅頭水牯示綱宗覲面相承道愈隆化外來賓端的  
別莫將蒨子當天雄

瀉山上堂仲冬嚴寒年年事晷運推移事若何仰  
山進前叉手而立師曰我情知汝答者話不得却  
顧香嚴嚴曰某甲偏答待者話師躡前問嚴亦進  
前叉手而立師曰賴遇寂子不會

瑞嚴愠云瀉山將引三千向冰枯雪老之時作一家  
宴熊掌獸峰下筋獸飫管絃鼙鼓聲徹雲霄遠近觀  
瞻莫不欣艷及乎分付家財依然却成吳越擊拂云  
當初祇道茅長短燒了方知地不平 烏石道云瀉  
山父子三人裝一棚傀儡打箇決殺無好散場且道  
那裏是他打決殺處兩人各各叉雙手門外砂盆井  
石走笑殺瀉山老古錐却來面南看北斗 空有生  
云瀉山父子雖則聲和響順敲唱同時檢點將來俱  
在百尺竿頭坐地各認一斑未免傍觀者哂當時若  
問明覺仲冬嚴寒年年事晷運推移事若何但道今  
日風頭稍硬請和尚歸方丈若道得者一語瀉仰宗  
風必不致恁麼寂寥

晷運推移事若何絲來線去定諸譌織成蜀錦千般  
巧不出當時一隻梭 懶菴樞

一竿絲線兩金魚不犯清波意自殊斜拽蓑衣遮蓋  
後空餘明月滿江湖石溪月

一箭暗穿紅日影雙鵬已落碧雲端不知李廣無玄  
妙多向弓絃發處看開極雲

瀉山問雲巖聞汝久在藥山是否曰是師曰如何  
是藥山大人相曰涅槃後有師曰如何涅槃後有  
曰水灑不著巖却問未審百丈大人相如何師曰  
巍巍堂堂煒煒煌煌聲前非聲色後非色蚊子上  
鐵牛無汝下業處

天童華云二尊宿說大人相何異指鹿爲馬或有問  
歸宗虎丘大人相作麼生向他道九九百半青半  
白 平陽忞云二尊宿指鹿爲馬應菴祖證龜成鱉  
各領三頓棒或有問天童大人相作麼生擘胸云堂  
堂皇皇歷歷落落三生六十劫悟去也不知

瀉山見劉鐵磨來曰老特牛汝來也磨曰來日臺  
山大會齋和尚還去麼師乃放身作臥勢磨使出

去

淨慈一云瀉山老漢平生一條脊梁拗不曲被劉鐵磨一推推倒直至如今起不得若要扶起瀉山請各下一轉語衆默然以拄杖一時趁散 中峰本云瀉山被劉鐵磨一拶拶倒要起不得鐵磨被瀉山一推推轉要住住不得木上座與麼批判多少人在背後敲斷拇指 博山來云案山起雲主山下雨杓卜聽虛聲熟睡饒語祇饒弓折箭盡末是作家要得同氣相求同聲相應看者一隊水牯牛復笑云鼻孔總在博山手裏 廣教王云劉鐵磨來不是冤家不聚頭老將牛汝來也勾賊破家來日臺山大會齋和尚還去麼胡餅裏呷甚麼汁作臥勢便出去雨收雲散長空闊一對鴛鴦畫不成 愚庵孟云瀉山被鐵磨一問直得倒街臥路雖有牛馬踐蹋總不顧也且道大會齋去不去來日再看 曾騎鐵馬入重城敕下傳聞六國清猶握金鞭問歸客夜深誰共御街行翠峰顯 百戰功成老太平優游誰敢共爭衡玉鞭金馬閒終

日明月清風富一生天童覺

主人無德客無機石火光中閃電飛同死同生同得失此心能有幾人知中庵空

雲巢夢斷月華秋玉女翻身過斗牛卸却花冠歸舊隱玄途鳥道未容收足庵鑒

共樂昇平道泰時相逢終不展槍旗隨宜淡飯清茶外困臥閒行幾箇知無準範

雙放雙收盡主賓笙歌共奏玉樓春醉扶金屋珠簾悄花氣曾餘香露深天章玉

驀將影艸探來風直下翻身迥不同四海晏清天地靜將軍意不在雕弓浪山巖

八極功成帝道平離弓久自挂閒庭夜來一陣沙隄雁疑是邊驚畫角聲祖燈紹

瀉山上堂有僧出曰請和尚爲衆說法師曰我爲汝得徹困也僧便禮拜

雪峰存問云古人得與麼老婆心切玄沙備云山頭老漢蹉過古人事峰云那裏是蹉過處沙云瀉山被者僧一問直得百禰碎 愚菴孟云須知瀉山未上

堂時早已微困了也法林音云愚庵是作家

瀉山因僧問如何是百丈真師下禪牀叉手立僧

曰如何是和尙真師却坐

百丈狸奴面瀉山鬼眼睛見人空解笑弄物不知名

松源岳

婆娑疎影梅江月濃淡幽生闌苑春一陣和風俱漏

洩滿天香氣送游津全越祖

老婦臨粧繡點脣人前自逞好精神顰眉冷笑渾相

似不顧傍觀掩鼻人石帆衍

瀉山謂衆曰如許多人祇得大機不得大用仰山

舉問山下一菴主曰山頭老漢恁麼道意旨如何

主曰更請舉看仰擬再舉被庵主蹋倒仰歸舉似

師師呵呵大笑

笑嚴寶別瀉山云寂子更要一蹋麼 理安問云盡

道仰山被菴主一蹋殊不知仰山有作賊不犯底手

脚菴主雖得便宜未免遭人笑破口脣皮笑嚴老漢

恁麼道祇見錐頭利且道山僧與諸老相去多少乃

呵呵大笑

瀉山問仰山即今事且置古來事作麼生仰叉手

進前師曰猶是即今事古來事作麼生仰退後立

師曰汝屈我我屈汝

昭覺勸云仰山雖善進前退後發明古今其奈瀉山

向胡餅裏呷汁壓沙覓油雖然如是且道仰山叉手

意作麼生若也知得行脚事辦其或未然老僧不曾

孤負諸人自是諸人孤負老僧 方菴顯云仰山進

前退後洞古明今瀉山因甚道彼此相屈復頌

相見錦江頭相攜上酒樓會醫還少病知分不多愁

師資會遇意何深嘉地臨機問古今叉手進前還退

後曾經百煉見真金本覺一

裂破古今只一已五湖四海皇化裏森羅萬象屈不

伸此事何人共生死雲林略

瀉山坐次仰山香嚴侍立師舉手曰如今恁麼者

少不恁麼者多嚴從東過西仰從西過東師曰者

箇因緣三十年後如金擲地相似仰曰亦須是和

尙提唱始得嚴曰即今亦不少師曰合取狗口

象王頓呻獅子哮吼踞地盤空移星換斗坐斷舌頭



合取狗口一回擲地作金聲九曲黃河徹底清

南堂

一隊金毛師子兒相將無事共遊嬉同時啐啄知機

變鳳轉龍盤也大奇本覺一

待得郎來月已西寒暄不道醉如泥五更又欲向何  
去騎馬出門烏夜啼寂寥照

瀉山一日指田謂仰山曰那頭得恁麼高者頭得  
恁麼低仰曰却是者頭高那頭低師曰汝不信但  
向中間立看兩頭仰曰不必中間立亦莫住兩頭  
師曰若如是著水看水能平物仰曰水亦無定但  
向高處高平低處低平師乃休去

龍池微云瀉仰父子議論者片田地最初到有些分  
曉及手拶到臨末梢頭未免懞懞而休且道瀉山懞  
懞仰山懞懞若人定當得出要見者片田地高低也  
不難 二行滿云瀉山父子見處偏枯鏡清當時聞  
他恁麼祇向道自來手不沾泥水坐看木豐勝去年  
瀉山坐次仰山入來師乃兩手握拳相交示之仰  
作女人拜師曰如是如是  
佳人十八正嬌癡一曲堂前舞柘枝祇有五郎知雅

態更無人道柳如眉惹受深

芙蓉月向懷中照楊柳風來面上吹夜半庭前柘枝

舞天明羅袖溼臙脂心聞貴

瀉山方丈內坐仰山入來師曰寂子近日宗門令  
嗣作麼生曰大有人疑著此事師曰寂子作麼生  
曰慧寂祇管困來合眼健卽坐禪所以未曾說著  
在師曰到者田地也難得曰據慧寂所見祇如此  
一句也著不得師曰汝爲一人也不得曰自古聖  
人盡皆如此師曰大有人笑汝恁麼抵對曰解笑  
者是慧寂同參師曰出頭事作麼生仰繞禪牀一  
匝師曰裂破古今

蔣山勤云動絃別曲落葉知秋自古至今築著磕著  
鳥道立路許他父子親遊若是荊棘林中猶欠悟在  
以何爲驗祇如仰山遶禪床一匝瀉山云裂破古今  
若是明眼衲僧瞞他一點不得

宗門中令嗣合眼坐禪處平地打毬子急須著眼觀  
兩挑挑得上三築築不住築得住依前覲向毬門去  
石溪月

瀉山問仰山妙淨明心汝作麼生會曰山河大地  
日月星辰師曰汝祇得其事曰和尚適來問甚麼  
師曰妙淨明心曰喚作事得麼師曰如是如是  
黃龍斯云絃歌相和節拍相隨須讓他瀉仰父子若  
是妙淨明心三生六十劫未夢見在

妙淨明心一句全真山河大地日月星辰舒肝瀝膽  
照徹古今箇中如不昧徧界是黃金雪竇宗

瀉山因僧問如何是祖師西來意師豎起拂子後  
有僧到王常侍處舉前話王曰彼中兄弟如何商  
量曰卽色明心附物顯理王曰不是者箇道理上  
座快歸瀉山去某甲寄一封書與和尚僧得書馳  
上師師開書見一圓相相中書曰字師曰誰知千  
里外有箇知音仰山侍立乃曰雖然如是也祇是  
箇俗漢師曰子又作麼生仰作圓相於中書曰字  
以脚抹却師乃大笑

南星北斗忽移位四海九州如鼎沸波斯匿王鼻柱  
天樓至如來脚蹋地保寧勇

豎起拂子封白紙千里誰知有知己行人莫與路爲

讐四海五湖王化裏別峰印

瀉山因僧問從上諸聖直至今和尙意旨如何  
師曰目前是什麼物曰莫祇者是麼師曰阿那  
箇曰適來抵對底師曰你擬那箇去莫生事

蔣山勤云石頭太險答處太賒二俱不了

瀉山因僧問如何是道師曰無心是道曰某甲不  
會師曰會取不會底好曰如何是不會底師曰祇  
汝是不是別人復曰今時人但直下體取不會底  
正是汝心正是汝佛若向外得一知一解將爲禪  
道且沒交涉名運糞入不名運糞出汚汝心田所  
以道不是道

月函潛云若總是瀉山者箇一生也無用處聽者僧  
無禮卓拄杖一下云放過則不可

雪中送炭堪爲喜譬裏添鹽更是佳往往盡隨言語  
轉却同蛙步輾泥沙東夏顯

瀉山示衆汝等諸人各呈所悟看時有志和上座  
出作禮師曰不思善不思惡正與麼時還我志和  
上座本來面目志曰正與麼時是某甲放身命處

師曰子莫落空否曰某甲若見有空可落何曾是  
放身命處師曰到者裏何不問去曰某甲到者裏  
亦不見有和尚可問師曰汝福薄扶吾宗不起  
愁休乾云不啓龍門焉知三汲之化不迷魚腹安伏  
八陣之神瀉山與者僧驚路相逢未免七花八裂了  
也何故平蕪盡處是青山行人更在青山外復頌  
等閒垂釣向官津柳外從來覓故人話盡收綸天欲  
暮君之東魯我西秦

瀉山問仰山百丈再參馬祖豎拂因緣此二尊宿  
意旨如何仰曰此是顯大機之用師曰馬祖出八  
十四員善知識幾人得大機幾人得大用曰百丈  
得大機黃蘗得大用餘者盡是唱導之師師曰如  
如是是

家肥生孝子國霸有謀臣拳頭劈口槌未到無兒孫  
龍門遠

瀉山問仰山甚麼處來曰田中來師曰田中多少  
人仰插鋤叉手而立師曰南山大有人刈茅仰拔  
鋤子便行

玄沙備云我若見卽踞倒鋤子 鏡清怱因僧問仰  
山插鋤意旨如何清云狗銜敎書諸侯避道玄沙踞  
倒意旨如何清云不奈船何打破屎斗南山刈茅意  
旨如何清云李靖三兄久經行陣 翠峰顯云諸方  
咸謂插鋤話奇特大似隨邪逐惡據山僧見處仰山  
被瀉山一問直得無繩自縛去死十分 翠巖芝云  
仰山祇得一概諸人別有會麼 徑山杲云仁者見  
之謂之仁智者見之謂之智百姓日用而不知故君  
子之道鮮矣 天寧琦云幸是無事奈妙喜老漢念  
一道真言直得天左旋地右轉 天童悟云仰山當  
時待問田中多少人便出去不惟截斷瀉山葛藤且  
教伊討鼻頭不著 愚菴孟云雪竇道仰山被瀉山  
一問直得無繩自縛去死十分還知仰山麼偶行花  
下路驚起樹頭鶯 資福廣云枳朶來巢空穴來風  
皆有託而然也若是義海無際暗機無形縱臨濟德  
山有棒有喝亦用不得且道利害在甚麼處不見道南  
山大有人刈茅  
盡道瀉山父子和插鋤猶自帶干戈至今一井明如

老覺情多念子孫而今慚愧起家門是須記取南山

金鞭擊動蒼龍窟吐霧擎雲出海門溟渤吸乾天上

賊火相逢恰五更現成賊物不須爭暗中多少都分

一日頻來三五度有時歡喜有時瞋改頭換面休疑

半坡風雨半坡晴  
漁曲飄秋野調清  
多少游船泛溪

瀉山因仰山問如何是西來意師曰大好鐙籠曰

莫祇者箇便是麼師曰祇者箇是什麼曰大好鐵

籠師曰果然不謬

觀面提來付與伊分明此意沒東西腕頭有力千鈞

重誰道通身是水泥雪巖欽

瀉山在百丈因司馬頭陀問野狐話作麼生會師

以手撼門扇三下院曰太癩生師曰佛法不是者

## 箇道理

因果雙行孰共知  
茫茫四海路多岐  
擡頭拶出初生

月便効張公畫翠眉佛心才

春至百花開朱顏安在哉可憐園裏色不入鏡中來

龍門遠

瀉山因遊山到一磐石上坐仰山侍立忽鵲銜一

紅柿落在面前仰取以呈師師曰子甚處得來曰

此是和尙道德所感師分半與仰日子也不得無

分

玄沙備云瀉山被仰山一坐至今起不得 天童悟

云玄沙祇知瀉山被坐不知仰山被瀉山半箇柿子

塞却咽喉至今轉氣不來

鴉銜柿子落師前致問何來事皎然各分一半甜如

蜜如今不會更何年汾陽昭

滄仰分明亙古今父子相見意最深果熟馨香鴉銜

至捏來擘去似交襟要會二人端的處中秋月落時

潭心洞山聽

瀉山問仰山曰寂子速道莫入陰界仰曰某甲信

亦不立師曰汝信了不立未信不立仰曰祇是某甲更信阿誰師曰若與麼卽是定性聲聞仰曰佛亦不見

一聲寒雁南歸去菊綻東籬帶曉霜客在他鄉思故里西風颯颯甚淒涼鐵轡信

瀉山因仰山問百千萬境一時來作麼生師曰青不是黃長不是短諸法各住自位非干我事仰乃作禮

月心寶別云和尚善說青黃長短

瀉山坐次乃指足謂仰山曰十二時中承它負載不可孤負它仰曰昔日給孤園中祇說者箇師曰未得更道仰曰寒時與它轆著也不爲分外

魯菴遠云仰山雖則不孤負也爭奈未會瀉山意若在今日三十棒趁出也

瀉山示衆行脚高士直須向聲色裏橫行聲色裏坐臥始得時疎山仁新到出問曰如何是不落聲色句師豎起拂子疎曰此是落聲色句師放下拂子歸方丈疎不契遂辭香嚴嚴曰何不且住疎曰

某甲與和尚無緣嚴曰有何因緣不契試舉看疎學前話嚴曰我有箇語疎曰請道看嚴曰言發非聲色前不物疎曰元來此中有人遂囑嚴曰向後有住處某甲却來相見乃去至晚師問嚴曰問聲色話底矮團絜在麼嚴曰已去也師曰曾向子道甚麼嚴曰某甲曾對它來師曰試舉看嚴曰某甲向它道言發非聲色前不物師曰它道什麼嚴曰它深肯某甲師失笑曰將謂者矮子有長處元來祇在者裏此子向後若有箇住處近山無柴燒近水無水喫

天童華云在今天下覓一箇言發非聲色前不物底正如掘塹討天何況更要會他瀉山說話雖然切忌鑽龜打瓦 龍翔訴云案中商量盡道瀉山用向上牙爪惜手疎山失却一隻眼殊不知正是瀉山失却一隻眼却被疎山看破中峰恁麼道諸人還甘麼保寧茂云宗師爲人言不虛發然疎山旣不能坐斷舌頭應菴又豈免隨邪逐惡諸上座山僧者裏放一線道墮在聲色堆中把斷要津一任諸方揀責

瀉山坐次仰山問和尚百年後有人問先師法道如何祇對師曰一粥一飯仰曰前面有人不肯又作麼生師曰作家師僧仰便禮拜師曰逢人不得錯舉

慧海儀云自古及今多少人下語道嚴而不威恭而無禮橫按拄杖豎起拳頭若祇恁麼如何知得他父子相契處山僧今日也要諸人共知乃頌

莫分彼我彼我無殊困魚止灤病鳥棲蘆逡巡不進泥中履爭得先生一卷書

瀉山問仰山終日與子商量成得箇什麼邊事仰於空中畫一畫師曰若不是吾終被子惑

語浪謂云盡謂瀉仰父慈子孝仔細看來終是骨肉操戈祇如瀉山云若不是吾終被子惑是何意旨扁舟江上風波險潦倒漁翁是慣家

盡日商量古佛言當時一畫却成冤至今尚有瀉山在莫道宗枝絕子孫佛印元

父子雖親共較量胸中爭信有刀槍當時一畫畫得斷遍界葛藤無復生箇翁敬

瀉山一日見野火乃問道吾還見火麼曰見師曰從何處起曰除却行住坐臥請師別致一問來

連天野火了無涯起處猶來辨作家眼裏瞳人雙翳盡面前徧界絕空華道吾老也堪誇汲水僧歸林下寺待船人立渡頭沙佛燈珣

野火炎炎何處起紫烟紅焰便燒人須知坐臥經行裏見得無殊用得親石溪月

瀉山因資國來參乃指月示之國以手撥三下師曰不道汝不見只是見處太麤

憨休乾云瀉山寒光萬里資國皓魄一輪既然見處同明因甚又道太麤璞逢敏手方增價詩到重吟始見工復頌

孤光迴迴映長空一道清輝萬古同自是姮娥情未瞥猶憐身在廣寒宮

瀉山坐次見仰山從方丈前過師曰若是百丈先師子須喫痛棒始得曰今日事作麼生師曰合取兩片皮有分曰此恩難報師曰非子不才老僧年邁曰今日親見百丈師翁師曰子向甚句中見先



師曰不道見只是無別師曰始終作家

林臯豫云啐啄同時箭鋒相拄瀉仰父子可謂知音雖然若是明眼衲僧未舉先知落處

瀉山因僧問如何是露地白牛師曰叱叱曰啖餌何物師曰喫喫

白牛生下是白牛現起堂堂莫外求是我不能藏委曲直下分明是一頭般若柔

白牛露地沒遮闌在處橫眠在處閒水艸恣情甘美足醍醐純出潤良田汾陽昭

玉角霜毛露地牛人間天上顯踪由不同雪嶺時時吼肯若瀉山日日收冷吸月光無影像徧經塵國任遨遊牧童忽上須彌頂指出乾坤那一頭洞山聰

露地白牛起問端隨緣叱叱齒牙寒不知飲啄是何物喫喫直教滄海乾天童覺

宗鑑法林卷三十九

宗鑑法林卷四十

集雲堂 編

大鑒下五世

袁州仰山慧寂智通禪師潯山有梵僧從空而至

師問近離甚處曰西天師曰幾時離彼曰今早師

曰何太遲生曰遊山翫水師曰神通遊戲則不無

闍黎佛法須還老僧始得曰特來東土禮文殊却

遇小釋迦遂出梵書貝多葉與師作禮乘空而去

自此號小釋迦

東林總云大小仰山被他將兩杓惡水鷄頭澆了也

當時集雲峰下自有正令何不施行且道作麼生是

正令咄黃龍新云大小仰山被者僧熱瞞更出貝

多梵書塗糊一上如今更有異僧從空而至雲巖門

下喚來洗脚 渤潭準云可惜仰山放過者漢當時

若是寶峰便與擒住須教維那僧堂前撞鐘集衆責

狀趕出況佛法不當人情既稱羅漢諸漏已盡梵行

已立爲什麼不歸家穩坐祇管遊山翫水 昭覺勤

云驅畊夫之牛奪饑人之食是從上爪牙者僧具許

多神通妙用到仰山面前直得目證口喏何故鶴有  
九臯難翥翼馬無千里漫追風 大滙泰云仰山祇  
知進前趁鹿不知身墮網羅者僧偶爾成文頗有禪  
僧氣息若人會得許你倒捋虎鬚

遠離西竺路迢迢親向支那弄海潮若要清風生閭  
外拽來更與四藤條南華易

瞬目西天此土揚眉此土西天出息千重百市入息

一念萬年禪禪閣浮樹在海南邊南堂靜

仰山住東平滙山送書并鏡至師上堂提起曰且  
道是滙山鏡東平鏡若道是東平鏡又是滙山送  
來若道是滙山鏡又在東平手裏道得則留取道  
不得則撲破去也衆無語師遂撲破

五祖戒云更請和尚說道理看驀奪打破

提起分明照正邪衆人皆不啓唇牙譬如賣物無人  
買最後須歸本主家洞山聰

滙山古鏡仰山提日上東方月落西撲落不知誰拾  
得秋風索索艸萋萋保事勇

八十婆婆學畫眉風流意比少年時若無明鏡分妍

醜盡道不勞紅粉施上方盆

此謂拈來伸一問如何舉衆盡茫然不因一撲百雜  
碎定作人間醜婦冤西禪淨

仰山嘗夢往彌勒內院居第二座有一尊者白椎  
曰今日當第二座說法師起白椎曰摩訶衍法離  
四句絕百非諦聽諦聽衆皆散去及覺舉似滙滙  
日子已登聖位師便禮拜

滙山秀云依文解義卽不無忽然彌勒會中有箇作  
者纔見伊道摩訶衍法聲未絕便云合取兩片皮非  
惟止絕仰山麻語亦免使後人夢中說夢 瑯琊覺  
云且道聖衆肯仰山不肯仰山若肯又孤負仰山若  
不肯仰山平地喫交山僧今日不惜眉毛與諸人說  
破摩訶衍法離四句絕百非你若舉似諸方諸方恁  
麼會入地獄如箭射 天童覺舉公案畢云玉女依  
帋夜動機錦絲歷歷吐梭臍水天湛碧全功墮雪月  
寒清一色迷諸禪德全功負墮一色猶迷作麼生體  
悉得相應去權挂垢衣云是佛却披珍御復名誰  
東禪觀云尊者白椎聖衆便散不妨使人疑著却待

第二杓惡水潑了方始惺惺遲也且如摩訶衍法離四句絕百非道已道了諸人還識仰山麼 報恩秀云大瀉若解迴光返照和高松無地容身莫有夢中了醉裏惺惺者麼 天童悟云大小仰山刺腦人膠盆被尊者白椎云今當第二座說法腦門粉碎了也當時拂袖便行直令一院聖衆疑著猶更白椎逐塊不少

夢中擁衲參耆舊列聖森坐其右當仁不讓捷椎鳴說法無畏師子吼心安如海膽量如斗鮫目淚流蚌腸珠剖謔語誰知泄我機龐眉應笑揚家醜離四句絕百非馬師父子病休醫天童覺

夢裏談空也大奇百非四句若爲離當時能舉摩竭令何必堂中下一椎本覺一

仰山因龐公問久響仰山到來爲什麼却覆師豎起拂子公曰恰是師曰是仰是覆公乃打露柱曰雖然無人也耍露柱證明師擲拂子曰若到諸方一任舉似

隱靜岑云大小仰山被龐公一拶直得手忙脚亂祇

如居士打露柱一下作麼生鯨吞海水盡露出珊瑚枝

兩箇八文爲十六從頭數過猶不足掣來亂撒向階前滿地團團苔蘚綠白雲端

賊偷賊物太希奇好手還他夥伴知今日併賊齊捉獲得便宜是落便宜保寧勇

不畏傾湫倒嶽來軒轅寶鏡有高臺得牛還馬兩無負一任時流胡亂猜磬山修

仰山因歸潯山省覲潯問子旣稱善知識怎辨得諸方來者知有不知有有師承無師承是義學是玄學子試說看師曰慧寂有驗處但見僧來便豎起拂子問伊諸方還說者箇不說又曰者箇且置諸方老宿意作麼生潯嘆曰此是從上宗門中牙爪

紫雲端云潯山無事生事爲憐三歲子仰山承虛接響弄醜出乖俱未免遭人怪笑當時衆中若有箇漢見伊舉拂便好近前奪却大聲一喝而去潯山父子雖有通身牙爪亦當倒退三千里

仰山到巖頭頭舉起拂子師展坐具頭拈拂子擲背後師將坐具搭肩而出頭曰我不肯汝放祇肯汝收

一豎一展一放一收仰山弄險過似巖頭不是隨風回棹棹幾乎翻却釣魚舟斷橋倫

仰山坐次有僧問和尚還識字否師曰隨分僧乃右旋一帀曰是什麼字師於地上書箇十字僧又左旋一帀曰是什麼字師改十字作卍字僧畫一圓相兩手拓如修羅擎日月勢曰是什麼字師乃畫圓相圍却卍字僧乃作樓至勢師曰如是如是此是諸佛之所護念汝亦如是吾亦如是善自護持其僧禮拜騰空而去

報恩秀云仰山十字注也注了說也說破更要後面許多粥飯氣作麼當時待問師識字否何不道自來文寡看他又且如何 笑巖寶云大小仰山泥水不分待者僧作樓至勢劈脊便打云者野狐精何故如此不見道是真難掩是僞不昌

道環之虛未盈空印之手未形妙運天輪地軸密羅

武緯文經放開捏聚獨立同行機發玄樞兮青天激電眼合紫光兮白日見星天童覺

坐斷乾坤正眼明傾湫倒嶽不曾驚從來浩蕩康衢路那怕行人夜扣門理安問

仰山一日坐次一僧來問訊了向東邊叉手而立以目視師師垂左足僧過西邊叉手立師垂右足僧向中間叉手立師雙足收坐僧禮拜師曰老僧自住此未曾打著一人拈拄杖便打僧騰空而去法林音云好一棒可惜太遲生

草舍蕭蕭寄白雲故人遠訪意慙慙寒暄禮節皆通罷難免杯茶且奉君南叟茂

子晉吹笙和鳳鳴萼花雲外舞衣輕相將奏徧諸方曲玉樹流光滿紫青覺海清

左看成賊右看成魔覲面看來較不多拄杖不知何處落西天夜夜隔秋河三峰藏

仰山問僧近離甚處曰南方師拈拄杖曰彼中還說者箇麼曰不說師曰不說者箇還說那箇麼曰不說師曰參堂去僧便去師復召大德僧應諾師

曰近前來僧近前師便打

雲門偃云仰山若無後語爭識得人

仰山因梵僧來參師於地上畫半月相僧近前添作一圓相以脚抹却師展兩手僧拂袖便去

寂子偶逢穿耳客曾將半月似伊家僧添半月翻然去却道親逢小釋迦本覺一

仰山問僧汝是甚處人曰幽州師曰汝還思彼處否曰常思師曰能思是心所思是境彼中樓臺林苑人馬駢闐汝返思底還有許多般也無曰某甲到者裏總不見有師曰汝解猶在心信位即得人位未在曰除却者箇別更有意也無師曰別有別無即不堪也曰到者裏作麼生即是師曰據汝所解祇得一立得坐披衣向後自看

無外而容無礙而冲門牆岸關鎖重重酒常酣而臥客飯雖飽而顏農突出虛空兮風搏妙翅躡翻滄海兮雷送游龍天童覺

凡聖總無別路岐返思思底幾人知春風不到桃源洞葉落花開自有時慈受深

五月大雨建方丈六月大熱請和尚行也坐也汗通身恨殺當年學模樣覺淚盛

眼裏山河不見有翻著甌毖露雙肘春日尋芳泗水濱放歌花下顛村酒樓之玉

仰山問僧甚處來曰幽州師曰我恰要箇幽州信幽州米作麼價曰某甲無端從它市橋上過蹋折它橋梁

保寧勇云放你三十棒 寶掌白云大小仰山龍頭蛇尾者僧便是崩倒了幽州城八十里寶掌拄杖也未肯放伊過在

仰山問僧近離甚處曰廬山師曰曾到五老峰麼曰不曾到師曰闍黎不曾遊山

雲門偃云此語皆慈悲之故有落草之談 滄山秀云今人盡道慈悲之故有落草之談祇知捉月不知水深忽若雲門當時謹慎唇吻未審後人若爲話會黃龍新云雲門仰山祇有受璧之心且無割城之意殊不知被者僧一時領過黃龍今日更作死馬醫乃拈拂子度與僧僧擬接龍便打 滄山詰云仰山

可謂光前絕後雲門雖然提綱挈要鉗錘天下稱僧  
怎奈無風起浪諸人還識者僧麼他親從廬山來

黃龍震云仰山已是失却鼻孔雲門更下註腳有什  
麼教處我卽不然近離甚處廬山曾到五老峰麼不  
曾到祇向道別甌炊香飯供養此人 天童覺云雲  
門雖然識得仰山底裏爭奈祇知其一不知其二且  
道仰山意作麼生無限風流傭賣弄免人指點好郎  
君

出艸入艸誰解尋討白雲重重紅日杲杲左顧無瑕  
右盼已老君不見寒山子行太早十年歸不得忘却  
來時道翠峰顯

出艸何如入艸時全身入艸爲慈悲仰山垂手隨他  
去直至如今在路岐本覺一

欲識廬山五老峰箇中何地不相逢舌頭無骨隨人  
轉熨斗煎茶鑊不同慈受深

仰山因有官人來師問官居何位曰推官師豎起  
拂子曰還推得者箇麼

理安問云險 資福玉云盡謂官人只解推官忘却

自己殊不知仰山被者俗漢驗徹骨髓 三昧真云  
官人何不云有勞和尙動用看仰山又作何伎倆

仰山夏末問訊瀉山瀉曰子在下面作何所務師  
曰慧寂在下面鋤得一片畚下得一籬粟瀉曰子  
今夏不虛過師却問未審和尙一夏之中作何所  
務瀉曰日中一食夜後一寢師曰和尙今夏亦不  
虛過道了乃吐舌瀉曰寂子何得自傷己命

瀉山詰云仰山眼照四天下到大圓面前却向淨地  
喫交大圓可謂養子之緣不免挂後人唇齒 東林  
顯云今時師僧千百成羣經冬過夏虛消歲月深屈  
古人東林不是檢點先聖仰山逞俊太過吐舌祇得  
一半 天童覺云少當努力老合歇心者一夏總不  
虛過爲什麼仰山道了吐舌若檢點得出禍不入悞  
家之門 天寶樞云瀉山施鳩毒於樽俎之間仰山  
揮戈矛於笑談之頃還會麼兩箇駝子相逢著如今  
世上無直人 徑山琇云鋤一片畚種一籬粟款出  
囚人口日中一食夜後一寢兔子不離窠瀉仰父子  
纔相見便要打口鼓直饒說得天雨四花地搖六震



怎如一默好

翁翁年德兩俱尊家有詩書富可倫飽食慙眠無箇事却來敲盤弄兒孫別山智

開得一片畝種得一籬粟回頭閒一望山青水又綠終日祇一餐夜後祇一宿困來伸脚眠千足與萬足相將八月九月來籬邊爛熳鋪黃菊西禪帶

開得一片田種得一籬粟卞和三獻楚王玉設若不遇別寶人至今猶在荊門哭午間一齋早晨一粥斷絃須是鸞膠續陽春白雪有知音山自青兮水自綠辛菴集

酒闌人欲罷休更弄筇篻公子揮鞭去徒含此夜愁恨亭挺

仰山攜拄杖行次僧問和尚手中是什麼師拈向背後曰見麼僧無語

天童悟代僧撫掌云今日識得和尚

仰山同陸侍御入僧堂公乃問如許多師僧爲復是喫粥飯僧爲復是參禪僧師曰亦不是喫粥飯僧亦不是參禪僧曰在此作什麼師曰侍御自問

取它

法林音代云勘破了也

來問威風頗不減幾多龍象在雲堂栴檀林裏曾無襍造次凡流豈易量本覺一

仰山指雪獅子謂衆曰還有過得此色者麼

雲門偃云當時好便與推倒 翠峰頤云雲門祇解推倒不解扶起 瑯琊覺云即今問汝諸人推倒扶起相去多少乃拈拄杖云拶過眉毛鼻孔呵呵大笑遂擲下 淨慈昌云推倒也錯扶起也錯還有過得此色者麼 南堂欲云雲門推倒翠峰扶起直饒過得此色也未是金毛獅子 報恩秀云一則推倒一則扶起在他宗異派不道不得若洞上宗風須知有正倒時便起正起時便倒底時節然後起倒同時起倒不立更買婢鞋行脚三十年 古南門云三箇老漢雖則因事長智總未踢著向上關楬子如何是向上關楬子曰出後一場懣懣 雪竇正云者一隊漢總被雪獅子轉法林音云即今也不少 一倒一起雪庭獅子憤於犯而懷仁勇於爲而見義

清光照眼似迷家明白轉身還墮位衲僧家了無寄  
同死同生何彼何此暖信破梅兮春到寒枝涼鷗脫  
葉兮秋澹潦水天重覺

去歲嶺南梅似雪今年冀北雪如梅紛紛暖閣人爭  
賞誰惜天香點綠苔益然濟

仰山因僧問法身還解說法也無師曰我說不得  
別有一人說得曰說得底人在甚處師乃推出枕  
子瀉山聞乃曰寂子用劍刃上事

徑山杲云瀉山憐兒不覺醜仰山推出枕子已是漏  
逗更著箇名字喚作劍刃上事誤他學語之流便恁  
麼承虛接響流通將去妙喜雖則借水獻花要且理  
無曲斷卽今莫有旁不肯底出來我要問你推出枕  
子還當得法身說法也無 天童華云若是劍刃上  
事寂子何曾會用或有問法身還解說法也無亦向  
道我說不得說得底人在什麼處但云三生六十劫  
靈隱岳云瀉山一期逞俊不知失却一隻眼有問  
治父法身還解說法也無便攔胸一踢踢倒教伊起  
來作箇灑灑落落底漢 天寧琦云者僧問法身說

法蹉過也不知仰山推出枕子又何曾見慣大小瀉  
山將錯就錯配作劍刃上事縛作一束秤上稱來八  
兩半斤殊無輕重若也當時纔問法身還解說法也  
無便驟步歸方丈豈不是出格宗師免致天下衲僧  
貶割 仰山欽云法身說法已於問處流通推出枕  
子也祇箇信受奉行瀉山老漢雖曰列段分科若是  
正文敢道不知落處

法身說法肉眼看物大智如愚大辯如訥拈起簸箕  
別處春推出枕子露眠牀劍刃上事放毫光 月堂昌  
眼底藏身人不見瞋睡漢來發一箭從茲徧地是吹  
毛不觸不犯分半院雲 林輅

仰山問陸郎中承聞郎中看經得悟是否曰是弟  
子因看涅槃經不斷煩惱而入涅槃得箇入處師  
豎拂子曰祇如者箇作麼生入曰入之一字也不  
用得師曰入之一字不爲郎中陸便起去

清涼欽云且道入之一字爲什麼人又云郎中且莫  
煩惱 翠峰顯於舉拂處別云拂子到某甲手裏也  
又別後語云我將謂你是箇俗漢

生死涅槃翻手覆手正眼豁開二俱非有獨步大方  
塵塵正受片片亂飄巖上梅條條縱舞溪邊柳

石門聽

仰山因劉侍御問了心之旨可得聞手師曰若欲  
了心無心可了無了之心是名真了

口朝鼻孔無空過眼蓋胡鬚有古風信彩骨頭花十  
八等閒擲出滿盆紅或菴體

仰山因瀉山問涅槃經四十卷幾卷是佛說幾卷  
是魔說師曰總是魔說瀉休去師隨後曰某甲適  
來拙抵對和尚猶疊石峰頭艸瀉曰許汝眼正

江天銓云瀉山休去是肯伊不肯伊許汝眼正是肯  
伊不肯伊明眼衲子切莫圖圖吞棗

仰山埽地次瀉山問塵非埽得空不自生如何是  
塵非埽得師以埽帚埽地一下瀉曰作麼生是空  
不自生師以手指自身又指瀉瀉曰塵非埽得空  
不自生離此二途又作麼生師又將埽帚埽地一  
下又指自身却指瀉山

全提妙用體元彰父子家聲滿大唐空手一雙拈禿  
帚却從夜半放毫光弘鼎教

仰山因韋宙就瀉山請一伽陀瀉曰覲面相呈猶  
是鈍漢豈況形於紙墨韋乃就師請師於紙上畫  
一圓相注曰思而知之落第二頭不思而知落第  
三首

威音消息本無踪寂寂寥寥煙雨中幾度看來山色  
裏半沉滄海半懸空弘鼎教

仰山因瀉山問忽有人問你你作麼生抵對師曰  
東寺師叔若在某甲不致寂寥瀉曰放你一箇不  
抵對罪師曰生之與殺祇在一言瀉曰不負汝見  
別有人不肯師曰阿誰瀉指露柱曰是者箇師曰  
道什麼瀉曰道什麼師曰白鼠推遷銀臺不變

天童傑云仰山好語只是語上偏枯靈隱即不然徑  
山師叔若在靈隱不致寂寥何故聞蜀同風

仰山問東寺借一路過那邊得否寺曰大凡沙門  
不可祇一路也別更有麼師良久寺却問借一路  
過那邊得否師曰大凡沙門不可祇一路也別更  
有麼寺曰祇有此師曰大唐天子決定姓金

法林音云你看者兩箇艸裏漢放著官路不肯走一

人開口了合不得一人合口了開不得今日若總放過難瞞識者料簡若不放過又道棒頭無眼雖然就中一人較些子若簡得出許伊具參方眼

良久分明陷虎機更騎賊馬抽金箭長安大道入荒通至尊豈定含元殿聞風咸謂小釋迦翻轉由來夜叉面還菴體

仰山因僧問如何是祖師意師於空畫<sup>佛</sup>相示之秋月團團珠玉珊珊當面拋擲初未嘗怪可憐醉夢不能醒一顆圓明空自寒二隱語

仰山問潞山大用現前請師辨白潞下座歸方丈師隨入潞問子適來問甚麼話師再舉潞曰還記得吾答語否師曰記得潞曰你試學看師珍重出去潞曰錯師曰閒師弟來莫道某甲無語

是卽全是非卽全非大用現前攜手同歸不知猶自涉離微松源岳

問處分明答處親縱橫有路憤翻身相如奪得連城壁秦主安然致太平木菴永

仰山將順寂時在東平數僧侍立次師示以偈曰

一二二三子平日復仰視兩口無一舌此是吾宗旨

一二二三子<sup>④</sup>字清風起<sup>⑤</sup>來勘不破<sup>⑥</sup>乃爭綱紀龍潭演四

平日復仰視兒孫還有異未辨箇端倪出門俱失利兩口無一舌止止不須說西天僧到來烏龜喚作鼈此是吾宗旨揚聲囉囉哩鏡智出三生吹到大風止一對黃鸝上下飛相呼相喚日斜暉可憐巧語爲誰訴贏得春工展化機法林音

鄧州香巖智閒禪師<sup>潞山</sup>神嗣一日芟除艸木偶拋瓦

礫擊竹作聲忽然省悟述頌曰一擊忘所知更不假修持動容揚古路不墮悄然機處處無踪跡聲色外威儀諸方達道者咸言上上機

粥飯隨緣養病軀本無迷悟可關渠無端擊著菴前竹直至如今在半途承天宗

放下身心如弊帚拈來瓦礫是黃金驀然一下打得著大地山河一法沉九峰昇

香巖頌去年貧未是貧今年貧始是貧去年貧猶

有卓錫之地今年貧錫也無

寶峰文云去年富未是富今年富始是富去年富惟有一領黑黻布衫今年添得一領百衲袈裟歲朝抖擻呈禪衆實謂風流出當家 天寧琦云香巖貧未是貧奈何猶有箇渾身真淨富不是富家私未免俱呈露鳳山者裏不說富不說貧隨家豐儉沒疎親豎拂子云收來兎角長三尺放去龜毛重九斤

無地無錫未是貧知無尚有守無身儂家近日貧來甚不見當初貧底人 鴈山元

年去年來貧復貧祖師擡脚重千斤愁人莫向愁人說說向愁人愁殺人 松源岳

香巖因仰山見日和尙讚嘆師弟發明大事試說

看師舉擊竹頌仰曰此是夙昔記持有正悟別說看師舉去年貧頌仰曰如來禪許你會祖師禪未

夢見在師曰我有一機瞋目視伊若人不曾別喚

沙彌仰乃對瀉山曰閒師弟會得祖師禪也

報慈遂云且道如來禪與祖師禪是分不分 長慶

棲云一時坐却 瑯琊覺云武帝求僊不得僊王喬

端坐却昇天 瀉山詰云香巖可謂上無片瓦下無

卓錫淨裸裸赤灑灑莫可把若不是仰山幾手放過何故不得雪霜力焉知松柏操 徑山杲云瀉山晚年好則劇教得一棚肉傀儡直是可愛那裏是可愛處面面相看手脚動怎知語話是他人 天寧琦云師兄師弟去年今年論甚道說甚禪總是掉棒打月掘地討天禪禪也無妙也無玄莫把封皮當信傳焚却詩書搥碎琴雲岑拌老髮霜侵無端舊友重相識脫賺山前人異心雪奇靜

香巖初開堂瀉山送書并拄杖至師接得便哭蒼

天蒼天僧曰和尙爲甚麼如此師曰祇爲春行秋

令

天井新云得人一半還人一馬檢點將來也是死而

不弔 法忍謚云瀉山杖子千里同風者僧送到對

面千里且道諸譌在甚麼處甜瓜徹蒂甜苦瓠連根

苦 天目律云珊瑚枕上兩行淚半是思君半恨君

風穴喜云者僧爲瀉山送拄杖兵隨印轉香巖接

得便哭將遂符行且道春行秋令意旨如何咄

接得被哭蒼天不言絕後與光前春行秋令人難會  
蹋破艸鞋腳底穿正覺逸

曾作錢塘弄潮手入流全不用浮囊壯年忘却兒時  
戲慈母倚門空斷腸幻寄庵

香巖示衆若論此事如人上樹口銜樹枝脚不蹋  
枝手不攀枝樹下忽有人問如何是祖師西來意  
不對它又違它問若對它又喪身失命當恁麼  
時作麼生即得時有虎頭招上座出衆曰樹上即  
不問未上樹請和尚道師乃呵呵大笑

翠峰顯云樹上道即易樹下道却難老僧上樹去也  
致將一問來 翠巖芝云問者對者俱不免喪身失  
命如今衲僧作麼生 徑山杲云吞得栗棘蓬透過

金剛圈看者般說話也是泗州人見大聖 大滄果  
云香巖慈悲之故有落艸之談雖然未免弄巧成拙

鼓山珪云香巖大似蕭何制律 天童覺云虎頭

上座是箇惡賊用無義手打不防家直饒本色作家  
往往做手脚不辦雪寶是別機宜識休咎漢到者裏  
也祇得藏身露影還會香巖做處麼三千劍客今何

在獨許莊周見太平 天寧琦云大小香巖曲設方

便虎頭上座未辨端倪若論激揚此事三生六十劫

天寧樞云上樹未上樹鐵蛇橫古路覲面笑呵呵

苦瓜連銀苦 南堂欲云香巖用盡神通不消虎頭

一拶便乃四棱蹋地翠峰縱有生機也扶他不起

理安問云香巖前不構邨後不迭店不得虎頭上座

幾乎無出身路

曲設多方老古錐那堪枝上更生枝好如良馬窺鞭

影逐塊且非獅子兒保寧勇

狹路轉身難東西盡是山行人不到處風定落花閒

上方益

故園春色在枝頭惱亂春風卒未休無事晚來江上

望三三兩兩釣魚舟天童華

一回拈起一攢眉上樹何如未上時誰在畫樓明月

夜倒拈玉管向風吹笑隱新

全提三尺殺人刀千里聞風鬼亦號沒興有人輕犯

著饒伊得命也無毛中峰本

好倚青松看碧溪刺桐毛竹望凰樓花時知已傷離



別莫把相思樹下啼海舟愁

上樹何如未上樹平如鏡面利如鋒由基剛鬚機前  
鏃肝膽高懸奪日紅龍池珍

一聲簫管玉珊瑚透體風流不等閒僊子引來庭下  
步十分清韻逼人寒雪奇靜

樹頭昨夜雨滂沛眼裏耳裏渾溼透忙忙手脚費拍  
牽柳絲零亂還依舊燕剪鶯梭織不成青山一幅羣  
鷄鬬唳挂向虛空直是難構靈巖儲

曉天雲靜濃霜白千峰萬峰鎖寒色驪龍失珠知不  
知無限平人遺點額平陽晝

謫言寐語好支離惑亂人來知幾時當日苟無青白  
眼崑崙也要失雙眉鐵舟海

驪龍奮迅海門時徑寸反成按劍疑南海崑崙相奪  
去依然烟艸自離離法林音二

笑日含春舞絳裙愁腸片片共誰論五陵惹得王孫  
醉白日一天星斗分

香巖因僧問如何是道師曰枯木裏龍吟曰如何  
是道中人師曰髑髏裏眼睛僧後問石霜如何是

枯木裏龍吟霜曰猶帶喜在曰如何是髑髏裏眼  
睛霜曰猶帶識在又問曹山枯木裏龍吟山曰血  
脈不斷問髑髏裏眼睛山曰乾不盡曰未審還有  
得聞者麼山曰盡大地未有一箇不聞曰未審龍  
吟是何章句山曰也不知是何章句聞者皆喪

玄沙備別初語云龍吟枯木 神鼎諶云石霜一向  
打撲向真界裏作活計又舉曹山語畢云恁麼會取  
好 昭覺勤云念不異心不差圓融五位君臣跳過  
無明三毒便可以向枯木上生花寒巖中吹律看龜  
三箇老宿一人透語滲漏一人透情滲漏一人透見  
滲漏若善參詳便可玄關獨步還委悉麼莫守寒巖  
異艸青坐斷白雲機不妙 徑山杲云諸人還揀得  
出麼若揀不出妙喜不惜眉毛爲諸人說破香巖透  
語滲漏被語言縛殺石霜透情滲漏被情識使殺曹  
山透見滲漏被見聞覺知惑殺分明說了具眼者辨  
天寧琦云妙喜老人全身坐在三種滲漏裏却不  
被三種滲漏所拘雖然要見古人直是遠在爲什麼  
吟無事教壞人家男女 天童覺云王居門裏臣不

出門 報恩秀云天童能以無量法門作一句說有時一字法門海墨書而不盡還識天童安家樂業處麼獨鶴有時常伴水好雲無事不離山

枯木龍吟真見道髑髏無識眼初明喜識盡時消息盡當人那辨濁中清曹山寂

香嚴獨脚頌曰子啐母啄子覺母藏子母俱亡應緣不錯同道唱和妙曰獨脚

雲門信云子啐母啄即且從子覺母藏向那裏討子母俱亡應緣不錯子母既亡阿那箇應緣不錯且道憑箇甚麼道理

獨脚香嚴鎖萬重重錦繡白雲封箇中子母元無命啐啄之機也太靈雲門信

以一重兮破一重平田淺艸易相逢忽然突出千峰頂土曠人稀絕所逢惟有立沙知此意患盲患瘡又兼聖朝宗忍

七竅鑿開混沌死九鳥射盡乾坤黑藕絲牽倒五須彌鍼眼放出搏空翻啐啄機誰委悉獨脚香嚴解雙趂趂破萬重金鎖關依舊穿靴水上立天笠珍

三更三點夜方深形影相忘在枕衾賸得趙州牀一脚鍾期何處覓知音豁堂

宗鑑法林卷四十

宗鑑法林卷四十一

集雲堂 編

大鑒下五世

杭州徑山洪譚禪師諡山僧問奄息如灰時如何師曰猶是時人功幹曰幹後如何師曰畊人田不種曰畢竟如何師曰禾熟不登場

天童華云鳳閣香沉雪巢夜冷半窗明月和氣鬪然正與麼時且道歸宗與徑山還有相見分也無見與不見且置祇如者僧與麼問還具眼麼苟或未然雲藏無縫襖鳥宿不萌枝

打鼓弄琵琶相逢兩會家九年人不識幾度過流沙保寧茂

靈苗不是興家物瑞紳翻爲喪國徵何似老農忘帝

力閒行鼓腹樂餘生顯吉祥

洪謔因僧問如何是長師曰十聖不能量曰如何是短師曰蠅螟眼裏著不滿其僧不肯便去舉似石霜霜曰祇爲太近實頭僧問如何是長霜曰不屈曲曰如何是短霜曰雙陸盤中不喝彩

撥艸瞻風問客程徒勞跋涉聽虛聲兩途看取盤中彩百尺竿頭縱步行弘鼎教

滁州定山神英禪師潯山因樺樹省問不落數量

請師道師提起數珠曰是落不落曰圓珠三竅時人知有請師圓前話師便打樹拂袖使出師曰三十年後提臂大哭去在樹住後示衆曰老僧三十年前被定山熱瞞一上不同小小

翠峰顯云定山用卽用怎奈險樺樹知卽知要且未具擇法眼 古南門云盡道樺樹被定山瞞殊不知定山被樺樹引得牽筋動骨諸人還辨得麼如辨不得莫待三十年祇今也須提胸大哭一上且道古南又具什麼眼

神英一日見首座洗衣遂問作什麼座提起衣師

曰洗底是甚衣座曰福州使鐵錢師乃令維那移下座元挂搭

千年古柏插青天一度春歸翠欲妍不礙行人來往道翻雲覆雨綠庭煙翠菴鼎

襄州延慶法端禪師潯山僧問蚯蚓斬爲兩斷兩

頭俱動佛性在那一頭師展兩手

洞山价別云卽今問底在阿那一頭 笑巖寶別云

但呼闍黎僧若應諾却云端的在阿那一頭 慧雲

盛別和聲便打

京兆米和尚潯山問僧近離甚處曰藥山師曰藥

山老子近日如何曰大似一片頑石師曰得恁麼

鄭重曰也無你提掇處師曰非但藥山米和亦恁

麼僧近前顧視而立師曰看看頑石動也僧使出

翠峰顯云米和也縱奪可觀爭奈死而不弔 昭覺

勤云翠峰細處細如米末冷處冷似冰霜要且祇見

錐頭利若據蔣山見處處祇者米和趁得老鼠打破油

甕 天童華云者僧豈不是具眼底耐藥山一片

頑石到處賣弄苟非米和深辨端倪幾遭惑亂

米和好塊頑石多少遊人不識及乎衲僧一見不免  
將南作北瀾山結

米和因還鄉老宿問月落斷井索時人喚作蛇未  
審七師見佛喚作甚麼師曰若有佛見卽同衆生  
宿曰千年桃核

法眼於若有佛見處別云此是甚麼時節 問法燈  
別云喚底不是 節巖琇云多時不見果然年老成  
精米和出門去學得一巴掌禪此時爲什麼不展開  
來用

米和令僧去問仰山今時人還假悟否山曰悟卽  
不無爭奈落在第二頭師深肯之

投子青云仰山與麼道還免得自己不落麼若免得  
更有一人大不肯在若免不得亦落第二頭米和雖  
然肯他自己還有出身之路也無若檢點得出二人  
瓦解冰消不然且莫造次 勸潭清云門庭施設米  
和深肯仰山入理深談第一頭猶未悟在 天童華  
云米和提本分鉗錘仰山展劍刃上事二老於唱教  
門中足可稱尊若是衲僧門下總是喫棒底漢

碧岫峰頭借問人指山窮處未安身雖然免得重行  
令爭似靈苗不犯春投子青

第二頭邊悟破迷快須撒手捨筌罟功兮未盡成聯  
拇智名難知覺噬臍免老冰盤秋露泣烏寒玉樹晚  
風淒持來大仰辨真假痕玷渾無貴白圭天童覺

悟人千個道無憂肯信遭他第二頭寂寞山花寒食  
後夕陽西去水東流龍門遠

當恨家山不得歸歸來猶與故人違翻思四海優游  
日何處封疆非帝畿果如真

米和因僧問自古上賢還達真正理麼師曰達曰  
祇如真正理作麼生達師曰當時霍光賣假銀城  
與單于契書是什麼人做曰某甲直得杜口無言  
師曰平地教人作保

昭覺勤云米和是大善知識 徑山杲舉至契書是  
什麼人做處云徑山當時若作者僧下一轉語塞却  
者老漢口且道下甚麼語良久云若教容易得便作  
等閒看

手裏絲綸卷復舒扁舟接撥洞庭湖忽然惡浪翻空

立收拾歸來一伎無月坡明

福州九峰慈慧禪師

鴻山祐嗣

因鴻山上堂汝等諸人

祇得大機不得大用師便抽身出去鴻召師師更

不回顧鴻曰此子堪爲法器

保福展云依稀似曲失後忘前 蠡山季云九峰抽

身出去是大用不是大用鴻山道此子堪爲法器是

賞伊是罰伊

元康禪師

鴻山祐嗣

因訪石樓樓纔見便收足坐師曰

得與麼威儀周足樓曰你適來見箇什麼師曰無

端被人領過樓曰須是與麼始爲真見師曰苦哉

賺却幾人來樓便起身師曰見則見矣動則不動

樓曰盡力道不出定也師撫掌三下

南泉願云天下人斷者兩個漢是非不得若斷得與

他同參

與奪縱橫氣象全就中同路不同躡獅兒不食鷄殘

物肯爲區區戀吐涎主峰法

蘄州三角山法遇菴主

鴻山祐嗣

因荒亂魁帥入山執

刃而問和尚有甚財寶師曰僧家之寶非君所宜

曰是何寶師振威一喝魁不悟以刃加之

龍唐柱云渠魁大似瞎眼波斯焉能辨得真實三角

不善深藏未逢別者輒爾開拳二俱有咎當時待道

是何寶好與云折脚鎗品字竈無底鉢孟斷鼻舡

若用得著一任將去使渠知我稍僧風味放下夜叉

心突起菩薩面也未可知

菴僧真實濟兇人一喝分明出差珍莫道賊魁非別

者當頭雪刃用來親天目禮

福州雙峰禪師

鴻山祐嗣

因仰山問近日見處如何師

曰據某甲見處無一法可當情仰曰汝解猶在境

師曰某甲祇如此師兄又作麼生仰曰你豈無能

知無一法可當情者鴻山問曰寂子已後疑殺天

下人去在

鴻山詰云前箭猶輕後箭深無限平人被陸沉 東

禪嶽云解弄不須霜刃劍能彈何必玉絃絲

寂子雙峰論見處直教聞者轉疑深相逢未肯三分

語那得全拋一片心本覺一

襄州常侍王敬初

見鴻山祐

視事次米和尚至公舉筆

示之米曰還判得虛空否公擲筆入宅米致疑明日憑鼓山供養主人探其意米亦隨至潛在屏蔽間偵伺主就席乃問曰昨日米和尚有甚麼言句便不相見公曰師子咬人韓獹逐塊米聞此語即省前謬乃遽出朗笑曰我會也我會也公曰試道看米曰請常侍舉公豎起隻箸米曰者野狐精公曰者漢徹也

瀉山詰云米和尚雖然如是且祇得一概常侍云者漢徹也大似看樓打樓大瀉則不然常侍雖是個俗漢筆下有生殺之權米和尚是一方知識且出他圈圍不得常侍待他擲下筆但向道我從來疑著者漢瀉山問云常侍可謂鐵眼銅睛不但令米和尚致疑亦可疑殺天下人雖然當時也艸艸放過待道者野狐精復抽身便行何故要教伊疑個徹底賓主機先有路通筆端不是判虛空筋頭再運回天力千聖齊教立下風癡絕沖機輪活脫走珠盤妙處都盧在筆端豎起依然還放下靈鋒寶劍倚天寒 偈溪間

常侍與臨濟至僧堂乃問者一堂師僧還看經也無濟曰不看經公曰還習禪也無曰不習禪公曰經又不看禪又不習究竟作什麼曰總教成佛作祖去公曰金屑雖貴落眼成翳濟曰將謂你是箇俗漢

投子同別云官人何得貴耳賤目 鏡清怱代云北來拋輒引玉 瀉山詰云王常侍可謂儒門君子禪門良匠若非智鑑精明爭得是非穎脫 白雲端云臨濟端的祇具一隻眼圓通即不然金屑雖貴落眼成翳我將謂你是個俗漢大眾試斷看 徑山杲云臨濟氣宇如王握金剛王寶劍橫行海內等閒遇著者官人瓦解冰消 天寧琦云臨濟吹毛劍甚處去也若也拈出有什麼常侍自出洞來無敵手得饒人處且饒人 理安問云二老相見明如果日寬若太虛一挨一拶全彰本地風光若不是怎麼人怎說得怎麼話者裏還有識得者一堂師僧者麼水不洗水金不博金橫身當宇宙誰是個般人 世出世間希有事顯露須憑過量人祇將補衲調羹



手撥轉如來正法輪徑山泉

一著高一著一步闊一步明  
眼人前猶涉露布鳳樓  
不在梧桐樹松源岳

事到無心不苟欺烏玄鶴白  
尙懷疑自非親見黃頭  
老爭敢逢人泄漏機座堂愚

常侍參睦州一日州問來何遲  
公曰看馬打毬所

以來遲州曰人打毬馬打毬  
公曰人打毬曰人困

麼公曰困曰馬困麼公曰困曰  
露柱困麼公茫然

歸私第中夜忽有省明日見州  
曰某會得昨日事

也州曰露柱困麼公曰困州遂肯之

看人騎馬打毬子不覺今朝入院  
遲官路雪殘春正

好江梅著意要題詩懶菴

### 大鑑下六世

袁州仰山西塔光穆禪師仰山寂嗣  
因僧問如何是西

來意師曰汝無佛性

官馬從來無所禁南陌溪西任所馳  
沿山百里皆傳

驛處處輕花靚馬蹄顯吉祥

晉州霍山景通禪師仰山寂嗣  
初參仰山山閉目坐師

翻起右足曰如是如是西天二十八祖亦如是中華六祖亦如是和尚亦如是景通亦如是山起來打四藤條因此自稱集雲峰下四藤條天下大禪佛

翠峰顯云仰山藤條未到折因甚祇與四下須是個斬釘截鐵漢始得 翠巖芝云此四藤條亦不得作賞會亦不得作罰會如今作麼生會 昭覺勤云師資會合親芥投鍼一期借路經過不免遞相鈍置翠峰道藤條未到折因甚祇打四下胡餅裏討甚麼汁又云須是斬釘截鐵漢始得大似隨邪逐惡 平陽恣云你要知者四藤條落處麼一藤條打他西天二十八祖亦如是一藤條打他東土六祖亦如是一藤條打他和尙亦如是一藤條打他某甲亦如是諸仁者還肯山僧恁麼判斷也無若肯不惟埋沒仰山何處有他大禪佛若不肯怎奈團圓吞棗者裏也須是截鐵斬釘漢始得

集雲峰下四藤條幾險當時打折腰堪笑後來稱猛將祇知空說霍嫖姚整軒選

竺國支那咸印定更無毫髮可參差眼橫鼻直誼天  
下一頓殘羹永不饑保寧勇

集雲峰下四藤藿打破潼關路一條似鶴似雲天地  
外如龍如鳳在烟霄通仙

強盜遭逢惡抵家賊賊總敗別無他山藤徹骨令甘  
伏翻與渠儂貼面花或花體

景通到霍山自稱集雲峰下四藤條天下大禪佛

參霍山喚維那打鐘著師驟步而去

翠峰顯云者漢雖見機而變怎奈有頭無尾 昭覺

勤云者漢擔却仰山冬瓜印子向人前賣弄若不是  
霍山幾被塗污雖然如是可惜令行一半當時不用

喚維那好與擒住更打四藤條且聽者漢疑三十年

證果興云者兩個漢雷聲浩大雨點全無

當場翹足有來由四下藤條未足齏又向霍山門下

去見機雖足未風流地藏恩

藤條喫了任閒遊未到牢關未肯休打鼓打鐘俱是

令知機識變有誰儔通仙

子陵灘下急如弦摸得黃魚縮項鰻提向市中頻索

價他家不值半文錢佛心才

景通因行者問如何是佛法大意師乃禮拜者曰  
和尚爲甚麼禮俗人師曰汝不見道尊重弟子

黃金打作鑰石筋白玉碾出象牙梳黑漆崑崙多伎  
倆海中拾得夜明珠慈受深

芳艸落花前自倒還自起一等太無端賺殺王大姐

雲海政

袁州仰山南塔光湧禪師仰山寂嗣因僧問曹溪意旨

如何師曰一鎖入寒空

重峰層仞插寒空塔鎖深雲勢莫窮千古松聲來有  
韻萬年溪水去無踪投子青

南塔因歸省仰山山問來作甚麼師曰禮覲和尚

山曰還見和尚麼師曰見山曰和尚何似驢師曰

某甲見和尚亦不似佛山曰不似佛似箇什麼師

曰若有所似與驢何別山大驚曰凡聖兩忘情盡

體露吾以此驗人二十年無決了者子保任之

白巖符云盡謂他父子如空合空似水投水祇是仰

山末上欠驅耕奪食辣手若以山僧看來却是仰山

惡毒何故當途錦穿難智者難忘 □□日云仰山

不合大驚小怪與伊驀頭印定當時待伊道若有所似與驢何別便好震撼喝出漚仰法道不致今日

南塔向火次有僧參師曰一言說盡山河大地僧便問如何是一言師以火箸插向爐邊却收舊處一句稱提萬象分摩竭空自掩重門當初褫子微開眼插箸爐邊當火焚投子青

南塔因僧問文殊七佛之師未審文殊還有師否師曰遇緣卽有曰如何是文殊師師豎起拂子僧曰莫祇者是麼師放下拂子叉手

寶壽方云文殊固有師也祇是無人敢道直饒南塔與麼提持在他七佛之師則得若論文殊之師就是老僧也祇好口挂壁上

南塔嘗因僧問如何是法身寶師曰百舌未休枝上語鳳凰那肯共同棲

松生巖畔鶴停穩鳳出丹山鸞并羣面壁尙虧菴外事淨名何苦太言論投子青

杭州無著文喜禪師仰山寂嗣因參仰山頓了心契令

充典座文殊嘗現於粥鉢上師以攪粥筴便打曰文殊自文殊文喜自文喜文殊乃說偈曰苦瓠連根苦甜瓜徹蒂甜修行三大劫却被老僧嫌

燖迦羅眼頂門開悟了不須師更來打落粥鍋休說偈修行須信禍爲胎象田聊

等閒坐斷萬山巔明月清風歲任眠屋角年來溪水斷漁郎安許到門前子成遂

洪州米嶺和尙徑山垂語曰莫過於此時有僧問

未審是什麼莫過於此師曰不出是其僧後問長慶爲什麼不出是慶曰汝擬喚作什麼

底事何須論此時從前活計頓拋離超然不戀舊窠窟千古仁風立帝基培風澤

福州雙峰古禪師先雙峰到石霜一日辭去霜將拂

門送臨別復召古侍者師回首霜曰擬著卽差是著卽乖不擬不是亦莫作箇會除非知有莫能知之好去好去師應諾卽前邁住後有僧問當時石霜恁麼道未審意旨如何師曰它祇是教我不得是非著

玄覺云且道它會石霜意不會 法林音云何曾夢

見石霜

洛陽公子醉豪華不看青山祇看花松寺若能留得

住老僧那肯惜杯茶紫柏可

### 大鑒下七世

吉州資福如寶禪師西塔穆嗣因陳操尙書來師畫一

圓相操曰弟子與麼來早是不著便何用如此師

於中著一點操曰將謂是南番舶主師便歸方丈

閉却門

翠峰顯云陳操祇具一隻眼 馮山喆云資福雖是

本分爐鞴怎奈陳操是煅了精金要識資福麼等閒

拋一釣驚動碧潭龍 靈巖儲云翠峰恁麼批判肘

臂終不外曲殊不知尙書撥盡白雲爲尋知己資福

打開青嶂善應來機二俱好手未免起模畫樣

團團珠遶玉珊珊馬載驢馱上鐵船分付海山無事

客釣鰲時下一圈攀復云天下衲僧跳不出 翠峰顯

鏡照鏡賊識賊那堪眼裏重添屑君不見仲尼曾參

溫伯雪思嬾融

資福因僧問如何是一塵入正受師作入定勢僧

曰如何是諸塵三昧起師曰汝問阿誰

靈谿昱云山僧則不然如何是一塵入正受舉拳云

者個是拳頭如何是諸塵三昧起便與鷲口築 龍

唐古別前語云汝問阿誰又別後語却作入定勢

資福因僧問古人拈椎豎拂意旨如何師曰古人

與麼那曰拈椎豎拂又作麼生師便喝出

雲門偃云古人是什麼眼目有僧云和尚與麼驢年

會麼門乃召僧云來來僧近前門以拂子鷲口打

髻珠是云者裏則不然古人拈椎豎拂意旨如何向

道頻呼小玉元無事祇要檀郎認得聲者僧若是個

見角知牛底必能別露一斑

資福因鵲湖初開堂乃寄襪樣與湖湖遂書火字

封回師見皺眉久不語鹿苑和尚畫一圓相湖曰

拘尸羅國親行此令

於菟大蟲鱉鼻蛇從來相聚總冤家一山猶自分疆

界吐毒奮牙尾髭髯調卷怡

和雲和雨占洞庭七十二峰激灩生款乃月明漁火

發風微浴浪小舟橫梁菴鼎

鄂州芭蕉慧清禪師南塔

上堂拈拄杖曰你有拄

杖子我與你拄杖子你無拄杖子我奪却你拄杖

子靠拄杖下座

潞山喆云大滙即不然你有拄杖子我奪却你拄杖

子你無拄杖子我與你拄杖子大滙即如是諸人還

用得也未若人用得德山先鋒臨濟後令若也用不

得且還本主 投子青云人無遠慮必有近憂 天

童覺云你有則一切有你無則一切無自是當人與

奪干芭蕉什麼事正恁麼時作麼生是你拄杖子

寶峰文云大衆現錢買賣受人瞞知麼有利無利

不離行市 天童傑云芭蕉老漢將常住物私置艸

簿花破過頭致令後代兒孫同拄杖子節目上更生

節目凌辱宗風徑山乾索索地有也不與無也不奪

爲甚如此拈拄杖卓一卓云一朝罷在手看取令行

時 烏石道云有處與固爲錦上添花無處奪畢竟

作麼生話會良久云來年更有新條在惱亂春風卒

未休 愚菴孟云蒼老漢寬處有餘狹處不足者裏

則不然你有拄杖子雙手提不起你無拄杖子和身  
放不下 神鼎澤云一分銀子買一雙艸屨了無奇

特祇是不許人穿何故法如是故喝一喝 聖可玉

云諸人這知芭蕉用處麼保得他人艸田萬頃難免

自己窮無一錢 鼓山珪云五祖以拄杖子話請益

白雲雲云要會麼多處添些子少處減些子何故神

仙秘訣父子不傳白雲和尚大似一錢爲本萬錢爲

利殊不知如人善博日勝日貧老漢道多處添些子

少處減些子自然到處恰好者漢算法極省工夫你

諸人要會麼乃頌

多添少減休那兌支移折變加三倍平生有子不須

教一回落賺自然會

有無今古兩重關正眼禪人過者難欲通大道長安

路莫聽崑崙說往還投子青

舒無踪卷無跡日午晴空轟霹靂衲子驚迷失路頭

神號鬼哭知何極承天宗

你有更須當面與渠無背後奪將來熹然夜半化龍

去黑雨烏雲裂地雷虛堂愚

南枝向暖北枝寒一種春風有兩般憑仗高樓莫吹笛大家留取倚欄看山曉

十八佳人點翠眉雙雙畫就衣斜披丰姿自是人難見張敞徒勞望紫幃法林音二

有無與奪建宗風凜凜寒光誰與同三級浪高何處去謾將雙劍定雌雄

芭蕉示衆如人行次忽遇前面萬丈深坑背後野火來逼兩畔荊棘叢林若也向前則墮在坑塹若也退後則野火燒身若也轉側則被荊棘林礙當與麼時作麼生免得若也免得合有出身之路若免得則墮身死漢

廣胤標云芭蕉老漢爲你和賊捉敗了也是你諸人皮下還有血麼良久云若是淺行婆定合哭蒼天

芭蕉因僧問賊來須打客來須看忽遇客賊俱不還堪受用也無師曰汝若將去前凶後不吉

資福廣云雙關把住一劍通開若是短販之徒便見冰消瓦解

芭蕉因僧問如何是透法身句師曰一不得問二不得休曰學人不會師曰第三度來與汝相見休問維摩臥病城羅山空自掩光陰流沙欲渡全無難莫聽鶯啼在那林投子青

一不問兮二不休直須識取那鉤頭再三回首來相見急水波心輾繡毬懶菴

芭蕉曰我年二十八到仰山參見南塔見上堂曰汝諸人若是箇漢從阿孃肚裏出便作獅子吼好麼我於言下歇得身心便住五載

承天怡云芭蕉祇知教人作獅子吼殊不知自己吐出許多野狐涎沫至今令人掩鼻永寧鼎云當時會下若有人問恁麼舉遂出衆云和尚者般行脚喫水也須防噎

大鑒下八世

吉州資福貞遂禪師資福實嗣僧問如何是古佛歌師作此○相示之

一曲兩曲深夜談松風和雨過前山可憐卞玉離荆岫誰是知音却取還投子青



◆ 貶 貶

資福上堂隔江見資福刹竿便回去脚跟下好與三十棒況過江來時有僧纔出師曰不堪共語雲中走馬花千樹水底魚行路一句貶上眉毛飛過了且看百丈玉光騰龍華祥

鄂州芭蕉山繼微禪師芭蕉清嗣僧問有一人不捨生

死不證涅槃師還提攜也無師曰不提攜曰爲甚麼不提攜師曰老僧纔知好惡

天童覺云芭蕉雖然識好惡且不能驅畊夫之牛奪饑人之食如今有問長蘆便和聲打爲甚如此從來不識好惡 洞山瑩云芭蕉雖識好惡大似醉後添杯要活者僧不得天童不識好惡是則驅畊奪食雖活者僧未免傷鋒犯手若有問新豐但向道利劍不斬死漢他若是個衲僧管取別有生涯 百歲兒童出戶來滿身紅爛惹塵埃火中閒步清涼地識者無因敢近擡投子青

鄂州芭蕉山圓禪師芭蕉清嗣上堂三千大千世界夜

來被老僧都合成一塊輾向須彌頂上帝釋大怒拈得撲成粉碎諸上座還覺頭痛也無良久曰莫

不識痛癢好珍重

秋深處處醉芙蓉幾處西垂幾處東不必更教風雨妒高原滿徑落花紅頌吉祥

宗鑑法林卷四十一

宗鑑法林卷四十二

集雲堂 編

大鑒下三世

荊州天□道悟禪師嗣法存疑參石頭問離却定慧以

何法示人頭曰我者裏無奴婢離箇甚麼師曰如何明得曰汝還操得虛空麼師曰恁麼則不從今日去也曰未審汝早晚從那邊來師曰道悟不是那邊人曰我早知汝來處也師曰師何以賊誣於人曰汝身現在師曰雖然如是畢竟如何示於後人曰汝道誰是後人師乃頓悟

徑山杲云悟得箇什麼 明因懷云石頭當時待他道恁麼則不從今日去也何不劈頭一棒免得從那

邊者邊前人後人處繞葛藤不了 古航舟云雲無  
心以出岫鳥倦飛而知還爭得恁麼三番四覆脚跟  
歷落始得穩當石頭路滑門前高峻原是肯諾不全  
若是他家兒孫依係彷彿佛法不到今日

天□悟因龍潭信未出家時居寺側賣餅爲業日  
以十餅供師師受之每留一餅與信曰惠汝以蔭  
兒孫信曰是某將來何故返以遺我師曰是汝將  
來復汝何答信因有省遂投出家

將去將來事不差龍潭固問勿交加後來多少爭唇  
吻春鳥喃喃罵落花汾陽昭

南嶽山頭見石頭便歸古岸狎沙鷗謾分胡餅爲香  
餌引得金龍上直鉤佛國白

持來送去揅團團覆蔭兒孫義不寒何似當時休壁  
破團圓留與後人看無準範

合浦明珠合浦收驪龍乍影鏡光浮不因霧攫雲飛  
起怎見長川灌百流俱亭挺

故鄉原不隔天涯上得船來便到家試揭孤蓬聊一  
望青山依舊白雲遮紫琿峴

### 大鑒下四世

澧州龍潭崇信禪師天□一日問悟某自到來不

蒙指示心要悟曰自汝到來吾未嘗不指示心要  
師曰何處指示悟曰汝擎茶來吾爲汝接汝行食  
來吾爲汝受汝和南時吾便低頭何處不指示汝  
心要師低頭悟曰見則直下便見擬思卽差師當  
下開悟便問如何保任悟曰任性逍遙隨緣放曠  
但盡凡情別無聖解

笑嚴實云龍潭恁麼問天□恁麼答若實會得凡聖  
祇有虛名迷悟皆爲臆語若不會不可瞎驢趁大隊  
南山寶云大小天□尋常斬釘截鐵被個漢一拶  
便乃平高就下若論心要猶隔津在

脫白投師貴苦辛擎茶問訊盡躬親無端再敘三年  
事笑倒街頭賣餅人白雲端

輕如柳絮重如山指出分明俯仰間拽脫布衫風裏  
颺鑿砵作息不知閒三峰藏

榮寵羈身旅夢賒禁闌鶯喚便思家鳴珂寶馬歸來  
日二月春山盡是花蔗菴範

花艸縈紆水蔚藍陂塘雲木曉相參阿承家有黃頭  
女徧種柔桑教養蠶恨亭題

龍潭因德山來參直上法堂日久嚮龍潭及乎到  
來潭又不見龍又不現師日子親到龍潭山無語  
翠峰顯云將錯就錯 雲峰悅云大小德山向齋瓮  
裏淹殺 黃龍心云翠峰與麼道爲是德山將錯就  
錯龍潭將錯就錯識休咎底必知去處未過關者亦  
宜辨取還委悉麼縱饒栽種得不是棟梁材 東山  
演云龍潭可謂騎賊馬趕賊 天童悟云潭不見龍  
不現因甚又道子親到大似方木逗圓竅那裏是親  
到處 法林音代德山云賺我來賺我來  
浩渺深潭納衆流謾持香餌擲金鈎風雲匝匝雷霆  
動應訝龍王不出頭保寧勇  
親到龍潭不見龍龍潭龍不在潭中青天白日與雲  
雨千古同笑葉翁佛國白  
血盆似口劍如牙竭世樞機未足誇親到龍潭龍不  
現者回失却眼中花心聞貴  
潭不見龍不現親到龍潭須活薦莫學承虛接鬻人

守株待兔亡機變知機變蓋子撲落地碟子成七片  
遜菴演

潭不見龍不現全身已在空王殿夢回忽聽曉鶯啼  
春風落盡桃花片皖山凝

龍潭一夕因德山侍立次師曰更深何不去山  
珍重使出却回曰外面黑師點紙鐙度與山擬接  
師復吹滅山大悟便禮拜師日子見箇甚麼山曰  
從今日去更不疑天下老和尚舌頭也至來日師  
陞座曰可中有箇漢牙如劍樹口似血盆一棒打  
不回頭它時向孤峰頂上立吾道去在山將疏鈔  
堆法堂前舉火炬曰窮諸玄辯若一毫置於太虛  
竭世樞機似一滴投於巨壑遂焚之

明暗相凌不足云絲毫有解未爲親紙燈忽滅眼睛  
出打破大唐無一人白雲端

一時瀑布巖前落半夜金烏掌上明大開口來張意  
氣與誰天下共橫行保寧勇

明暗相形事渺茫誰知腦後迸神光都來劃斷千差  
路南北東西遠本鄉大洪遂

明暗分時光定動火光滅處見來由龍潭截斷辭源  
後佛祖孤峰罵未休照覺總

一陣旋風霧靄開千峰突出碧崔嵬驚猿怨鶴拋來  
久半夜山前喚得回上方益

龍潭霧起老龍吟嚇殺南山白額蟲不觸波瀾擎鰲  
鼻嶄然頭角氣如虹南堂靜

百結欄衫破幘頭年年落第出神州却因一隻穿楊  
箭臨老來封馬上侯蘿月瑩

開口不見齒伸手不見掌夜半忽相逢葛藤長萬丈  
雪菴瑾

親到龍潭已暗投夜深誰共御街遊紙燈吹滅狼烟  
息坐斷中原四百州天目禮

驚剗相逢不再三纔開臭口見鄉談紙燈滅去饒端  
的不許蒼龍臥碧潭補翁話

### 大鑒下五世

鼎州德山宣鑒禪師龍潭信嗣示衆今夜不答話問話

者三十棒時有僧出禮拜師便打僧曰某甲話也  
未問和尚因甚麼打師曰汝是甚麼人曰新羅人

師曰未跨船舷好與三十棒

法眼益云大小德山話作兩橛 德山密云大小德

山龍頭蛇尾 翠峰顯云此二老宿雖善裁長補短

舍重從輕要見德山老漢亦未可在殊不知德山握

閫外之威權有當斷不斷不招其亂底劍還識新羅

僧麼祇是撞露柱底瞎漢 芭蕉徹云作死馬醫

瑯琊覺云德山何似履春冰雖然如是如貓弄鼠

翠巖芝云時人盡道德山作家用得好若與麼會還

曾夢見麼山僧道德山被者僧一推直得瓦解冰消

雖然如是今時覓一個尊宿也大難得 滄山詰云

德山大似清平世界鎗甲磨槍者僧不惜性命身挨

白刃法眼道話作兩橛大似藥病相治圓明道龍頭

蛇尾也是金鎗不辨翠峰道撞露柱底瞎漢截斷衆

流如今還有人爲新羅僧作主者麼出來與大滄相

見乃豎拂云去去西天路迢迢千萬餘 五祖演云

山僧與德山相見去也待道今夜不答話問話者三

十棒但向道某甲話也不問棒也不喫你道還契他

德山麼到者裏須是個人始得 黃龍清云雖則翠

峰高提劍令坐斷寰區祇解瞻前不能顧後者僧堂  
堂出來什麼處是撞著露柱處還有人辨得麼若也  
辨得不惟與新羅僧雪屈亦見當人眼目分明若辨  
不出非惟新羅僧撞著露柱盡大地衲僧個個出來  
撞著露柱 南堂靜云德山老人寂寂惺惺法眼圓  
明精精靈靈六韜三略武緯文經新羅衲子有丙無  
丁 丹霞淳云盡道者僧纔出德山便打末後却道  
未跨船舷好與三十棒是話作兩橛處是龍頭蛇尾  
處若與麼會大似盲人摸象非惟不曾夢見德山自  
已亦乃未具參學眼在殊不知德山韜略雙全文武  
兼備放開則大野風行把住則碧天星落然則貪扶  
正宗步步登高仔細觀來一向祇顧他非不能自省  
已過者僧當時若是個作家直饒德山通身是手眼  
也須放下拄杖子豈不見道大丈夫捋虎鬚未爲分  
外者僧既無奪驪龍珠之手段致使德山令行一半  
如今衆中莫有爲新羅僧雪屈者麼便請掀倒禪牀  
喝散大衆丹霞者裏不學德山倚勢欺人却分半院  
與之住因甚如此深嗟季運一將難求若無實說異

獸藏頭角靈禽惜羽毛 昭覺勤云德山大似金輪  
聖主寰中獨據四方八表無不順從等閒布一敕施  
一令直得艸偃風行若不是者僧怎見殺活擒縱威  
權自在法眼圓明翠峰雖則直指單提各能扶豎德  
山要且祇扶得末後句未扶得最初句且作麼生是  
德山最初句大鵬欲展摩霄翅誰顧奔騰六合雲  
護國元云忒煞倚勢欺人山僧見處也要諸人共知  
者僧當時若是個漢待他道你是甚處人便與掀倒  
禪牀撩起便行直饒德山牙如劍樹口似血盆也須  
倒退三千里何故識法者懼 淨慈一云者僧赤肉  
挨他底白刃也不易抵當當時若是個漢待他道今  
夜不答話問話者三十棒便與掀倒禪牀喝散大衆  
奪德山棒倒行正令去直饒德山全機也須倒退三  
千里 浮山□云德山門下艸偃風行其奈法眼圓  
明猶不放過翠峰雖則縱奪可觀抑揚有準要見二  
老宿亦未可拈拄杖畫一畫云到江吳地盡隔岸越  
山多 雲居莊云諸方祇能扶強不能扶弱徑山今  
夜要斷不平牙如劍樹口似磔盤還他德山老漢若

是辨衲僧眼猶欠悟在者僧當時纔出直云某甲今夜不同話祇與和尚相見他若行棒便與接住一推非惟坐斷德山且竟翠峰檢罰豈不是個俊快衲僧拈拄杖卓一卓云鶴有九臯難翥翼馬無千里謾追風 大巍倫云我若作新羅僧見德山纔開口呵呵大笑便出 大慈瓊云德山老漢被者僧暗地裏把條斷貫索穿却鼻孔了也還委悉麼山僧不是扶弱鋤強也要指諸人個入處卓拄杖云月黑霜濃毛骨冷鶴翹千尺一聲鴉喝一喝 東塔烹云德山干將在握殺活自由怎奈一席兩令未見好手若是長溪見者僧出禮拜便歸方丈不惟使者僧結舌有分且免得彼此遞相鈍置 遜菴定云德山布漫天鐵網將謂無敢展翅撞著個新羅鷄子一翅衝破且道那裏是他衝破處檢點得出不妨與者僧喝彩檢點不出切忌孤負德山好

德山自得任公手一綫分明下兩鉤透網金鱗纔弄水岸邊還把釣絲收佛印元

烟塵掃蕩將軍令正敕流行宣德音公子祇知歌既

醉夜深還被活生擒實峰照

橫按莫耶居閬外當鋒誰敢犯重圍堪笑新羅個衲

子全機破敵也光輝晏古佛

高提祖印定寰中孰敢當機問吉凶不是新羅者衲

子爭教千古振清風大渴詰

大治烹金忽雷驚春草木秀發光輝日新不費纖毫

力擒下天麒麟全威殺活得自在千古照耀同冰輪

話作兩橛句中眼活龍頭蛇尾以指喻指撞著露柱

瞎衲僧塞斷咽喉無出氣擬議尋思隔萬山吉獠舌

頭三千里圓悟勦

風沙刮地塞雲愁平坦交鋒晚未休白骨又沾新戰

血青天猶列舊旄頭海舟慈

門庭施設若爲高善識兵機有是刀即使青霄鷄子

過不勞拔箭見飛毛幻有傳

堂堂華夏不歸降猶戀新羅水一方謾謂德嶠拄杖

短更添腦後一重光鏡堂清

德山到滄山挾複子上法堂從西過東從東過西

顧視曰有麼有麼滄坐殊不顧盼師曰無無便出



至門首乃曰雖然如是也不得艸艸遂具威儀再入纔跨門提起坐具曰和尚爲擬取拂子師便喝拂袖而出爲至晚間今日新到在麼首座曰當時背却法堂著艸屨出去也爲曰此子以後向孤峰頂上盤結艸菴呵佛罵祖去在

翠峰顯於兩出處云勘破了也於呵佛罵祖去在處云雪上加霜 五祖戒云德山大似作賊人心虛大瀉也是賊過後張弓 昭覺勸云翠峰兩處俱道勘破且道是勘破德山是勘破瀉山 徑山杲云二尊宿恁麼相見每人失却一隻眼 城山洽云二尊宿一出入各各胸藏韜略力舉千鈞多少鹵莽底盡謂大瀉不及德山有什麼交涉祇如大瀉末後恁麼道是何意旨澤廣藏山龜能伏豹

一勘破二勘破雪上加霜曾嶮墮飛騎將軍入虜庭再得完全能幾個急走過莫放過孤峰頂上艸裏坐明覺顯

偷營斫砦入中軍應是機謀已十分袖裏金鎗猶未動山前飛騎去紛紛上方盆

大用不拘今古規模倒拈蝎尾平捋虎鬚若非深辨端倪何以坐觀成敗俊處脫穎囊雖高來卷舒方外孤峰頂上浪滔天正令當行百雜碎咄圓悟勸騎虎頭把虎尾霹靂一聲驚萬里坐觀成敗老將軍腦後一椎誰敢擬擬不擬個個無裨長者子 懶菴需韜略雙全膽氣豪當頭不怕陣雲高排關自謂塞旗手未免孤峰沒艸巢頭石空

大方獨步左旋右顧金鳥拍翅海波翻鐵網倒挂珊瑚樹橫機莫萬象平沉全殺全活能縱能擒莫嫌老大無筋力談笑之間錦綽深笑隱訢

鐵騎橫連衝不開幾番突入陣門來攬旗奪鼓威風甚腦後誰知帶箭回古帆機

德山凡見僧入門便棒

龍泉鷲云閉門打睡接上上機須還他過量丈夫始得若非德山老漢與麼作略未免旁觀者晒黃金自有黃金價何必和沙賣與人

當機截斷聖凡膝上寒光照雪茫茫宇宙無窮皮下何人有血 普融平

入門棒棰沒商量撈出紅流便斷當不是奴奴情淡  
薄無錢難作好兒郎佛燈珣

皎潔晴空吼怒雷鐵山萬疊盡驚開因思塊雨條風

日安得全提有此來寶葉源

一生俠氣最難平垂老猶堪作宦行不惜黃金曾結

客幾人肝膽論交情蔗菴範

德山一日飯遲拓鉢下堂雪峰作飯頭見便曰者

老漢鐘未鳴鼓未響拓鉢向什麼處去師便低頭

歸方丈峰舉似巖頭頭曰大小德山未會末後句

在師聞令侍者喚頭問汝不肯老僧那頭密啓其

意師乃休去明日陞堂與尋常不同頭至僧堂前

撫掌大笑曰且喜老漢會末後句雖然如是祇得

三年活

明招謙代德山云咄咄沒處去沒處去 翠峰頭云

曾聞說個獨眼龍元來祇有一隻眼殊不知德山是

個無齒大蟲若不是巖頭識破怎得明日與昨日不

同諸人要會末後句麼祇許老胡知不許老胡會

翠巖真云德山巖頭一狀領過雪峰一千五百人善

知識地在 瀉山詰云巖頭大似高崖石裂直得百

里走獸潛踪若非德山度量深明爭得昨日與今日

不同 瀉山果云古今無異路達者共同途透出威

音外須明肘後符那裏是巖頭識破德山處若檢點

得出非但參學眼明亦乃領過雪峰其或縑素不辨

邪正不分路遠夜長休把火大家吹滅暗中行 高

峰妙云佛祖機緣古今公案其中誦譌無出於此或

謂巖頭智過於師故有密啓其意殊不知犯彌天之

咎萬劫遭殃且道利害在什麼處撫掌大笑云侍者

分明記取三十年後有人證明 伏龍長云末後句

德山巖頭雪峰總跳不出乃喝一喝云大丈夫當爲

眞王何以假爲 雲門信云密啓其意壁上貼門神

低頭歸方丈慚惶殺人果與尋常不同毫釐有差天

地懸隔 愚菴孟云一人在高高峰頂立一人在深

深海底行一人山上行船一人巖前走馬直得花飛

錦上月到上林雖然如是禾黍不陽艷競栽桃李春

翻令力畊者半作賣花人 古南門云字經三寫烏

焉成馬若於鐘未鳴鼓未響時會去不惟穿却德山

明招鼻孔亦乃坐斷巖頭雪竇舌頭不然蓋子撲落地碟子成七片要會末後句且緩緩 報恩琇云承虛接響者蹉過德山抑强扶弱者埋沒巖頭山僧老實告報道師勝資强還他德山父子喝一喝云好手中呈好手知音知外有誰知 天章玉云巖頭向百尺竿頭做個失落德山從深深海底倒轉旗槍雪峰祇得坐地看揚州雖然如是祇得三年活德山果三年後示寂多少人向者裏走作擊拂子云誰家別館池塘裏一對鴛鴦畫不成

千尺絲綸直下垂一波纔動萬波隨兒童不慣風濤惡走入蘆花不敢窺真淨文

凜凜風霜憂地寒漁翁擲釣五湖寬錦鱗觸散波心月收拾絲綸上古灘寶峰祥

鼓寂鐘沉托鉢回巖頭一拶吼如雷果然祇得三年活莫是遭他授記來張無盡

末後句會也無德山父子太含糊座中亦有江南客莫向樽前唱鷓鴣天童覺

天生富貴稱雄才織翠華裾擁不開一曲管絃聲未

絕醉扶公子上瑤臺中韓本

紅蓼汀洲一笛風暮雲滅盡水吞空可憐無限深秋意祇在汀鷗冷眼中無見觀

阿娘情性耐奢華家富兒嬌輿轉賒白日畫堂啼復笑不堪歡喜祇堪嗟理安問

破爛袈裟搭半肩出遊無度取人嫌歸來獨掩三更月又被狂風揭艸簾密啓意絕聯緘活得三年豈偶然石雨方

未鳴鍾鼓托盃低頭一棚傀儡紅線牽抽末後句得人愁從空放下黃河閘九曲三灣俱倒流著提珍

寶鴨雙雙引使車都梁旖旎散郊墟癡人低首還思憶走馬紅塵三月初苕溪森

虎爲百獸尊誰敢觸其怒幸有父子情一步一回顧咄末後句不在裏許石湫如

靜裏攜琴上玉壇婆娑月色到闌干清音撥轉西廊去露滴花枝夜正寒大鼎新

德山因僧問如何是佛師曰佛是西天老比丘

佛是西天老比丘星移斗轉水東流茫茫宇宙人無

數戶貫依前百艸頭或菴體

德山因臨濟侍次乃曰今日困濟曰老漢寐語作

麼師便打濟便掀倒禪牀

翠峰顯云二員作者具啐啄同時眼有啐啄同時用  
翠峰擬向饑鷹爪下奪肉餓虎口裏爭餐敢謂二俱  
瞎漢有人辨得天下橫行 雲峰悅云看他二員作  
家一拶一捺略露風規大似把手上高山雖然如是  
未免旁觀者哂誰是旁觀者喝一喝 徑山杲云雲  
峰與麼批判大似普州人徑山若見縛作一束送在  
河裏不見道蚌鵝相持俱落漁人之手 西堂顯云  
然則德山門下艸偃風行爭奈臨濟當機不讓雖然  
如是未出葛藤窠裏 護國元云二老忒煞旁若無  
人真如若見每人與二十棒利害在什麼處有人辨  
得許你親見二老 天寧琦云用盡自己心笑破他  
人口 天童悟云臨濟拽倒禪牀大似不奈船何打  
破屎斗當時若作今時拽倒薰面擲豈不得人一牛  
還人一馬 古南門云二老可謂旁若無人豈料千  
古之下咽喉被翠峰把定還辨得麼若辨不得今日

放一線道乃擊禪牀云長安風月貫今昔那個男兒  
摸壁行

臥龍纔奮迅猛虎便咆哮時人祇見波濤湧不知新  
月出林梢中菴空

西番舶主眼睛赤南海波斯鼻孔麤拌得滿船無價  
寶換他一顆夜明珠千巖長

一般換日偷天手更遇旋嵐偃獄機雷雨一時聊鼓  
動山川艸木斬然非西儀傳

德山因僧來參便閉却門僧打門師問誰曰師子  
師開門僧纔入禮拜師驚頭騎曰者畜生許多時  
向甚麼處去來

見兔放鷹因邪打正脚未跨門直須猛省本菴本

德山垂示我先祖見處即不然者裏無佛無祖達  
磨是老臊胡釋迦是乾矢橛文殊普賢擔屎漢等  
覺妙覺是破執凡夫菩提涅槃是繫驢橛子十二  
分教是鬼神簿是拭瘡疣紙四果三賢十地是守  
古塚鬼自救不了

雲門偃云讚佛讚祖須是德山老人始得 瑯琊覺

云諸方若與麼會入地獄如箭射祇如雲門與麼道也是入地獄如箭射

德山因龍牙問學人仗鎧鄒擬取師頭時如何師引頸近前曰因牙曰頭落也師呵呵大笑牙後到洞山舉前話洞曰德山道什麼曰無語洞曰莫道無語且將德山落底頭呈似老僧看牙方省後師聞曰洞山不識好惡者漢死來多少時救得有甚用處

保福展云龍牙祇知進前不知失步 翠巖芝云龍牙當斷不斷如今作麼生斷 法華舉云莫是德山無機鋒麼爲當別有道理良久云德山引頸龍牙獻劍 東禪觀云龍牙抱劍傷身自招過咎德山爲頭作主幸好機籌忽被洞山暗指不覺尾巴露出

德山上堂問卽有過不問猶乖時有僧出禮拜師便打僧曰某甲纔禮拜因甚便打師曰待汝開口堪作什麼

雲居莊云德山權衡在握殺活臨時者僧久經行陣奮不顧身雖然如是二俱不了 投子青云然禍因

自起傷損他人火發內生燄燔林獸旣險崖弄巧祇可推落洪崖放轉微通却成反遭受屈雖小得便還知德山大錯麼若知得德山粉碎若不知得棒猶少在 百和順云德山縱奪臨時令人可觀祇是猶少機關在當初待道某甲纔禮拜爲什麼便打卽與連棒趁出非惟令者僧脫皮換骨并見德山一宗千古萬古

金輪微動吼乾坤稍逆金軀艸臥身更欲發言來擬問悲風吹盡四絕鄰

一毛頭上禹門開挾海金鱗戲水來三級浪高回首去已知不是化龍才無趣空

德山因一僧相看乃近前作相撲勢師曰與麼無禮合喫山僧手裏棒僧拂袖便行師曰饒你如是也祇得一半僧轉身便喝師打曰須是我打你始得曰諸方有明眼人在師曰天然有眼僧劈開眼曰貓便出師曰黃河三千年一度清

天童華云者僧是透關底漢若非德山本分鉗錘幾乎死在句下祇知道黃河三千年一度清又作麼生

嶺梅殘雪裏雲鬢未梳時 龍池微云者僧雖久經  
行陣到德山面前未免納誠降款德山祇欲坐致太  
平被者僧槍旗一展直得伎倆俱露總未免旁觀者  
哂且道誰是旁觀者若也識得龍池與你三十拄杖  
德山示衆凡名聖號盡屬虛聲殊相劣形皆爲幻  
色汝欲求之得無累乎及其棄之又成大患  
魚行水濁鳥飛毛落張果老蹋碎藥葫蘆支道林放  
去峰前鶴而今所薄者厚未見所厚者薄錯錯衲僧  
鼻孔曾拈却惟一楫

德山因雪峰問從上宗乘學人還有分也無師打  
一棒曰道什麼曰不會明日復上請益師曰我宗  
無語句實無一法與人峰有省

巖頭禪云德山老漢一條脊梁骨硬似鐵雖然如是  
於唱教門中猶較些子 保福展問長慶稜祇如巖  
頭出世有何言教過於德山便與麼道慶云汝不見  
巖頭道如人學射久久自中云中後如何慶云展閣  
黎莫不識痛癢云和尚今日非惟學話慶云展閣黎  
是什麼心行 明招謙云大小長慶錯下名言

此疾懷來沒量時尋醫求卜過多師濃煎一服通神  
散血汗滂流徹四肱保寧勇

是法平等無高下伊余有分必相亞雖無一法輕與  
人棒下龍蛇從變化雲巖因

德山因巖頭初參纔展具師以杖挑却頭拾具搭  
肩上便去參堂師曰不肯子放祇肯子收

動絃別曲葉落知秋不肯子放祇肯子收來年更有  
新條在惱亂春風卒未休 蘧菴演

宗鑑法林卷四十二

宗鑑法林卷四十三

集雲堂 編

大鑒下六世

鄂州巖頭全禪師 德山鑑嗣 一日參德山纔跨門便

問是凡是聖山便喝師禮拜有僧舉似洞山山曰  
若不是禪公大難承當師曰洞山老人不識好惡  
錯下名言我當時一手擡一手掇



翠峰顯云然則德山門下艸偃風行要且不能塞斷天下人山當時纔拜劈脊便打非惟剝絕洞山亦乃把定巖老還會麼李將軍有嘉聲在不得封侯也是閒瑯琊覺云巖頭無人問著不妨奇特纔被洞山腦後一錐便乃冰消瓦解南華曷云岩頭一期展露事不徒然無人讚歎猶較些子纔被洞山稱提直得驚羣駭衆還會麼無滯自然隨勢去有聲多爲不平來昭覺勤云德山據令而行祇得一半洞山通方有眼千里同風巖頭既善據虎頭又能收虎尾大似作家戰將臨陣扣敵七事俱全不妨奇特敢問那裏是一手擡一手搨處謾言侵早起更有夜行人

徑山景云猛虎不識穿窬中身死蛟龍不悟剝削下身亡巖頭雖於虎穿之中自有透脫一路向劍刃上有翻身之機檢點將來猶欠悟在即今莫有爲伊作主者麼出來與妙喜相見良久喝一喝拍一拍云泊合停囚長智教忠光云還知三大老落處麼德山通身放倒洞山帶水挖泥若非巖頭具道方眼有格外機怎顯功高汗馬且作麼生是一手擡一手搨處

殺人刀活人劍 天寧琦云德山具較豬狗手脚巖頭是煨了底精金鷲剗相逢更無回互將他八兩還他半斤洞山雖是作家也祇旁觀有分妙喜費許多氣力作什麼拈拄杖畫一畫云一 南堂欲云家肥生孝子國霸有謀臣翠峰怎麼說得道理好歸依佛法僧 報恩秀云諸方盡謂巖頭一擡一掬洞山錯下名言殊不知洞山一擡一掬更甚雖然巖頭擡掬洞山賺出洞山擡弱萬松說破忽有箇出來禮拜萬松却放過不打何也爲伊皮下無血 博山來云問不在意裏答預於機先進得德山門破得巖頭句灼然兩彩一賽洞山雖是善因而招惡果又安知巖頭二爲文隱即三爲文三、題作一示始得

平川走兔放蒼鷹一掬便啗雙眼睛毒手奪來人買去奈何斤兩未分明 保寧勇

一喝驚天動地雷海翻太華洞然開巖頭膽喪魂飛也謾道當時手掬擡疎山如

好手呈機不露鋒慣將雙劍定雌雄忽雷迸出驚天地華嶽三峰倒卓空蕩堂堂深

挫來機總權柄事有必行之威國有不犯之令賓尚  
奉而主驕君忌諫而臣佞底意嚴頭問德山一擡一  
捺看心行天童覺

掣電之機轟雷之作奔流度刃傾湫倒獄等閒施設  
駭旁觀明月一輪懸碧落雲濤政

嚴頭示衆吾教意猶如塗毒鼓擊一聲遠近聞者  
皆喪時有小嚴上座出問如何是塗毒鼓師兩手  
按膝亞身曰韓信臨朝底

國法無情報爾曹忽生忽殺在吹毛若教韓信得妙  
訣自是深明防漢高南嚴勝

烏藤攪動四溟水蝦蟹魚龍喪膽魂進退觸波遭點  
額那堪踣跳聽雷崩幻奇庭

嚴頭因僧問三界競起時如何師曰坐却著曰未  
審師意如何師曰移取廬山來卽向汝道

徑山杲云嚴頭向萬仞巖頭垂手鑊湯爐炭裏橫身  
蓋爲慈悲之故有落艸之談今日有問三界競起時  
如何祇向道快便難逢未審師意如何移取雲門山  
來卽向汝道 天寧琦云三界競起嚴頭道坐却著

見怪不怪其怪自壞妙喜道快便難逢順水流舟更  
加櫓棹天寧道在什麼處長安甚鬧我國晏然未審  
師意如何待上山斫棒來却向汝道三段不同收歸  
上科 眉山霈云嚴頭雖有殺人刀且無活人劍

嚴頭因僧問古帆未挂是如何師曰後園驢喫艸  
投子青云寒山睡早拾得起遲復頌

雲暗東巖西峯明汀洲南面起簫聲天光睡重和衣  
潤鶯轉高枝柳帶春

槌打不碎火燒不著天上人間何處安泊阿呵呵是  
甚麼莫敲破須爛嚼海印信

後園驢喫艸蘆花輓雪飛霜前雙白鴈孤影落天池  
塗毒策

風信不來春色老却憶後園驢喫艸滿天明月贈行  
人野客溪邊歸路早楚方安

燒痕幽澀路縱橫就我春姿得得行珍影不多天地  
白寒聲如寄雨風鳴雪僧酬

嚴頭因僧問古帆挂後如何師曰小魚吞大魚  
甌峰承云後園驢喫艸小魚吞大魚一語箭鋒相拄

一語天地懸殊有人辨得出許你具一隻眼

小魚吞大魚直路太繁紆古帆休更問處處得逢渠

徑山杲

古帆已挂後小魚吞大魚李廣運神箭張顛解卿書

照堂一

巖頭因僧問浩浩塵中如何辨主師曰銅砂鑼裏

滿盛油

天童傑云巖頭拔貧助富未是作家者裏則不然忽有恁麼問但向道日輪正當午喝一喝 石霜尊云

大小巖頭祇有定亂之謀且無出人之眼若有問山

僧劈脊便棒爲甚如此驀地喚回秋夜夢舉頭惟見

月當空 別峰印云大小巖頭打失鼻孔忽有問保

寧浩浩塵中如何辨主祇對他道天寒不及卸帽

平陽恣云巖頭理上偏枯傑祖事上不足不肖兒孫

隨例看孔著喫今日有人問但云白面郎敲金鐙過

紅妝人揭繡簾看

塵中辨主眼分明特地尋芳更點睛堪笑者婆雖瞋

眩至今南北絕人行佛印元

礎澗天將雨雲開月正明漁翁閒引釣牽動一潭星

海印信

銅砂鑼裏滿盛油正是毗盧印後收更有塵中辨得

主太平將將盡封侯雲溪恭

頂起砂鑼時身心都不見西風一陣來落葉兩三片

塗毒策

村飲夜歸來健到三四五摩挲青莓苔莫瞋驚著汝

息菴觀

百萬雄兵入漢關威如猛虎陣如山單刀直取顏良

首不是亭侯也大難無境微

巖頭因辭德山山曰什麼處去師曰暫辭和尚下

山去日子它後作麼生師曰不忘和尚日子憑何

有此語師曰豈不聞智與師齊滅師半德智過於

師方堪傳授曰如是如是善自護持

天童覺云德山尋常棒下不立佛祖及乎到者時節

復恁麼老婆雖然是養子之緣怎免得後人檢責待

伊道智過於師方堪傳授拽拄杖劈脊便打

巖頭凡有所問祇噓一聲

龍臥碧潭靜雲收浩月圓七星光燦爛誰薦未生前  
大洪遂

巖頭值沙汰於鄂渚湖邊作渡子兩岸各挂一版  
有人過渡敲版一下師曰阿誰曰要過那邊去師  
乃舞棹迎之一日有婆抱一兒乃曰呈撓舞棹即  
不問且道婆手中兒甚處得來師便打婆曰婆生  
七子六箇不遇知音祇者一箇也不消得便拋向  
水中

瑯琊覺云欺敵者亡 大瀉智云巖頭業在其中祇  
得通身泥水婆子雖有丈夫手段也是冢醜外揚  
天奇瑞云綿裏有鍼泥裏有刺婆子不妨奇怪若不  
是巖頭也大難抵對 笑巖寶呵呵笑云者婆子圖  
箇甚麼巖頭當時待他纔拋便好連棒打入水中始  
較些子不見道祇者一箇也不消得 平陽恣云婆  
子下水拖人巖頭逆風把舵檢點將來二俱不了  
寶壽方云瑯琊道欺敵者亡在婆子分中在巖頭分  
中 戒文德云巖頭徧體生涯婆子一貧如洗  
時展家風與衆殊探身虎穴有工夫拈撓擊處留無

計夜靜同誰泛五湖三祖宗

鄂陽江口擲釣絲擺蜆撈蝦不計時薦被老婆相借  
問叢林千古振雄規如今過在邪師客擺手相逢論  
棄兒意在目前如會得莫信傍人說是非佛鑑珣

親兒棄了更無親擦手歸家罷問津呈撓舞棹波中  
客休向江邊覓渡人真如詰二

老來無累亦無因獨寢高堂祇此身除却江中混波  
客復誰還是不羈人

一葉扁舟泛渺茫呈撓舞棹別宮商山雲海月俱拋  
棄贏得莊周蝶夢長無著總

相逢把手上高峰四顧寥寥宇宙空一曲漁歌人不  
會蘆花飛起渡頭風無菴全

從來六箇不知音一箇全拋惡浪深義斷情忘無處  
覓三千刹海冷沉沉天目禮

彼此肝腸盡底傾清波明月兩人心歸去罷浪風平  
君往瀟湘我往秦山夷際

巖頭因德山曰我者裏有兩僧入山住菴多時汝  
去看它怎生師遂將一斧去見兩僧在菴內坐師

乃拈起斧曰道得也一下斧道不得也一下斧二僧殊不顧師擲下斧曰作家作家歸舉似山山曰汝道它如何師曰洞山門下不道全無若是德山門下未夢見在

理安問云巖頭大似金翅劈海直取龍吞二菴主雖則穩坐家堂到者裏也祇得退身三步敢問諸人洞山門下且置作麼生是德山門下事劍去久矣徒勞刻舟 眉山霈云雖然不趁行情家無滯貨不富

巖頭示衆大凡唱教須從無欲中流出三句祇是理論較去較住欲去不去欲住不住或時一向不去或時一向不住

注林音云大凡演教須從無欲中流出三句爰公不妨較些子却乃下箇註脚反屬有欲了也較去較住是情欲欲去不去欲住不住是想欲或時一向不去或時一向不住是無定欲爭得無欲吹餘今從無欲中流出三句舉似諸人切不得錯解背手拽杖歸方丈

三文買箇撈波子擺蜆撈蝦經幾年逆順短長休要

說誰家屋裏竈無烟虛堂愚

巖頭問僧甚處來曰西京來師曰黃巢過後還收得劍麼曰收得師引頸近前曰因曰師頭落也師呵呵大笑僧後到雪峰峰曰甚麼來曰巖頭峰曰巖頭有何言句僧舉前話峰打三十棒趁出

鴻山詰云者僧黃巢過後曾收得劍却向巖頭處施設及至雪峰前鋒銳不露何故爲他巖頭大笑一聲直得天地陡暗四方絕唱若不得雪峰幾乎陸地平沉不見道殺人刀活人劍 承天宗云可惜許者般漢祇學得勝負之法殊不知勝負是生滅之因我當時若見但向他道作家作家教他擔板過一生 寶掌白云者僧既收得劍因何殺活威權總在他人手裏當時待他引頸向前何不道艸賊大敗他若擬議呵呵一笑便出不惟塞斷巖頭咽喉就是雪峰也祇與他平展如今莫有恁麼人麼良久云泊合停囚長智

肘後懸來不是真被他方術誤殘生末梢剖出青囊看自愕甘心就死門眉山霈

鑒曲直心頭祇自詢嬾放大

天童華云巖頭好一拶自不知落處 天童傑云巖

躲避若也檢點得出雖是善因而招惡果又云嚴頭

巖頭一拶虚空迸裂父子不傳神仙妙訣破菴先

覷怎麼這時有僧舉似雪峰峰曰窮鬼子道我快

魯菴遠云巖頭一生作用非雪峰不知其快活雪峰

費盡腕力正眼看來大似雲居道底

且於湖畔撈蝦蜆不向滄溟釣巨鰲一葉扁舟一蓑

笠閒眠閒坐任風濤海印信

野水舟橫芳艸渡人來舞棹或呈橈撈蝦攬玩隨時

過却向何時得六鰲水菴一

鍼作割勢贅遂整衣欲謝妻問作什麼贅曰說不

從一回飲水一回噎女子聞曰誰知盡大地人性

命被廢上座割將去也

在以拂子擊禪床。向此須明上上機。長靈卓

無孔笛子兩頭吹韻出青霄徹九維可憐一對冤家

種人人鼻孔大頭垂僂燈珣

不點自行不撥自轉伎倆天然機輪如箭如今分付

當行家百歲光陰已不多若能直下猛提取天上人

間爭奈何已菴深

幸然無事鼓風濤，激起洪波萬丈高。直得渾家都浸

殺至今平地浪滔滔高峰妙

夜半三更來討火我罵你兮你罵我相喚相呼歸未

歸也有無衣艸裏坐盧堂愚

福州雪峰義存禪師

德山鑑

與巖頭欽山至澧州鰲

山鎮阻雪頭日惟打睡師祇坐禪頭責之令通所



得師一一敘訖頭與一喝曰你不聞道從門入者不是家珍師曰它後如何卽是曰它後若欲播揚大教須一一從自己胷襟流出蓋天蓋地去師於言下大悟便禮拜起曰師兄今日始是鰲山成道說盡平生去住因到頭難遇赤心人忽然自肯成家業瓦礫拈來也是珍枯木成

鰲山成道足人傳莫是從前話未圓賴有玄沙知始末徧身紅爛在漁船龍門遠

孤村陋店雪紛紛平地無風起浪痕醜拙祇因藏不得胸襟流出蓋乾坤鐵山仁二

三回九度太顛預到底須尋舊路還待得鰲山消積雪至今平地起波瀾

隨風逐境探烟霞浪子回頭便作家若道今朝方悟道鰲山依舊在天涯石雨方

雪峰住菴時有兩僧來師以手拓菴門放身出曰是什麼僧亦曰是什麼師低頭歸菴僧辭去師問甚處去曰湖南師曰我有箇同行住湖南附汝一書去書曰某上書師兄某一自鰲山成道後迄至

於今飽不饑僧到巖頭呈書了頭問別有何言句僧舉前話頭曰它道甚麼曰它無語低頭歸菴頭曰噫我當初悔不向伊道末後句若向伊道天下人不奈雪老何僧至夏末請益前話頭曰何不蚤問曰未敢容易頭曰雪峰雖與我同條生不與我同條死要識末後句祇者是

瀉山詰云大小雪峰巖頭却被者僧勘破 泐潭準云且道雪峰是會末後句不會末後句若道會巖頭又道當初悔不向伊道末後句若道不會因甚如今兒孫徧天徧地雖與我同條生不與我同條死末後巖頭雖與劈頭說破未免有些諸譌久參先德一舉便知後學初機莫道不疑好 徑山杲云雪峰低頭歸菴疑殺天下人巖頭道我當初若向伊道天下人不奈雪老何若不同床睡焉知被底穿又道雪峰與我同條生不與我同條死要識末後句祇者是殺人須是殺人刀活人須是活人劍 博山來云莫道無語其聲如雷佛事門中商量不下巖頭寶燄吐華雪峰金鍼露鼻固是難兄難弟若論生死同條待別時

來抹過一著

末後句爲君說明暗雙雙底時節同條生也共相知  
不同條死還殊絕還殊絕黃頭碧眼須甄別南北東  
西歸去來夜深同看千巖雪翠峰顯

末後句無問處萬仞鍊山橫在路當日巖頭不奈何  
至今雪老難伸吐倒捋虎鬚方識虎未解行兒休離  
母透過牢關舉似君把定咽喉淚如雨佛印元

切磋琢磨變態誦謠葛陂化龍之杖陶家居蟄之梭  
同條生兮有數同條死兮無多末後句祇者是風舟  
載月浮秋水天童覺

夜深石女暗拋梭織就雲中五色錦攤向街頭人不  
知却教收卷和雲枕沖默開

高山流水調雖稀怎奈知音有子期欲識同條末後  
句休將鶴唳當鶯啼梅谷悅

雪峰問僧甚麼處去曰識得卽知去處師曰你是  
了事人亂走作麼曰和尚莫塗汚人好師曰我卽  
不塗汚你古人吹布毛作麼生與我說來看曰殘  
羹餒飯已有人喫了也師休去

雲門偈別雪峰前語云築著便屎臭氣又代後語云  
將謂鑽天鷄子元來祇是死水蝦蟆 翠峰顯出雪  
峰語云一死更不再活

雪峰一日陞座衆集定師輟出木毬立沙遂去捉  
來安於舊處

白雲端云此箇時節衆中皆言子父共作一大事如  
此見解還夢見也未海會今日布施諸人乃云濃研  
香翰深蘸紫毫

天兮寬地兮闊雪峰輟毬幾怛怛一輟直上須彌山  
無量人天眼開豁眼開豁脫却多年臭皮靴步行走  
馬到新羅報道花須連夜發天衣懷

收來輟去事方圓獨許漁郎上釣船明月蘆花同一  
色落霞孤鶩共遙天夢菴信

輟向人前事未休再安舊處有來由一聲斷鴈鳴雲  
漢兩岸瀟瀟蘆荻秋戴無爲

雪峰一日因立沙來三箇木毬一時輟出沙便作  
偈倒勢師曰尋常用幾箇曰三卽一一卽三  
團團輟出沒來由不立名模見便休三一一三重注

脚螺江依舊向東流 圓覺演

山寺裏頭無可作 輾出木毬三兩箇 不惟玄沙遭一  
跌 雪峰老人亦話墮懶菴

雪峰上堂要會此事如明鏡當臺胡來胡現漢來  
漢現玄沙出衆曰忽遇明鏡來時如何師曰胡漢  
俱隱沙曰老和尚脚跟猶未點地在

玄沙別云我即不與麼若有問忽遇明鏡來時如何  
向道百雜碎 明招謙云當與麼時莫道胡漢俱隱  
別作麼生道沙云破招云喪也 瑯琊覺云驗人端  
的處下口便知音 龍池傳云山僧則不然忽遇明  
鏡來時如何但道收起收起若不收起有甚合殺

雪峰一日喚僧近前來僧近前師曰去

雲門偃舉問僧你作麼生道得叉手句你若道得叉  
手句即見雪峰

雪峰與玄沙行次師指面前地曰者一片田地好  
造箇無縫塔沙曰高多少師上下顧視沙曰人天  
福報即不無和尚靈山受記未夢見在師曰你作  
麼生沙曰七尺八尺

瑯琊覺云國清才子貴家富小兒嬌 圓悟勸云要  
神通妙用須參雪峰要田地穩密須參玄沙更有一  
箇不涉二途還委悉麼須彌頂上擊金鐘 寶壽方  
云雪峰放憨玄沙逞俊師勝資強千古一遇熱鬧門  
庭即得若是無縫塔且緩緩

父子同行相將入艸起無縫塔功高策巧帶水拖泥  
漏逗不少雖然落七落八爭奈有道理好佛燈珞  
指出長生地不迷造成無縫塔巍巍大家從此無餘  
事渴飲饑餐且度時 楚菴璇

雪峰上堂南山有一條鱉鼻蛇汝等諸人切須好  
看長慶出口今日堂中大人喪身失命雲門以  
拄杖攢向師前作怕勢有僧舉似玄沙沙曰須是  
稜兄始得雖然如是我即不然曰和尚作麼生沙  
曰用南山作麼

寶峰文云雪峰無大人相然則蛇無頭不行長慶却  
似怕阿家相似便道今日堂中大人喪身失命雲  
門攢拄杖作怕勢爲蛇盡足玄沙用南山作麼道我  
見處親切不免在窠窟裏更無一箇有些子天然氣

槩報寧門下莫有天然氣槩者麼不敢望你別懸慧  
日獨振玄風且向古人鵲吳布衫上知些氣息也難  
得

誦國元云雪峰搖頭雲門擺尾長慶爲蛇畫足  
玄沙一向插業諸人還知者一隊漢落處麼妙舞也  
願誇偏拍三臺須是大家催 高峰妙云雪峰雖慣  
作竊怎奈諸子不善參隨未免一場敗露致令千載  
之下惡聲猶在 報恩秀云萬松當時若作雲門以  
拄杖攬向雪峰懷裏他若擬議隨後教伊自作自受  
親遭一口爲什麼今朝二月二暫放龍臺頭

象骨巖高人不不到者須是弄蛇手稜師備師不奈  
何喪身失命知多少韶陽老重撥艸南北東西無處  
討忽然突出拄杖頭拋對雪峰大張口大張口同閃  
電剔起眉毛還不見如今藏在乳峰前來者一看  
方便高聲喝云看脚下翠峰頭

玄沙太剛長慶少勇南山鰲鼻死無用風雲際會頭  
角生果見韶陽下手弄下手弄激電光中看變動在  
我也能遣能呼於彼也有擒有縱底事如今付阿誰  
冷口傷人不知痛天童覺

放出南山鰲鼻蛇聞風喪命數如麻必奇宗一能擔  
荷終羨韶陽是作家遣去目前生黑霧擒來口內吐  
紅霞半千年外白拈賊今對諸人盡活拏復召云各  
請歸堂穩便笑 巖寶

雪峰示衆飯籬邊坐餓死人無數海水邊坐渴死  
人無數

玄沙備云飯籬裏坐餓死人無數海水沒頭渴死人  
無數 雲門偈云通身是飯通身是水 天童覺云  
我則不然飯籬裏坐服死人無數海水沒頭殺殺人  
無數以前傷乎不吞以後失乎不吐祇如雲門道通  
身是飯通身是水到者裏無你吞吐處又作麼生  
寶壽新云雪峰門下開得口玄沙手裏出得氣也是  
去死十分惟除雲門一關略較些子寶壽又且不然  
饒你通身是飯不消一踢通身是水不消一蹋也是  
平地起風波 伏雲鰲云盡大地是飯盡大地是水  
直饒你吞得下吐得出鰲上座敢云未在何故若是  
鳳凰兒豈向那邊討  
通身是飯通身水饒舌沙彌下口難悟得頓除饒渴

念迷時往往更求餐本覺一

小店梨花酒正香牧童指出幾人嘗任渠點滴不沾口已是渾身臥醉鄉幻寄庭

珍珠瑪瑙滿家園甘向街頭覓幾錢蒸地回頭得受用錦衣玉食賽神仙密菴可

雪峰因僧問緊要處乞指示師曰是什麼僧大悟雲門偃云雪峰向伊道什麼 風日明微云且道雪峰有指示無指示

雪峰騎駿馬雲門跨驢兒一踢一踢相奔驢長安有路非無路夜半行時人不知圖晉勸

無量劫來是箇甚麼觀面全提幾手蹉過不蹉過土苴堆頭且高臥

雪峰陞座召衆曰看看東邊底又曰看看西邊底汝若要會拈拄杖擲下曰向者裏會去

靈巖儲云雪峰古佛剖腹露心將從上來家業盡情分付了也衆中若有克家之子使好一肩擔荷去如無不妨爲伊清理一上東邊底玉樹擎天西邊底綠陰蓋地擲下拄杖四至分明向者裏會都盧一契若

人於此個儘分明正好將三條篾束束肚皮拈一柄

鋤斧子隨處耕種去會麼鏡牛吼處春光滿木馬嘶時夜浦平拄杖不知何處去一雙秋鴈落沙汀

東邊觀了復西觀拄杖重重話歲寒帶雨一枝花落盡不煩公子倚闌干治父川

大雪紛紛下柴米多長價板櫪桌子都燒了嚇得床兒以手斫額云怕南菴依

空林露處見波瀾輕漿誰從掠水還日暮亂雲如宿鳥隨風片片泊廬山童求昱

帝重瞳霸重瞳雲雷交錯要飛龍當陽寶物從天授呬味徒爭汗血功黃河如帶泰山如礪竿頭點處成靈異醵光身裏縱馳驅獨步寰中無忌諱者邊踏著那邊擲絕世風流莫浪傳和翁云

宗鑑法林卷四十三